元白詩箋證稿

陳寅恪集

獨立之精神自由之思想

生活.讀書.新知三聯書店

## 陳寅恪集 元白詩箋證稿

生活·讀書· 新 知

三聯書店

Copyright © 2015 by SDX Joint Publishing Company All Rights Reserved. 本作品版權由生活·讀書·新知三聯書店所有未經許可,不得翻印。

## 圖書在版編目 (CIP) 數據

陳寅恪集.元白詩箋證稿/陳寅恪著.一3 版.一北京:生活·讀書·新知三聯書店,2015.7 ISBN 978-7-108-05410-4

I. ①陳… Ⅱ. ①陳… Ⅲ. ①陳寅恪 (1890 ~ 1969) - 文集 ②唐詩-詩歌研究 Ⅳ. ① C52 ② I207.22

中國版本圖書館 CIP 數據核字 (2015) 第 131971 號

封面所用拓片文字節自一九二九年立於清華大學內 王國維紀念碑碑銘(陳寅恪撰文,林志鈞書丹)

Ē S	早年	開				版	印	經	郵		出版發行	責任印制	版式設計	封扉設計	責任編輯
要	数数	本				次	刷	銷	編		贺行	制制	設計	設計	編輯
二方五千字 氏引 二十四、五		六三五毫米×九六五毫米 十六開	二〇一五年七月北京第七次印刷	二〇一五年七月北京第三版	二〇〇九年九月北京第二版	二○○一年四月北京第一版	鸿博昊天科技有限公司	新華書店	100010	(北京市東城區美術館東街二十二號)	生活·讀書·新知 三聯書店	盧岳	寧成春	陸智昌	孫曉林 潘振平

文。 原據 陳寅恪集十三種十四冊, 授,一九五二年後為中山大學教授。一九五五年後并為中國科學院哲學社會科學學部委員 先後任教於西南聯合大學、 曲 館 及故宮博物院理事等, 蘇黎世大學、法國巴黎高等政治學校和美國哈佛大學。一九二五年受聘清華學校研究院導 陳寅恪(一八九〇——一九六九),江西修水人。早年留學日本及歐美, 叢 九四二年後為教育部聘任教授。 上海古 稿二 詩集(原名陳寅恪詩集附唐賞詩存)和讀書札記一 後任清華大學中文、歷史系合聘教授,兼任中央研究院理事、歷史語言研究所研究員、第一 聯書店 編 籍出版社 隋唐制度淵 九五七年版重印), 出 版。 其後當選為中央研究院院士。一九三七年 源略論稿、 收入了現在所能找到的作者全部著述。其中寒柳堂集、 此次出版以上海古籍版為底本 香港大學、 一九四六年回清華大學任教。 内容基本不變。 唐代政治史述論稿、 廣西大學和燕京大學。一 集(原名陳寅恪讀書札記舊唐書新唐書之部)八九十年代 惟寒 (隋唐制度淵源略論稿、 元白詩箋證稿、 柳堂集增 九四四年被選為英國科學院通訊 一九四八年南遷廣州, 蘆溝橋事變 補了 先後就讀於德國柏林大學、 寒 柳如是別傳 柳堂記夢未定稿 金明館叢 唐代政治史述 後挈全家離北平 t 種, 任嶺 稿 師, 初 八十年代曾 論 編、 南大學教 補) 組 稿二 П 南 院 金明 主 或 瑞士 行 書 任 任

分別 由 清華大學出版社和上海古籍 出 版社 出版, 此次出 版均有增補。 書信集、 讀書札記二 集、 讀 書 札

三集、講義及雜稿四種均為新輯。全書編輯體例如下:

要依據作者手 所收内容, 跡錄  $\exists$ ]發表的均保持發表時 的 原 貌 經作者修改過 的論著, 則採用最後的 修改本。 未 刊 稿 主

校核, 述係針對原版本而來, 一、本集所收已刊、 如二十四史、資治通鑑等。 未刊著述均予校訂, 則引文原貌酌情予以保留。 尚無點校本行世的史籍史料, 凡體例不一或訛脫倒衍文字皆作改正。 以上改動均不出 大多依通行本校核。 校記 引文一 少量作者批 般依現行點校本 論

四、 保留少數異體字。 根據作者生前 凡已刊論文、 引文中 願望, 序跋、 凡為閱讀之便而 全書採用繁體字豎排。 書信等均附初次發表之刊物及時 補 入被略去的内容時 人名、 地名、 間 書名均不加符 未刊文稿盡量注明 補入文字加 號注 寫作 明。 凡 時 屬 般 間 作者說明 用 通 行

性文

字則加( )。原稿不易辨識的文字以□示之。

助。 陳寅恪集的 在此 謹向所有關心、 出 版曾得到季羨林、 支持和參與了此項工作的朋友表示衷心的感謝 周一良、李慎之先生的指點, 並獲得海内外學術文化界人士的熱情 並誠怨地希望廣大讀者 批 評 相

指

Ē

生活・讀書・新知三聯書店二〇〇〇年十二月

書信集 讀書札記三集 讀書札記二集 讀書札記

講義及雜稿

唐代政治史述論稿 隋唐制度淵源略論稿 金明館叢稿二編 元白詩箋證稿 金明館叢稿初編 寒柳堂集

詩集附唐質詩存 柳如是別傳

集



流求、父親陳散原、夫人唐篔、次女小彭、

長嫂黄國巽

左起:陳寅恪、侄封懷、侄媳張夢莊、長女 公園時留影 陳寅恪與家人陪同父親游北平北海 一九三四年春



九三八年初春

懷抱幼女美延,攝於香港羅便臣道



一九四八年春

新林院五二號院內陽臺

手持黃籐手杖.攝於北平清華大學




號寓所院內南草坪全家合影於廣州嶺南大學東南區十 一九五〇年暑假

左起:小彭、寅恪、美延、唐篔、流求

と 能器を因文章と大人と直上して作品 三名夫職傷班放王所 其明被如及此枝和此之你的面美到人是 共同人所通信所見れるのを思える武松五大百風方乃城山五天上 九口等中俱有形宝有工作而機天神作五題在太神唐代前十 · 及且在過了後去 开城越见白《表考》全後怕暴地請成一 同名老板在什么源大考其六 九白 在意其或在學府 五题 在是去: 十五是因發是方成改元七五二十時自送但今即送此問該之 文同等近在我立方方外的紅石至後風之為其推考を河口 原形於けるでは、要を留方後你あるを中時心をはまいた趣下 題於去見多随有時人引首以前五十五五十五五十五五七時得 古我因此重複放之多百万五大五局大量最高好明高直方 也与五一年大李小屋等理走五九年五不度收回公司 むお教行の風いなかるとの時代の魔を教中而言上う羽は 五八日本明十二年前也数層之和の年刻を伸出 如此在後華名近代明於人社由意深陷直江致北京是人會工 此白風雅多作學處其州原理當時之事以數像代之人后都 也之之是在直轉數方官重是法改造正立、監工學正立 之不在多樓と見る中的老備長 國立中六研究院歷史語言研究所楊紙


收入「元白詩箋證稿」第五章「元白新樂府」初稿,後經修改、



一九五〇年嶺南大學出版 綫裝本 「元白詩箋證稿」封面



綫裝本「元白詩箋證稿」扉頁



所寫批語

讀唐人小説「鶯鶯傳」時,陳寅恪

元白

唐質題寫

華田	立	<u></u> F	法曲	七	第五章		第四章	第三章	第二章	第一章	
華原磬	部伎 五五	二王後 海漫漫 五〇	<b>囲</b>	七德舞 三四	新樂府	附:讀鶯鶯傳	<b>豔詩及悼亡詩</b>	連昌宮詞	琵琶引四六	長恨歌	

Ħ

次

驪宮高	縛戎人	驃國樂	蠻子朝	五絃彈	馴犀:	道州民	城鹽州	昆明春	捕蝗:	司天臺	太行路	新豐折臂翁	朝旋女	上陽(白髮)人	
;		:	:	:		;	÷	;		:	;	臂	į	髮	
		- {	1	•		1			:			羽	•		
			•									5		$\wedge$	
	•	•	:				•	ŝ	:	:		1	•		
				•						•			•		
	:	:	:							•		:			
:	:	:	:			- 1	:			:	•	i	•	:	
-		÷	:	į	i	-	÷	1	i	÷		1	÷	÷	
:	:	•	-	•	1		•		•	÷	•	-	:		
		:	:	:	:		÷		:	•	:		÷	:	
	÷	:	:	:	÷		:		:	:		- 1	:	:	
ì	•			:			:		3	:	- 1		:	:	
	:			÷			:			:			:	:	
					÷			4	:					:	
ě	•		•	٠			•		•	•		-	ě		
į	÷			•	1	-			1	•		-	•	•	
		÷	:	÷		1		į	1	÷		•	÷	÷	
:	÷		3					:	:			:	:	:	
:	:		:		:	:	:	:		:		i	*	:	
:		*	:	i	i	i	:	i	:			:			
	i		:	÷	1	1	:	:		:	1	1	:	:	
	:	:		÷	1	1	:	Ì	1	÷	:	- 1	÷		
	÷	:		÷	:		•	1	÷	÷				:	
	•		1		1		•	ł	1	•		•	è	•	
1	•	:		•		1	i	-	3	•	1.			•	
	•		1	•	1			į		:		ì		:	
:	:		:					:	:				:		
Ş	•		:	•	- 1		•		:	•		į	:	:	
ì	•			÷	- 1	- 1	•		1	•		-	•		
1	i	•		÷		- } -	÷		į	•		1	•	:	
	÷	3		•			÷		÷	÷	÷		÷	÷	
	•	÷		:	÷		:		3	÷			÷	:	
:	:	:	:	:	:	:	:	:	1	:	:	:		:	
:	:	:	:	•	:	:	:	:	:		*	:	:	:	
	二一七		二〇九	•		一九九	一九三	一八九	一八七		·····································		:		
_	_	_	=	::二0七	=	16	_	-	_	-	-	-	_		
=	_		Ò	Ò	0	九	九	八	八	八	八	七七	七四	六七	
-	t	124	九	t	_	九	_	九	t	24	_	t	24	4	

李夫人	時世妝	陰山道	母別子	賣炭翁	繚綾:	杜陵叟	紅線毯	牡丹芳	澗底松	八駿圖	西涼伎	兩朱閣	青石:	百鍊鏡
i	:	:	÷	:		÷	:	:	:	:	:	:	i	:
:	:	:	:	:	:		:	:		:	:		:	:
		3	- 6		- :	÷			1		•	3	:	
:	:	:	:	:		:	:	:	:	:	:	:	:	:
÷	:				:	:	:			•		i		:
:	:			:	:	:	:			:	:		•	
:	:				:	:	:	:	. :	:	:	:	3	•
:	;		:						:	:	:		:	
:		,	:		:	•	:			:	:	:	:	
				÷		-				÷			•	
	•	1	- 1		:	:	:		1	•		•	•	
			:	•		1			1	•	•	3	•	
:	:		;	:		:	:	:	:	:	:	:	:	•
:	:			- 3	:	- 3	:		1	•	:		•	- 1
:	:	:	:		:	:	:	:	:	:	:	:	:	1
:	:	:	:	:	:	:	:	:	:	:	:	- 1		
:	:	:	:	:	:	:	:		:	:	:		:	Ĭ
:	:		:	:	:	:		:		:	:			
	:		:	•	:	1	:	:		:	:	:	:	
			:		:		÷	-	:	÷	:		:	- 8
:	:	1	:	:	:	:	:		:	:	:	:	:	
•	•		:		:				:	:	:	:	:	
:				:	:		•		:	:	:	:	:	- È
:		÷	:		:		3		:	:	:	•	:	
:	:	:	:	:	:	:	÷	:			:		:	:
			:			•	:	:	:	:	:			:
•	:	:	•	:	:		:		:	- 3		i		:
:	:	:		:	:		:	3	:	:	:	:		
				•	9						:	•		:
:	:		:	•		3	:	:	:	:	:	:	.:	:
:	:	:	:	:	:	:	:	:						:
:	:		:		-	:	:	:	:	:	:	:	:	:
:	:	:	:		:	:	:	:	:	:	:	:	:	
:	:	:	:		:					:	:		:	:
•		:	:	:	:	:	:	- 3	:	i	:	:		:
:	:	:			:			:	:	:		:	:	:
		:		•	:	:		:						:
:	•	:	:		:	:	:	: .	:	;	:	:	:	:
	:	:			÷	•			:		:		÷	:
:	:	:	:		:			:	:	:	:	:	:	:
:	:	:	:	;	:	:	:	:	:		:			:
_	_	_	_	_	_	_	=	_	=	=	_	=	$\dot{=}$	=
七	六	六	:二六〇	:二五五	三五一	24	24	29	29	$\equiv$	$\equiv$	_	_	_
::140	…二六七	…二六一	0	五	_	:二四九	:二四七	三四二	:二四〇	:二三九		:二二九	二二二七	二二二六

元白詩箋證稿	<b>[24]</b>
陵園妾	二十四
鹽商婦	
杏爲梁	
井底引銀瓶	銀瓶
官牛	
紫毫筆	
隋堤柳	
草茫茫	
古冢狐	
黑潭龍	
天可度	
秦吉了	O
<b>鵐</b> 九劍	O
采詩官	
第六章 古題樂府	題樂府三〇九

竹校						附論
附交補記	(戊)白樂天與劉夢得之詩三五(	(丁)元和體詩三四H	(丙)論元白詩之分類	(乙)白樂天之思想行爲與佛道關係]三	(甲)白樂天之先祖及後嗣	

白氏長慶集貳捌與元九書云:

及再來長安,又聞有軍使高霞寓者,

欲聘倡妓。 妓大誇曰,

我誦得白學士長恨歌,

豈同他妓

哉!由是增價。

全唐詩第壹陸函白居易壹陸編集拙詩成一 篇長恨有風情。 十首秦吟近正聲。 十五卷因題卷末戲贈元九李二十云: 每被老元偷格律, 苦教短李伏歌行。

世間富貴應無分,

身後文章合有名。莫怪氣粗言語大, 新排十五卷詩成。

寅恪案:自來文人作品,其最能爲他人所欣賞,最能於世間流播者,未必即是其本身所最得意,

最自負自誇者。若夫樂天之長恨歌,則據其自述之語,實係自許以爲壓卷之傑構, 人所極欣賞,且流播最廣之作品。此無怪乎歷千歲之久至於今日,仍熟誦於赤縣神州及鷄林海外 而亦爲當時之

|王公妾婦牛童馬走之口」(元微之白氏長慶集序中語。)也。

雖然,古今中外之人讀此詩者衆矣,其瞭解之程度果何如?「王公妾婦牛童馬走」固不足論,

謂文人學士之倫, 其詮釋此詩形諸著述者, 以寅恪之淺陋, 尚未見有切當之作。 故姑試爲妄說

別進 鄙意以爲欲瞭解此詩,第一,須知當時文體之關係。第二, 須知當時文人之關係。

一新解焉

何謂文體之關係?宋趙彥衛雲麓漫鈔捌云:

怪錄傳奇等皆是也。 唐之舉人,先藉當世顯人以姓名達之主司, 蓋此等文備衆體, 可以見史才, 然後以所業投獻。 詩筆, 議論。 踰數日又投, 至進士則多以詩爲贄。 謂之溫 如

有唐詩數百種行於世者是也。

草一文略言之,題曰韓愈與唐代小說,載哈佛大學亞細亞學報第壹卷第壹期。其要旨以爲古文之 說之作者, 之狀態。然就文章言, 寅恪案:趙氏所述唐代科舉士子風習, 所謂「文起八代之衰」之古文運動, 自貞元以後,尤欲以文治粉飾苟安之政局。 蓋唐代科舉之盛,肇於高宗之時,成於玄宗之代,而極於德宗之世。德宗本爲崇獎文詞之君 實亦即古文運動中之中堅人物是也。此二者相互之關係, 即今日所謂唐代小說者,亦起於貞元元和之世,與古文運動實同一時,而其時最佳小 則其盛況殆不止追及,且可超越貞觀開元之時代。 即發生於此時, 似與此詩絕無關涉。然一考當日史實,則不能不於此注 就政治言,當時藩鎭跋扈, 殊非偶然也。 又中國文學史中別有 自來未有論及之者。 此時之健者有 武夫横恣, 固爲紛亂 寅恪嘗 韓 可注 柳

體, 芒洛冢墓遺文肆編叁安師墓誌云: 以供例證如下。 體之敦煌俗文學及燕山外史式之遊仙窟等, 得如斯之結論者,因見近年所發現唐代小說,如敦煌之俗文學,及日本遺存之遊仙窟等, 之文所以多創造之傑作, 今觀兩誌文因襲雷同公式化之可笑, 又康達墓誌云: 出土之唐代非士族之墓誌等,其著者大致非當時高才文士,(張文成例外。)而其所用以著述之文 駢文固已腐化, 君諱達, 或 諱 乃其時古文家以古文試作小說,而能成功之所致,而古文乃最宜於作小說者也。拙文所以 師, 乃以仰爲幷州刺史, 自(字?)文則, 字文則, 即散文亦極端公式化, 因家河□焉。 河南洛陽人也。 以 而諛墓之金爲應得之報酬也。 河南伊闕人也。 因家洛陽馬。 至若此, 十六代祖西華國君, 皆世所習見,不復具引。茲節錄公式化之墓誌文二通 實不勝敍寫表達人情物態世法人事之職任。 則知非大事創革不可。 夫當時敍寫人生之文衰弊至極, 東漢永平中, 是昌黎河東集中碑誌傳記 遭子仰入侍,

求爲屬

其低級駢

與洛陽

欲事改

第一

章

長

恨

歌

雜無實之說, 答張籍書注, 爲愛好小說之人, 嘗試爲之。 應革去不適描寫人生之已腐化之駢文, 然碑誌傳記爲敍述眞實人事之文, 重答張籍書注, 旣能以俳諧出之,又可資雅俗共賞, 致爲張籍所譏。 及全唐文陸捌肆張籍上韓昌黎書, 觀於文昌遺書退之之事, 二當改用便於創造之非公式化之古文,則其初必須 其體尊嚴, 實深合嘗試且兼備宣傳之條件。 實不合於嘗試之條件。 如唐摭言伍切磋條(參韓昌黎集壹 上韓昌黎第二書。 而小 此韓愈之所以 說 則可爲駁

實之説爲戲也。 人陳之於前以爲歡, 韓文公著毛穎傳, 執事每見其説, 好博簺之戲。張水部以書勸之。其一曰, 此有以累於令德。 亦拊抃呼笑, 其二日, 是撓氣害性, 君子發言舉足, 不得其正 比見執事多尚駁雜無實之説, 不遠於理, 未嘗聞以駁雜無

可知也。

古文同一原起及體製也。唐代舉人之以備具衆體之小說之文求知於主司,即與以古文詩什投獻者 是舉人投獻主司之作品, 是故唐代貞元元和間之小說,乃一種新文體,不獨流行當時,復更輾轉爲後來所則效, 元稹李紳撰鶯鶯傳及歌於貞元時, 但實爲貞元元和間新興之文體。 白居易與陳鴻撰長恨歌及傳於元和時, 此種文體之興起與古文運動有密切關 雖非如 本與 趙氏所言

旣明乎此, 則知陳氏之長恨歌傳與白氏之長恨歌非通常序文與本詩之關係,而爲一不可分離之共

而其特徵則尤在備具衆體也。

點在便於創造,

第一 章 長 恨 歌

敍事之散文言。 同機構。 趙氏所謂「文備衆體」中,「可以見詩筆」(趙氏所謂詩筆係與史才幷舉者。 詩筆即謂詩之筆法,指韻文而言。 其筆字與六朝人之以無韻之文爲筆者不同。 史才指小說 中

之部分,白氏之歌當之。其所謂「可以見史才」「議論」之部分,陳氏之傳當之。後人昧於此義,

多妄說,如沈德潛唐詩別裁捌選長恨歌評云:

迷離恍惚, 不用收結, 此正作法之妙。

又唐宋詩醇漬漬云:

戛然而止,全勢已足,不必另作收束。

初視之,其言似皆甚允當。 結處點清長恨, 爲一詩結穴。 詳繹之, 則白氏此歌乃與傳文爲一體者。其眞正之收結,

即議論與夫

作詩之緣起,乃見於陳氏傳文中。 傳文略云:

者不但感其事, (王)質夫舉酒於樂天前曰,樂天深於詩, 亦欲懲尤物, 室亂階, 垂於將來也。 多於情者也。 歌既成, 試爲歌之如何?樂天因爲長恨歌。 使鴻傳焉。 世所不聞者, 予非

此節諸語正與元氏鶯鶯傳末結束一節所云:

開

元遺民,

不得知。

世所知者,

有玄宗本紀在。

今但傳長恨歌云爾。

元 時人多許張爲善補過者。 (歲九月,執事(?)李公垂宿於予靖安里第,語及於是。公垂卓然稱異, 予嘗於朋會之中, 往往及此意者,使夫知者不爲,爲之者不惑。 遂爲鶯鶯歌以傳 貞

Ŧī.

乙。崔氏小名鶯鶯,公垂以命篇

適相符合。而李氏之鶯鶯歌,其詩最後數語亦爲:

詩中報郎含隱語。 郎知暗到花深處。 三五月明當户時, 與郎相見花間語。 (語字從董解元西

廂

本,

他本作路。

歌以長恨結, 謂之會眞歌。 然則鶯鶯歌雖不似長恨歌之迷離恍惚,但亦不用所謂收結者,其故何耶?蓋鶯鶯傳旣可謂之會眞 而其體裁實無一不合。 (見拙著讀鶯鶯傳,載歷史語言研究所集刊第拾本第壹分。今附於第四章後。)故鶯鶯歌亦] 鶯鶯歌以「與郎相見」即會眞結,(會眞之義與遇仙同, 正復相同。 至於二詩之眞正收結, 蓋二者同爲具備衆體之小說中之歌詩部分也。 則又各在其傳文之中也。 說詳拙著讀鶯鶯傳。) 二詩作者不同, 後世評長恨歌者 與長恨 價值

更取韓退之小說作品觀之, 所引二例, 於此全未明瞭, 宜乎其贊美樂天, (詳見拙著韓愈與唐代小說, 載哈佛亞細亞學報第壹卷第壹期。 而不得其道矣。

)如昌

黎集貳壹石鼎聯句序及詩,

詩 二子(侯喜劉師服。 不然, )因起謝 章不可以不成也。 日, 尊師(軒轅彌明。 又謂劉 )非世人也, 日, 把筆來, 其伏矣, 吾與汝就之。 願爲弟子, 即又唱出四十字 不 敢 更論

即當時流行具備衆體之小說文也。其序略云:

書訖便讀。

讀畢,

謂二子曰,

章不已就乎。

二子齊應曰,

就矣。

寅恪案:此八句四十字,即石鼎聯句之末段。 其詞云:

全勝瑚璉貴, 空有口傳名。 豈比俎豆古, 不爲手所撥。 磨礱去圭角,浸潤著光精。 願君莫嘲

天長恨歌之「此恨綿綿」, 此篇結句「此物」二字,即「石鼎」之代稱。 此物方施行。 皆以結局之詞義爲全篇之題名, 亦正與李公垂之鶯鶯歌, 結構全同。於此可以知當時此種文章之 即會眞歌之「與郞相見」,白樂

體制, 而不妄事評贊矣。 復次, 洪氏韓公年譜云:

之甚。且言彌明形貌聲音之陋, 或謂軒轅寓公姓,彌明寓公名, 亦豈公自詞耶?而列仙傳又有彌明傳,要必有是人矣。 蓋以文滑稽耳。是不然, 劉侯雖皆公門人,然不應譏誚如是

朱子考異云:

乃故爲幻語,以資笑謔, 今按此詩句法全類韓公。 即張籍所譏與人爲無實駁雜之說者也。故竊意或者之言近是。 又以亂其事實,使讀者不之覺耳。若列仙傳, 而或者所謂寓公姓名者。 蓋軒轅反切近韓字, 洪氏所疑容貌聲音之陋 則又好事者, 彌字之意又與愈字相 因此序

寅恪案:朱子說甚諦, 其深識當時文章體裁,殊非一般治唐文者所及。 故不嫌駢贅, 幷附於此

而附著之,尤不足以爲據也。

第一 章 長 恨

歌

以資參校。

何謂文人之關係?白氏長慶集貳捌與元九書云:

與足下小通, 則以詩相戒。 小窮, 則以詩相勉。 索居, 則以詩相慰。 同處, 則 以詩 相娱。

人之作詩, 亦各受他一人之影響, 元白二人作詩, 相互之密切關係, 自無待論。如前引全唐詩第壹陸函白居易壹陸編集拙詩成一十 此數語已足以盡之,不必更別引其他事實以爲證明。 然元白二

元九向江陵日, 嘗以拙詩一軸贈行, 自後格變。

五卷因題卷末戲贈元九李二十詩「每被老元偷格律」句樂天自注云::

又「苦敎短李伏歌行」句自注云:

李二十當自負歌行, 近見予樂府五十首, 默然心伏。

蓋白氏長慶集貳和答詩十首序略云:

所奉者二十章, 事,凡二十章, [元和]五年春,微之左轉爲江陵士曹掾。 遽能開足下聰明使之然耶?何立意措辭與足下前時詩, 欲足下在途諷讀。 及足下到江陵, 僕職役不得去,命季弟送行,且奉新詩一軸致於執 寄在路所爲詩十七章, 如此之相遠也。 皆得作者風。

又元氏長慶集貳肆和李校書新題樂府二十首序云: 之,蓋十二而已。 予友李公垂, 

列而和

第一章 長 恨

歌

今白氏長慶集叁肆兩卷所載新樂府五十首,即因公垂微之所詠而作也。其所以使李氏心伏者,

乃

由當時文士各出其所作互事觀摩, 爭求超越,如白氏長慶集貳和答詩十首序云:

旬月來多乞病假, 能自異,異者亦不能強同。 假中稍開, 同者謂之和, 且摘卷中尤者,繼成十章,亦不下三千言。其間所見, 異者謂之答。 同者固

今幷觀同時諸文人具有互相關係之作品, 知其中於措辭(即文體。)則非徒仿效,亦加改進。 於立

所爲,則其間必有啓發,而得以知當時諸文士之各竭其才智,競造勝境, 文學史者,能盡取當時諸文人之作品,考定時間先後,空間離合,而總匯於一書,如史家長編之 意(即意旨。)則非徒沿襲, 亦有增創。 蓋仿效沿襲即所謂同, 改進增創即所謂異。 ,爲不可及也 苟今世之編著

據上所論, 則知白陳之長恨歌及傳,實受李元之鶯鶯歌及傳之影響, 而微之之連昌宮詞,

其間因革演化之跡,顯然可見。茲釋長恨歌,恨歌及傳,實受李元之鶯鶯歌及傳之影響,而

姑就鶯鶯歌及傳與長恨歌

又受白

據鶯鶯傳云:

及傳言之,暫置連昌宮詞不論焉。

陳之長恨歌及傳之影響。

貞元歲九月, 執事(?)李公垂宿於予靖安里第, 語及於是。 公垂卓然稱異, 遂爲鶯鶯歌以傳

之。(此節上已引。

貞元何年, 雖闕不具。但貞元二十一年八月即改元永貞, 是傳文之貞元歲, 決非貞元二十一 年可

知。

又鶯鶯傳有:

後歲餘,崔已委身於人,張亦有所娶。

則據才調集伍微之夢遊春七十韻云:

夢何足云, 良時事婚娶。

當年二紀初,

佳節三星度。

朝蕣玉佩迎,

高松女蘿附。

韋門正全

盛,出入多歡裕。

韓昌黎集貳肆監察御史元君妻京兆韋氏夫人墓誌銘云:

及白氏長慶集陸壹河南元公墓誌銘(舊唐書壹陸陸元稹傳同。)云: 夫人於[韋]僕射[夏卿]爲季女。愛之,選婿得今御史河南元稹。

稹時始以選校書秘書省中。

(貞元十八年)年二十四,試判入四等,署秘省校書。

是又必在貞元十八年微之婚于韋氏之後(微之時年二紀,即一十四。 自是絕不復知矣。 )而鶯鶯傳復有:

言,則距微之婚期必不甚近。然則貞元二十年乃最可能者也。又據長恨歌傳略云: 仙遊寺, 元和元年冬十二月,太原白樂天自校書郎尉於盩厔。鴻與琅琊王質夫家於是邑, 話及此事。 樂天因爲長恨歌。

暇日相攜遊

0

起, Щ 詩之中,(其詳俟於論連昌宮詞章述之。)使之自成一獨立完整之機構矣。 自誅褒妲。 又宋人論詩, 樂府五十首, 妙之文。若其關於帝王平民(鶯鶯非出高門, 此則長恨歌及傳之作成在鶯鶯歌及傳作成之後。其傳文即相當於鶯鶯傳文, 長恨歌詳寫燕昵之私,不曉文章體裁,造語蠢拙, 及傳中分出別行, 而不足論矣。 詞及會眞等詩, 」之句及自注「元九向江陵日, 脫離備具衆體詩文合併之當日小說體裁,而成一新體,俾史才詩筆議論諸體皆匯集融貫於 一爲生離, 然實亦受樂天新樂府體裁之暗示,而有所摹仿。 實不能脫離傳文而獨立也。至若元微之之連昌宮詞, 一節, 默然心伏。 復次, 如魏泰臨漢隱居詩話,張戒歲寒堂詩話之類,俱推崇杜少陵而貶斥白香山。謂樂天 一爲死別。 是其因襲相同之點也。 爲世人所習誦,久已忘其與傳文本屬一體。然其本身無眞正收結, 及哀江頭「昭陽殿裏第一人,同輦隨君侍君側。 就文章體裁演進之點言之, 之語, 一爲生而負情,一爲死而長恨。其意境宗旨,迥然分別,俱可稱爲超 明白言之。 嘗以拙詩 至其不同之點,不僅文句殊異,乃特在一爲人世, 世之治文學史者可無疑矣。 一軸贈行, 說詳拙著讀鶯鶯傳。)貴賤高下所寫之各殊, · 則長恨歌者,雖從一完整機構之小說, 無禮於君。喜舉老杜北征詩「未聞夏殷 故樂天於「每被老元偷格律, 自後格變。 則雖深受長恨歌之影響, 」「李二十嘗自負歌行, 一節, 此固微之天才學力之所 以爲例證。 歌詞即相當於鶯鶯歌 苦教短李伏歌 然已更進 殊不知長 無作詩緣 即長恨歌 要微末 衰, 近見吾 爲仙

敍寫燕昵之私, 恨歌本爲當時小說文中之歌詩部分,其史才議論已別見於陳鴻傳文之內, 正是言情小說文體所應爾, 而爲元白所擅長者。 (見拙著讀鶯鶯傳。)如魏張之妄 歌中自不涉及。 而詳悉

將來也。 終 此論爲推尊少陵則可, 眞可謂「不曉文章體裁, 而作 自與北征詩不同。 猶慮詩有未詳, 若以此貶樂天則不可。 造語蠢拙。 陳鴻又作長恨歌傳, 若諱馬嵬事實, 」也。又汪立名駁隱居詩話之言(見汪本壹貳。)云: 則長恨二字便無着落矣。 論詩須相題, 所謂不特感其事, 長恨歌本與陳鴻王質夫話楊 亦欲懲尤物, 室亂 階, 妃始

及,不必詳者。 是以陳鴻作傳爲補長恨歌之所未詳,即補充史才議論之部分,則不知此等部分,爲詩中所不應 然則汪氏不解當日小說體裁之爲何物, 猶有強作解事之嫌也。 (見校補記第四則)

歌工

漢皇重色思傾國。 朝選在君王側。 迴眸 御宇多年求不得。 一笑百媚生, 六宮粉黛無顏色。 楊家有女初長成, 養在深閨人未識。 天生麗質難自棄

容齋續筆貳唐詩無諱避條略云:

而發。 唐人歌詩, 杜子美尤多。 而上之人亦不以 其於先世及當時 此下如張祐賦連昌宮等三十篇, 《爲罪。 事, 直詞 如白樂天長恨歌諷 詠寄, 略無隱避。 諫 諸章, 大抵詠開元天寶間事。 至宮禁嬖昵, 元微之連 昌宮詞 非外間所應知者, 始 李義山華 末, 皆爲 清宮等 皆反 明 皇

寅恪案:洪氏之說是也。唐人竟以太眞遺事爲一通常練習詩文之題目,此觀於唐人詩文集即可瞭 但文人賦詠, 本非史家紀述。 故有意無意間逐漸附會修飾, 歷時旣久, 益復曼衍滋繁,

極富興趣之物語小說,

如樂史所編著之太眞外傳是也。

世,遂更延長而優美。然則增加太眞死後天上一段故事之作者,即是白陳諸人,洵爲富於天才之 若依唐代文人作品之時代,一考此種故事之長成, 天上下半段之全部情事。 不及於靈界,其暢述人天生死形魂離合之關係, 如漢武帝李夫人。 雖然, 此節物語之增加, 者, 文思貫澈鈎結如是精妙。 是其明證也。 亦極自然容易, 故人世上半段開宗明義之「漢皇重色思傾國」一句, 似以長恨歌及傳爲創始。此故事旣不限現實之人 特爲標出, 在白歌陳傳之前,故事大抵尙局限於人世,而 即從漢武帝李夫人故事附益之耳。 以供讀者之參考。 寅恪於此, 陳傳所云 已暗啓

**免有金人瑞以八股文法評西廂記之嫌疑,然不敢辭也。(可參新樂府章李夫人篇。)** 

趙與旹賓退錄玖云:

白樂天長恨歌書太眞本末詳矣, 私, 猶可以 而大惡不容不隱。 殊不爲魯諱。 陳鴻傳則略言之矣。 然太真本壽王妃, (見校補記第一 顧云楊家有女云云。 則

第一章 長 恨 歌

又史繩祖學齋佔畢壹云:

明皇納壽王妃楊氏, 本陷新臺之惡, 而白樂天所賦長恨歌, 則深沒壽邸一段, 蓋得孔子答

所論辨證其誤, 見之材料, 彝尊曝書亭集伍伍書楊太眞外傳後, 叁丙辰劄記等, 寅恪案:關於太眞入宮始末爲唐史中一重公案,自來考證之作亦已多矣。清代論茲事之文, `敗遺意矣。春秋爲尊者諱, 如開元禮及唐大詔令集諸書, 雖於白氏之文學無大關涉, 似俱能持之有故,言之成理, 杭世駿訂譌類編貳楊氏入宮幷竊笛條,章學誠章氏遺書外編 此歌深得之。 大宗實齋不過承用竹垞之說, 然可藉以了却此一重考據公案也。 而以朱氏之文爲最有根據。蓋竹垞得見當時不甚習 而推衍之耳。 今止就朱氏

曝書亭集伍伍書楊太眞外傳後略云::

迎, 使。 宫, 河南府士曹參軍楊玄璬長女爲壽王妃。 二十三年十二月二十四日遣户部尚書同中書門下(平章事)李林甫, 太真外傳,宋樂史所撰。 使高力士取於壽邸, 同牢。 降而親王,禮儀有殺, 或奏妃姿色冠代, 備禮動需卜日, 乃度爲女道士。 度爲女道士, 稱妃以開元二十二年十一月歸於壽邸。二十八年十月玄宗幸溫泉 無納采受册即歸壽邸之禮也。 命使則同。 勅曰, 住内太真宫。 由納采而問名,而納吉, 考之開元禮, 壽王瑁妃楊氏, 此傳聞之謬也。 皇太子納妃, 越明年, 素以端毅, 武惠妃薨, 而納徵, 副以黄門侍郎陳希 將行納采, 按唐大韶令[集]載開元 (寅恪案:毅章氏 而請 後宮無當帝意 期 皇帝臨軒命 然 後親 册

歌

邸 張俞驪山記謂妃以處子入宮, 則妃由道院入宮, 宗永貞元年, 二年正月二日受害, 用敦弘道之風,特遂由衷之請, 引作慤。)作嬪藩國。 十五年正月二日也。 乃言出自妃意。 詠帝與妃定情係七月十六日, 方改正以十一月二日爲忌辰。 不由壽邸。 則天后以建子月爲歲首, 所云作嬪藩國者, 雖居榮貴, 妃既入道, 衣道士服入見, 號曰太真。 似得其實。而李商隱碧城三首, 陳鴻長恨傳謂高力士潛搜外宮, 宜度爲女道士。蓋帝先注意於妃, 每在清修。屬太后忌辰, 永懷追福, 證以武皇内傳分明在, 據妃曾受册云然。其曰太后忌辰者,昭成寶后以長壽 開元中猶循中宗行香之舊, 中宗雖復舊用夏正, 莫道人間總不知。 得妃於壽邸,與外傳同其謬。 一詠妃入道,一詠妃未歸壽 史稱不暮歲禮遇如惠妃。 顧難奪之朱邸, 即正月行香廢務, 以茲求度。 是妃入道之期當在開 是足當詩史 雅志難違, 思納諸禁 直至順

寅恪案:朱氏考證之文, 加詳考, 遽信舊唐書伍壹后妃傳玄宗楊貴妃傳所云:: 似極可信賴。 然一取其他有關史料覈之, 其誤即見。 其致誤之由,

[開元]二十四年[武]惠妃薨。

惠妃以開元二十五年十二月薨。 但同書同卷與玄宗楊貴妃傳連接之玄宗貞順皇后武氏傳云:

耶?夫武惠妃薨年爲開元二十五年,非二十四年, 陸后妃傳於玄宗貞順皇后武氏傳, 元二十四年武惠妃薨。」之文。朱氏當日僅參取新書楊妃傳,而未別考他傳及他書。 元二十四年之紀載與其他史料俱不合。第二,武惠妃薨於開元二十四年於當時情事爲不可能。 而竹垞所以未及注意此二傳紀載之衝突者, 特刪去舊傳「開元二十五年薨。 殆由新唐書柒陸后妃傳玄宗楊貴妃傳亦承用舊傳「開 可以兩點證明。 第一, 之語。 舊唐書武惠妃傳薨於開 豈宋子京亦覺其矛盾 不知新書柒 先

就第一點言之,如:

舊唐書玖玄宗紀下云:

開元二十五年)十二月丙午, 惠妃武氏薨, 追謚爲貞順皇后。

新唐書伍玄宗紀云:

開元二十五年)十二月丙午, 惠妃薨。 丁巳追册爲皇后。

唐會要叁皇后門略云:

玄宗皇后武氏。 后幼入宫, 賜號惠妃。 開元二十五年十二月七日薨。 (年四十。 )贈皇后, 謚

日 貞順。

通鑑貳壹肆唐紀叁拾玄宗紀云:

開元二十五年)十二月丙午, 惠妃武氏薨, 贈謚貞順皇后。

可知武惠妃開元二十五年薨說,幾爲全部史料之所同,而舊唐書楊貴妃傳武惠妃開元二十四年薨 三庶以(開元)二十五年四月二十三日死。武妃以十二月斃。(薨?)

說,

再就第二點言之,舊唐書壹佰柒廢太子瑛傳敍玄宗之殺三庶人即太子瑛鄂王瑶光王琚事略云: 二十一年十一月[武]惠妃即世。 」乃數字傳寫譌誤,可不置辨。又可參劉文典先生群書斠補。

雖爲新唐書楊貴妃傳所沿襲誤用,實仍是孤文單紀也。(今本樂史楊太眞外傳上云:「[開]元

庶人, 十五年四月,楊洄又構於惠妃。 及武惠妃寵幸,〔瑛生母趙〕麗妃恩乃漸弛。時鄂王瑶母皇甫德儀,光王琚母劉才人亦漸疏 瑛於内第與鄂光王等自謂母氏失職,嘗有怨望。惠妃女咸宜公主出降於楊洄。 [開元]二 俄賜死於城東驛。其年,武惠妃數見三庶人爲祟, 言瑛兄弟三人,常構異謀。玄宗使中官宣韶於宮中, 怖而成疾, 巫者祈請彌月, 并廢爲 不痊而

矣。此武惠妃薨於開元二十四年,所以於當時情事,爲不可能。而依朱氏所考,楊妃於開元二十 傳文之神話附會姑不論,但若武惠妃早薨於開元二十四年,則三庶人將不致死於二十五年四月 五年正月二日即已入宫, 實則其時武惠妃尚在人間。 豈不成爲尹邢覿面?是朱氏所謂:

武惠妃薨, 後宮無當帝意者。 或奏妃姿色冠代, 乃度爲女道士。

長

恨

歌

即謂楊貴妃爲武惠妃之替身者,亦絕對不可能矣。

午册韋昭訓女爲壽王妃。 璬長女。」蓋唐大詔令集之所載,乃宋次道采自唐實錄也。又通鑑貳壹伍唐紀天寶四載秋七月壬 著開元二十三年十二月乙亥册故蜀州司戶楊玄琰女爲壽王妃。此條考異云:「實錄載册文云楊玄 辰。至度壽王妃(楊氏)爲女道士敕文,則不載年月。全唐文叁伍及叁捌均同。通鑑貳壹肆唐紀亦 次乙亥十二月壬子朔二十四日乙亥。 又朱氏所根據之材料,今見適園叢書本唐大詔令集肆拾, 八月壬寅册楊太眞爲貴妃。其考異云: 册壽王韋妃文爲天寶四載歲次乙酉七月丁卯朔二十六日壬 其册壽王楊妃文年月爲開元二十三年歲

寅恪案:楊氏之度爲女道士入宮與册爲貴妃本爲先後兩事。其度爲女道士,實無詳確年月可尋。 敷衍而爲之說,未必眞見第一等材料而詳考之也。 以服朱氏之心。至杭大宗之文,亦不過得見錢曾讀書敏求記肆集部唐大詔令集提要, 見之史料, 而章實齋考此事文中「天寶四載乙酉有度壽王妃楊氏入道册文。」云云,豈司馬君實朱錫鬯所不能 統紀八月册女道士楊氏爲貴妃。本紀甲辰。 甲辰甲寅皆在後,恐册妃在贈官前。新本紀亦云,八月壬寅,立太眞爲貴妃。今從之。 而章氏尙能知之耶?實誤會臆斷所致,轉以「朱竹垞所考入宮亦未確。 唐曆甲寅。 今據實錄, 壬寅,贈太真妃父玄琰等 」爲言, 及曝書亭集 恐不足

朱氏唐代典禮制度之說,似極有根據,且依第一等材料開元禮爲說。

在當時,

開元禮尙非

甚習見之書, 或者使人不易辨別其言之當否。獨不思世人最習見之通典,其書壹佰陸至壹肆拾爲

其五禮篇目下注云:

謹按斯禮, 敢輒有刪改。 開元二十年撰畢。 本百五十卷, 自後儀法續有變改, 類例成三十五卷, 冀尋閱易周, 並具沿革篇。 覽之者幸察焉。 爲是國家修纂, 今則悉依

之,朱氏「妃以處子入宮似得其實。 正月二日。 爲正月二日,乃依據唐會要貳叁忌日門永貞元年十二月中書門下之奏。及册壽王妃楊氏爲開元二 道士在開元二十五年正月二日,則其間相隔已逾一歲,頗已有舉行親迎同牢之危險矣。何況開元 條所列典禮先後次第,爲(一)納采。(二)問名。(三)納吉。(四)納徵。(五)請期。(六)册妃。 足徵杜氏悉依開元禮舊文,節目並無更改。其書壹貳玖禮典捌玖開元禮纂類貳肆嘉禮捌親王納妃 十三年十二月二十四日,乃依唐大詔令集。 饗婦人送者。其册妃之前爲請期, 二十五年正月二日武惠妃尙在人間,其薨年實在開元二十五年十二月七日。(朱氏所考寶氏忌辰 然必不致太久。即如朱氏所考楊氏之受册爲壽王妃在開元二十三年十二月二十四日, 親迎。(八)同牢。(九)妃朝見。(一〇)婚會。(一一)婦人禮會。(一二)饗丈夫送者。(一三) 其間相隔至少已越兩歲, 其後即接親迎, 」之論,殊不可信從也。 豈有 距離如是長久, 皆甚精確。)是楊氏入宮,至早亦必在開元二十六年 同牢。是此三種典禮之間, 既已請期而不親迎同牢者乎?由此觀 雖或有短期間之距 度爲女

武惠妃薨以後,天寶四載八月壬寅日即十七日册楊太眞爲貴妃以前。新唐書伍玄宗紀云: 至楊氏究以何時入宮, 則度壽王妃楊氏爲女道士敕文雖無年月, 然必在開元二十五年十二月七日

南部新書辛云:

開元二十八年十月甲子,

幸溫泉宮。

以壽王妃楊氏爲道士,

號太真。

楊太眞外傳上云:

内太真宫。

(開元)二十八年十月,

玄宗幸溫泉宮。

使高力士取楊氏女於壽邸。

度爲女道士, 號太眞,

楊妃本壽王妃, (開元)二十八年, 度爲道士入内。

因追書楊氏入道於前一歲,即天寶三載裴敦復賂楊太眞姊致裴寬貶官事之後耳。其實非有確定年 或與某事有關者之後。司馬君實蓋以次年即天寶四載有册壽王妃韋氏及立太眞妃楊氏爲貴妃事, 有說焉。通鑑紀事之例,無確定時間可稽者,則依約推測,置於某月,或某年,或某帝紀之末, 寶后之忌日。雖不中,不遠矣。又資治通鑑紀度壽王妃楊氏爲女道士入宮事於天實三載之末, 正史小說中諸紀載何所依據, 八年十月爲玄宗所選取, 其度爲女道士敕文中之太后忌辰, 乃指開元二十九年正月二日睿宗昭成 今不可知。 以事理察之,所記似最爲可信。 姑假定楊氏以開元二十

月可據也。

始公開揭露耳。 但讀者若以楊氏入宮即在天寶三載, 女爲壽王妃事,竟遲至天寶四載者, 宮闈隱秘,史家固難深悉, 則其時上距武惠妃之薨已逾六歲,於事理不合。至册韋昭訓 則以其與册楊太眞爲貴妃事,互爲關聯。喜劇之一幕, 而通鑑編撰時, 此度壽王妃楊氏爲女道士敕文已無年 至此

歌云:

月日可考,

亦可因而推知也。

春寒賜浴華清池。 溫泉水滑洗凝脂。侍兒扶起嬌無力,始是新承恩澤時。

不贅言。 關於玄宗臨幸溫泉之時節,俟於下文考釋「七月七日長生殿,夜半無人私語時。 」句時詳辨之,姑

茲止論賜浴華淸池事。 按唐六典壹玖溫湯監一人正七品下注略云:

碑。 辛氏三秦紀云, 皇朝置溫泉宮, 驪山 常所臨幸。 西有溫湯, 又天下諸州往往有之, 漢魏以來相傳能蕩邪蠲疫。 然地氣溫潤, 今在新豐縣西。 殖物尤早, 後周庾信有溫泉 卉木凌冬不

又丞一人從八品下注云: 凋,蔬果入春先熟,比之驪山,多所不逮。

及,瓜果之屬,先時而育者, 凡王公以下至於庶人, 湯泉館室有差, 必爲之園畦, 別其貴賤而禁其踰越。 而課其樹藝。 成熟 凡近湯之地, 則苞匭而進之, 潤黷(澤?)所 以薦陵廟。

第一章 長 恨

歌

稿

即玄宗亦嘗自言之,如全唐詩第壹函明皇帝詩中有: 寅恪案:溫泉之浴, 其旨在治療疾病,除寒祛風。非若今世習俗, 以爲消夏逭暑之用者也。

惟此溫泉,是稱愈疾。豈予獨受其福, 思與兆人共之。 乘暇巡遊,

乃言其志

陰崖含秀色,溫谷吐潺湲。

績爲蠲邪著,

功因養正宣。

願言將億

同此共昌延。(此條失之眉睫, 友朋中夏承燾先生首舉以見告, 甚感愧也。)

及幸鳳泉湯五言排律云:

桂殿與山連。

蘭湯湧自然。

益齡仙井合, 愈疾醴源通。

皆可爲例證也。 及七夕長生殿私誓等物語之增飾。今不得不略爲辨正。 中唐以後以至宋代之文人,似已不盡瞭解斯義。 蓋漢代宮中即有溫室, 故有荔枝香曲名起原故事之創 如漢書孔光傳

所謂,「不言溫室樹。」者是也。倭名抄佛塔具之部云:

溫室,内典有溫室經。今按溫室,即浴室也。俗名由夜。溫泉一名湯泉。 百病久病人入此水

安世高所譯。(即使出自依託,亦必六朝舊本。)其書託之天竺神醫耆域,廣張溫湯療疾之功用, 寫本中亦有唐惠淨撰溫室經疏一卷, 寅恪案:今存內典中有北周惠遠撰溫室經義記一卷, (倫敦博物院藏斯坦因號貳肆玖柒。)此經爲東漢中亞佛教徒 (大正藏壹柒玖叁號。)又近歲發見敦煌石室

可詳知矣。 乃中亞所傳天竺之醫方明也。頗疑中亞溫湯療疾之理論及方法,尙有更早於世高之時者,而今不 由北周惠遠爲此經作疏及同時庾信王褒爲溫湯作碑文事等(庾子山集壹叁藝文類聚玖

締婚突厥方始輸入。考之北朝史籍如魏書肆壹源賀傳(北史貳捌源賀傳同。)云: 實在「武帝天和三年三月皇后阿史那氏至自突厥。」(見周書伍武帝紀。)以前,故此風氣亦不必待 初學集柒。)觀之,固可窺知其時溫湯療疾之風氣。但子山之文作於北周明帝世任弘農太守時

太和元年二月, 療疾於溫湯。 高祖文明太后遣使者屢問消息, 太醫視疾。患篤,

後取急, 就雁門溫湯療疾 北齊書叁肆楊愔傳(北史肆壹楊播傳附愔傳同。)云:

魏書捌肆儒林傳常爽傳(北史肆貳常爽傳同。)云:

爽置館溫水之右,教授門徒七百餘人。京師學業,

水經注壹叁屪水篇引魏土地記云:

可知溫湯療疾之風氣,本盛行於北朝貴族間。 唐世溫泉宮之建置,不過承襲北朝習俗之一而已。

代城北九十里有桑乾城。城西渡桑乾水。去城十里有温湯,

療疾有驗。

對於浴堂條胡注。)雖不必供洗浴之用,但其名號疑皆從溫湯療疾之胡風輾轉嬗蛻而來。今北京 歷代宮殿中如漢代之溫室,唐代紫宸殿東之浴堂殿,(可參考通鑑貳叁柒唐紀元和二年上召李絳

第

恨

歌

謂風呂者,原由中國古代輸入,或與今歐洲所謂土耳其浴者, 故宮武英殿之浴室, 世所妄傳爲香妃置者, 殆亦明清因沿前代宮殿建築之舊稱耶? 又今之日本所 同爲中亞故俗之遺。 寅恪淺陋,

妄言之,以俟當世博識學人之敎正焉。

可無疑。 總而言之,溫湯爲療疾之用之主旨旣明,然後玄宗之臨幸華清, 而長生殿七夕私誓之爲後來增飾之物語, 並非當時眞確之事實一點,亦易證明矣。 必在冬季或春初寒冷之時節, 始

太眞外傳上云:

雲鬢花顏金步搖。

芙蓉帳暖度春宵。

歌云:

上(玄宗)又自執麗水鎭庫紫磨金琢成步搖,至妝閣, 親與挿鬢上。

安祿山事蹟下及新唐書叁肆五行志所述,天寶初婦人時世妝有步搖釵。 寅恪案:樂史所載,未詳其最初所出。或者即受長恨歌之影響,而演成此物語, 人篇。)楊妃本以開元季年人宮, 其時間與姚歐所言者連接。然則樂天此句不僅爲詞人藻飾之韻 (見下新樂府章上陽白髮 亦未可知。 但依

歌云

亦是史家紀事之實錄也。

姊妹弟兄皆列土。 可憐光彩生門户。遂令天下父母心,不重生男重生女。

生男重生女。此刺以男女不常,陰陽失倫。其意險而奇,其文平而易。所謂言之者無罪, 罪。殊不謂三百五篇多乎女子,蓋在所指説如何耳。至如長恨歌云,遂令天下父母心,不重 大唐前有李杜,後有元白。 信若滄溟無際,華嶽干天。然自李飛數賢, 多以粉黛爲樂天之

寅恪案:黃氏所言,亦常談耳。但唐人評詩, 殊異於宋賢苛酷迂腐之論,於此可見。故附錄之。

之者足以自戒哉

歌云: 驪宮高處入青雲。 仙樂風飄處處聞。 緩歌慢舞凝絲竹。盡日君王看不足。 漁陽鞞鼓動地來,

寅恪案:全唐詩第壹陸函白居易貳壹覽裳羽衣(原注:一有舞字。寅恪案:有舞字者是。)歌(原

注:和微之。)云:

驚破霓裳羽衣曲。

樂天自注云: 飄然轉旋迴雪輕。 嫣然縱送游龍驚。 小垂手後柳無力, 斜曳裾時雲欲生。

四句皆霓裳舞之初態。

此可供慢舞義之參考。又白氏長慶集伍肆早發赴洞庭舟中作云:

出郭已行十五里,唯銷一曲慢霓裳。

寅恪案:此亦可與緩歌之義相證發。 故並附錄之。 但有可疑者, 霓裳羽衣舞歌云:

繁音急節十二遍, 跳珠撼玉何鏗錚。

非如後來作「霓裳羽衣歌」所云: 則謂中序以後至終曲十二遍皆繁音急節, 似與緩歌慢舞不合。豈樂天作長恨歌時在入翰林之前。

乃依據在翰林時親見親聞之經驗。 致有斯歧異耶?姑記此疑, 以俟更考。

我昔元和侍憲皇。

曾陪内宴宴昭陽。

又「看不足」別本有作「聽不足」者,非是。 蓋白公霓裳羽衣舞歌云:

皆形容舞者。旣著重於舞, 不著人家俗衣服。 千歌萬舞不可數。就中最愛霓裳舞。 虹裳霞帔步搖冠。 故以作「看」爲允。 鈿瓔累累珮珊珊。 舞時寒食春風天。 娉婷似不任羅綺。 玉鈎欄下香案前。

顧聽樂懸行復止。案前舞者顏如玉。

樂名黃鐘商時號越調下有: 羽衣舞歌。茲請據此兩者略論之。唐會要叁叁諸樂條天寶十三載七月十日太樂署供奉曲名及改諸 自來考證霓裳羽衣舞之作多矣。其中宋王灼碧雞漫志所論頗精。 徴引甚繁。 總而言之,其重要材料有二, 一爲唐會要, 爲全唐詩第壹陸函白居易貳壹霓裳 近日遠籐實夫長恨歌之研究

之紀載。 是此霓裳羽衣本名婆羅門, 可與樂天霓裳羽衣舞歌「楊氏創聲君造譜」句自注所言:

開元中,西涼府節度楊敬述造。

者相印證。又舊唐書捌玄宗紀上(舊唐書壹玖肆突厥傳上新唐書伍玄宗紀貳壹伍突厥傳上通鑑貳 壹貳唐紀貳捌玄宗紀開元八年十一月九年正月等條略同。 )云:

開元八年)秋九月, 突厥[暾]欲谷寇甘源(源通鑑作涼。 )等州。 涼州都督楊敬述爲所敗,

掠

契苾部落而歸。

由中亞,開元時始輸入中國。 其所紀時代,姓名, 而劉禹錫望女几山詩序, 官職與白氏所言均相符同,足證白氏此說必有根據。 鄭嵎津陽門詩注, (遠籐氏取印度祀神, 及逸史, 舞於香案鈎欄前者, 龍城錄,諸書所述神話之不可信, 以相比擬。或不致甚謬 然則此曲本出天竺, 固無待

//。)據歐陽修六一詩話云·

霓裳羽衣曲

今教坊尚能作其聲,

其舞則廢而不傳矣。

卷大和三年九月庚辰條, 則北宋時,其舞久已不傳,今日自不易考知也。 大和九年五月丁巳條, 舊唐書壹陸捌新唐書壹柒柒馮定傳新唐書貳貳禮 又册府元龜伍陸玖掌禮部作樂類伍(參看同書同

樂志等。)云:

鐘鼓之本。 (文宗)開成元年七月, 語及音律, 教坊進霓裳羽衣舞女十五以下者三百人。帝絕畋遊馳騁之事, 每謂絲竹自有正聲,人但趣于鄭衞。 乃造雲韶等法曲, 遇内宴奏之。 思玉帛

顧大臣曰,笙磬同音, 沈吟躭味, 不圖爲樂至於斯。 十月, 太常奏成雲韶樂。

唐闕史下李可及戲三教條(參雲谿友議上古製興條。)略云:

壹伍雜記條。 寺樂官尉遲璋者,善習古樂爲法曲。 參寥子曰,開成初,文宗皇帝躭玩經典,好古博雅。嘗欲黜鄭衞之樂,復正始之音。有太常 寅恪案:開成二年高鍇知貢舉, 韶中書門下及諸司三品以上,具朝服班坐以聽。 今雲谿友議所載李肱之詩, 恩賜詩題曰霓裳羽衣曲。三年復以前詩題爲賦。 笙磬琴瑟, 戞擊鏗拊, 咸得其妙, 遂成霓裳羽衣曲以 是其於開成二年舉進士所作也。 因以曲名宣賜 貢院, 文苑英華柒肆所載 充試進士賦 見唐摭言

文苑英華柒肆陳嘏霓裳羽衣曲賦云: 沈朗陳嘏及闕名之霓裳羽衣曲賦三篇, 則開成三年進士之文之留存於今日者也。)

爾其絳節迴互,霞袂飄颺。

宣宗妙于音律。

每賜宴前,

必製新曲。 其曲有霓裳者,

率皆執幡節,

被羽服,

飄然有翔雲飛

鶴之勢。

是文宗宣宗之世,並有霓裳羽衣曲之名。然唐闞史以爲開成時之霓裳羽衣曲乃尉遲璋所創。 林亦目大中時之霓裳爲新曲。又二者於舞時皆執「節」,亦爲樂天詩中所未及。 或後來所製者, 唐語

非復玄宗時之舊觀耶?今就樂天霓裳羽衣舞歌所言此曲散序云:

自注云:

磬簫等笛遞相攙, 擊擫彈吹聲邐拖。

又云:

散序六曲未動衣。 陽臺宿雲慵不飛。

凡法曲之初,衆樂不齊,惟金石絲竹,

次第發聲。

霓裳序初亦復如此。

自注云:

散序六遍無拍,故不舞也。

又白氏長慶集伍捌王子晉廟詩云:

鸞吟鳳唱聽無拍,多似霓裳散序聲。

樂天又敍寫霓裳中序云:

可以窺見霓裳散序之大概。今日本樂曲有所謂「淸海波」者,

據云即霓裳散序之遺音,

未知然否

中序擘騞初入拍。秋竹竿裂春冰拆。

歌

元白詩 箋

自注云:

中序始有拍,亦名拍序。

又敍寫中後十二遍云:

繁音急節十二編,跳珠撼玉何鏗錚。

霓裳破凡十二徧而終。

遍,非十二遍。白氏長慶集伍陸臥聽法曲霓裳詩所謂:

寅恪案:他本有作「霓裳曲」者,但全唐詩第壹陸函作「霓裳破凡十二徧而終。

是。

蓋全曲共十八

者是也。 至樂天於:

宛轉柔聲入破時。

漁陽鞞鼓動地來, 驚破霓裳羽衣曲。

又霓裳羽衣「入破時」,本奏以緩歌柔聲之絲竹。今以驚天動地急迫之鞞鼓,與之對舉。相映成 句中特取一「破」字者, 蓋破字不僅含有破散或破壞之意,且又爲樂舞術語, 用之更覺渾成耳。

樂天又述終曲云: 趣,乃愈見造語之妙矣。

自注云:

凡曲將畢, 皆聲拍促速。唯霓裳之末, 長引一聲也。

據上所引,可以約略窺見此曲之大概矣。

又國史補上王維畫品妙絕條(舊唐書壹玖拾下文苑傳下新唐書貳佰貳文藝傳中王維傳俱有相同之

合。國史補作者李肇,爲樂天同時人,且曾爲翰林學士,(見翰苑羣書重修承旨學士壁記附錄翰

豈肇未嘗親見此舞耶**,** 

或雖親見此

紀載。)有「霓裳羽衣曲第三疊第一拍。」之語,與樂天在元和年間爲翰林學士時所親見親聞者不

錄此條時曾未注意耶?殊不可解,姑記此疑,以俟詳考。

林學士題名及新唐書伍捌藝文志史部雜史類。)何以有此誤,

又樂天平生頗以長恨歌之描寫霓裳羽衣舞曲自翻, 即如此詩云:

我愛霓裳君合知。發於歌詠形於詩。 君不見我歌云, 驚破霓裳羽衣曲

自注云:

長恨歌云。

歌云: 是也。

稿

九 宛轉蛾眉馬前死。 重城闕煙塵生。 千乘萬騎西南行。 翠華搖搖行復止。 西出都門百餘里。 六軍不發無奈何,

寅恪案:唐人類以玄宗避羯胡入蜀爲南幸。 元和郡縣志貳關內道京兆府興平縣條云::

又:

馬嵬故城在縣西北二十三里。

興平縣東至府九十里。

即此詩所謂「千乘萬騎西南行。」「西出都門百餘里。」者也。

岑建功舊唐書校勘記叁貳(卷五壹。)玄宗楊貴妃傳「旣而四軍不散」條略云:

軍徘徊。 軍。及至德二載,始置左右神武軍。是至德以前有四軍無六軍明矣。白居易長恨歌傳曰,六 御覽壹肆壹作六軍。按張氏宗泰云,以新書兵志考之,大抵以左右龍武左右羽林軍合成四 歌日, 六軍不發無奈何。蓋詩人沿天子六軍舊說, 未考盛唐之制耳。此作四軍,

寅恪案:張氏說是也。 不僅詩人有此誤, 即唐李繁鄴侯家傳(玉海壹叁捌兵制。)云:

是。

因附辨於此

又云: [玄宗]後以左右神武軍與龍武羽林備六軍之數。

玄宗幸蜀,六軍扈從者千人而已。

宋史家司馬君實之通鑑貳壹捌唐紀云:

[至德元載](即天寶十五載,司馬君實用後元,於此等處殊不便。)[六月壬辰](即初十日)既

夕,命龍武大將軍陳玄禮整比六軍。

亦俱不免於六軍建置之年月有所疏誤。考舊唐書玖玄宗紀下云:

(天寶十五載)六月壬寅(即二十日),

次散關,

分部下爲六軍。

潁王墩先行,

壽王瑁等分統六

前後左右相次。

是天寶十五載六月二十日以後,似亦可云六軍。而在此以前即唐玄宗與楊貴妃在馬嵬頓時, 自以

作四軍爲是。但舊唐書拾肅宗紀亦云:

(天寶十五載六月)丁酉,至馬嵬頓。 六軍不進。

是李唐本朝實錄尙且若此, 則詩人沿襲天子六軍舊說, 未考盛唐之制, 又何足病哉?

又劉夢得文集捌馬嵬行云:

貴人飲金屑,倏忽蕣英暮。(見校補記第五則)

則以楊貴妃爲吞金而非縊死,斯則傳聞異詞,或可資參考者也。(見校補記第六則)

章

長

歌

嵋山下少人行, 旌旗無光日色薄。

夢溪筆談貳叁譏謔附謬誤類云:

白樂天峨嵋山下少人行, 旌旗無光日色薄。 峨嵋山在嘉州, 與幸蜀路並無交涉。

寅恪案:元氏長慶集壹柒東川詩好時節絕句云:

身騎聽馬峨嵋下, 面帶霜威卓氏前。 虚度東川好時節, 酒樓元被蜀兒眠

按微之以元和四年三月以監察御史使東川,

按故東川節度使嚴礪罪狀。(詳見舊唐書壹陸陸

元稹

馬經過 簡二州隸西川。 和四年時爲梓, 白氏長慶集陸壹元稹墓誌銘, 元氏長慶集壹柒及叁柒等。) 考東川所領州, 峨嵋山下也。 遂, (見新唐書陸捌方鎭表東川表及元和郡縣圖志叁叁東川節度使條。 綿, 夫微之親到東川, 劍, 龍, 普 陵, 尚復如此**,** 瀘, 榮, 何況樂天之泛用典故乎?故此亦不足爲樂天深 資,簡,昌,合, 渝, 十四州。 屢有變易。 )微之固無緣騎 是年又割資 至元

病。

江水碧蜀山青。 聖主朝朝暮暮情。 行宮見月傷心色, 又可參敎坊記曲名條。 夜雨聞鈴腸斷聲。

) 云:

寅恪案:段安節樂府雜錄(據守山閣叢書本。 雨霖鈴

雨淋鈴者, 因唐明皇駕迴至駱谷, 聞雨淋鑾鈴, 因令張野狐撰爲曲名。 (依御覽補。

全唐詩第壹玖函張祜貳雨霖鈴七絕云:

雨霖鈴夜却歸秦。 猶見(見一作是。)張徽一曲新。 長說上皇和淚教, 月明南内更無人。

鄭處誨明皇雜錄補遺(據守山閣本又可參楊太眞外傳下。)略云:

妃, 上因以其曲授野狐。 明皇既幸蜀,西南行。 採其聲爲雨霖鈴曲, 泊至德中, 初入斜谷, 以寄恨焉。 車駕復幸華清宮。 屬霖雨涉旬, 時梨園子弟善吹觱篥者, 於棧道雨中聞鈴音與山相應。 上於望京樓中命野 張野狐爲第一。 狐奏雨霖鈴曲。 此人從至蜀, 上既悼念貴 未半,

上四顧淒涼, 不覺流涕。 左右感動, 與之歔欷。其曲今傳於法部。

若依樂天詩意,玄宗夜雨聞鈴,製曲寄恨,其事在天寶十五載赴蜀途中, 段書之以此事屬之至德二載由蜀返長安途中者,殊不相同。但據舊唐書玖玄宗紀下略云: 與鄭書合,而與張詩及

月丙申次鳳翔郡。十二月丙午肅宗具法駕至咸陽望賢驛迎奉。 丁未至京師。 [至德二載]九月郭子儀收復兩京。十月肅宗遣中使啖廷瑶入蜀奉迎。

丁卯上皇發蜀都。

是玄宗由蜀返長安, 其行程全部在冬季, 與製曲本事之氣候情狀不相符應。 故樂天取此事屬之赴

蜀途中者, 實較合史實。非僅以「見月」「聞鈴」兩事相對爲文也。

歌云:

旋日轉迴龍馭。 到此躊躇不能去。 馬嵬坡下泥土中, 不見玉顏空死

高彥休闕史上鄭相國[畋]題馬嵬詩條云::

肅宗迴馬楊妃死, 雲雨雖亡日月新。 終是聖明天子事, 景陽宮井又何人。

吳曾能改齋漫錄捌馬嵬詩條載臺文此詩,「肅宗」作「明皇」,「聖明」作「聖朝」。

計有功唐詩紀事伍 則並改「雖亡」爲

此後人逐漸改易, 份留痕跡者也。但臺文所謂「肅宗迴馬」者**,** 據舊唐書拾肅宗紀略云:

惟改「肅」字爲「玄」字(又聖明作聖朝),今通行坊本選錄臺文此詩,

陸亦載此詩,

於是玄宗賜貴妃自盡。 玄宗聞之, 車駕將發, 留上(肅宗)在後宣諭百姓。 衆泣 而言曰, 請從太子收復長

令[高]力士口宣曰, 汝好去。 上(肅宗)迴至渭北, 時從上惟廣平建寧二王,

可與舊唐書伍壹后妃傳楊貴妃傳參證。)將士纔二千人, 自奉天

而

玄宗迴馬

楊妃死,

雲雨難忘日月新

及四軍(寅恪案:此言四軍,

楊貴妃而言, 蓋肅宗迴馬及楊貴妃死, 謂貴妃雖死而日月重光, 乃啓唐室中興之二大事, 王室再造。 其意義本至明顯平易。 自宜大書特書, 此所謂史筆卓識也。 今世俗習誦之本易作: 「雲雨」指

與臺文元詩之本旨絕異。斯則不得不爲之辨正者也。(又李義山馬嵬七律首二句,「海外徒聞更九 固亦甚妙而可通, 但此種改易,必受長恨歌此節及玄宗難忘楊妃令方士尋覓一節之暗示所致,殊

州。 義山雖才思過人,恐亦不能構想及此。故寅恪嘗謂此詩乃長恨歌最佳之縮本也。(見校補記第七 他生未卜此生休。」實爲絕唱,然必係受長恨歌「忽聞海上有仙山。」一節之暗示無疑。否則

Ę

歌云:

夕殿螢飛思悄然,孤燈挑盡未成眠。

邵博聞見後錄壹玖云:

皇帝自挑燈者乎?書生之見可笑耳。 白樂天長恨歌有夕殿螢飛思悄然, 孤燈挑盡未成眠。 之句, 寧有興慶宮中, 夜不燒蠟油,

明

寅恪案:南史叁柒沈慶之傳附沈攸之傳云:

富貴擬於王者,夜中諸廂廊然燭達旦。

歐陽修歸田錄壹(參考宋史貳捌壹寇準傳,及陸游「燭淚成堆又一時」之句。)云: 鄧州花蠟燭名著天下,雖京師不能造。 相傳云是寇萊公燭法。公嘗知鄧州, 而自少年富貴,

地, 不點油燈。 往往成堆。 尤好夜宴劇飲, 杜祁公爲人清儉,在官未嘗然官燭。 雖寢室亦然燭達旦。 每罷官去後, 油燈一炷,熒然欲滅, 人至官舍, 見溷 與客相對, 廁間 燭淚在 清談

第一章 長

恨歌

而已。

考樂天之作長恨歌在其任翰林學士以前, 夫富貴人燒蠟燭而不點油燈, 自昔已然。 北宋時又有寇平仲一段故事, 宮禁夜間情狀, 自有所未悉, 固不必爲之諱辨。惟白氏 宜乎邵氏以此笑樂天也。

長慶集壹肆禁中夜作書與元九云:

心緒萬端書兩紙, 欲封重讀意遲遲。 五聲鐘漏初鳴後, 點窗燈欲滅時。

從樸儉耶?(參劉文典先生羣書斠補。)至上皇夜起, 此詩實作於元和五年樂天適任翰林學士之時, 而禁中乃點油燈, 獨自挑燈, 則玄宗雖幽禁極淒涼之景境, 殆文學侍從之臣止宿之室,

亦稍

歌云:

或不至於是。 文人描寫,每易過情,

斯固無足怪也。

上窮碧落下黄泉,兩處茫茫皆不見。

寅恪案:太平廣記貳伍壹詼諧類張祜條 (參孟棨本事詩嘲戲類。 )云:

張祐〕日, 枯亦嘗記得舍人目蓮變。 白日, 何也?日, 上窮碧落下黃泉, 兩處茫茫皆不見,

非目蓮變何邪?(出摭言。)

歌云:

敦煌發見之目蓮變文寫本印證也。 此雖一時文人戲謔之語, 無關典據, 以其涉及此詩, 因幷附錄之, 藉供好事者之談助, 且可取與

1

歌

中有一人字太真,雪膚花貌參差是。

楊太眞外傳上云:

内太真宫。 (開元)二十八年十月, 玄宗幸溫泉宮, 使高力士取楊氏女於壽邸, 度爲女道士, 號太真,

玖儀坤廟條略云:

寅恪案:此有二問題, 即長安禁中是否實有太真宮,及太真二字本由何得名, 是也。 考唐會要壹

先天元年十月六日, 開元四年十一月十六日, 祔昭成肅明二皇后於儀坤廟。 昭成皇后祔於太廟。 至八月九日敕,肅明皇后, (廟在親仁里。) 依前儀坤廟安置。

太廟, 于是遷昭成皇后神主祔于睿宗之室, 不宜頓置官屬。 至二十一年正月六日, 惟留肅明皇后神主于儀坤廟。八月二日敕, 遷祔肅明皇后神主于太廟, 其儀坤廟爲肅明 儀坤廟隷入

又同書伍拾觀條云:

開元四年八月九日勅, 咸宜觀, 遂爲道士觀。 親仁坊, 寶曆元年(據宋敏求長安志捌引, 本是睿宗藩國地。 肅明皇后 [依]前於儀坤廟安置。 開元初置昭成肅明皇后廟, 應作寶應元年。)五月, 二十一年五月六日肅明皇后祔入太 號儀坤。 後昭成遷入太廟。 以咸宜公主入

道, 與太真觀 換名焉。

太真觀 道 德坊, 本隋秦王浩宅。

則楊妃入宮, 弘明集貳玖上梁武帝孝思賦序及梁書叁高祖紀下南史柒梁本紀中武帝下。)即所謂內太眞宮。否 夫長安城中於宮禁之外, 與後來帝王於宮中別建祠廟以祠其先世者相類, 無從以實后忌辰追福爲詞, 實有祀昭成太后之太真宮, 且無因以太眞爲號。恐未可以傳世唐代宮殿圖本中無太 (梁武帝亦於宮內起至敬殿以祀其親。 可無論矣。 而禁中亦或有別祀昭成實后之 見廣

母生母俱號太后, 又據舊唐書柒新唐書伍睿宗紀, 故世俗之稱祀兩太后處爲太眞宮者, 睿宗之諡爲大聖眞皇帝。 殆以此故。不僅眞字在道家與仙字同義 肅明, 昭成, 皆睿宗之后妃, 玄宗之嫡

歌云:

也。

真宮之名,

而遽疑之也。

風

吹

仙袂飄

飄舉。

猶

似霓裳羽

衣舞。

寅恪案:舊唐書伍壹玄宗楊貴妃傳 云:

太真姿質豐豔, 善歌舞, 通音律。

則楊妃親舞霓裳亦是可能之事。

歌中所詠或亦有事實之依據,

非純屬詞人迴映前文之妙筆也。

上又宴諸王於木蘭殿。 時木蘭花發,皇情不悦。妃醉中舞霓裳羽衣一曲, 天顏大悦

寅恪案:太眞親舞霓裳, 未知果有其事否?但樂天新樂府胡旋舞篇云

天寶季年時欲變, 臣妾人人學圓轉。 中有太真外禄山, 二人最道能胡旋。

故歟?

蹈。太眞旣善胡旋舞,

則其親自獨舞霓裳,亦爲極可能之事。所謂「盡日君王看不足」者,

然俱由中亞傳入中國,

同出一源,

乃當時最流

殆以此 発以此

疑有所本。

胡旋舞雖與霓裳羽衣舞不同,

歌云

臨別 在地願 殷勤重寄詞。 爲連理枝。 天長地久有時盡, 詞中有誓兩 心知。 此恨綿綿無絕期 七月七日長生殿, 夜半無人私語時。 在天願爲比翼鳥,

寅恪案:此節有二問題, 次於夏日炎暑時幸驪山, 夫溫泉祛寒去風之旨旣明, 一時間,二空間。關於時間之問題,則前論溫湯療疾之本旨時已略言之 而其駐蹕溫泉, ,則玄宗臨幸溫湯必在冬季春初寒冷之時節。今詳檢兩唐書玄宗紀 常在冬季春初, 可以證明者也。(參劉文典先生羣

而不書。 ) 夫君舉必書, 然則決無如長恨歌傳所云,天寶十載七月七日玄宗與楊妃在華淸宮之理, 唐代史實,武宗以前大抵完具。 若玄宗果有夏季臨幸驪山之事, 可以無疑 斷不致

矣。此時間之問題也。

若以空間之問題言,則舊唐書玖玄宗紀下略云:

天寶元年冬十月丁酉,幸溫泉宮。辛丑,新成長生殿,名曰集靈臺, 以祀天神。

唐會要叁拾華淸宮條云:

天寶元年十月造長生殿,名爲集靈臺,以祀神。

唐詩紀事陸貳(全唐詩第貳壹函。)鄭嵎津陽門詩注云:

而白傅長恨歌以長生殿爲寢殿,殊誤矣。

又云:

飛霜殿即寢殿,

有長生殿,乃齋殿也。有事於朝元閣,即御長生殿以沐浴也。

所以致誤之由, 則李三郎與楊玉環乃於祀神沐浴之齋宮, 蓋因唐代寢殿習稱長生殿, 如通鑑貳佰柒長安四年太后寢疾居長生院條胡梅礀注 夜半曲敍兒女私情。揆之事理,豈不可笑?推其

殿也。 長生院即長生殿。明年五王誅二張, 此武后寢疾之長生殿, 白居易長恨歌所謂七月七日長生殿, 洛陽宮寢殿也。 進至太后所寢長生殿, 夜半無人私語時。 肅宗大漸, 越王係授甲長生殿, 同此處也。 華清宮之長生殿也。 蓋唐寢殿皆謂之長生 長安大明宮之寢

章 長 恨 歌

寅恪案:唐代宮中長生殿雖爲寢殿,獨華淸宮之長生殿爲祀神之齋宮。 樂天未入翰林, 猶不諳國家典故, 習於世俗, 未及詳察, 遂致失言。胡氏史學顓家, 神道清嚴, 不可闌入兒女

雜徵引, 轉以爲證, 疏矣。

涵芬樓本說郛叁貳范正敏遯齋閒覽論杜牧「一騎紅塵妃子笑, 至春即還宮, 未嘗六月在驪山也。 無人知是荔枝來。 句云:

荔枝盛暑方熟,

據唐紀, 明皇常以十月幸華清,

但程大昌考古編駁之云:

進新曲, 說者謂明皇帝以十月幸華清, 而白香山長恨歌亦言, 載許雲封所得荔枝香曲曰, 未有名。 會南海獻荔枝, 七月七日長生殿, 涉春即回,是荔枝熟時,未嘗在驪山。 天寶十四載六月一日是貴妃誕辰, 因名荔枝香。 開天遺事,帝與妃每至七月七日夜在華清遊 夜半無人私語時。 則知牧之乃當時傳信語也。 命小部音聲奏樂長生殿, 然咸通中有袁郊作甘澤

寅恪案:據唐代可信之第一等資料,時間空間,皆不容明皇與貴妃有夏日同在驪山之事實。 世人但見唐史所載, 遽以傳聞而疑傳信,大不可也。

杜牧

歐陽永叔博學通識 皆承譌因俗而來, 乃於新唐書貳貳禮樂志壹云: 何可信從?而樂天長恨歌「七月七日長生殿」之句,更不可據爲典

帝幸驪山。 楊貴妃生日, 命小部張樂長生殿。 因奏新樂, 未有名。 會南方進荔枝, 因名曰荔

枝香

是亦采甘澤謠之謬說, 殊爲可惜。 故特徵引而略辨之如此, 庶幾世之治文史者不致爲所惑焉。 又

武帝祈靈太乙壇。 新豐樹色繞千官。 那知今夜長生殿, 獨閉空山月影寒。 全唐詩第拾函顧況宿昭應七絕云:

翁方綱石州詩話貳云: 似比之樂天詩語病較少,故附寫於此,以供參讀。

白公之爲長恨歌霓裳羽衣曲諸篇,自是不得不然,不但不蹈杜公韓公之轍也。 獨出冠時, 所以爲豪傑耳。 始悟後之欲復古者, 真強作解事。 是乃瀏

窒亂階, 其文句往往溢出於通行本之外。所最可注意者,通行本傳末雖有「意者不但感其事, 長恨歌前之通行本。他一爲文苑英華柒玖肆附錄麗情集中別本。而麗情集本與通行本差異頗多, 論長恨歌旣竟,茲於長恨歌傳,略綴一言。今所傳陳氏傳文凡二本,其一即載於白氏長慶集壹貳 歌詩部分, 寅恪案:覃溪之論, 垂於將來也。 尚未 免未達一間, 雖未解當時文章體制, 」一節小說體中不可少之議論文字,但據與此傳及歌極有關係之作品, 但較趙宋以來尊杜抑白強作解事之批評, 不知長恨歌乃唐代「駁雜無實」「文備衆體」之小說中之 獨勝一籌。 亦欲懲尤物, 因附錄於此 如

鶯鶯傳者觀之,

終覺分量較少。

至麗情集本傳文,

則論議殊繁於通行本,

如 :

!女德無極者也。 死生大別者也。 故聖人節其慾, 制其情, 防人之亂者也。 生惑其志, 死

溺其情, 又如之何?

又如通行本只有「如漢武帝李夫人」一語, 而麗情集本則於敍貴妃死後別有:

承當世博識通人, 並垂敎正, 明集中桃花源記之初本。(見淸華學報第拾壹卷第壹期拙著桃花源記旁證。)此傳或亦其比歟?儻 包括議論於詩中之文體,而爲微之天才之所表現者也。寅恪嘗以爲搜神後記中之桃花源記, 行本乃經樂天所刪易。 段故事之非妄。又取兩本傳文讀之,即覺通行本之文較佳於麗情本。 皆是其例。 叔向母云,其(其當作甚)美必甚惡。 而觀麗情本詳及李夫人故事, 議論逐漸減少,此亦文章體裁演進之跡象。其後卒至有如連昌宮詞一 則幸甚矣。 亦可旁證鄙說「漢皇重色思傾國」一句, 李延年歌曰,傾國復傾城。 此之謂也。 頗疑麗情本爲陳氏原文, 實暗啓此歌下半

乃淵 種

通

增入漢武帝李夫人故事,乃白陳之所特創。詩句傳文之佳勝,實職是之故。此論長恨歌者不可不 故必須合併讀之, 綜括論之,長恨歌爲具備衆體體裁之唐代小說中歌詩部分,與長恨歌傳爲不可分離獨立之作品。 知也。(見校補記第八則) 賞之, 評之。明皇與楊妃之關係, 雖爲唐世文人公開共同習作詩文之題目, 而

第二章

唐摭言壹伍雜記條云:

造化無爲字樂天。童子解吟長恨曲, 白樂天去世,大中皇帝以詩弔之曰,綴玉聯珠六十年。 胡兒能唱琵琶篇。文章已滿行人耳, 誰教冥路作詩仙。浮雲不繫名居易, 一度思卿一愴然。

據此可知也。故茲箋證長恨歌訖, 寅恪案:此詩是否眞爲宣宗所作, 乃次及琵琶引焉。 姑不置論。然樂天之長恨歌琵琶引兩詩相提並論, 其來已久,

寅恪於論長恨歌篇時,曾標舉文人之關係一目。其大旨以爲樂天當日之文雄詩傑, 各出其作品互

下,始得明瞭。 年代,於同中求異,異中見同, 事觀摩,各竭其才智競求超勝。故今世之治文學史者,必就同一性質題目之作品,考定其作成之 否則模糊影響, 爲一比較分析之研究,而後文學演化之蹟象,與夫文人才學之高 任意批評,恐終不能有眞知灼見也。今請仍以比較之研究論樂天

張戒歲寒堂詩話上云:

四六

不侔矣。 如琵琶行, 雖未免於煩悉, 然其語意甚當, 後來作者, 未易超越也。

適從者, 亦可因比較研究, 蓋樂天之作此詩, 於長恨歌之論,不可依據者也。 集壹陸。)中, 寅恪案:樂天於長慶末年所作, 而樂天當日實已超越微之所作,要爲無可疑者。至樂天詩中疑滯之字句,不易解釋, 今取兩詩比較分析, 固屬不可。 然後詮論樂天之詩。元氏長慶集貳陸琵琶歌(原注云:寄管兒兼誨鐵山。)云: 自述其平生得意之詩,首舉長恨歌而不及琵琶引。若據以謂樂天不自以琵琶引爲 然樂天心中絕不以長恨歌爲拙,而琵琶引爲較工,則斷斷可知。此張氏琵琶引工 亦已依其同時才士, 即元微之, 所作同一性質題目之詩, 其因襲變革之詞句及意旨, 而取決一是。斯又此種研究方法之副收穫品矣。茲先考定微之作品年 然張氏謂琵琶引「語意甚當, 編集拙詩成一十五卷因題卷末戲贈元九李二十。七律(白氏長慶 固歷歷可覩也。 後來作者, 後來作者能否超越, 未易超越。 即琵琶歌, 」其言甚允。 或莫知 所不敢 加以改

去年御史留東臺。 公私變促顏不開。 今春制獄正撩亂, 晝夜推囚心似灰。

寅恪案:舊唐書壹肆憲宗紀上(參同書壹陸陸元稹傳。)云:

〔元和五年二月〕東臺監察御史元稹攝河南尹房式於臺,擅令停務。 貶江陵府士曹參軍。

同書壹陸陸元稹傳略云:

引

[元和]四年,奉使東蜀。使還,令分務東臺。

微之此詩旣有去年東臺及今春制獄之句, 明琵琶歌作於元和五年也。 又依白氏長慶集壹貳琵琶引

元和十年予左遷九江郡司馬。明年秋,送客湓浦口。

以改進也。 是樂天琵琶引作於元和十一年。元作先而白作後, 此樂天所以得見元作, 而就同一性質題目, 加

以作詩意旨言之, 兩詩雖同贊琵琶之絕藝, 且同爲居貶謫閒散之地所作, 然元詩云:

始爲管兒歌此歌。 我爲含悽歎奇絕。 歌此歌, 許作長歌始終說。 寄管兒, 藝奇思寡塵事多。 管兒管兒憂爾衰。 爾衰之後繼者誰。 許來寒暑又經過。 繼之無乃在鐵山。 如今左降在閑處,

鐵 山已近曹穆間。 性靈甚好功猶淺, 急處未得臻幽閒。 努力鐵山勤學取。 莫遣後來無所祖。

之詩中所說, 間之隔。故不及樂天之一題一意之明白曉暢也。 則微之盛贊管兒之絕藝, 不過久許管兒作一詩, 復勉鐵山以精進,似以一 以事冗未暇, 此點當於研究兩家所作新題樂府時詳論之。 及謫官得閑, 題而兼二旨。雖二旨亦可相關,但終不免有 乃償宿諾, 其旨似嫌庸淺。 又微 而白

我聞琵琶已歎息。 又聞此語重唧唧。 同是天涯淪落人, 相逢何必曾相識。

詩云:

則旣專爲此長安故倡女感今傷昔而作,又連綰己身遷謫失路之懷。 詠之人,二者爲一體。眞可謂能所雙亡, 主賓俱化, 專一而更專一 ,感慨復加感慨。 直將混合作此詩之人與此詩所 豈微之浮泛

之作,所能企及者乎?琵琶引序云:

予出官二年, 恬然自安。 感斯人言,是夕始覺有遷謫意。

因爲長句, 歌以贈之。

乃有眞實情感之作。與微之之僅踐宿諾,償文債者,大有不同。其

工拙之殊絕,復何足怪哉。

是樂天此詩自抒其遷謫之懷,

復次, 樂天晚歲之詩友劉夢得, 亦有泰娘歌一篇。 (劉夢得文集玖。)其引略云:

盡得其術。 泰娘本韋尚書[夏卿]家主謳者。 居一二歲, 攜之以歸京師。 初尚書爲吳郡得之, 京師多新聲善工,于是又損(捐)去故技, 命樂工誨之琵琶, 使之歌舞。 以新聲度 無幾何,

州刺史張懸所得。 而泰娘名字往往見稱于貴遊之間。元和初,尚書薨于東京, 其後懸坐事謫居武陵郡(朗州。)卒。泰娘無所歸。 泰娘出居民間。 地荒且遠,

久之,爲蘄

無有能知其

维客聞之, 爲歌其事。

曲,

則泰娘事頗與樂天所詠者相類。 而詩云:

朱絃已絕爲知音,

雲鬢未秋私自惜。

舉目風煙非舊時。

夢尋歸路多參差。

乃以遺妾比逐臣,其意境尤與白詩「同是天涯淪落人,相逢何必曾相識。」之句近似。惟劉詩多述

第二章 琵 琶 引

止可 樂天於作琵琶引以前, 且劉 月王叔文之黨坐謫官者十年不量移條及下連昌宮詞章。) 固有得見此詩之可能。 慨有所 前所作。 十一月己卯 視 遭 冥會也。 爲各別發展, 亦在京師。 特以簡鍊勝, 遇之經過, 而夢得於元和十年春, 貶朗 而此時却未見有交際往復之跡象,且二詩之遣詞亦絕不相似。 州司 是知白之琵琶引與劉之泰娘歌, (參舊唐書壹陸拾新唐書壹陸捌劉禹錫傳, 雖甚稱其絕藝, 亦可據見也。 互不相謀者。 馬。 曾見夢得泰娘歌與否耳。 至元和十年二月召至京師。 曾與柳子厚元微之諸逐客, 蓋二公以謫吏逐臣, 劉詩固爲佳作, 而不詳寫琵琶之音調。 其關係殆非如其與元之琵琶歌實有密切聯繫者 考夢得此詩爲任朗州司馬時 讀琵琶引者, 不可不參讀。 三月, 詠離婦遺妾。 此則與元之琵琶歌白之琵琶引不同 同由貶所召至長安。 以爲連州刺史。 通鑑貳叁玖唐紀憲宗紀元和十年一 其事旣相近, 然則二公之藉題自詠 即 (劉夢得于永貞元 所成爲問題者, 惟劉白二公晚歲 元 時樂天爲左贊善 宜乎於造意感 和十年二 月以

叙述 又李公垂悲善才一詩(全唐詩第壹捌函李紳壹。)亦與元白二公之琵琶歌琵琶引性質類似。 參互並 或 讀, 事己身變遷之故。 則李詩 未能· 人我雙亡, 撫今追昔, 不勝惆悵。 其意境似嫌稍遜。 取與微之所作相較, 又考公垂此詩 有 自爲優越。 但若與樂天之作

南

譙寂

寞三春晚。(南譙即滁州之舊稱。可參通典壹捌壹州郡典古揚州上

滁州

永陽郡

五〇

當是任滁州刺史時所作。公垂於元和十五年閏正月,自山南幕召爲右拾遺充翰林學士。

中, 非虚 公垂之心伏白樂天,皆文雄詩傑,歷盡甘苦,深通彼己之所致。 短李伏歌行。」及「李二十常自負歌行,近見吾樂府五十首,默然心伏。 琶引以後。且其間李公垂似已因緣窺見樂天之詩,而所作猶未能超越。 四月量移江州長史。 、參新唐書壹捌壹李紳傳及翰苑題名。) 其年冬, |月轉壽州刺史。(參全唐詩第壹捌函李紳壹轉壽春守七律。)則悲善才一詩作成之時間, 知制誥。 而元和時代同時詩人,如白樂天之心伏劉夢得, 二公同在長安者, (參舊唐書壹柒上敬宗紀及壹伍玖韋處厚傳等。)復遷滁州刺史, 約歷二年之久。此後公垂于長慶四年二月流貶端州, 樂天亦自忠州召還, (見附論戊白樂天與劉夢得之詩。 後之讀者所涉至淺, 拜司門員外郎, 者, 然後知樂天所謂,「苦敎 (參長恨歌章。 於大和四年 至寶曆 既不能解 轉主客郎 遠在琵 元

乃妄爲品第, 疑及之者。惟南宋之洪邁,博學通識之君子也。其人讀樂天詩至熟, 可以爲證。其涉及此詩而致疑于實無其事, 並附鄙見以辨釋之。 何其謬耶!古今讀此詩者衆矣, 雖所得淺深,各有不同, 樂天藉詞以抒其天涯淪落之感者,凡二條。 觀所著容齋隨筆論白詩諸 而於詩中所敍情事,多無

白樂天琵琶行, 蓋在尋陽江上爲商人婦所作。 而商乃買茶於浮梁, 婦對客奏曲,樂天移船,

容齋三筆陸白公夜聞歌者條云:

31

歌者。 日, 見其人, 夜登其舟與飲, 夜泊鸚鵡洲, (寅恪案, 有婦顏 如雪。 了無顧忌。 豈非以其爲長安故倡女, 不以爲嫌耶?集中又有一篇題云, 在白氏長慶集拾。)時自京城謫尋陽, 秋江月澄澈。 獨依帆檣立, 鄉船有歌者, 娉婷十七八。夜淚似眞珠,雙雙墮明月。 發調堪悲絕。 宿于鄂州,又在琵琶行之前。 歌罷繼以泣, 泣聲通復咽。 借問 誰 家婦, 尋聲 其詞 夜聞

不議也。今詩人罕談此章,聊復表出。

遇

必寄之吟詠,

非有意於漁色。

然鄂州所見亦一女子獨處,

夫不在焉。瓜田李下之疑,樂天深於詩,多於情者也。

故所

歌泣何淒切。

一問一霑襟,低眉終不說。

陳鴻長恨歌傳云,

又容齋五筆柒琵琶行海棠詩條云::

樂天之意, 安故倡所作。 無乃好事移西蜀。 入獨處婦人船中, 白樂天琵琶行一篇, 與之相似。 直欲攄寫天涯淪落之恨爾。 予竊疑之。 是不然, 相從飲酒, 天涯流落俱可念, 讀者但羨其風致, 唐世法網雖于此爲寬, 此真能用樂天之意者, 至於極絲彈之樂,中夕方去。豈不虞商人者,它日議其後乎? 爲飲一尊歌此曲。 敬其詞章, 東坡調黃州, 何必效常人章摹句寫而後已哉 然樂天嘗居禁密,且謫宦未久,必不肯乘夜 至形於樂府, 賦定惠院海棠詩, 之句, 其意亦爾也。 詠歌之不足, 遂以謂眞爲長 有陋邦何處得此花 或謂 殊無 一話

寅恪案:容齋之論,

有兩點可商。一爲文字敍述問題,一爲唐代風俗問題。洪氏謂「樂天夜登其

舟與飲, 了無顧忌。 」及「乘夜入獨處婦人船中, 相從飲酒, 至於極絲彈之樂,中夕方去。

置 差別。 事之假設, 敍述問題也。 安故倡, 蓋日本往日雖曾效則中國無所不至,如其近世之於德國及最近之於美國者然。但其所受影響最深 商 亦未言及其何時從商婦船中出去,洪氏何故臆加「中夕方去」之語?蓋其意以爲樂天賢者, 送客之船中,故能添酒重宴。否則江口茶商外婦之空船中,恐無如此預設之盛筵也。且樂天詩中 司馬移其客之船, 則「移船相近邀相見」之「船」,乃「主人下馬客在船」之「船」, 婦船中, 一言。考吾國社會風習, 多爲華夏唐代之文化。 斯事顯淺易見,不待詳論也。 船相近邀相見。 特不過一尋常之外婦。 亦爲贅賸矣。 若不中夕出去, 夫此詩所敍情事, 旣不如洪氏之詮解, 以就浮梁茶商外婦之船, 添酒回燈重開宴。 然容齋所論禮法問題, 故其社會風俗, 如關於男女禮法等問題,唐宋兩代實有不同。此可取今日日本爲例 豈非此夕逕留止於其中耶?讀此詩而作此解, 其關係本在可離可合之間, 惟其關於樂天此詩者有二事可以注意:一即此茶商之娶此長 千呼萬喚始出來, 與中國今日社會風氣經受宋以後文化之影響者, 而邀此長安故倡從其所乘之船出來, 實涉及吾國社會風俗古今不同之大限, 則洪氏抵觸法禁之疑問可以消釋, 非「去來江口守空船」之「船」。 猶抱琵琶半遮面。 以今日通行語言之,直「同居」而已。 未発可驚可笑。 進入江州司馬所 故不能不 即本無其 蓋江州 此文字 既夜入

之於此故倡,茶商之於此外婦,皆當日社會輿論所視爲無足重輕,不必顧忌者也。此點已於拙 即唐代當時士大夫風習,極輕賤社會階級低下之女子。視其去留離合,所關至小之證。是知樂天 天亦此新興階級之一人,其所爲如此,固不足怪也。其詳當別於論樂天之先世時更述之。 不拘守禮法, 元微之於鶯鶯傳極誇其自身始亂終棄之事,而不以爲慚疚。其友朋亦視其爲當然, 讀鶯鶯傳文中論及之矣。二即唐代自高宗武則天以後,由文詞科舉進身之新興階級, 與山東舊日士族甚異。寅恪于拙著唐代政治史述論稿中篇論黨派分野時已言之。 而不非議。 大抵放蕩

序云:

凡六百一十二言。

盧校本作六百一十六言。注云:

二部

寅恪案:盧抱經之勘校甚是。惟諸本皆作六百一十二言,故爲標出之。

詩云:

間關鶯語花底滑, 幽咽泉流冰下難。

寅恪案:汪本及全唐詩本俱作「幽咽泉流水下灘」而于水字下注云:「一作冰。 」盧校本作「水下難」, 於難字下注灘字。 那波本作「冰下灘」。 」攤字下注云:「一

謂當作泉流冰下難, 白樂天間 關鶯語花底滑, 故下文接以冰泉冷澀。 幽咽泉流水下灘。 泉流水下灘不成語, 難與滑對, 難者, 滑之反也。 且何以與上句屬對?昔年曾 鶯語花底,

下,形容澀滑二境,可謂工絕。

一與本集互證。白氏長慶集陸肆箏云:其說甚是。今請更申證其義。

霜珮鏘還委,冰泉咽復通。

正與琵琶引此句章法文字意義均同也。

衣偏宛轉。」「六么散序多籠撚。 」「斷弦砉騞層冰裂。 」諸句, ,皆是其例。 惟其中

二與與此詩有關之微之詩互證。元氏長慶集貳陸琵琶歌中詞句與樂天此詩同者多矣。如「霓裳羽

冰泉嗚咽流鶯澀。(可參元氏長慶集壹柒贈李十二牡丹花片因以餞行七絕, 鶯澀餘聲絮墮風

之句。)

之因革, 段氏之說,其正確可以無疑。然則讀樂天琵琶引,不可不並讀微之琵琶歌,其故不僅在兩詩意旨 句實爲樂天「間關鶯語花底滑,幽咽泉流冰下難。」二句演變擴充之所從來。取元詩以校白句, 可藉以窺見。且其字句之校勘,亦可取決一是也。

又微之詩作「流鶯澀」,而樂天詩作「間關鶯語花底滑」者, 蓋白公旣擴一而成二句, 若仍作澀,

**免兩句同說一端,殊嫌重複。白詩以滑與難反對爲文,自較元作更精進矣。** 

又元氏長慶集貳陸何滿子歌(原注云:張湖南座爲唐有熊作。)略云:

鶯泥晚花啼漸嬾

我

來湖外拜君侯,

正值灰飛仲春琯。

纏綿疊破最慇懃,

整頓衣裳頗閑散。

冰含遠溜咽還通,

又同集壹捌盧頭陀詩序云:

元和九年, 張中丞領潭之歲, 予拜張公于潭。

[元和八年冬十月己巳]以蘇州刺史張正甫爲湖南觀察使。

舊唐書壹伍憲宗紀下云:

據此, 詩。然則其擴琵琶歌「冰泉嗚咽流鶯澀。」之一句爲琵琶引「間關鶯語花底滑, 微之何滿子歌作於元和九年春, 而樂天琵琶引作於元和十一年秋,是樂天必已見及微之此 幽咽泉流冰下難。

之二句,蓋亦受微之詩影響。而樂天箏詩之「冰泉咽復通。」乃作於大和七年。在其後,不必論

云

風入春松正凌亂,

鶯含曉舌憐嬌妙。 新題樂府五絃彈

嗚嗚暗溜咽冰泉,

殺殺霜刀澀寒鞘。

元氏長慶集貳肆

五六

大聲麤若散,颯颯風和雨。小聲細欲絕,切切鬼神語。

同集叁新樂府五絃彈云:

第五絃聲最掩抑。 隴水凍咽流不得。 (李公垂悲善才, 寒泉注射雕水開。 句,可與此參證。

寒氣中人肌骨酸。 五絃並奏君試聽。 曲終聲盡欲半日, 淒淒切切復錚錚。 四座相對愁無言。 鐵擊珊瑚一兩曲,冰寫玉盤千萬聲。殺聲入耳膚血慘。 座中有一遠方士,唧唧咨咨聲不已。

拾遺時所作, 寅恪案:元白新樂府此兩篇皆作於元和四年, (見白氏長慶集壹傷唐衢二首之貳。)俱在樂天作琵琶引以前,亦可供樂天琵琶引中 (見新樂府章。)白氏秦中吟亦是樂天於任諫官即左

赤ゴ

摹寫琵琶音調一節之參考者也。

此時無聲勝有聲。

唐詩別裁捌選錄此詩, 並論此句云:

可貴如此。 諸本此時無聲勝有聲。 既無聲矣, 下二句如何接出。 宋本無聲復有聲, 謂住而又彈也。

寅恪案:詩中「此時無聲勝有聲。」句上有「冰泉冷澀弦疑絕。疑絕不通聲暫歇。」之語。夫旣曰

稿

五八

古本, 之疑滯, 聲暫歇」, 深可疑也。 誠所不解。 即是「無聲」也。 且遍考今存白集諸善本,未見有作「此時無聲復有聲」者, 聲暫歇之後, 忽起「銀瓶乍破」「鐵騎突出」之聲, 何爲不可接出?沈氏 不知沈氏所見是何

詩云:

自言本是京城女,家在蝦蟇陵下住。

國史補下略云:

坊中語也。 舊説, 董仲舒墓, 門人過, 皆下馬。 故謂之下馬陵。 後人語訛爲蝦蟆陵, 皆訛謬所習。 亦曰

寅恪案:樂天此節所詠乃長安故倡自述之言,宜其用坊中語也。 又同書同卷略云:

酒〔之名品,〕則有京城之西市腔蝦嫲陵郎官清阿婆清

此長安故倡, 藝,豈即所謂「酒家胡」者耶? 而吾國中古傑出之樂工亦多爲西域胡種。 其幼年家居蝦螂陵, 似本爲酒家女。又自漢以來, 則此長安故倡, 旣居名酒之產區, 旅居華夏之中亞胡人, 復具琵琶之絕 頗以善釀

又樂府雜錄上琵琶條略云:「貞元中有王芬, 與綱同時。 曹綱善運撥, 若風雨, 而不事叩絃。 曹保保, 其子善才, 興奴長於攏燃, 其孫曹綱, 不撥, 稍軟。 皆襲所藝, 時人謂曹綱 次有裴

是。然則裴興奴不必是女子也。劇曲家之說,未知所本,恐不可據。俟考。 爲女子之名,如元微之連昌宮詞中之念奴是。 有右手, 興奴有左手。 」故後世劇曲中或以裴興奴當此長安故倡女。裴固西域胡姓,「奴」字亦可 但男子亦可以奴字爲名,如白樂天之幼弟「金剛奴」

妝成每被秋娘妬。

府寄同年科第詩自注俱作「呂二炅」。復證以下引樂天詩題, 寅恪案:元氏長慶集壹柒贈呂三(寅恪案:元氏長慶集壹陸全唐詩第壹伍函元稹壹陸酬哥舒大少 則三當爲二之誤。)校書云:

競添錢貫定秋娘。

白氏長慶集壹肆和元九與呂二同宿話舊感贈云:

聞道秋娘猶且在,

至今時復問微之。

又章縠才調集壹載樂天江南喜逢蕭九徹因話長安舊遊戲贈五十韻云:

多情推阿軟 巧語許秋娘。

而坊本釋此詩,乃以杜秋娘當之,妄謬極矣。(杜秋娘始末,可參杜牧樊川集壹杜秋娘詩幷序。

即此琵琶引中之秋娘,蓋當時長安負盛名之倡女也。樂天天涯淪落,感念昔遊,遂取以入詩耳。

第一 音

引

商 人重利輕別離, 前月浮梁買茶去。

寅恪案:據元和郡縣圖志貳捌江西觀察使饒州浮梁縣條云:

國史補下略云::

每歲出茶七百萬馱,

税十五餘萬貫。

風俗貴茶, , 茶之名品益衆, 而浮梁之商貨不在焉。

則知此商人所以往浮梁之故。蓋浮梁之茶,雖非名品,

而其產量極豐也。

江 州司馬青衫濕 詩之結語云:

寅恪案:此句爲世人習誦, 已爲一口頭語矣。 然一考唐代文獻, 則不免致疑。 元和郡縣圖志貳捌

江西觀察使江州條云:

云, 江州,上。(寅恪案, 江州, 中。 與此異。 新唐書肆壹地理志云, 據白氏長慶集貳陸江州司馬廳記云, 江州潯陽郡, 上。 上州司馬, 與此同。 舊唐書肆拾地理志 秩五品。 知元和時

江州實爲上州。 舊志所記, 蓋舊制也。

蓋江州乃上州也。 上州, 司馬一人, 唐六典叁拾上州條(舊唐書肆貳職官志新唐書肆玖下百官志同。)云: 從五品下。

舊唐書肆伍輿服志(參唐會要叁壹章服品第目, 新唐書貳肆輿服志。)略云:

上元元年,八月,又制文武三品已上服紫, 四品服深緋, 五品服淺緋, 六品服深綠, 七品服

八品服深青, 九品服淺青。

唐六典肆禮部郎中員外郎條略云:

親王三品已上二王後服用紫, 五品已上服用朱, 七品已上服用綠, 九品已上服用青, 流外庶

然則樂天此時適任江州上州司馬之職, 何以不著緋而著青衫耶?錢竹汀十駕齋養新錄拾唐人服色

視散官條云:

人服

用黄。

野客叢書(貳柒)云,唐制服色不視職事官, (寅恪案,此說甚是。可參尚書故實公自言四世祖河東公爲中書令著緋條及唐會要叁壹 而視階官之品。 至朝散大夫方換五品服色, 衣銀

内外官章服目。

唐制服色旣視階官之品,

維元和十二年歲次丁酉二月辛酉朔二十一日, 將仕郎守江州司馬白居易。

考白氏長慶集貳叁祭匡山文云:

是元和十二年樂天之散官爲將仕郎,而據舊唐書肆貳職官志(通典肆拾職官典同。)云:

從第九品下階將仕郎。(文散官。)

是將仕郎爲最低級之文散官。樂天於元和十一年秋作此詩時,其散官之品亦必爲將仕郎無疑,

無從更低於此品也。唐會要叁壹內外官章服目云:

開元八年二月二十日勅,都督刺史品卑者,借緋及魚袋,永爲常式。

樂天此時止爲州佐,固唯應依將仕郞之階品著靑衫也。(見校補記第九則)

蓋

## 第三章 連昌宮

新樂府之體制改進創造而成之新作品也。 與樂天長恨歌詳悉比較,又不俟論也。總而言之,連昌宮詞者,微之取樂天長恨歌之題材依香山 氏長慶集叁。)所謂「首句標其目,卒章顯其志。」者,有密切關係。樂天所謂「每被老元偷格律。 元微之連昌宮詞實深受白樂天陳鴻長恨歌及傳之影響, 而成。其篇首一句及篇末結語二句,乃是開宗明義及綜括全詩之議論。又與白香山新樂府序(白 (白氏長慶集壹陸編集拙詩成一十五卷因題卷末戲贈元九李二十詩。)殆指此類歟?至於讀此詩必 合併融化唐代小說之史才詩筆議論爲

題懸擬之作。若屬前者, 凡論連昌宮詞者, 有一先決問題, 則微之一生可以作此詩之年月,共計有五,悉條列於下, 即此詩爲作者經過行宮感時撫事之作,抑但爲作者閉門伏案依 論其可否。

#### 一說 討淮蔡時作

洪邁容齋隨筆壹伍(容齋詩話肆。)連昌宮詞條云:

其末章及官軍討淮西乞廟謨休用兵之語,蓋元和十一二年間所作, 殊得風人之旨, 非長恨

稿

云

若僅依詞旨論斷, 寅恪案:容齋以連昌宮詞作於元和十一二年間, 則爲讀者普通印象, 無論何人, 未知是否僅依詩中詞旨論斷, 皆具同感。 匪特容齋一人如是也。 抑或更別有典據。 元氏長慶集

貳肆連昌宮詞 (全唐詩第壹伍函元稹貳肆。)云: 官軍又取淮西賊, 此賊亦除天下寧。

殆即依此立論。 爲希望語氣。 詩中所言,皆憲宗時事。今皇明指憲宗, 今皇神聖丞相明。 「憲宗旣平蜀之劉闢, 故此詩之作應在方討淮蔡, 考憲宗討淮蔡, 詔書纔下吳蜀平。 吳之李錡。 前後共歷三年之久,自元和九年多起,至十二年多止。 今又討淮西之吳元濟,若復除之,則天下寧矣。 故此詩之作必在憲宗之世。 而尙未竟功之時。洪氏此詩作於元和十一二年間之說 據讀者普通印象論。 即資治通 」後二句 此 刀山

鑑自卷貳叁玖唐紀憲宗紀所載: 元和九年冬十月甲子, 以嚴緩爲申光蔡招撫使, 督諸道兵討吳元濟。

至卷貳肆拾唐紀憲宗紀所載

元和十二年冬十月甲戌, (李) 愬以檻車送吳元濟詣京師。 己卯, 淮 西行營奏獲吳元濟。

是也。 月[丙戌朔]上御興安門受俘, (參閱舊唐書壹伍新唐書柒憲宗紀等。)其實即此數年中眞與此詩之著作有關者, 遂以吳元濟獻廟社, 斬於獨柳之下。

止元和十

年十一年及十二年, 而九年不能在內, 以詩中有:

又有牆頭千葉桃,風動落花紅蔌蔌

寫實之句, 爲暮春景物, 不能屬於其他節候。 元和九年之暮春尚未出兵討淮蔡, 故不能計入也。

新唐書叁捌地理志云:

河南道河南府河南郡壽安縣。 (原注云:西一十九里有連昌宮, 顯慶三年置。)

竟功時所作,則在元和十年十一年或十二年暮春之時,微之至少必須經過壽安,然後始有賦此詩 寅恪案:壽安約當今河南省宜陽縣地。連昌宮所在之地旣已確定,連昌宮詞如爲憲宗討淮蔡而未

(甲)元和十年暮春

茲逐年考之於下:

舊唐書壹肆憲宗紀(通鑑貳叁捌唐紀憲宗紀元和五年亦紀此事。)云:

元和五年二月,東臺監察御史元稹攝河南尹房式於臺,擅令停務。貶江陵府士曹參軍。

爲墓誌皆紀述簡略。 微之自元和五年貶謫出長安後,至十年春始由唐州還京,復出京至通州。 今摘錄其集中諸詩句及其題目自注等, 與十年還京出京之道途時日有關者 兩唐書本傳及白香山所

以資參證。

元氏長慶集壹玖載:

桐孫詩幷序。(原注云:此後元和十年韶召入京及通州司馬已後詩。)

詩。 元和五年予貶掾江陵。 三月二十四日宿曾峯館, 當時草慶, 未暇紀題。及今六年,韶許西歸, 山月曉時,見桐花滿地,因有八韻寄白翰林 去時桐樹上孫枝已拱矣。予亦白鬚兩莖,

年正月題。

而蒼然班鬢,

感念前事,

因題舊詩,

仍賦桐孫詩一絕。

又不知幾何年復來商山道中。

元和十

去日桐花半桐葉, 別來桐樹老桐孫。 城中過盡無窮事, 白髮滿頭歸故園。

西歸絕句

五年江上損容顏。 今日春風到武關。 兩紙京書臨水讀, 小桃花樹滿商山。 (原注云:得復言

樂天書。)

只去長安六日期。 多應及得杏花時。 春明門外誰相待, 不夢閑人夢酒巵。

今朝西渡丹河水, 心寄丹河無限愁。 若到莊前竹園下, 殷勤爲繞故山流。 (原注云:丹淅,

莊之東流。)

二藍田宅。

寒寒風雪摊深爐。 彼此相傷指白鬚。 一夜思量十年事, 幾人強健幾人無。(原注云:宿實十

雲覆藍橋雪滿溪。 須臾便與碧峯齊。 風回麵市連天合, 凍壓花枝着水低。

留呈夢得子厚致用(原注云:題藍橋驛。)(詩略。)

寅恪案:以上皆微之由唐州至長安途中所作。

遭西別樂天博載樊宗憲李景信兩秀才姪谷三月三十日相餞送

寅恪案:以上爲微之出長安至通州時所作。

今朝相送自同遊。酒語詩情替別愁。

忽到灃西總回去,

一身騎馬向通州。

又元氏長慶集壹貳載:

酬樂天東南行詩一百韻幷序

我病方吟越, 元和十年三月二十五日予司馬通州。二十九日與樂天於鄠東蒲池村別。十三年予以赦當遷。 君行已過湖。 (原注云:元和十年閏六月至通州, 染瘴危重。八月,聞樂天司

馬江州。)

又云:

重喜登賢苑, 方看佐伍符。(原注云:九年樂天除太子贊善,予從事唐州也。)

又云:

因教罷飛檄, 便許到皇都。 (原注云:十年春自唐州韶予召入京。)

第三章

連昌宮詞

寅恪案 :以上諸句爲微之追述元和十年春由唐州至長安, 又由長安至通州事。

詩序雖記元和十年正月。 壽安殊遠, 微之此次行程適合, 長安途中所賦詩, 據上引諸詩, 似難迂道經過。 知微之於元和十年春由唐州入長安,實取藍武大道,證以韓退之貶潮州刺史, 如左遷至藍關 不過有去國還京之別耳。 繹其文意, 即使經過, 示姪孫湘七律及武關西逢配流吐蕃七絕等, 乃補題元和五年三月二十四日之舊作者。 其時之景物亦與連昌宮詞所言者不符, 微之此役, 西渡丹淅, 北經武藍, (悉見昌黎集拾。)與 自不 本草綱目叁伍桐 距連昌宮所在之 可能。 其桐 其出

二月開花,紅紫色。禮云,三月桐始華者也。

引陶弘景說云:

期。 是正 疑 一月時 多應及得杏花時。」則此商山之「小桃花」必爲先杏開花之桃, 商 山道 桐 中 尚未開花。 氣候 不同, 微之取元和十年正月詠桐孫詩附題於元和五年三月詠桐花詩後, 花事特早也。 西歸絕句言:「小桃花樹滿商 而與千葉桃之較後開者不 山。」又言:「只去長安六日 不可 同 因 此

### 考陸游老學庵筆記肆云:

來 陽 公梅 始 相 識 顧 所謂 共 宛陵王文恭 驚 小桃者, 疑。 便當索酒花 (寅恪案, 上元前後即著花, 前醉, 文恭王珪諡也。)集皆有 初 見今年第一 狀如垂絲海棠。 枝。 小桃詩。 但謂桃 曾子固雜識 花 歐詩云, 有 云 種 早開 正月二十間 雪裏花 者耳。 開 及 天章閣 未 遊 知 成

賞小桃。 正 謂此也。

留呈子厚諸人七律, 是微之元和十年正月間於商山途中所見之小桃花正是此種植物, 證以柳子厚集肆貳所載 確無可疑矣。

又據微之題藍橋驛

韶追赴都二月至 灞亭上

之於元和十年春季正月一小部分或二月之全部分及三月幾全部分之時日, 豐水出縣東南終南山, 合推計之, 之七絕, 王程有限, 至六月之時間, 月末,微之即取道灃鄠, 此連昌宮詞不能作於元和十年暮春之證也。 + 年前南渡客, 是微之略前行而子厚後隨。 謂微之元和十年到長安之時,約在正月下旬或二月初旬,諒不甚遠於事實也。 (白氏長慶集壹柒夷陵贈微之詩云:「各限王程須去住。」此借用。)亦無從得而賞之詠 又在由長安至通州之途中。 自發源北流至縣東二十八里北流入渭。)由秦至巴赴通州司馬之任。 四千里外北歸人。 折向 西南, 子厚於二月達灞亭, (元和郡縣圖志貳關內道京兆府鄠縣, 韶書許逐陽和至, 連昌宮牆頭之千葉桃花, ,即長安近傍。時微之已先到長安。故綜 驛路開花處處新。 自開自謝, 悉在長安。 東北至府六十五里, 微之關山遠隔 夏季自四月 是年二 然則微

乙)元和十一年暮春 丙)元和十二年暮春

連昌宮詞

元氏長慶集壹貳獻滎陽公詩五十韻云:

自傷魂慘沮, 何暇思幽玄。 ( 種病瘧二年, 求醫在此, 滎陽公不忍歸之瘴鄉。)

寅恪案:舊唐書壹伍捌鄭餘慶傳云:

[元和]九年拜檢校右僕射兼興元尹, 充山南西道節度觀察使。 三歲受代,十二年除太子少

師

又舊唐書壹伍憲宗紀下云:

[元和]九年三月辛酉以太子少傅鄭餘慶檢校右僕射興元尹山南西道節度使。

同書同卷(參吳廷燮唐方鎭年表肆。)又云:

[元和十一年]冬十月丁巳以刑部尚書權德輿檢校吏部尚書兼興元尹, 充山南西道節度使。

又白氏長慶集壹柒題詩屛風絕句並序云:

[元和]十二年冬微之猶滯通州,予亦未離湓上。(詩略。)

據此可知微之自元和十年六月至十二年冬,皆在山南西道區域。 能越道境而遠遊。 權俱爲當時之文儒大臣, 故微之因病求醫, 今旣無微之奉使越境之事, 此連昌宮詞不能作於元和十一年或十二年暮春之 得至其地。若連昌宮所在之壽安縣,則隷屬河南道。 而載之尤負盛名。 微之之能久留興元, 要非無因。且通州即在山南西道 興元爲山南西道節度使治所, 微之非有公務,不

第二說

淮蔡平後作

連昌宮詞旣不能作於元和十年十一年十二年暮春,即不作於淮蔡用兵之時。元和紀年凡十五歲 憲宗暴崩於十五年正月庚子,(見舊唐書壹伍憲宗紀等。)則僅十三年十四年暮春,與此詩之著作

(丁)元和十三年暮春

有關。復依前例條辨之於下:

白氏長慶集貳陸三遊洞序云:

平淮西之明年(即元和十三年)冬,予自江州司馬授忠州刺史。微之自通州授虢州長史。又明 之反櫂送予至下牢戍。又翌日(即三月十二日)將別未忍,引舟上下者久之。 年(即元和十四年)春祗命之郡,與知退偕行。三月十日參會於夷陵。翌日(即三月十一日)微

又白氏長慶集壹柒載七言十七韻詩贈微之序云:

微不同。)遇微之於峽中,停舟夷陵,三宿而別 十年三月三十日別微之於灃上。十四年三月十一日夜,(三遊洞序言,三月十日參會於夷陵。

暮春仍在山南西道管內,無由得至壽安。此連昌宮詞不能作於元和十三年暮春之證也。 據此,則微之雖於元和十三年冬自通州司馬授虢州長史。至十四年春,始下峽赴新任。

戊)元和十四年暮春

舊唐書壹陸陸元稹傳云:

(元和)十四年, 自號州長史徵還, 爲膳部員外郎。

新唐書壹柒肆元稹傳云:

(元和)末召拜膳部員外郎。

昌宮詞之作, 寅恪案:憲宗崩於元和十五年正月。 似即在元和十四年暮春, 微之於十四年已由號州長史徵還長安, 自通州赴虢州, 就長史新任, 便道經過壽安之時。 爲膳部員外郎,

則連

元和郡縣圖志伍云:

河 南道 河南府壽安縣, 東北至府七十六里。

河南道號州,

同書陸云:

東至東都四百五十里。

未知與當時實用之曆如何?即使不同, 是微之未至虢州之前, 北地通常桃花開放之時, 其所謂「去年今日」即淸明日也。 必先經東都。 約值舊曆清明節時。 然考是年清明在三月三日,(此係據陳垣先生中西回史日曆, 而東都與壽安, 要不過相差一二日,於本文論證之主旨無關也。)微之發夷 唐孟棨本事詩崔護「人面桃花」之句, 僅七十六里之隔, 便道經行, 亦頗意中之 爲世所習

**陵時,已爲三月十二或十三日,據通典壹捌叁州郡典壹叁云:** 

夷陵郡南至江陵水路二百三十七里。

江陵郡北至襄陽郡四百四十五里。

又同書壹柒柒州郡典柒云:

襄陽郡去東京八百五十七里。

前元和十年由唐州至長安由長安至通州二役爲迅速,然亦非四月初不能到壽安,是距淸明已一月 今復加計自東京至壽安七十六里,共爲一千六百一十五里。縱唐代里度較今略短,又微之行程較

元和十四年二月壬戌, 通鑑貳肆壹唐紀憲宗紀元和十四年條(參閱舊唐書壹貳肆新唐書貳壹叁李正己傳等。)云: 田弘正捷奏至。乙丑命户部侍郎楊於陵爲淄青宣撫使。 己巳李師道首

之久,恐不及見連昌宮牆頭千葉桃落紅蔌蔌之狀矣。且元和十四年二月憲宗平定淄青最爲當時

自廣德以來, 垂六十年, 藩鎭跋扈, 河南北三十餘州自除官吏, 不供貢賦。 至是盡遵

朝廷約束。

函至。

據此, 相見, 壹伍。)之誇大其事,亦不能僅敍至淮西平定而止, 微之即行色忽忽,所經過之大都邑如洛陽等,似不能不稍作淹留,與當地官吏及平生親故 因從得知平齊消息。 連昌宮詞若適作於是年暮春, 絕不道及淄青一字。於此轉得一強有力之反 則雖不必如劉夢得平齊行(劉夢得文集

此連昌宮詞不能作於十四年暮春之證也。

穿巫峽,便下襄陽向洛陽。」之道也。故似可能。但一考當年節候與花事之關係,又爲不可能。 僅有元和十年暮春及元和十四年暮春二者之可能。 連昌宮詞旣爲依題懸擬之作, 者既皆不可能, 嶺家何在, 總而言之, 連昌宮詞若爲作者經過行宮感時撫事之作, 雪擁藍關馬不前。」之道也。故不可能。 則連昌宮詞非作者經過其地之作, 然則作於何時何地乎?考元氏長慶集壹貳見人詠韓舍人新律詩因有 而爲依題懸擬之作, 元和十四年其所取之道, 而元和十年微之所取之道, 則其著作之時日, 據此可以斷定也。 用地 即杜子美「即從巴峽 理行 即韓退之「雲橫秦 程以相參校

是微之在通州司馬任內曾有機緣得見韓退之詩之證也 喜聞韓古調, 兼愛近詩篇。 好去老通川。 (原注云 :自謂。 戲贈略

云:

又考韓昌黎文集拾和李司勳過連昌宮七絕云:

夾道 疏槐出老根。 高甍巨桷壓山原。 宮前遺老來相問, 今是開 元幾葉

此爲退之和李正封之詩, 頗疑李氏原詩或韓公和作, 其時微之尚在通州司馬任內, 李氏 原作, 遠道流傳, 今不可得見。 未出山南西道之境。 至次年即十三年春間遂爲微之所見, 退之作詩之時, 觀其託諸宮邊遺老問對之言, 爲元和十二年冬淮西適平之 因依題懸擬,

亦

元元和今昔盛衰之感**,** 若非見他人作品, 與退之絕句用意遣詞尤相符會。 有所暗示, 決無無端忽以連昌宮爲題, 否則微之既在通州司馬任內, 而賦此長詩之理也。 其居距 據舊唐 連

壹陸陸元稹傳云:

未審如何。

若微之此篇之波瀾壯闊,

決非昌黎短句所可並論,

又不待言也。

至唐詩紀事陸貳鄭

嵎

夫河南雖是郡望**,** 連昌宮門內之竹, 稹河南人, 但洛陽則爲微之仕宦居遊之地。 元和元年四月除右拾遺。 牆頭之桃, 俱所目見。 出爲河南縣尉。 故依題懸擬, 元和五年未貶江陵以前, 亦能切合。 四年奉使東蜀, 李正封之作, 使還 至少亦當 分務 其 東 度經 藝術高 過

頗備, 學意境衡之, 頤養而已。 津陽門詩, 可供參考之資耳。 才劣而識陋, 雖亦託之旅邸主翁之口, 誠無足取。 其所以至今仍視爲敍述明皇太真物語之鉅製者, 較之近人王湘綺之圓明園詞, 爲道承平故實, 抒寫今昔盛衰之感。然不過塡砌舊聞, 王觀堂之頤和園詞, 殆由詩中子注搜采故實 或猶有所 不 逮。 祝

以待天子臨幸。 語氣。故「年年耕種宮前道,今年不遣子孫耕。」二句, 洪氏作於元和十一二年間之說, 綜合此詩末章前後文意言之,「官軍又取淮西賊,此賊亦除天下寧。」二句爲已然語氣, 「今年」爲淮西始平,天下遂寧之年, 即以依題懸擬言, 猶有未諦也。 文意甚明。 意謂今年不依往年之例, 是此詩實成於元和十三年暮春。 耕種宮前御道 而非希望

連昌宮詞末章「老翁此意深望幸, 努力廟謨休用兵。」之語, 與後來穆宗敬宗兩朝之政治尤有關係

舊唐書壹柒貳蕭俛傳 略徵舊史述之於下: (參舊唐書壹陸穆宗紀長慶元年二月乙酉馬總奏條。)云:

鎭之卒, 處,每百人之中限八人逃死, 穆宗乘章武恢復之餘, 兵以靜亂,時已治矣,不宜黷武。 藩, 籍既不充, 合而爲盜, 尋行招募。 伏於山林。 即位之始, 謂之消兵。帝既荒縱, 烏合之徒, 明年朱克融王庭湊復亂河朔, 勸穆宗休兵偃武。 兩河廓定, 動爲 賊敗。 四鄙無虞, 不能深料, 又以兵不可頓去,請密韶天下軍鎮有兵 由是再失河朔, 而俛與段文昌屢獻太平之策, 呼而遺卒皆至。 遂韶天下如其策行之。 蓋消兵之失也。 朝廷方徵兵 而 以爲

舊唐書壹陸陸元稹傳云:

潭峻歸朝當在長慶以前也。)出稹連昌宮詞等百餘篇奏御。 即弑憲宗之黨, 壹柒肆元稹傳作, 南宮散郎。 南監軍崔潭峻甚禮接稹, 中人以潭峻之故, 即日轉祠 而憲宗於元和十五年正月二十七日被弒, 長慶初潭峻方親幸, 部郎中, 爭與稹交。 不以掾吏遇之,常徵其詩什諷誦之。長慶初潭峻歸朝, 尋知制誥。 而知樞密魏弘簡尤與稹相善。 較妥。 由是極承恩顧。 蓋新唐書壹柒玖李訓傳明言潭峻爲元和逆黨, 無何, 穆宗嗣位。 穆宗大悦, 召入翰林, 穆宗愈深知重。 問 次年, 稹安在?對曰, 爲中書舍人承旨 方改元長慶。 河東節度 (新唐書 今爲 是

使裴度三上疏,言稹與弘簡爲刎頸之交,謀亂朝政。 言甚激計。 穆宗顧中外人情,乃罷稹内

授工部侍郎。上恩顧未衰,長慶二年拜平章事。 韶下之日, 朝野無不輕笑之。

非本文所能詳盡。但連昌宮詞末章之語,同於蕭俛段文昌「消兵」之說,宜其特承穆宗知賞,而爲 此逆黨中之一人。故「消兵」之說,爲「元和逆黨」及長慶初得志於朝之士大夫所主持。 朋黨, 當憲宗之世,主持用兵者,宰相中有李吉甫武元衡裴度諸人,宦官中則有吐突承璀。 與士大夫相似。其弒憲宗立穆宗及殺吐突承璀之諸宦官, 世號爲「元和逆黨」。 然宦官亦有 此事始末, 崔潭峻者

又白氏長慶集肆伍策林序略云:

裴晉公所甚不能堪。此則讀是詩者,

於知人論世之義,不可不留意及之也。

和初予罷校書郎, 與元微之將應制舉。 揣摩當代之事, 構成策目七十五門。

四十四 銷兵數

然則「銷兵」之說,本爲微之少日所揣摩當世之事之一。作連昌宮詞時,不覺隨筆及之。殊不意其 若使逃不捕,死不填, 則其數自銷也 則十年之間,十又銷其三四矣。故不散棄之,則軍情無怨也。不增加

又微之賦此詩述玄宗時事託諸宮邊野老之口,如「弄權宰相不記名,依稀憶得楊與李。」之例,其 竟與己身之榮辱升沈,發生如是之關係。 此則當日政治之環境實爲之也。

連昌宮詞

如「明年十月東都破, 有與史實不甚符合者, 御路猶存祿山過。」之句, 可置不論。 然今日流傳之本,亦有後人妄加注解者, 今全唐詩本第壹伍函元稹貳肆此句下注云:: 則不得不亟爲刪

天寶十三年禄山破洛陽。

閉。」之句下注云: 年十月燕寇來,九廟千門虜塵涴。」之句。)其最可異者,莫如「爾後相傳六皇帝, 月」自是微之誤記,至「十三年」之誤,更不待言也。(又元氏長慶集貳肆新題樂府立部伎亦有「明 寅恪案:舊唐書玖新唐書伍玄宗紀及通鑑貳壹柒同記天寶十四載十二月丁酉安祿山陷洛陽,「十 不到離宮門久

六字。豦詩中文義,謂「今皇」平吳蜀,汉隹西,(連昌肅代德順憲穆。

相傳已久。 諭淮西書參證。)則「今皇」自是指憲宗而言,自玄宗不到離宮之後,順數至「今皇」即憲宗,只有五 六字。據詩中文義,謂「今皇」平吳蜀,取淮西, (連昌宮詞此數句,可與元氏長慶集貳壹代嚴綬 何能預計穆宗或加數玄宗而成「六皇帝」?嘗徧考諸本,俱作「六」,無作「五」者, 頗疑微之於本朝君主傳代之數, 似不應譌誤至此, 而諉爲野老記憶不眞之言。 可知此誤字 如元氏

五紀四宗, 容受隱忍

長慶集伍貳沂國公魏博德政碑所云:

其「四宗」自指肅代德順四宗而言, 所言旣無譌舛,以彼例此, 則應亦不致誤述也。 或者此詩經崔 第三章 連昌宮詞

幸東都, 以兼指穆宗歟?此言出於臆測, 於「老翁此意深望幸,努力廟謨休用兵。」之句,遂斷章取義,不顧前後文意,改「五」爲「六」,藉 柒拾新唐書壹柒叁裴度傳, 潭峻之手進御於穆宗,閹椓小人,未嘗學問,習聞當日「消兵」之說,圖復先朝巡幸之典,殊有契 殆亦受宦官之誘惑者,經羣臣極諫,並畏藩鎭稱兵, 茲迻錄通鑑原文及胡三省注於下, 別無典據,姑備一說於此,以待他日之推證可也。然其後敬宗欲 似亦與「望幸」句意關涉, 不得已中止。其事本末見舊唐書壹 讀此詩者

通鑑貳肆叁唐紀敬宗寶曆二年條云:

可併取以參證焉

畏幽鎭之稱兵而罷耳。 上曰,從來言事者,皆言不當往。 安之連昌宮是也。)裴度從容言於上曰, 外郎盧貞,按視修東都宮闕及道中行宮,(胡注, 自長安歷華陝至洛, 今宮闕營壘 上(敬宗)自即位以來,欲幸東都。宰相及朝臣諫者甚衆,上皆不聽,決意必行。已令度支員 三月丁亥,敕以修東都煩擾,罷之。(胡注,史言修東都之役,非以羣臣論諫 百司廨舍, 率已荒阤。 如卿言,不往亦可。會朱克融王庭湊皆請以兵匠助修東 陛下儻欲巡幸, 國家本設兩都, 宜命有司歲月間徐加完葺, 以備巡幸。 自多難以來, 沿道皆有行宮。 然後可往。 茲事遂廢。 而罷, 如壽

作「玄武樓前花萼廢。」全唐詩本「成」字下亦有「一作前」之注, 案唐六典柒云:

至十四年又取永嘉勝業坊之半以置朝。 興慶宮在皇城之東南, 東距外郭城東垣。 自大明宮東夾羅城複道經通化門磴潛通焉。)宮之南曰 (原注云:即今上龍潛舊宅也。 開元初以爲離宮。

通陽之西曰花萼樓。 (原注云: 樓西即寧王第, 故取詩人棠棣之義以名樓焉。

宋敏求長安志陸大明宮條(參考徐松唐兩京城坊考壹。)云:

北面一門曰玄武門。 (原注云:德宗造門樓,外設兩廊, 玄武樓在大明宮之北面,興慶宮遠在大明宮之東南,而花萼樓又在興慶宮之西南隅, 持兵宿衛, 謂之北衙。)

薄。」之句爲誤, 萼樓準諸地望, 騎驄馬峨嵋下,面帶霜威卓氏前。」之語。(並見長恨歌章。)此皆詩人泛用典故率意牽附之病,不 譏謔附謬誤類及詩人玉屑壹壹。)殊不知微之使東川,作好時節絕句,(元氏長慶集壹柒。)亦有「身 以峨嵋山在唐代嘉州境內,明皇由長安至成都不經過其下也。(見夢溪筆談貳叁 決無在玄武樓前之理。昔人譏白香山長恨歌「峨嵋山下少人行,旌旗無光日色 則花

衰之感,不明著一字,即已在其中。若非文學之天才,焉能如是。此微之所以得稱「元才子」而無 爲帝王友愛之美談。玄武樓造於德宗之時,成神策宿衞之禁域。一成一廢,對舉並陳。而今昔盛 城坊宮苑之方位, 獨此詩說長安今昔之變遷,託諸往來年少之口,乃寫實之詞, 豈能顚倒錯亂至此。 若斯之類, 自屬後人傳寫之誤。況花萼樓建於玄宗之世, 與泛用典故者不同。其於

#; 宗紀實本之舊文,夫君舉必書,巡幸陪都之大典,決無漏載之理。考舊唐書玄宗自開元二十四年 愧者耶?又五代會要壹捌前代史條載賈緯之語,謂「自唐高祖至代宗,紀傳已具。」則今舊唐書玄 十月丁丑自東都還西京之後, 當依張宗泰校記改爲丁卯。)遂未重到洛陽。 `(新唐書伍玄宗紀及通鑑貳壹肆俱作丁卯。 是後率以冬季十月或十一月幸華清宮, 而舊唐書捌玄宗紀作丁

崤函一步。 故通鑑貳壹肆開元二十五年九月條(參閱新唐書伍叁食貨志。)云:

從未東出

停今年江淮所運租。 先是西北邊數十州多宿重兵, 請行糴法於關中。 自是關中蓄積羨溢,車駕不復幸東都矣。癸巳敕河南河北租應輸含嘉倉 戊子敕以歲稔穀賤傷農,命增時價什二三和糴東西畿粟各數百萬斛, 地租營田皆不能膽, 始用和糴之法。 有彭果者, 因牛仙客獻

或 |史補上略云:

者皆留輸本州。

甫初拜相, 玄宗開元二十四年時在東都, 竊知上意, 乃言, 因宮中有怪, 兩京陛下東西宮也。 明日召宰相欲西幸。 臣請宣示有司, 裴稷山張曲江諫。 即日西幸。 上大悦。 是時 李林

雖册壽王妃楊氏在開元二十三年十二月乙亥,(見通鑑貳壹肆及考異並唐大詔令集肆拾全唐文叁

駕至長安,

不復東矣。

捌册壽王楊妃文。) 其時玄宗尚在東都,未還西京。然自楊妃於開元二十九年正月二日入道,

宮之後,(詳見長恨歌章辨曝書亭集伍伍書楊太眞外傳後。)明皇旣未有巡幸洛陽之事,則太眞更 無以皇帝妃嬪之資格從遊連昌之理,是太眞始終未嘗伴侍玄宗一至連昌宮也。詩中「上皇正在望 不可與史家傳信之文視同一例,恐讀者或竟認爲實有其事,特爲之辨正如此。 楊太眞外傳下云:「華清宮有端正樓,即貴妃梳洗之所。」) 構成藻飾之詞。才人故作狡獪之語, 仙樓,太眞同凭欄干立。」及「寢殿相連端正樓。太眞梳洗樓上頭。」等句, 、皆傅會華淸舊說,

至元氏長慶集壹柒燈影七絕云:

以「楊太眞以〔天寶〕三載方入宮。」則殊疏舛,殆誤會通鑑書法所致。寅恪別於長恨歌章詳論之矣。 仗避岐薜,楊氏諸姨車鬭風。」之句,容齋續筆貳開元五王條已言其非事實,故茲不再辨。惟洪氏 則亦微之依據世俗傳說, 函張祜貳連昌宮七絕所謂:「玄宗上馬太眞去」者, 又在微之之後, 尤可不論矣。 陽畫夜無車馬,漫掛紅紗滿樹頭。 姑妄聽之,姑妄言之。旣有「見說」之語,則更不足辨。 見說平時燈影裏,玄宗潛伴太真遊。 又詩中「百官隊 而全唐詩第壹玖

寅恪案:通鑑貳壹捌唐紀叁肆至德元載六月〔安祿山〕遣孫孝哲將兵入長安條考異 明年十月東都破。 新傳又云〔安〕禄山至〔長安〕,怒,大索三日。按舊傳〔張〕通儒爲西京留守編檢諸書, 御路猶存禄山過。 驅令供頓不敢藏, 萬姓無聲淚潛墮。 略

云:

禄山自

詩云:

過連昌宮前之御路,故此事與楊貴妃之曾在連昌宮之端正樓上梳洗者,同出於假想虛構。 是祿山自反後未嘗至長安。連昌宮爲長安洛陽間之行宮,祿山旣自反後未嘗至長安, 則當無緣經 宋子京

爲史學名家,尚有此失,特附論及之,庶讀此詩者不至沿襲宋氏之誤也。

場」之意也。又如「蛇出燕巢盤鬭拱。」之「鬭拱」, 此詩復有唐代當時術語須略加詮釋者,如「賀老琵琶定場屋。」之定,及樂府雜錄敍貞元時長安東 西兩市互鬭聲樂事中,「西市豪族厚賂莊嚴寺僧善本,以定東鄽之勝。」之定,其義爲「壓」及「壓 即近日營造學者所盛稱之「斗拱」。斗字義不可

蓋古代工匠用以代鬭字之簡寫, 殊非本字。然今知此者鮮矣。(見校補記第十則)

通,

# 第四章 豔詩及悼亡詩附:讀鶯鶯傳

罗卫士 農業 乙州 じまず

元氏長慶集叁拾敍詩寄樂天書云::

淡眉 不幸少有伉儷之悲, 目, 館約頭鬢, 撫存感往, 衣服脩廣之度及匹配色澤尤劇怪豔, 成數十詩, 取潘子悼亡爲題。 因爲豔詩百餘首。 又有以干教化者, 詞有今古, 近世婦 又兩 人量

成爲戲曲中之大國鉅製, 多見, 者而作。微之以絕代之才華,抒寫男女生死離別悲歡之情感。其哀豔纏綿,不僅在唐人詩中不可 以悼亡詩與豔詩分歸兩類。其悼亡詩即爲元配韋叢而作。 第伍卷所錄微之詩五十七首, 兩類詩, 寅恪案:今存元氏長慶集爲不完殘本。 而影響及於後來之文學者尤巨。如鶯鶯傳者,初本微之文集中附庸小說,其後竟演變流傳 亦不得不相校並 論也。 即是其例。 雖非爲一人而詠, 夫此二婦人與微之之關係, 其第玖卷中夜閒至夢成之等詩, 但所謂豔詩者, 其豔詩則多爲其少日之情人所謂崔鶯鶯 既須先後比較觀察之, 大抵在其中也。 皆爲悼亡詩, 微之自編詩集。 章縠才調 則微之此

夫此 會中所處之地位。 兩類詩本爲男女夫婦而作。 寅恪前著讀鶯鶯傳一文, (三)當日風習道德二事影響及於微之之行爲者。 已論及之。 故於(一)當日社會風習道德觀念。(二)微之本身及其家族在當 此文即附於後幅, 雖可取而 並 必先明其梗概, 觀, 然爲 通 院元 然後 氏 此兩 始 可 類

詩,

故不憚

重複煩悉之譏,

仍爲總括序論於此,

以供讀此兩類詩者之參考焉

於消滅 用或不善利用此兩種以上不同之標準及習俗, 易之時, 用。 間際, 拙者之所爲適 量衡並 縱覽史乘, 各是其是, 存雜用, 常呈一紛紜綜錯之情態, 而後已。 此轉移升降之士大夫階級之人, 凡士大夫階級之轉移升降, 與之相反。 其不肖者巧者, 則其巧詐不肖之徒,以長大重之度量衡購入,而以短小輕之度量衡售出。 而互非其非也。 於是兩者之得失成敗, 則多享受歡樂, 斯誠亦事實之無可如何者。 即新道德標準與舊道德標準, 往往與道德標準及社會風習之變遷有關。 有賢不肖拙巧之分別, 以應付此環境而已。譬如市肆之中, 往往富貴榮顯, 即決定於是矣。 雖然, 新社會風習與舊 身泰名遂。 而其賢者拙者, 值此道德標準社會風習紛亂 其故何也?由於善利 社會風習並 當其新舊蛻嬗之 常感受苦痛 新舊不同之 其賢而 存 度 終

感及事功之二部。 生時 間約 事功之部爲仕宦。 可分爲 兩節 若古代之士大夫階級, 爲中歲以前, 故白氏長慶集壹肆和夢遊春詩一百韻序略云: 關於社會政治者言之, 爲中歲以後。 人生本體之施受於外物者, 則中歲以前, 情感之部爲婚姻 亦可 別爲情

八六

者 下陳夢遊之中所以甚感者, 之既 亦不可使不知。 到 江 陵, 又以 樂天知吾(者)也,不敢不使吾子知。 夢遊春七十韻寄予, 敍婚仕之際所以至感者。 且題其序曰, 微之微之,予斯文也, 斯言也, 故廣足下七十韻爲一百韻, 不可使不知吾者 尤不可使不知吾 知, 重 一爲足 知 吾

南北朝之官有淸濁之別, 不研究微之之仕宦與婚姻問題, 爲不肖爲巧爲得利成功, 德標準社會風習並存雜用, 夫婚仕之際,豈獨微之一人之所至感, 即因之而低降淪落。 至唐高宗武則天時, 而至唐之中葉, 者知。幸藏之云爾。 不須多舉。 故士大夫之仕宦苟不得爲淸望官, 即微之樂天所生值之世, 無不繫於此仕婚之二事。 茲僅引一二事於下,已足資證明也。 如隋書貳陸百官志中所述者, 所發生之統治階級及社會風習之變動。 正不肖者用巧得利, 而欲明當日士大夫階級之仕宦與婚姻問題, 實亦與魏晉南北朝以來士大夫階級之一生得失成敗至有關 此二者已適在蛻變進行之程途中, 而賢者以拙而失敗之時也。 以是欲瞭解元詩者,依論世知人之旨, 婚姻苟不結高門第, 即是其例。 請略述之, 至於門族與婚姻之關係, 則其政治地位, 故欲明乎微之之所以 以供論 則不可不知南北 其不同之新舊道 證焉 固不可 社會階 朝以

晉書捌肆楊佺期傳云:

自 云門户承籍, 江表莫比。 有以其門第比王珣者猶恚恨。 而時人以其晚過江, 婚宦失類

南史叁陸江夷傳附斅傳云:

江斅謝淪。 邀逢聖時, 中書舍人紀僧眞幸於(齊)武帝, 我不得措此意。可自詣之。僧眞承旨詣數, 階榮至此。爲兒婚得荀昭光女, 稍歷軍校, 即時無復所須,唯就陛下乞作士大夫。 容表有士風。 登榻坐定, 數便命左右曰, 謂帝曰,臣小人,出自本縣武 移吾牀讓 帝曰, 由

僧真喪氣而退,告武帝曰,士大夫故非天子所命。

終不免受此種風習之影響。 據此,可知當時人品地位, 故婚仕之際,仍爲士大夫一生成敗得失之所關也。 實以仕宦婚姻二事爲評定之標準。 唐代政治社會雖不盡同於前代,

但

若以仕之一事言之,微之雖云爲隋兵部尚書元巖之六世孫, 然至其身式微已甚, 觀其由明經出身

事可證。如康駢劇談錄(參唐語林陸補遺。)略云:

退。 元和中李賀善爲歌篇, 日執贄造門。 爲韓愈所知,重於縉紳。 賀覽刺不答。遽入,僕者謂曰, 時元稹年少,以明經擢第,亦工篇什。 明經及第, 何事看李賀?稹惭恨而 當交

裴廷裕東觀奏記上(參新唐書壹捌貳李珏傳唐語林叁識鑒類。)略云:

李珏趙郡贊皇人。早孤,居淮陰, 舉明經。李絳爲華州刺史,一見謂之曰,日角珠庭, 非常

人也。 當撥進士科, 明經碌碌, 非子發跡之路。

新唐書壹捌叁崔彥昭傳(參尉遲偓中朝故事。)云:

彦昭與王凝外昆弟也。

凝大中初先顯,

而彦昭未仕。

嘗見凝,

凝倨不冠帶,

慢言日,

不若從

明經舉。彦昭爲憾。

王定保摭言壹序進士條云:

其艱難謂之三十老明經, 五十少進士。

正其由明經出身之途徑, 據此得見唐代當日社會風尙之重進士輕明經。 正如其棄寒族之雙文, 微之年十五以明經擢第, 而婚高門之韋氏。於仕於婚, 而其後復舉制科者, 皆不憚改轍, 以增 乃改

高其政治社會之地位者也。

又元氏長慶集伍玖告贈皇祖祖妣文云:

蔭籍朘削, 龜繩 用 稀。 我曾我祖, 仍世不偶。 先尚書盛德大業, 屈於郎署。

同集同卷告贈皇考皇妣文云:

外姻。 先夫人備極勞苦, 惟積洎稹, (元氏長慶集壹壹答姨兄胡靈之見寄五十韻序云, 幼遭閔凶, 躬親養育。 積未成童。稹生八歲,蒙騃孩稚, 昧然無識, 遺有清白, 截長補敗,以禦寒凍。質價市米, 九歲解賦詩, 以給 明旦。 飲酒至斗餘乃醉, 依倚舅族, 業無

、樵蘇。 分張

時

## 方依倚舅族。

悱, 科之放佚恣肆, 以故唐代進士科, 武后以來所拔起之家門, 之幼年家庭寒苦之情況, 案白氏長慶集陸壹河南元公墓誌銘及新唐書柒伍下宰相世系表等,微之曾祖延景, 而不重經學, 南頓丞。即告祭文所謂「我曾我祖,仍世不偶。」者。父寬,比部郎中,即告祭文所謂「屈於郎 即其例證。 (後悱復以罪降虢州別駕, (微之雖以明經舉,然當日此科記誦字句而已,不足言通經也。)尚才華而不尙禮法, 宜乎鄭覃李德裕以山東士族禮法家風之立場, 不守禮法, 爲浮薄放蕩之徒所歸聚,與倡伎文學殊有關聯。 用進士詞科以致身通顯, 其告祭考妣文詳述無遺。 固與社會階級出身有關。 累遷舒王府長史。見元氏長慶集伍捌陸翰妻元氏墓誌銘。) 觀微 故微之縱是舊族, 由翰林學士而至宰相者。 然其任誕縱情, 欲廢其科, 觀孫棨北里志, 亦同化於新興階級, 毫無顧忌, 而斥其人也。 此種社會階級重詞賦 岐州參軍。 則北里志序略 及韓偓香匳 夫進士詞 即 高宗 祖

喪亂, 俊少年爲兩街探花使, 自大中皇帝好儒術, 鑾 輿 巡蜀 崤崡鯨鯢。 特重科第。 鼓扇輕浮, 向來聞見, 故進士自此尤盛,曠古無傳。 仍歲滋甚。 不復盡記。 予頻隨計吏, 久寓京華, 聊以編次, 僕馬豪華, 爲太平遺事云。 時亦偷遊 宴遊崇侈。 其中。 中和甲辰歲 以同年 俄逢

云:

元 白詩 箋

香匳集序略云:

往在士大夫之口, 自庚辰辛巳之際, 或樂工配入聲律, **迄辛丑庚子之間**, 粉牆椒壁,斜行小字,竊詠者不可勝記。 所著歌詩,不啻千首。 其間以綺麗得意, 大盜入關, 亦數百篇。

面, 也。 準, 寅恪案:孫序作於中和甲辰, 貞元之時, 較早,猶不敢公然無所顧忌。蓋其時士大夫階級山東士族,尙保有一部分殘餘勢力。 庚子辛丑即僖宗廣明元年及中和元年。然則進士科舉者之任誕無忌,乃極於懿僖之代。 明乎此,然後可以論微之與韋叢及鶯鶯之關係焉。 則久經亂離, 與詞科進士階級之新社會風氣,並存雜用。而工於投機取巧之才人如微之者,乃能利用之 朝廷政治方面, 略得一喘息之會, 則以藩鎭暫能維持均勢,德宗方以文治粉飾其苟安之局。民間社會方 即僖宗中和四年。 故亦趨於嬉娛遊樂。因此上下相應,成爲一種崇尙文詞, 韓序中所謂庚辰辛巳, 即懿宗咸通元年及二年, 其道德標 微之生世

風流之風氣。 長安風俗, 自貞元侈於遊宴。 國史補下云:

詡

又杜牧之感懷詩 至於貞元末, (樊川集壹。)所謂: 風流恣綺靡。

者,正是微之少年所遭遇之時代也。微之幼時,依其姊婿陸翰, 及新唐書叁玖地理志等。)爲東西兩京交通所常經繁盛殷闐之都會也。 實有不侔。蒲州爲當日之中都河中府,去長安三百二十四里,洛陽五百五十里,(見舊唐書叁玖 鳳翔。」之句。) 雖駐屯軍將,奢僭恬嬉。要之,其一般習俗,仍是樸儉。與中州之名都大邑相較 (見元氏長慶集叁拾誨姪等書,又白氏長慶集肆新樂府西涼伎云:「平時安西萬里疆。今日邊防在 居於鳳翔西北邊境荒殘之地。 微之以甫逾弱冠之歲, 出遊

内秉堅孤,非禮不可入,以是年二十二,未嘗近女色。(寅恪案, 通行本鶯鶯傳皆作年二十

自不能不被誘惑。其所撰鶯鶯傳所云:

其地, 其所聞見,

與昔迥殊,

三。兹依王性之微之年譜改作二十二。)

沈溺聲色,見其前之堅貞,亦不可信。 鳳翔之誘惑力,不及河中,因得以自持。 何以言之?姑不必論其始亂終棄之非多情者所爲, 而以守禮誇詡,欺人之言也。 及其遭遇雙文以後之 即於韋

其三遣悲懷詩之叁云:

唯將終夜常開眼,報答平生未展眉。

唯韋氏亡後未久, 裴氏未娶以前, 所謂常開眼者, 自比鰥魚,即自誓終鰥之義。 已納妾安氏。元氏長慶集伍捌葬安氏誌云: 其後娶繼配裴淑, 已違一時情感之語, 亦可不論

始辛卯歲,予友致用憫予愁,爲予卜姓而授之。

侍, 之四云: 動, 不似其自言之永久篤摯, 考成之卒於元和四年七月九日, 言行必不能始終相符, 乃關於時代之習俗, 即元和 六年。 是韋 自不可以今日之標準爲苛刻之評論。 氏亡後不過二年, 則可以推知。 則無疑也。 (見昌黎集 又微之自言眷念雙文之意,形之於詩者, 然則其於韋氏, 貳肆監察御史元君妻京兆韋氏夫人墓誌銘。)所謂 微之已納妾矣。 亦如其於雙文, 兩者俱受一時情感之激 夫唐世士大夫之不可一日. 但微之本人與章氏情感之關 如才調集伍雜思 無妾媵之 係, 辛 決 卯

取次花叢懶回顧,半緣修道半緣君

及白樂天轉述其友之事,

如全唐詩第壹

陸函白

居易壹伍和夢

遊

春詩

百韻

云:

存誠期有感, 誓志貞無黷。 京洛八九春, 未曾花裏宿。

干諛近 亦不可信也。 之在鳳翔之未近女色, 禮法之觀念仍存, 似微之真能「內秉堅孤 非禮不可入。」者,其實唐代德憲之世, 以資證明。 致身通顯。 抑更推言之, 詞科進士放蕩風流之行動, 舊唐書壹陸陸元稹傳(新唐書壹柒肆元稹傳略同。)略云:: 則其仕宦, 乃地爲之。 微之之貶江陵, 亦與婚姻同 而其在京洛之不宿花叢, 實由忤觸權貴閹宦。 猶未爲一般輿論所容許, 無節操之守。 則時爲之。 惟窺時趨勢, 山東舊族之勢力尚在, 及其淪謫旣久, 如後來懿僖之時者, 是其自誇守禮多情之語 以取利自肥耳。 忽爾變節 士大夫社會 故微

故觀微之一生仕宦之始末, 固極瞭然也 其是非雖可不置論, 二年拜平章事, 罰式一月俸, 年九月,入爲尚書左丞。 而 (元和)四年, 知樞密魏弘簡 出稹連昌宮辭等百餘篇奏御, 荆南監軍崔潭峻甚禮接稹,不以掾吏遇之。長慶初, 會宰相王播倉卒而卒, 士元追之, 朝政, 使還, 仍召稹還京。 奉使東蜀, 韶下之日, 言甚激計。 尤與稹相善。 復以 筆擊稹, 令分務東臺, 但今日吾儕取此二事以評定當日士大夫之操守品格, 適與其婚姻之關係正復符同。 劾奏故劍南東川節度使嚴礪違制擅賦。 振舉綱紀, 稹大爲路岐經營相位。 朝野無不輕笑之。 穆宗顧中外人情, 宿敷水驛, 穆宗愈深知重。 傷面。執政以稹少年後輩, 河南尹房式爲不法事, 穆宗大悦, 出郎官頗乖公議者七人。然以稹素無檢操, 内官劉士元後至, 出稹爲同州刺史,改授浙東觀察使。〔大和〕三 乃罷稹内職, 河東節度使裴度三上疏, 由是極承恩顧。 四年正月〔拜〕武昌軍節度使, 南北朝唐代之社會, 稹欲追攝, 爭廳。 潭峻歸朝,(新唐書歸朝作方親幸。 授工部侍郎。 務作威福,貶爲江陵府士曹參 中人以潭峻之故, 士元怒, 排其户。 稹襪而走 稹雖舉職, 擅令停務。 言稹與弘簡爲刎頸之 以仕婚二事衡量 上恩顧未衰, 則賢不肖巧拙分 而執政有與礪厚 既 卒於鎮。 爭與稹交, 飛 人情不厭

之二女與微之本人關係之先後爲次序,而更以涉於裴柔之者附焉。 論其事, 故此從略, 惟取豔詩及悼亡諸作略詮論之如下。 所以先豔詩而後悼亡諸作者, 至夢遊春一詩, 乃兼涉雙文成 以雙文成

元氏長慶集伍陸唐故工部員外郎杜君墓係銘幷序略云:

之者,故首論之。

棄凡近。

則李[白]尚不能歷其藩翰,

至若舖陳終始, 排比聲韻, 大或千言, 次猶數百。 詞氣豪邁, 而風調清深。 屬對律切, 而脱

況堂奥乎?

宛然。」及樂天「或爲千言或五百言律詩以相投寄」者相參校。 取此與微之上令孤楚啓(見舊唐書壹陸陸元稹傳。)所謂「思深語近,韻律調新。 丁元和體詩篇。) 乃心儀院花草堂之鉅製, 而爲元和體之上乘, 且可視作此類詩最佳之代表者也。 則知元白夢遊春詩, 屬對無差, 實非尋常遊戲之 (見附論 而風情

微之夢遊春詩傳誦已逾千載。 甚難通解。 據爾雅釋畜云:「短喙, 其間自不免有所譌誤。茲舉一例言之, 猲獢。」全唐詩第壹伍函元稹貳柒春曉云: 如「嬌娃睡猶怒」之「嬌娃」二

半欲天明半未明。 邦綏箋注本引述異記云,美女曰娃。 醉聞花氣睡聞鶯。 往兒 (寅恪案,今所見才調集諸本俱作娃兒。 殊可笑也。)撼起鐘聲動, 二十年前曉寺情 殷元勳宋

及楊太眞外傳下(參酉陽雜俎前集壹忠志類天寶末交趾貢龍腦條及開元天寶遺事下。)略云:

夢遊春詩(才調集伍。)中所述鶯鶯之妝束,如:

不多及。

瑟色。)玲瓏合歡袴。 (原注云:夾纈名。)鮮妍脂粉薄, 叢梳百葉髻, (原注云:時勢頭。)金蹙重臺履。 (原注云:踏殿樣。) 纰軟鈿頭裙, 暗淡衣裳故。 (原注云:瑟

而全唐詩第壹陸函白居易壹伍樂天和之云:

風流薄梳洗, 綺花紅石竹。 時世寬妝束。 袖輕異文綾, 裾輕單絲縠。 裙腰銀線壓, 梳掌金筐蹙。 帶纈紫葡

第四章 豔詩及悼亡詩

及才 調集壹白居易詩:江南喜逢蕭九徹, 因話長安舊遊, 戲贈五十韻。 其中摹寫貞元間京師 婦人

諸句云:

時世高梳髻, 煖手小香囊。 風流澹作妝。 戴花紅石竹, 被暈紫檳榔。 鬢動縣蟬翼, 釵垂小鳳行。 拂胸輕粉

乃有時代性及寫實性者, 非同後人豔體詩之泛描, 斯即前引微之敍詩寄樂天書所

又白氏長慶集貳和答詩序云:

近

世婦人暈淡眉目,

縮約

頭鬢,

衣服修廣之度及匹配色澤,

光劇怪豔

頃在科試間, 一群繁。 意太切, 常與足下同筆硯。 則言激。 然與足下爲文, 每下筆時, 所長在於此, 輒相顧語。 患其意太切, 所病亦在於此。 而理太周。 足下來序,果有辭 故理太周

時, 作八字低。」「圓鬟無鬢椎髻樣。 夫長於用繁瑣之詞, 若取與白香山新樂府上陽人中所寫之「天寶末年時世妝。」之「小頭鞋履窄衣裳。青黛點眉眉細 必詳述其服妝, 犯 文繁之説。 固自不侔。 今僕所和者, 即時世妝中所寫「元和妝梳」之「顋不施朱面無粉, 亦猶斯義也。 描寫 某一時代人物妝飾, 斜紅不暈赭面狀。」者, 猶前病也。 原注所云,實貞元年間之時世妝。足見微之觀察精密, 待與足下相見日, 正是小說能手。 亦仍有別。 各引所作, 後世小說, 然則即此元白數句詩, 烏膏注唇唇似泥。 稍刪其繁而晦 凡敍一重要人物出 其 亦可作 雙眉 義 記 憶確

又時勢頭者, 才調集伍微之有所教詩云:

人人總解爭時勢,

都大須看各自宜。

賦, 芙蓉即蓮花也。 國史補下蘇州進藕條云:

也。

又重臺履者,

取義於重臺花瓣, 此處則專指蓮花而言。

如李德裕會昌一

品集別集壹有重臺芙蓉

則時勢者,

即今日時髦之義,

乃當日習用之語。

但「時勢頭」則專指貞元末流行之一

種時式頭樣

近多重臺荷花, 荷花上復生一花。

與潘妃步步生蓮花之典相關,

更爲適合也。

又唐語林肆賢媛篇引因話錄云:

故取作履樣之名,

玄宗柳婕好, 因婕妤生日, 有才學, 獻王皇后一匹。 上甚重之。 婕妤妹適趙氏, 上見而賞之, 因敕宮中依樣製之。 性巧慧, 因使工鏤板爲雜花象之, 當時甚秘,

而爲夾

遍

寅恪案:雙文在貞元時, 於天下, 乃爲至賤所服 亦服夾纈袴。 可徵此種著品已流行 世, 雖賤者亦得服之矣。

微之旣云:

第四章 豔詩及悼亡詩

又夢遊春詩中先後述雙文成之二女事,

覺來八九年,

不向花迴顧。

及

云, 近作夢仙詩, 良時事婚娶。 (此指才調集伍全唐詩第壹伍函元稹貳柒夢昔時詩言。)亦知勞肺腑。 一夢何足

及:

雖云覺夢殊,同是終難駐。

而樂天亦云:

心驚睡易覺,夢斷魂難續。

是俱以雙文之因緣爲夢幻不真, 殊無足道。 其所謂「存誠」「誓志」,亦徒虛言耳。 故樂天和句云:

韋門女清貴,裴氏甥賢淑。

及:

劉阮心漸忘,潘楊意方睦。

科之人,猶不敢如後來咸通廣明之放蕩無忌, 道德之所容許,已於拙著讀鶯鶯傳詳論之。茲所欲言者, 乃眞實語也。微之所以棄雙文而娶成之,及樂天公垂諸人之所以不以其事爲非,正當時社會輿論 盡決藩籬。此所以「不向花迴顧」及「未曾花裏宿」者 則微之當日貞元元和間社會, 其進士詞

也。 名實兼得。然則微之乘此社會不同之道德標準及習俗並存雜用之時, 但微之因當時社會一部分尙沿襲北朝以來重門第婚姻之舊風, 故亦利用之,而樂於去舊就 自私自利。 綜其一生行

迹, 巧宦固不待言, 而巧婚尤爲可惡也。豈其多情哉?實多詐而已矣。

復次,其最言之無忌憚,且爲與雙文關係之實錄者,莫如才調集伍所錄之古決絕詞, (參全唐詩

第壹伍函元稹貳柒。) 其壹云:

春風撩亂百勞語,況是此時抛去時。 握手苦相問, 竟不言後期。 君情既決絕, 妾意亦參差。

借如死生別,安得長苦悲。

如雙文者爲非,所謂「一夢何足云」者也。

據此,雙文非負微之,微之實先負之,而微之所以敢言之無忌憚者,

當時社會不以棄絕此類婦人

其貳云:

詩云, 悠若雲之意也,噫。)又安能保君皟皟(全唐詩作皚皚。)之如雪。 矧桃李之當春, 嫁得浮雲壻, 競衆人而攀折。 相隨即是家。微之一生對於男女關係之觀念, 我自顧悠悠而若雲, (雲溪友議下豔陽詞條, 無論何人, 終不改易其悠 引微之贈裴氏

又云:

幸它人之(全唐詩之字下多既字。)不我先,又安能後 (全唐詩作使。) 它人之(全唐詩之字下

第四章 豔詩及悼亡詩

多終字。)不我奪。 已焉哉, 織女別黃姑。 一年一度暫相見, 彼此隔河何事無

嗚呼, 微之之薄情多疑, 無待論矣。然讀者於此詩, 可以決定鶯鶯在當日社會上之地位,微之之

其叁云:

所以敢始亂而終棄之者,

可以瞭然矣。

觀於此詩, 去又一年, 則知微之所以棄雙文,蓋籌之熟思之精矣。 一年何可徹。 有此迢遞期, 不如死生別。 然此可以知微之之爲忍人,及至有心計之 天公隔是妬相憐, 何不便教相決絕。

其後來巧宦熱中,位至將相,以富貴終其身,豈偶然哉

安先生論紅樓夢,其釋「秉風情,擅月貌,便是敗家的根本。」意謂風情月貌爲天性所賦, 其實微之之爲人,乃合甄賈寶玉於一人。其婚姻則同於賈, 能不敗家者, 微之夢遊春自傳之詩,與近日研究紅樓夢之「微言大義」派所言者,有可參證者焉。 乃人性與社會之衝突。 其旨與西土亞歷斯多德之論悲劇, 而仕宦則符於甄。 及盧梭之第雄論文暗合。 觀夢遊春詩自述其 昔王靜 而終不

賊, 寵榮非不早,遭迴亦云屢。直氣在膏肓,氛氳日沈痼。 , 性亦天之付。 乍可沈爲香, 不能浮作瓠。 不言意不快,快意言多忤。忤誠人所

是亦謂己之生性與社會衝突, 終致邅迴而不自悔。 推類而言, 以仕例婚, 則委棄寒女, 締姻高

輿論之所容許, 會之衝突也。 雖繾綣故歡, 惟微之於仕則言性與人忤, 而視爲當然之事,遂不見其性與人之衝突故也。吾國小說之言男女愛情生死離 形諸吟咏。 然卒不能不始亂終棄者, 而於婚則不語及者。 社會環境, 蓋棄寒女婚高門,乃當時社會道德 實有以助成之。 是亦人性與社

才調集伍所錄微之豔詩中如恨粧成云:

合,與社會之關係,

要不出微之此詩範圍,

因併附論之於此,或者可供好事者之研討耶?

曉日穿隙明, 開惟理 生粧點。 傅粉貴重重, 施朱憐冉冉。 柔鬟背額垂, 叢鬢隨釵飲。 凝翠暈蛾

輕紅拂花臉。 滿頭行小梳, 當面施圓 屬。 最恨落花時, 妝成猶披掩。

離思六首之貳云:

眉,

自愛殘粧曉鏡中。 鐶釵慢祭綠絲叢。 須臾日射燕脂頰, 桑紅酥旋欲融。

及其叁云:

紅羅著壓逐時新。 吉了花紗嫩麴塵。 第一莫嫌材地弱, 些些纰慢最宜人。

又有所教云:

莫畫長眉畫短眉。 人人總解爭時勢, 都大須看各自宜 斜紅傷豎莫傷垂。 (寅恪案, 此兩句乃當日時勢妝, 即時世妝之教條也。)

皆微之描寫其所謂:

近世婦人晕淡眉目, 綰約頭鬢。 衣服修廣之度及匹配色澤, 尤劇怪豔。

者也。 宜也。 當之無愧也。 細畫長眉者有異矣。「人人總解爭時勢」者,人人雖爭爲入時之化妝, 暈赭面(赭面即吐蕃。 然則微之能言個性適宜之旨, 至恨粧成所謂「輕紅拂花臉」及有所敎所謂「斜紅傷豎莫傷垂」者,與元和時世妝之「斜紅不 見新樂府章時世妝篇。)狀」者,不同,而有所教所謂短眉, 亦美術化妝之能手, 言情小說之名家。「元才子」之稱, 然非有雙文之姿態, ,復較天寶宮人之 則不相 足以

侵次**,**樂天和夢遊春詩結句云:

法句與心王,期君日三復。

自注云:

新知:·日氏浸養皂式口答寺思帚裳云: 微之常以法句及心王頭陀經相示,故申言以卒其志也。

心付頭陀經。宣恪案:白氏長慶集貳和答詩思歸樂云:

爲恨。 即此詩自注所謂心王頭陀經者也。 禪師注殘本, 近歲始見倫敦博物院藏斯坦因號貳肆柒肆, (大正續藏貳捌捌陸號。)乃一至淺俗之書, 寅恪少讀樂天此詩, 佛爲心王菩薩說投陀經卷上, 遍檢佛藏, 爲中土所僞造者。 不見所謂心王頭陀經者, 至於法句經, 五陰· 山室寺惠 亦非吾 頗以 第四章 豔詩及悼亡詩

折藏敦煌寫本, 續藏貳玖零貳號。)此書亦是淺俗僞造之經。夫元白二公自許禪梵之學, 國古來相傳舊譯之本,乃別是一書, 大正續藏貳玖零壹號。)及巴黎國民圖書館藏伯希和號貳叁貳伍法句經疏, 即倫敦博物院藏斯坦因號貳仟貳壹佛說法句經, 叮嚀反復於此二經。今日 (又中村不

得見此二書,其淺陋鄙俚如此,則二公之佛學造詣,可以推知矣。

及。蓋閨房燕昵之情意,家庭米鹽之瑣屑,大抵不列載於篇章,惟以籠統之詞, 吾國文學,自來以禮法顧忌之故,不敢多言男女間關係,而於正式男女關係如夫婦者, 概括言之而已。 尤少涉

此後來沈三白浮生六記之閨房記樂,所以爲例外創作, 然其時代已距今較近矣。

眞詩傳,則亦可推之於正式男女間關係如韋氏者,抒其情,寫其事,纏綿哀感,遂成古今悼亡詩 體之絕唱。實由其特具寫小說之繁詳天才所致,殊非偶然也。(見校補記第十一則)

微之天才也。文筆極詳繁切至之能事。旣能於非正式男女間關係如與鶯鶯之因緣,詳盡言之於會

一 此後並悼亡。
今本元氏長慶集玖第壹首夜閑題下注云:

考程大昌演繁露陸云:

元稹集十三聽庾及之彈烏夜啼引云云。

程氏所見元集卷帙, 雖與今本次第不同, 然實與宋建本符合。 (詳見涵芬樓影印明本後所附校

南宋乾道四年洪适重刊北宋宣和六年劉麟編輯之六十卷本跋云:

今之所編,又律呂乖次。惜矣,舊規之不能存也。

亦未能取校。 調集伍所收微之詩, 新唐書陸拾藝文志別集類所著元氏長慶集一百卷, 諒此卷諸作, 但詳繹今本第玖卷內諸詩所言節候景物, 猶存舊規。 俱在六十卷本外也。 此點殊爲重要, 今日本內閣文庫所藏元氏長慶集僅有殘葉, 蓋與解釋疑滯有關故也。 又小集十卷, 似亦與微之當日所賦之年月先後頗相符 傳至宋代, 亡佚已多。 不知如何 故章縠才

秋月滿床明。

如此卷第壹首夜閑

云

第貳首感小株夜合云:

第叁首醉醒不涉節候景物,未能有所論斷,第肆首追昔遊云:不分秋同盡,深嗟小便衰。傷心落殘葉,猶識合昏期。

再來門館唯相弔, 風落秋池紅葉多。

皆秋季景物也。

昌黎集貳肆監察御史元君妻京兆韋氏夫人墓誌銘云:

知此數詩,皆韋氏新逝後,即元和四年秋季所作也。

又第伍首空屋題(原注云:十月十四日夜。)云:

朝從空屋裏,騎馬入空臺。盡日推閑事,還歸空屋來。

月明穿暗隙,

燈燼落殘灰。更想咸陽

道,魂車昨夜回。

白氏長慶集壹肆感元九悼亡詩, 因爲代答三首之二答騎馬入空臺云:

道,家人覆墓迴。 君入空臺去,朝往暮還來。我入泉臺去,泉門無復開。鰥夫仍繫職,稚女未勝哀。寂寞咸陽

昌黎韋氏墓誌云:

故微之於元和四年十月十四日夜賦詩云: 其年(元和四年。)十月十三日葬咸陽, 從先舅姑兆

更想咸陽道,魂車昨夜回。

也。 白樂天代答詩云:

鰥夫仍繁職。

又云:

家人覆墓迴

微之琵琶歌(元氏長慶集貳陸。)云:

去年御史留東臺。公私變促顏不開。

其第陸首爲初寒夜寄子蒙。其第柒首城外回謝子蒙見諭有句云: 可知韋氏之葬於咸陽,微之尙在洛陽,爲職務羈絆, 未能躬往,

僅遣家人營葬也。

寒煙半床影,燼火滿庭灰。

第捌首諭子蒙及第玖第拾第拾壹三遣悲懷三首,俱無專言季候景物之句,不易推定其作成之時

日。而第拾貳首旅眠云:

夜眠兼客坐,同在火爐床。

及第拾叁首除夜云:

憶昔歲除夜,見君花燭前。 今宵祝文上, 重疊敍新年。 閑處低聲哭, 空堂背月眠。 傷心小男

女,撩亂火堆邊。

則皆微之於元和四年所作之悼亡詩也。

其第拾肆首感夢云:

行吟坐歎知何極,

影絕魂銷動隔年。

今夜商山館中夢,

分明同在後堂前。

一〇六

元和五年予貶掾江陵, 三月二十四日宿曾峰館。 及今六年, 韶許西歸, 感念前事, 因題舊詩, 山月曉時, 仍賦桐孫詩一絕。 見桐花滿地, 又不知幾何年, 因有八韻寄白翰林 復來商

山道中。元和十年正月題。

故此詩爲元和五年三月貶江陵道中所作。

貳拾首第貳拾壹首江陵三夢三首,第貳拾貳首張舊蚊幬,第貳拾叁首獨夜傷懷贈呈張侍御**,** 其第拾伍首合衣寢,第拾陸首竹簟,第拾柒首聽庾及之彈鳥夜啼引,第拾捌首夢井,第拾玖首第 微之在江陵所作。 其第貳拾肆至第叁拾壹六年春遣懷六首, 則元和六年在江陵所作。 其第叁拾貳

首答友封見贈,疑亦此時所作。至第叁拾叁首夢成之云:

則疑是元和九年春之作。何以言之,元氏長慶集壹捌盧頭陀詩序云: 燭暗船風獨夢驚。 夢君頻問向南行。 覺來不語到明坐, 一夜洞庭湖水聲。

元和九年張中丞(正甫)領潭之歲,予拜張公於潭。

同集貳陸何滿子歌云:

我來湖外拜君侯,正值灰飛仲春琯

蓋微之於役潭州,故有「船風」「南行」及「洞庭湖水」之語也。

序。)然今日亦未能別具勝解。 有考辨。由今觀之,所言實多謬誤。(見一九三五年清華學報拙著元微之遣悲懷詩之原題及其次 似其排編之次第與作成之先後均甚相符,此可注意者也。夫微之悼亡詩中其最爲世所傳誦 莫若三遣悲懷之七律三首。寅恪昔年讀其第壹首「今日俸錢過十萬」之句, 所列元氏長慶集第玖卷悼亡詩中有關章氏之作,共三十三首。 故守「不知爲不知」之訓, 姑闕疑以俟再考。 就其年月先後之可考知 而不得其解, 者 因妄

復次, 取微之悼亡詩中所寫之成之, 與其豔體詩中所寫之雙文相比較, 則知成之爲治家之賢婦

而雙文乃絕藝之才女,其鶯鶯傳云:

雖傳中所載雙文之一書二詩,

崔氏甚工刀札, 善屬文。 求索再三, 終不可見。 往往張生自以文挑, 亦不甚觀覽。

或不免經微之之修改,

但以辭旨觀之,

必出女子之手,

微之不能盡

爲代作, 故所言却可信也。 其於成之, 則元氏長慶集陸六年春遣懷八首之貳云:

檢得舊書三四紙,高低闊狹粗成行。

可知成之非工刀札善屬文者。 故白氏長慶集陸壹河南元公墓誌銘亦止云:

前夫人韋氏懿淑有聞

而已。 成之爲人, 從可知矣。 即善於諛墓之韓退之, 其昌黎集貳肆成之墓誌銘, 又元氏長慶集玖聽庾及之彈烏夜啼引云: 但誇韋 氏姻族門第之盛, 而不及其長於

唯說閑宵長拜烏。 五年前作拾遺。 今君到舍是烏力, 諫書不密丞相知。 粧點烏盤邀女巫。 謫官韶下吏驅遣。 身作囚拘妻在遠。 歸來相見淚如珠。

稍知文墨,如元氏長慶集壹貳酬樂天東南行詩一 古之名著。 述其安貧治家之事, 而不旁涉其他。 論巫假鳥以惑人之害, 夫拜鳥迷信**,** 尋常婦女,非雙文之高才絕豔可比,自無疑義也。 非微之之天才卓越, 善於屬文, 固當時風俗, 則微之本亦深鄙痛惡此迷信。 但成之如此, 專就貧賤夫妻實寫, 實不能免世俗婦女之譏。 觀元氏長慶集壹大觜烏詩, 斷難臻此也。 百韻序云: 其不言章氏之才識,以默證法推之,章氏殆 惟其如是,凡微之關於韋氏悼亡之詩,皆只 若更取其繼配裴氏 而無溢美之詞, 所以情文並佳, 以較韋氏, 遂成千 則裴氏

通之人莫知言詩者,唯妻淑在旁,知狀。

相爲贈答,亦是一證。 蓋語外之意,裴柔之亦可與言詩也。 至范氏又以爲韋裴二夫人俱有才思, 而范攄雲溪友議下豔陽詞條亦載微之於出鎭武昌時曾與柔之 則未可盡信。

又樂天於微之墓誌銘雖亦云:

记以表》是武式刀余所包裹自且自己从四貫连入后:一个夫人河東裴氏,賢明有禮,有輔佐君子之勞,封河東郡君。

而元氏長慶集貳貳初除浙東妻有阻色因以四韻曉之云:

時五月歸巴地, 今日雙旌上越州。 興慶首行千命婦, (自注云:予在中書日, 妻以郡君朝

羞未報,

君於此外更何求。

太 后於興慶宮, 猥爲班首。)會稽旁帶六諸侯。 海樓翡翠閑相逐, 鏡水鴛鴦暖共游。 我有主恩

佳作者, 渴慕虛榮, 案微之此詩, 實之故。 夫唯眞實, 直以韋氏之不好虛榮, 似不及韋氏之能安守貧賤, 詞雖美而情可鄙, 遂造詣獨絕 微之之尚未富貴。 夫不樂去近甸而就遐藩, 自可據此推知。 貧賤夫妻, 然則微之爲成之所作悼亡諸詩, 固亦人情之恆態, 關係純潔。 因能措意遣詞, 何足深責。 所以特爲 而裴氏之

悉爲眞

附:讀鶯鶯傳

因亦不欲多論。 以爲書中引海蟾子劉操, 州施肩吾(字希聖)西山群仙會眞記五卷, 及元稹所續之會眞詩。 目提要。)鄙意則謂其書本非肩吾自編,其中雜有後人依託之處,固不足怪,但其書實無甚可觀 天下篇語。)後來因有眞誥眞經諸名。 廣記肆捌捌雜傳記 茲所欲言者, 其實「會眞」一名詞, 類載有元稹鶯鶯傳, 而操乃遼燕山人,故其書當是金元間道流依託爲之者。(見所撰四庫書 僅爲「會眞」之名究是何義一端而已。 故眞字即與仙字同義, 李竦所編。(又有會眞集五卷,超然子王志昌撰。)姚鼐 亦當時習用之語。 即世稱爲會眞記者也。 而「會眞」即遇仙或遊仙之謂也。 今道藏夜字號有唐元和十年 會眞記之名由於傳中張生所 莊子稱關尹老聃爲博大眞 進 上洪

或風流放誕之女道士之代稱,亦竟有以之目倡伎者。 六朝人已侈談仙女杜蘭香萼綠華之世緣, 流傳至於唐代,仙(女性)之一名,遂多用作妖豔婦人, 其例證不遑悉舉, 即就全唐詩壹捌所收施肩

吾詩言之, 如及第後夜訪月仙子云:

自喜尋幽夜,

新當及第年。

還將天上桂, 來訪月中仙

及贈仙子云:

即是一例。

而唐代進士貢舉與倡伎之密切關係,

觀孫棨北里志及韓偓香匳集之類,

又可證

欲令雪貌帶紅芳。 更取金瓶瀉玉漿。 鳳管鶴聲來未足, 懶眠秋月憶蕭郎。

定,於是鶯鶯傳中之鶯鶯,究爲當時社會中何等人物,及微之所以敢作此文自敍之主旨, 恪別有辨證,茲不贅論。)然則仙(女性)字在唐人美文學中之涵義及「會眞」二字之界說, (致堯自序中「大盜入關」之語,實指黃巢破長安而言,非謂朱全忠也。 震鈞所編之年譜殊誤, 旣得確 寅

趙德麟侯鯖錄伍載王性之辨傳奇鶯鶯事略云:

人所持解釋之妄謬,皆可因以一一考實辨明矣。

見所謂鄭氏誌文。 保護其家備至。 清源莊季裕爲僕言, 則所謂傳奇者, 豈僕家所收未完,或別有他本爾。又微之作陸氏姊誌云,予外祖父授睦州 友人楊阜公嘗得微之所作姨母鄭氏墓誌云, 蓋微之自敍, 特假他姓以自避耳。 其既喪夫 僕退而考微之長慶集, 遭軍亂, 微之爲 不

第四章 豔詩及悼亡詩

疑。然必更以張生者, 刺史鄭濟。 乃崔鵬之女, 白樂天作微之母鄭夫人誌, 於微之爲中表。 豈元與張受命姓氏本同所自出耶?(原注云:張姓出黃帝之後, 正傳奇所謂鄭氏爲異派之從母者也。 亦言鄭濟女。 而唐崔氏譜, 永甯尉鵬亦娶鄭濟女。 可驗決爲微之無 則

後爲拓拔氏。 後魏有國, 改號元氏。)

寅恪案:.鶯鶯傳爲微之自敍之作, 則殊不易解。 新唐書壹貳伍張說傳云: 其所謂張生即微之之化名, 此固無可疑。

然微之之所以更爲張

武)后嘗問, 諸儒言氏族皆本炎黃之裔, 則上古乃無百姓乎?

此本古今文學中之常例也。夫遊仙窟之作者張文成, 之文中男女主人之姓氏, 武后之語頗爲幽默。夫後世氏族之託始于黃帝者亦多矣。元氏之易爲張氏, 其故事之演成, 眞」類小說, 則可改之姓甚衆,不知微之何以必有取於張氏也。故王性之說之不可通, 即張文成遊仙窟中男女主人之舊稱。 實取材於博望侯舊事,故文成不可改易其眞姓。且遊仙窟之書,乃直述本身事實 皆仍用前人著述之舊貫。 如後來劇曲中王魁梅香, 此爲會眞之事,故襲取微之以前最流行之「會 自謂奉使河源,於積石山窟得遇崔十娘等。 小說張千李萬之比。 若僅以同出黃帝之 無俟詳辨。 鄙意微

下官答曰, 前被賓貢, 已入甲科。 後屬搜揚, 又蒙高第。 奉勅授關內道小縣尉。 (寅恪案

之作。如:

即

門。 等語, 之地域雖殊, 其爲社會上貴婦人之泛稱, 故崔娘之稱, 即是其例。 實與其他文學作品所謂蕭娘者相同。 但崔十娘等則非真姓, 則無少異也。 而其所以假託爲崔者, 不過一屬江左高門, 又楊巨源詠元微之「會眞」事詩(全唐詩第 蓋由崔氏爲北朝隋唐之第 是山東甲族。 南北

壹貳函楊巨源崔娘詩,當即從鶯鶯傳錄出。)云:

清潤潘郎玉不如。 中庭蕙草雪消初。風流才子多春思, 腸斷蕭娘一紙書。

複字, 姓之婦人以實之, 詩第壹伍函元稹貳柒詩中有「代九九」一題,即是其例。「九九」二字之古音與鶯鳥鳴聲相近, 雖非眞名, 楊詩之所謂蕭娘, 故微之取之,以暗指其情人,自是可能之事。 然其眞名爲複字, 則與拘持楊詩之蕭姓, 即指元傳之崔女,兩者俱是使用典故也。 則可斷言。 鄙意唐代女子頗有以「九九」爲名者。如才調集伍及全唐 以爲眞是蘭陵之貴女者, 惜未得確證, 姑妄言之, 附識於此, 儻泥執元傳之崔姓, 豈非同一可笑之事耶?(鶯鶯 而穿鑿搜尋 以博通 又爲

又觀於微之自敍此段因緣之別一詩,即才調集伍夢遊春云:

人之一笑也。)

昔歲夢遊春, 盤旋竹林路 夢遊何所遇。 夢入深洞中, 果遂平生趣。 清冷淺漫流, 畫舫蘭篙渡。 過盡萬株

第四章 豔詩及悼亡詩

及白樂天和此詩(白氏長慶集壹肆。)云:

昔君夢遊春, 夢遊仙山曲。 怳若有所遇,似愜平生欲。因尋昌蒲水,漸入桃花谷。

則似與張文成所寫遊仙窟之窟及其桃李澗之桃亦有冥會之處。蓋微之襲用文成舊本,以作傳文, 固樂天之所諗知者也,然則世人搜求崔氏家譜以求合,僞造鄭氏墓誌以證妄,不僅癡人說夢爲可

唐河南元府君夫人滎陽鄭氏(則微之之母。)墓誌銘略云: 夫鶯鶯雖不姓崔, 或者眞如傳文所言乃鄭氏之所出, 而微之異派從母之女耶?據白氏長慶集貳伍

抑且好事欺人爲可惡矣。

夫人父諱濟, 睦州刺史,夫人睦州次女也。其出范陽盧氏。 天下有五甲姓,榮陽鄭氏居其

鄭之源流婚媾有家牒在。

夫諛墓之文縱有溢美, 而微之母氏出於士族, 自應可信。 然微之夢遊春詩敍其與鶯鶯一 段因緣

鄭之勳德官爵有國史在,

詩言。 我到看花時, 所謂 道性尤堅固。 仙 者, 但作懷仙句。 其定義必如上文所言乃妖冶之婦人, 非高門之莊女可知也。)亦知勞肺腑。 近作夢仙詩, (此指才調集伍全唐詩第壹伍函元稹貳柒雜憶五首詩言。)浮生轉 (寅恪案, 此指才調集伍全唐詩第壹伍函元稹貳柒夢昔時

夢何足云,

良時事婚娶。

四

之。母曰淨持,

之語**,**白樂天和此詩其序亦云:

重爲足下陳夢遊之中所以甚感者,敍婚仕之際所以至感者。

其詩復略云:

心驚睡易覺,夢斷魂難續。鸞歌不重聞,鳳兆從茲卜。韋門女清貴,裴氏甥賢淑。

又韓昌黎集貳肆監察御史元君妻京兆韋氏夫人(即微之元配)墓誌銘略云:

僕射[韋夏卿]娶裴氏皐女,皐父宰相耀卿。夫人於僕射爲季女,愛之,選壻得今御史河南元

稹。 銘曰:

也。

唐世倡伎往往謬託高門,如太平廣記肆捌柒雜傳記類蔣防所撰霍小玉傳略云:

據元白之詩意,俱以一夢取譬於鶯鶯之因緣,而視爲不足道。 顯赫,益可見韋叢與鶯鶯之差別,在社會地位門第高下而已。然則鶯鶯所出必非高門,實無可疑 詩歌碩人。 爰敍宗親。女子之事,有以榮身。夫人之先, 復觀昌黎之誌文,盛誇韋氏姻族之 累公累卿。有赫外祖, 相我唐明。

代社會之所謂仙人也。)謫在下界。生問其名居,鮑具説曰,故霍王小女,字小玉,王甚愛 大歷中隴西李生名益, 思得佳偶,博求名妓, 以進士擢第。 久而未谐。 其明年拔萃, 長安有媒鮑十一娘至日, 俟試於天官。 有一仙人(寅恪案, 夏六月至長安, 每自矜風 此 即唐

即王之寵婢也。王之初薨,諸弟兄以其出自賤庶,不甚收錄。因分與資財,

遣居於外, 易姓爲鄭氏。

及范攄雲溪友議上舞娥異條(參唐語林肆豪爽類。)略云:

道碑, 是之老大舞女耶?可發一笑。)亞相(李翺)曰, 和七八年,相去二十八九年, 李八座翱潭 而兩唐書章夏卿本傳俱不甚詳也。考章夏卿卒於元和元年, 州席上有舞柘枝者, 夏卿之胤, 正卿之姪。 即使此人眞爲夏卿之遺腹女,其年當近三十矣。 匪疾而 寅恪案, 顏色憂悴。 微之妻父韋夏卿事蹟可參呂和叔文集陸韋公神 吾與韋族其姻舊矣。 詰其事, 乃故蘇臺韋中丞愛姬所生之女 李翱之爲湖南觀察使在大 遂於賓榻中選士而嫁之 豈唐代亦多如

皆是其例。 蓋當日之人姑妄言之, 亦姑妄聽之。 並非鄭重視之, 以爲實有其事也。

論。 若鶯鶯果出高門甲族,則微之無事更婚韋氏。惟其非名家之女,舍之而別娶,乃可見諒於時人。 會所公認之正當行爲也。否則微之爲極熱中巧宦之人,值其初具羽毛,欲以直聲升朝之際, 即職是故也。 蓋唐代社會承南北朝之舊俗,通以二事評量人品之高下。此二事,一曰婚。二曰宦。凡婚而不娶 但明乎此, 與仕 其友人楊巨源李紳白居易亦知之, 而不以爲非者, iffi 則微之所以作鶯鶯傳, 不由清望官, 俱爲社會所不齒。 此類例證甚衆, 直敍其自身始亂終棄之事跡, 舍棄寒女, 且爲治史者所習知, 絕不爲之少慙, 而別婚高門, 或略諱者。 故茲不具 當日社

作此貽人口實之文,廣爲流播,以自阻其進取之路哉?(見校補記第十二則

也。 昌黎一派。 其關於韓退之者, 此傳之文詞亦有可略言者, 元白二公,亦當日主張復古之健者。 已別有論證, 茲不重及。 即唐代貞元元和時小說之創造, 其實當時致力古文, 不過宗尙稍不同, 影響亦因之有別, 實與古文運動有密切關係是 而思有所變革者, 後來遂湮沒 並不限於

舊唐書壹陸陸元稹白居易合傳論略云:

不顯耳。

策,白之奏議, 安才子,始定霸於曹劉。 潤色之文, 日, 放縱者, 國初開文館, 流於鄭衛。 咸布編 極文章之壺奧,盡治亂之根荄。 集。 高宗禮茂才。 永明辭宗, 若品調律度, 然而 向古者, 先讓功於沈謝。 虞許擅價於前, 揚推古今, 傷於太僻。 賢不肖皆賞其文, 元和主盟, 微之樂天而已。 徇華者, 蘇李馳聲於後。 或至不經。 未如元白之盛也。 或位昇台鼎, 齷 齪 臣觀元之制 局 學際天 昔建 於 宮

文章新體, 建安永明。 乃代表通常意見。 沈謝既往, 觀於韓愈, 元白挺生。

可推知矣。是以在當時一般人心目中,元和一代文章正宗, 公之意。 寅恪案:舊唐書之議論, (見唐文粹捌肆裴度寄李翶書。)及舊唐書壹陸拾韓愈傳, 雖受裴度之知賞, 應推元白, 於其爲文, 而非韓柳。 而退之之文轉不能 頗有貶詞者, 與歐宋重修唐 其故

書時,其評價迥不相同也。

又元氏長慶集肆拾制誥序云:

又明年召入禁林, 元和十五年余始以祠部郎中知制誥,初約束不暇及。後累月輒以古道干丞相,丞相信然之。 ,專掌內命。上好文,一日從容議及此。上曰,通事舍人不知書, 便其宜,

其意,率皆淺近, 宣贊之外無不可。 自是司言之臣,皆得追用古道,不從中覆。 無以變例, 追而序之, 蓋所以表明天子之復古, 然而余所宣行者,文不能自足 而張後來者之趣向耳。

全唐詩第壹陸函白居易貳叁(汪立名本白香山詩後集陸。)微之整集舊詩及文筆爲百軸,以七言長

句酬樂天,樂天次韻酬之。餘思未盡**,**加爲六韻詩。云:

日注

微之長慶初知制誥,文格高古。始變俗體,繼者效之也。

恪案:今白氏長慶集中書制誥有「舊體」「新體」之分別。其所謂「新體」,即微之所主張,而天所從

所就: 1. 刀盖紧各式: 同之復古改良公式文字新體也。

唐摭言伍切磋條略云:

韓文公著毛穎傳,

好博簺之戲。

張水部以書勸之曰,比見執事多尚駮雜無實之説,使人陳之

於前以爲歡。此有累於令德。

左傳, 因。觀昌黎集中尙別有一篇以古文作小說而成功之絕妙文字,即石鼎聯句詩序。(昌黎集貳壹。) 遊戲之筆,其感人之程度本應有別。夫小說宜詳,韓作過簡。毛穎傳之不及鶯鶯傳,此亦爲一主 毛穎傳者, 亦以古文試作小說,而真能成功者也。蓋鶯鶯傳乃自敍之文,有真情實事。毛穎傳則純爲 昌黎摹擬史記之文, 蓋以古文試作小說, 而未能甚成功者也。微之鶯鶯傳, 則似摹擬

朱子韓文考異陸論此篇云:

今按方本簡嚴, 諸本重複。 然簡嚴者, 似於事理有所未盡, 而重複者, 乃能見其曲折之詳。

白氏長慶集貳和答詩序云:

據此, 犯文繁之説。 太周則辭繁, 頃者在科試間常與足下(微之)同筆硯。每下筆時, 微之之文繁, 今僕所和者, 意太切則言激。然與足下爲文,所長在於此, 則作小說正用其所長, 猶前病也。 宜其優出退之之上也。 待與足下相見日, 輒相顧語, 各引所作, 所病亦在於此。 患其意太切, 稍删其繁而晦其義焉。 足下來序果有詞 而理太周。 故理

唐代古文運動鉅子, 雖以古文試作小說, 而能成功, 然公式文字, 六朝以降, 本以駢體爲正宗。

西魏北周之時,曾一度復古,旋即廢除。在昌黎平生著作中,平淮西碑文(昌黎集叁拾。)乃一篇 極意寫成之古文體公式文字,誠可稱勇敢之改革,然此文終遭廢棄。夫段墨卿之改作, (唐文粹

稿

伍玖。)其文學價值較原作如何及韓文所以磨易之故, 公式文字一端言, 則昌黎失敗, 而微之成功, 可無疑也。 乃屬於別種問題, 至於北宋繼昌黎古文運動之歐陽永叔爲 茲不必論。 惟就 改革當

文體之變革,其難若是。微之於此,信乎卓爾不群矣。

翰林學士,

亦不能變公式文之駢體。

司馬君實竟以不能爲四六文,辭知內制之命。

然則朝廷公式

文者也, 鶯鶯傳中張生忍情之說一 何爲著此一 段迂矯議論耶?考趙彥衛雲麓漫鈔捌云 節, 今人視之既最爲可厭, 亦不能解其眞意所在。 夫微之善於爲

唐之舉人先藉當世顯人,以姓名達之主司, 然後以所業投獻, 踰數日又投, 謂之溫卷。

錄傳奇等皆是也。

小說之文宜備衆體。

即所謂史才。

皆當日小說文中,

不得不備具者也。

5。鶯鶯傳中忍情之說,即所謂議論。會眞等詩,即所謂詩筆。蓋此等文備衆體,可以見史才,詩筆,議論。

敍述

普救寺釋道積傳。 至於傳中所載諸事 又渾瑊及杜確事, 跡經王性之考證者外, 取舊唐書壹叁德宗紀貞元十五年十二月庚午及丁酉諸條參校 其他若普救寺, 寅恪取道宣續高僧傳貳玖興福篇唐蒲州

信爲實錄。 然則此傳亦是貞元朝之良史料, 不僅爲唐代小說之傑作已也。

府

元氏長慶集貳叁樂府古題序略云::

也。以作品言,樂天之成就造詣,不獨非微之所及,且爲微之後來所仿效。(見白氏長慶集壹陸 長慶集者,似尙較樂天自言者爲詳。故茲先略述兩氏共同之理論,然後再比較其作品焉。 編集拙詩成一十五卷因題卷末戲贈元九李二十詩自注。)但以創造此體詩之理論言,則見於元氏 元白集中俱有新樂府之作, 而樂天所作, 尤勝於元。洵唐代詩中之鉅製, 吾國文學史上之盛業

其和李紳樂府新題詩,作於元和四年。是時微之實已三十一歲,不得云少時。此乃屬文之 無復依傍。 得如此, 況自風雅至於樂流, 於義咸爲贅賸, 率爾而言, 亦復稀少。 予少時(寅恪案, 此序題下題丁酉二字, 知是元和十二年微之年三十九時所作。 未可拘泥也。)與友人樂天李公垂輩謂是爲當,遂不復擬賦古題。 近代唯詩人杜甫悲陳陶哀江頭兵車麗人等,凡所歌行, 莫非諷興當時之事,以貽後代之人。沿襲古題,唱和重複, 尚不如寓意古題刺美見事, 猶有詩人引古以諷之義焉。 曹劉沈鮑之徒時 率皆即事名篇 於文或有短

府

稿

同集叁拾敍詩寄樂天書略云:

又久之。得杜甫詩數百首, 愛其浩蕩津涯, 處處臻到。 始病沈宋之不存寄興, 而訝子昻之未

暇旁備矣。

又同集伍陸唐故工部員外郎杜君墓係銘幷序云:

詩人以來未有如子美者。

白氏長慶集貳捌與元九書略云:

多,可傳者千餘首, 又詩之豪者,世稱李杜。李之作才矣,奇矣,人不逮矣,索其風雅比興, 然撮其新安吏,石壕吏, 潼關吏, 塞蘆子, 留花門之章, 十無一焉。 朱門酒肉臭, 杜詩最

路有凍死骨。之句,亦不過三四首。

寅恪案:元白二公俱推崇少陵之詩, 則新樂府之體,實爲摹擬杜公樂府之作品,自可無疑也。

白氏長慶集肆伍策林序略云:

元和初, 予罷校書郎, 與元微之將應制舉, 閉户累月, 揣摩當代之事,構成策目七十五門。

及微之首登科,予次焉。

其第陸捌目議文章(碑碣詞賦。)略云:

古之爲文者,上以紐王敎,繫國風, 下以存炯戒, 通諷諭。 故懲勸善惡之柄,執於文士褒貶

旨, 之詩不稽政, 但解 補察得失之端,操於詩人美刺之間焉。 賦合炯戒諷諭者, 則補察之義廢矣。 雖質雖野, 雖雕章鏤句, 採而獎之。 將焉用之。 伏維陛下韶主文之司, 今褒貶之文無覈實, 碑誄有虚美愧辭者, 則懲勸之道缺矣。 雖華雖麗 諭養文之 禁而絕

第陸玖目採詩以補察時政略云:

俾乎歌詠之聲, 臣聞聖王酌人之言,補己之過,所以立理本,導化源也。 諷刺之興,日採於下,歲獻於上者也。所謂言之者無罪,聞之者足以自誠。 將在乎選觀風之使, 建採詩之官,

矣。然則二公新樂府之作,乃以古昔採詩觀風之傳統理論爲抽象之鵠的,而以唐代杜甫即事命題 摩之思想至有關係。觀於策林中議文章及採詩二目所言,知二公於採詩觀風之意,蓋蘊之胸中久 寅恪案:元白二公作新樂府在元和四年, 距構策林之時甚近。 故其作新樂府之理論, 與前數年揣

微之之作, 似尙無摹擬詩經之迹象。至於樂天之新樂府, 據其總序云:

之樂府,如兵車行者,爲其具體之模楷,固可推見也。

之,爲君爲臣爲民爲物爲事而作,不爲文而作也。 首句標其目, 卒章顯其志, 其事覈而實, 詩三百之義也。 使采之者傳信也。 其辭質而徑, 其體順而肆, 欲見之者易諭也。 可以播於樂章歌曲也。 其言直而切,

部唐代詩經, 之每篇首句尚與詩題不同, 疑李氏原作當亦不異微之。)全體結構, 中國北宋元祐時。)重鈔建永(相當慶曆時。)本,於「首句標其目」之下有「古詩十九首之例也。」一 云, 即仿毛詩之小序。又取每篇首句爲其題目,即效關雎爲篇名之例。(微之之作乃和李公垂者。微 則已標明取法於詩三百篇矣。是以樂天新樂府五十首,有總序, 白詩特就耳。 有志者事竟成。 樂天元和之初撰策林時, 誠韓昌黎所謂「作唐一經」者。 樂天亦足以自豪矣。此外,尚有可論者,嚴震白氏諷諫本及日本嘉承(相當 即具采詩匡主之志。不數年間, 。不過昌黎志在春秋, 而樂天體擬三百。 即摹毛詩之大序。每篇有一序。 無異古經。 遂作此五十篇之詩。 質而言之, 乃一 韓書未成 而

有者,是也。

鈴木虎雄業間錄校勘記云:

寅恪案:毛詩大序,

關睢舊解云,三百二十一篇皆作者自爲名。

關雎后妃之德也。

孔穎達正義云:

取義於此。故新樂府序文中「詩三百之義也」一語, 舊說之是非,別爲 夫樂天作詩之意, 一問題,茲可不置論。唯據其說, 直上擬三百篇, 陳義甚高。 乃兼括前文「首句標其目」而言。 其非以古詩十九首爲楷則, 則詩經篇名,皆作者自取首句爲題。 而自同於陳子昂李 鈴木之說殊未 樂天實

太白之所爲,

固甚明也。

符同。 體也。 句。 之變文俗曲殊多三三七句之體, 復次, 動」本由以「古文」試作小說而成功之一事。寅恪曾於韓愈與唐代小說一文中論證之。 改良當日民間 陳子昂李太白之復古詩體。 作新樂府, 秋之文體試作毛穎傳, 時民間流行之歌謠。 諸書所載 樂天新樂府多用此體, 之句爲其常則 大相懸殊。 此實深可注意。 寅恪初 其差異之點, 關於新樂府之句律, 實擴充當時之古文運動, 茲不備引。 時頗疑其與當時民間流行歌謠之體制有關, 是也。 其價值及影響, 或更較爲高遠也。此爲吾國中古文學史上一大問題, 即「古文運 頭流行之俗曲爲職志。 僅爲一在文備衆體小說之範圍, 實與貞元元和時代古文運動鉅子如韓昌黎元微之之流, 考三三七之體, 至樂天之作, 必別有其故。蓋樂天之作,雖於微之原作有所改進,然於此似不致特異其 然則樂天之作新樂府, 石鼎聯句詩序,鶯鶯傳等小說傳奇者,其所持之旨意及所用之方法, 故白氏新樂府之創造性質, 李公垂之原作不可見, 始得其解。關於敦煌發見之變文俗曲, 則多以重疊兩三字句, 雖古樂府中已不乏其例, 而推及之於詩歌, 與陳李輩之改革齊梁以來士大夫紙上摹寫之詩句爲標榜 乃用毛詩, 未知如何。 在純粹詩歌之領域耳。 乃不爲世人所注意。 斯本爲自然之發展。 樂府古詩, 然苦無確據, 後接以七字句, 即如杜工部兵車行, 恐與微之之作無所差異, 及杜少陵詩之體制, 詳見敦煌掇瑣及鳴沙餘韻 不敢妄說。 或三字句後接以七字 實則樂天之作, 以太史公書, 惟以唐代古詩, 由是言之,樂天之 亦復如是。 後見敦煌發見 而白樂天之 即 以七字 左氏 改進當 乃以 前有 適相

新樂府,亦是以樂府古詩之體, 茲特略發其凡於此,俟他日詳論之,以求敎於通識君子焉。 改良當時民俗傳誦之文學,正同於以「古文」試作小說之旨意及方

關於元白二公作品之比較,又有可得而論者,即元氏諸篇所詠, 法。此點似尙未見有言及之者, 似有繁複與龐雜之病, 而白氏每

元氏長慶集貳肆「上陽白髮人」, 本愍宮人之幽閉, 而其篇末乃云:

篇則各具事旨,不雜亦不複是也。請先舉數例以明之。

諸子傳, 此輩賤嬪何足言,帝子天孫古稱貴。 新唐書捌貳十一宗諸子傳。 )宅六宮門户閉。 諸王在閣四十年,七(七當作十。 随煬枝條襲封邑, 見舊唐書壹佰柒玄宗 肅宗血胤無官位。

王無妃媵主無婿,陽亢陰淫結災累。 何如決壅順衆流, 女遣從夫男作吏。

可與同集叁貳獻事表所陳十事中:

一曰任諸王以固磐石。三曰出宮人以消水旱。 四曰嫁諸女以遂人倫。

邑。」句之暗示, 陽白髮· 參證。此爲微之前任拾遺時之言論,於作此詩時不覺連類及之,本不足異, 人之作, 別成「二王後」一篇, 亦未可知也。又如元氏長慶集貳肆法曲云:: 則截去微之詩末題外之意,似更切徑而少支蔓。或者樂天復受「隨煬枝條襲封 亦非疵累。 但樂天上

又云: 祖過沛亦有歌, 秦王破陣非無作。作之宗廟見艱難,作之軍旅傳糟粕

胡音胡騎與胡妝,五十年來競紛泊。

尙。若微之之詩,一題數意,端緒繁雜。例若元氏長慶集貳肆陰山道旣云: 樂天所作, 詞語明白, 則析此詩所言者爲三題, 鄙意似勝微之所作。蓋新樂府之作, 其本旨在備風謠之採擇, 即七德舞, 法曲,時世妝三首。一題各言一事,意旨專而 自以簡單曉暢爲

費財爲馬不獨生, 耗帛傷工有他盜。

之以迴鹘馬價縑爲非矣。其詩後段忽因絲織品遂至旁及豪貴之踰制,

挑紋變鑷力倍費, 棄舊從新人所好。 越穀撩綾織一端, 十匹素縑功未到。 如言:

令族親班無雅操。 從騎愛奴絲布衫, 臂鷹小兒雲錦韜。群臣利己要差僭, 天子深衷空閔悼。 豪家富貴踰常制

不免稍近支蔓。而樂天新樂府則於陰山道題下仿毛詩小序云:

疾貪虜也。

全詩只斥迴鹘之貪點, 而又別爲繚綾一題, 其小序云:

念女工之勞也。

所謂「苦教短李伏歌行」,遂使「每被老元偷格律」者耶? 全詩之中, 痛惜勞工,深斥奢靡。其意旣專,故其言能盡。其言能盡, 則其感人也深。此殆樂天

以上所列爲元詩中之一篇雜有數意者,至於一意而復見於兩篇者, 則如秦王破陣樂旣已詠之於法

曲云:

漢祖過沛亦有歌,秦王破陣非無作。 作之宗廟見艱難,作之軍旅傳糟粕。

復又見於立部伎中, 而有:

太宗廟樂傳子孫,

取類群凶陣初破。

之句, 即其例也

至樂天之作,則白氏長慶集壹傷唐衢二首之貳云:

遂作秦中吟,一吟悲一事。

篇題, 和微之篇題言之,此特點尤極顯明。 他事及他旨,此之謂不雜。此篇所詠之事,所持之旨,又不復雜入他篇, 寅恪案:一吟詠一事,雖爲樂天秦中吟十首之通則,實則新樂府五十篇亦無一篇不然。 即此篇所詠之事。每篇下之小序,即此篇所持之旨也。 如紅線毯與繚綾者,俱爲外州精織進貢之品, 每篇唯詠 事 此之謂不複。 持一旨, 宜其詩中所持 若就 其每篇之 而不雜以 其非

憂農桑之費也。

之旨相同矣。但紅線毯篇之小序云:

篇中痛斥宣州刺史之加樣進貢, 而繚綾篇之小序則云:

念女工之勞也。

篇中深憫越溪寒女之費工耗力,是絕不牽混也。 又如李夫人, 井底引銀瓶, 古冢狐三篇, 所詠者

皆爲男女關係之事, 而李夫人以:

鑒嬖惑也。

自是陳諫於君上之詞。 井底引銀瓶以:

淫奔也。

爲旨, 則力勸癡小女子, 勿爲男子所誘。 古冢狐則以:

戒豔色也。

之病, 相侔也。 胡旋女, 御史之失職。秦吉了所致譏者,乃言官之不言。 爲旨,乃深戒民間男子勿爲女子所惑者。是又各有區別也。又如紫毫筆所指斥者,乃起居郎與侍 樂天酬和其意, 縛戎人六篇中俱涉及天寶末年祿山之反,而樂天於法曲,華原磬, 即此所舉,亦足槪見其餘矣。至其和微之諸篇則稍有別。 若欲全行避免, 殆不甚可能。 雖俱爲譏斥朝官之尸位,而其針對之人事,又不 如微之於華原磬, 蓋微之之作, 西涼伎, 胡旋女, 西涼伎等篇 旣有繁複與龐雜 法曲, 立部伎

中亦均及其事,是其證也。然樂天大抵仍持每篇一旨之通則, 苟能審音與政通

如法曲篇云:

第五章 新 樂

府

華原磬云:

是其遣詞頗相同矣。 知樂與時政通 但法曲之主旨在正華聲,廢胡音。 華原磬之主旨在崇古器, 賤今樂。 則截 以 刺

愚賤之樂工。則又爲各別之針對也。他若唐代之立部伎,其包括之範圍極廣, 部伎二篇, 樂之陵替。 二事也。 又如華原磬五絃彈二篇, 並於當日之司樂者有所譏刺矣。但立部伎所譏者, 五絃彈寫趙璧五絃之精妙, 俱有慨於雅樂之不興矣。 以慨鄭聲之風靡, 則自不同之方面立論也。 但立部伎言太常三卿之失職, 乃淸職之樂卿。

伎篇中所述者, 皆在其內, 而樂天則以破陣樂旣已詠之於七德舞一篇,太平樂又有西涼伎一篇專言其事, 唯限於散樂, 即自昔相傳之百戲一 類。 此皆足徵其經營結構, 實具苦心也。 故立

舉凡破陣樂太平樂

華原磬所譏者,

又如華

原磐立

又微之所作, 其語句之取材於經史者, 如立部伎之用小戴樂記史記樂書, 乃蠻子朝之用春秋定八

年公羊傳疏之例, 而有:

象由文士憲左。

通 好轡長

等句之類, 即微之晚作, 頗嫌 硬澀未融。 亦少見此種聱牙之語。 、轡長駷之轡字似即由公羊傳定八年注之銜字而來。 然則白詩即元詩亦李詩之改進作品。 是乃比較研究所獲 )樂天作中

固無斯

新樂府之爲文學偉製,而能孤行廣播於古今中外之故,亦在於是也。 救應之效者也。其全部組織如是之嚴,用意如是之密, 此四十八篇之作。采詩官乃標明其於樂府詩所寄之理想, 府總序所謂爲君而作, 五十首之中,以七德舞以下四篇爲一組冠其首者, 似爲例外, 但樂天之意, 或以其切於時政, 而獻諫於憲宗者。) 其以時代爲劃分, 亦爲貞元之宰相也。)自此以下三十篇,則大率爲元和時事。(其百鍊鏡兩朱閣八駿圖賣炭翁, 天組織其全部結構時, 本和公垂之作,疑是時李氏亦在東都,故於此有所感發。若果如是,則微之詩題之次序, 次序不同。 至於新樂府詩題之次序, 自太行路至縛戎人諸篇, 漫四篇, 垂之次序。 乃言玄宗以前即唐創業後至玄宗時之事。 惟觀微之所作, 微之詩以上陽白髮人爲首。 尚不僅以其時代較前也。 心目中之次序, 今日自不易推知。 李公垂原作今不可見,無從得知。微之之作與樂天之作,同一 乃言德宗時事。 `排列諸題目似無系統意義之可言,而樂天之五十首則殊不然。 上陽宮在洛陽, (司天臺一篇, 如鄙意所論, 其以鵶九劍采詩官二篇居末者, 此四篇皆所以陳述祖宗垂誡子孫之意, 自立部伎至新豐折臂翁五篇, 微之元和四年以監察御史分務東臺, 求之於古今文學中, 皆所以結束全作, 但就尚可見者言之, 則自七德舞至海漫 似指杜佑而言, 洵不多見。是知白氏 而與首篇收首尾迴環 鵶 乃言玄宗時事 九劍乃總括 頗爲明顯也 而杜佑實 題目, 當日 即新 亦即公

元白二公作新樂府之年月, 必在李公垂原作後, 自無可疑。 微之詩未著撰作年月, 但其西涼伎

遠 門前 萬里埃, 今來變到行原州。 去京五百而近何其逼, 天子縣内半沒爲荒陬

寅恪案:舊唐書壹肆憲宗紀云:

元和三年十二月庚戌, 以臨涇縣爲行原州,命鎮將郝玭爲刺史。 自玭鎮臨涇,西戎不敢犯塞。

原州。廣德元年沒吐蕃,新唐書叁柒地理志云:

置行原州於靈臺之百里城。

貞元十九年徙治平涼。

元和三年又徙治

臨

百九十三里,與元詩「去京五百而近」之語適合。然微之詩斷無遠指第一次即廣德元年所徙之靈 而言之理, 臺縣之百里城,第三次之治所爲臨涇縣,則皆屬涇州。據舊唐書叁捌地理志, 府在京師西北八百里。與元詩「去京五百而近」之語不合, 是行原州凡三徙治所。 亦在元 是其所指必是元和三年十二月即第三次所徙之臨涇無疑。 和三年十二月以後, 其第二次之治所爲平涼縣, 與樂天所作同爲元和四年矣。 屬舊原州, 必非所指。 此微之作詩年歲之可考者也。 據舊唐書叁捌地理志, 至行原州第一次之治所爲靈 然則微之新樂府作成之年 涇州在京師 原州中都督 西北

樂天新樂府雖題爲:

元和四年爲左拾遺時作。

少,自宜稍積時日, 爲梁兩詩箋證, 似其作成之年歲無他問題。 茲不於此述之。 多有感觸, 然詳繹之,恐五十首詩, 蓋白氏新樂府之體,以一詩表一意, 以漸補成其全數。 其非一時所成, 亦非悉在元和四年所作。 極有可能也。今嚴震刊白氏諷 述一事, 五十之數, 見下文海漫漫及杏 殊不爲

元和壬辰冬長至日左拾遺兼翰林學士白居易序。

本新樂府序末有:

白集。)但據白氏長慶集伍叁詩解五律云:: 銜慣例不類。 和五年已除京兆府戶曹參軍。其所署官銜左拾遺, 初視之殊覺不合, 以元和壬辰即元和七年, (見歷史語言研究所集刊第玖本肆伍捌頁岑仲勉先生論白氏長慶集源流幷評東洋本 自有可議。 是年樂天以母憂退居渭上。樂天於前二年即元 且兼翰林學士之言, 似更與唐人題

舊句時時改,無妨悦性情。

姑識於此, 辰冬長至日」數字, 可知樂天亦時改其舊作。或者此新樂府雖創作於元和四年,至於七年猶有改定之處, 以待詳考, 乃改定後隨筆所記之時日耶?否則後人傳寫, 並於後論海漫漫杏爲梁諸篇中申其疑義焉。 亦無無端增入此數字之理也。 其「元和壬

關於篇章之數目, 白氏之作爲五十首, 自無問題。 元氏之作, 則郭茂倩樂府詩集玖陸卷玖新樂府

府

元 白詩 證 稿

上載微之新樂府共十三篇,其言云:

元稹序曰,李公垂作樂府新題二十篇,稹取其病時之尤急者,列而和之,蓋十五而已。今所

寅恪案:今元氏長慶集貳肆載新樂府共十二篇,序文亦作「十二」,適相符合, 得纔十二篇,又得八駿圖一篇,總十三篇。

集叁亦有八駿圖一詩,遂取之以補數。殊不知微之八駿圖詩,乃五言古詩, 見本,其「十二」之「二」,殆誤作「五」,因謂其未全。又見樂天所作中有八駿圖一題, 與微之新樂府之悉爲 無可疑者。郭氏所 而元氏長慶

七言體者迥異,斷不合混爲一類。觀於元氏長慶集叁拾敍詩寄樂天書云: 至是元和七年矣,有詩八百餘首,色類相從,共成十體,凡二十卷。

又同集伍陸唐故工部員外郎杜君墓係銘幷序云:

予嘗欲件析其文,體別相附,與來者爲之準,特病頗未就

則微之編輯自作之詩,必分別體裁,無以五七言相混淆之理。 然則郭氏編入之誤,不待詳辨也。 白氏長慶集之編輯, 其旨亦同微

德

元微之樂府新題法曲云:

府

秦王破陣非無作, 作之宗廟見艱難。

又立部伎云:

太宗廟樂傳子孫, 取類群凶陣初破。

白樂天則取其意別爲一篇, 即此篇是也。 此篇專陳祖宗王業之艱難以示其子孫。易言之,

取此篇, 爲其新樂府五十首之冠也。 太宗創業之功績,以獻諫於當日之憲宗,

所謂「采詩」「諷諫」「爲君」諸義,實在於是。斯樂天所以

即鋪陳

凡詮釋詩句, 要在確能舉出作者所依據以構思之古書, 並須說明其所以依據此書,

論述樂天此篇之主旨後,即進而推求其構思時所依據之原書, 則縱能指出最初之出處, 或同時之史事,

其實無當於第一義諦也。

故茲於

而不依據他書

之故。

若僅泛泛標舉,

類書之作,本爲便利屬文,樂天尤喜編纂類書,如策林之類。蓋其初原爲供一己之使用, 並先說明其所以取用此書之故焉。

其後乃

以爲決科射策之需, 而文學侍從之臣,亦

樂天於翰林中書取書韶批答詞等撰爲程式,禁中號曰白樸。每有新入學士求訪, 觀元氏長慶集貳貳酬樂天餘思不盡加爲六韻之作詩「白樸流傳 固須翫習類書, 寶重過於六

用轉新。」句自注云:

必繙檢類書, 兼利他人也。

以供起草代言之用。

唐世應進士制科之舉子,

便於官吏公文一種最有權威之類書。 職官章, 則知唐世 茲不多論。 翰林與六典之關係。 要之其書乃以唐代現行令式分配編纂, 六典一書, 他不必旁引, 究否施行, 即如樂天新樂府道州民篇述陽城奏語 自來成爲問題。 合於古代禮經, 詳拙著隋唐制度淵 即周官之形式 源 略 論

城云臣按六典書。 任土貢有不貢無。

要籍也。 係編年之體, 是其證也。夫六典爲法令之類書,宜翰林學士所不可須臾離者, 仍須有本朝掌故之類書。唐代祖宗功德之盛,莫過於太宗, 此書之實質爲一掌故之類書, 故事蹟不易檢查。 斯太宗實錄之分類節要本, 必與六典同爲翰林學士所寶重而翫習, 即吳兢貞觀政要一書所以成爲古今之 而太宗實錄四十卷部帙繁 但現行法令類書之外, 固無疑義, 供繙

且 檢

太宗十八舉義兵。 白旄黃鉞定兩京。 擒充戮竇四海清。 二十有四功業成。 二十有九即帝位

何以知其曾取用貞觀政要耶?詩云:

作七德舞時即先取此書尋撦材料以構成其骨幹,

乃極自然之理也。

三十有五致太平。

今世流行之戈直注本貞觀政要第叁玖篇論災祥篇第叁章云:

太宗曰, 東擒竇建德王世充, 吾之理國良無〔齊〕景公之過。 二十四而天下定, 二十九而居大位, 但朕年十八便爲經綸王業, 四夷降伏, 北翦劉武周, 海内乂安, 自謂古來英 西平薛舉

同書第肆拾篇論愼終篇第叁章略云:

業成。二十有九即帝位。」三句敍寫次序,全與論災祥篇中之語相同。「三十有五致太平」者, 寅恪案:「太宗十八舉義兵」句,蓋據論愼終篇中之語改寫而成。「擒充戮竇四海淸。二十有四功 太宗又曰,但朕年十八便舉兵,年二十四定天下,年二十九昇爲天子,此則武勝於古也。

祥篇第叁章於「二十九居大位」下,又以「四夷降服海內乂安」爲言,而此篇之第壹章略云: 貞觀六年,太宗謂侍臣曰,如朕本心,但使天下太平,家給人足,雖無祥瑞, 亦可比德於堯

「天下太平」上雖有「但使」一詞,似爲假設之語氣,但察其內容,則疑是已然之辭旨。太宗以武德 若百姓不足, 夷狄内侵, 縱有芝草徧街衢,鳳凰巢苑囿, 亦何異於桀紂。

示而來。貞觀政要災祥愼終兩篇,先後連續,而具有太宗述其創業踐極年歲之紀載,宜樂天注意 九年即位,其年二十有九。次年改元貞觀,至貞觀六年適爲三十五歲。故樂天此句殆即由此章暗 而取以入詩也。 至太宗舉義兵之歲,其年是否十八,乃別一問題,於此不詳論。又詩云:

亡卒遺骸散帛收, 饑人賣子分金贖。 魏徵夢見子夜泣, 張謹哀聞辰日哭。 怨女三千放出宫

寅恪案:「怨女三千放出宮。」此今戈本政要第貳拾篇論仁惻篇第壹章事也。「饑人賣子分金贖。」此 死囚四百來歸獄。 翦鬚燒藥賜功臣, 李勣嗚咽思殺身。含血吮創撫戰士,思摩奮呼乞効死。

府

要論仁惻篇爲主, 樂天此篇所採用。 吮創撫戰士, 論仁惻篇第貳章事也。「張謹哀聞辰日哭。」此論仁惻篇第叁章事也。「亡卒遺骸散帛收。」及「含血 思摩奮呼乞効死。」此論仁惻篇第肆章事也。今戈本政要論仁惻篇唯此四章, 從可知矣。否則太宗之事蹟至多,樂天若未嘗依據此書以組成其全詩之骨幹 此篇所舉太宗盛德之故實唯此八事,而五出政要論仁惻篇。 則其構思時必以政 而俱爲

何得若是之巧合耶?

第拾章下注云:: 復次, 今世流行之貞觀政要, 皆元代戈直注本, 其本曾移改吳氏原書之篇章, 如第貳篇論政體篇

舊本此章附忠義篇。今按其言於政體尤切,故附於此。

第肆篇論求諫篇第柒章下注云:·

舊本此與上章通爲一章。今按不同,分爲二章。

第伍篇論納諫篇下注云:

直諫另爲一類,附此類之後。

其第伍章下注云:

其例甚多,不必一一標舉。 舊本此章之首曰貞觀初。今按通鑑,標(貞觀三)年。 實則其書中尙有脫漏之章, 觀楊守敬之日本訪書志,

羅振玉之校補本

及影印日本寫本,即可知之。(高郵王氏亦有一校本。)如樂天此篇「以心感人人心歸」句,取白氏

長慶集肆伍策林第拾目王澤流人心感中云:

澤流心感而不太平者,未之聞也

固可相印證, 而日本傳寫本貞觀政要載有吳兢上表, 其文中即用易經咸卦象:

聖人感人心而天下和平。

政要之全本,恐亦不能悉復吳氏原書之舊觀。故白氏此篇所詠,其有不見於今日諸本政要者, 之語, 必全爲吳氏原書所不載也。 「欲復唐本之舊,苦未能得其全本。」(見羅氏松翁近稿貞觀政要殘卷跋。)之言,其實縱得日本傳寫 一卷之校記觀之,其中亦有戈本所詳,而日本寫本脫略者,則知日本寫本亦非無缺。羅氏雖有 知樂天此句, 殆又受此暗示而來, 不僅關涉其先時所編之策林也。又取羅氏政要卷伍卷陸

增補其內容而完成此篇也。茲請就已考見者條列於下,其尚有未詳者,俟續考焉。 雖然,若更就現存之史料以參校白氏此篇, 似不限政要一書,蓋樂天依據政要以構成此篇之骨幹,復於實錄中尋撦材料以修改其詞句 則知其中所詠太宗時事, 一一皆有所本, 而其所本

以「功成理定何神速。」一句, 「三十有五致太平。」句, 如前所論, 據小戴樂記云: 似受政要災祥篇第壹章及第叁章之暗示而成, 惟此句下即接

府

王者功成作樂,治定制禮。

又知所謂「致太平」者,直接與制禮作樂有關,易言之,即與七德舞本身有關也。此篇小序下注云: 武德中,天子始作秦王破陣樂以歌太宗之功業。貞觀初,太宗重制破陣樂舞圖, 韶魏徵虞世

南爲之歌詞,名七德舞。

伎條, 宜其特有此句以詠之也。考舊唐書貳捌音樂志(參唐會要叁叁破陣樂條, 偏後伍, 年,(會要作七年正月七日。 八佾皆進德冠, 太宗降誕之所。 被甲執戟, 樂,豈意今日登於雅樂。然其發揚蹈厲,雖異文容,功業由之,致有今日。所以被於樂章, 貞觀元年宴羣臣,始奏秦王破陣之曲。 示不忘本也。其後令魏徵虞世南褚亮李百藥改制歌辭,更名七德之舞,增舞者至百二十人。 新唐書貳壹禮樂志, 魚麗鶇鹳,箕張翼舒,交錯屈伸, 被甲執戟而習之,凡爲三變, 以象戰陣之法焉。六年太宗行幸慶善宮,宴從臣於渭水之濱, 於是起居郎呂才以御製詩等於樂府被之管絃,名爲功成慶善樂之曲。 紫袴褶,爲九功之舞。冬至享蘸, 通鑑壹玖肆唐紀太宗紀貞觀七年正月條。 舊紀作戊子,則是正月十日。)太宗制破陣舞圖,左圓右方, 每變爲四陣。 太宗謂侍臣曰, 首尾迴互,以象戰陣之形。命呂才依圖教樂工百 及國有大慶, 與七德之舞偕奏於庭。 有來往疾徐擊刺之象, 朕昔在藩,屢有征討, )略云: 通典壹肆陸樂典坐立部 賦詩十韻。 以應歌節。 世間 其宮即 遂有此 令童兒 (通 先 七

和云秦王破陣樂。新書曰,歌者和曰秦王破陣樂。 )數日而就, 更名七德之舞。 凜然震竦。武 癸巳,

(會要作正月十五日。)奏七德九功之舞。 觀者見其抑揚蹈厲,莫不扼腕踴躍,

臣列將咸上壽云,此舞皆是陛下百戰百勝之形容。羣臣咸稱萬歲。

勉先生白集質疑太宗十八舉義兵條論此事(見歷史語言研究所集刊第玖本陸伍頁。)云: 七德舞圖,亦在貞觀六年。此所云「三十有五致太平」者,蓋功成治定,因而製禮作樂也。 舞相連之九功慶善樂成。七年正月七日,重制破陣舞圖成。正月十五日(癸巳)奏之於庭。 依年推計,貞觀七年太宗年三十六歲。此前一年,即貞觀六年,太宗年三十五歲。六年, 則重制 與七德 又岑仲

又[册府]元龜三五,[貞觀]六年,公卿百寮以天下太平,四夷賓服,詣闕請封禪者, 首尾相

白詩其即取意於是數。

能與之無涉也。册府元龜唐會要兩唐志所載,當係采自太宗實錄。 雖與七德舞無關。然當貞觀六年即太宗三十有五之歲,羣臣旣以天下太平爲言,似樂天此句亦不

速在推心置人腹。」句, 政要中雖無具體語句可以指實, 但其愼終篇中論及漢光武事云:

太宗又曰, 四定天下,年二十九昇爲天子,此則武勝於古也。 朕觀古先撥亂之主, 皆年踰四十,惟光武年三十三。但朕年十八便舉兵,年二十

考後漢書壹光武紀云:

第五章

四二

銅馬〕降者更相語曰, 蕭王推赤心置人腹中, 安得不投死乎?。

部推誠門封同人條(參通鑑壹玖貳唐紀高祖紀武德九年九月丁未條。)云: 則樂天此句之構成, 固可能受政要此條之暗示, 而牽連思及光武之故實。 惟據册府元龜玖玖帝王

側, 字據通鑑補。)豈當有相疑之道也。 封同人爲韓州刺史。太宗即位,引諸衛驍兵統將等習射於顯德殿。朝臣多有諫者曰,先王制 謂之曰, 有以兵刃至御所者絞刑。所以防萌杜漸,備不虞也。今引卑碎之人,彎弧縱矢於軒陛之 陛下親在其間, 我以天下爲家, 正恐禍出不意, 率土之内, 自是後人人自勵。 盡爲臣子, 非所爲社稷計也。 所恨不能將我心徧置天下[人腹中],(此三 一二年間兵士盡便弓馬, 同人矯乘驛馬入朝切諫, 皆爲鋭卒。 帝皆不納。

知亦本之實錄也。

亡人骸骨設太牢致祭, 親臨哭之之事。但樂天於詩句下有注文云:: 「亡卒遺骸散帛收。」句, 政要論仁惻篇肆章雖記貞觀十九年太宗征高麗回, 次柳城, 詔集前後戰

貞觀初詔收天下陣死骸骨, 致祭而瘞埋之。尋又散帛以求之也。

考唐大詔令集壹壹肆有貞觀元年四月掩暴露骸骨詔云:: 諸色骸骨宜令所在官司收斂埋瘞。稱朕意焉。(舊唐書貳新唐書貳通鑑壹玖貳太宗紀俱繫此

事於貞觀二年四月己卯。)。

「饑人賣子分金贖。」句,白氏注文與政要同, 惟坊間汪本作貞觀五年誤, 應依全唐詩本作貞觀二

年。以政要新舊紀通鑑均繫其事於二年[三月]故也。

「魏徵夢見子夜泣。」句,亦見舊唐書柒壹新唐書玖柒魏徵傳,新舊傳當亦採自實錄也。

月辛卯。太宗以次日即壬辰日哭之。册府元龜壹肆壹帝王部念良臣門亦作貞觀六年。 「張謹哀聞辰日哭。」句,白氏注文不著年月。政要作貞觀七年,通鑑繫張公謹之卒於貞觀六年四 政要作貞觀

「怨女三千放出宮。」句,白氏注文中有:

七年,恐有誤。

於是令左丞戴胄給事中杜正倫,於掖庭宮西門,揀出數千人,盡放歸。

之紀載,而政要中則未著遣戴胄杜正倫揀放事。考舊唐書貳太宗紀上(參通鑑壹玖叁唐紀太宗紀

貞觀二年九月天少雨條。)略云:

尚書左丞戴胄,給事中杜正倫等於掖庭宮西門簡出之。(通鑑於此下有前後所出三千餘人一 (貞觀二年九月)丁未,謂侍臣曰, 婦人幽閉深宮,情實可憫。今將出之,任求伉儷。 於是遣

則白氏注文,亦依據實錄書之者也。

「死囚四百來歸獄。」句,舊唐書叁太宗紀下云:

貞觀六年)十二月辛未,親錄囚徒,歸死罪者二百九十人於家, 令明年秋末就刑。 其後應期

畢至,韶悉原之。

通鑑壹玖肆唐紀太宗紀貞觀七年九月死囚三百九十人自詣朝堂條考異云:

四年實錄云,天下斷死罪止二十九人。今年實錄乃有二百九十九人。何頓多如此,事已可疑。

又白居易樂府云,死囚四百來歸獄。舊本紀統紀年代記皆云二百九十人。今從新書刑法志。

此種數字之差異,自是傳寫致訛,至於孰正孰誤,恐不可考矣。

「翦鬚燒藥賜功臣。李勣嗚咽思殺身。」句, 樂天自注云:

李勣常疾,醫云得龍鬚燒灰,方可療之。 太宗自翦鬚燒灰賜之,服訖而愈。 勣叩頭泣涕而謝。

今戈本政要任賢篇所云:

與舊唐書陸柒李勣傳(新唐書玖叁李勣傳通鑑壹玖柒唐紀太宗紀貞觀十七年四月李勣嘗得暴疾條 動時遇暴疾,驗方云,鬚灰可以療之。太宗自翦鬚爲其和藥。動頓首見血, 泣以 陳謝

(一)所云

適相符合,而與樂天注文以「龍鬚」爲言者不同。龍鬚事殊詭異,頗類小說家言,但大唐新語壹壹 動時遇暴疾, 驗方云,鬚灰可以療之。太宗乃自翦鬚爲其和藥。勣頓首見血,泣以懇謝

褒錫篇高宗初立爲太子條云:

有疾, 醫診之日, 須龍鬚灰方可。 太宗翦鬚以療之, 服訖而愈。 勣頓首泣謝。

則與樂天注文相符。二者必同出一源, 蕪瑣外,大都出自國史。 劉書白注此條果出何書, 今未敢決言, 姑記之以俟考。 似無可疑。 劉氏之書雖爲雜史, 然其中除諧謔 篇,

傳新唐書貳壹伍上突厥上思摩傳, 「含血吮創撫戰士,思摩奮呼乞効死。」句及其注文,與政要仁惻篇第肆章及舊唐書壹玖玖上高麗 通鑑壹玖柒唐紀太宗紀貞觀十九年五月丙申條並同, 謂之出於

又此詩末「太宗意在陳王業, 王業艱難示子孫。」二句, 即本於太宗謂侍臣「功業由之」「示不忘本」

(見上引舊唐書貳捌音樂志。)等語也。

政要或出自實錄,

俱無不可也。

自無疑也。 國之實事, 總之,樂天此篇旨在陳述祖宗創業之艱難,以寓諷諫。 一一采自國史, 惟實錄一書, 部帙繁重, 即如「速在推心置人腹」等詞語, 且係編年之體,若依之以構思而欲求得條理, 其事尊嚴, 故詩中不獨於敍寫太宗定亂理 亦係本之實錄。 其爲竭意經營之作, 洵屬非易。 此

存之史籍參證並讀, 始能得其眞解, 斷可知矣。

又樂天曾用貞觀政要,

即實錄之分類節要本以供參考之故也。

然則七德舞

篇必與貞觀政要及現

又篇中「元和小臣白居易, 觀舞聽歌知樂意。」之句, 非泛語也。 此詩題下注云:

府

朔 以 韶郊廟享宴皆先奏之。

段安節樂府雜錄龜茲部云:

破陣樂曲亦屬此部, 秦王所制。 舞人皆衣畫甲, 執旗旆。 外藩鎭春冬犒軍, 亦舞此曲,

軍引入場,尤甚壯觀也。

而微之新題樂府法曲篇亦有

秦王破陣非無作。 作之宗廟見艱難, 作之軍旅傳糟粕

之句, 觸啓發無疑也。 故樂天即未見之於祭祀郊廟之上, 亦可見之於享宴軍賓之間。 其爲親身經歷, 因而有所感

在, 慶集貳。) 觀此知非虛語。 言直而切」之言相合矣。樂天序和答詩,自謂爲文所長在意切理周, 王業艱難示子孫。」一節, 茲更取此篇與新樂府總序相印證, 即總序所謂「卒章顯其志」也。 陸拾劉白倡和集解, 結語「歌七德。 舞七德。 其晚歲傾倒劉禹錫至極, 說明太宗創作七德舞之旨意, 王士禛香祖筆記伍, 聖人有作垂無極。 此篇詞語甚曉暢,結構無曲折, 則七德舞一篇首句三字與其篇題符同, 池北偶談壹肆。)其故殆欲藉夢得微婉之長(白氏 豈徒耀神武, 頗爲後人所不解, 亦樂天作此詩以獻諫於當日憲宗寓意之所 豈徒誇聖文。 可謂與序文「其辭質而徑」「其 所短在辭繁言激,(見白氏長 (見白氏長慶集伍玖與劉 即總序所謂「首句標其 太宗意在陳王業

此篇依據貞觀政要以構思, 長慶集陸玖哭劉尙書夢得二首之壹云:「文章微婉我知丘。」)以補己之短耶?(詳見附論戊篇。)又 取材於太宗實錄以遣辭,得不謂之「其事覈而實」乎?樂天所作,不似

微之所作有晦澀生硬之病, 實足當「其體順而肆」之義無愧。而此篇乃以小臣上陳祖宗功業之詩,

即序文所謂「爲君而作」者。 條理分明。 總序所列作詩之旨,一一俱能實踐,洵非浮誕文士所可及也。 其取此詩冠於五十篇之首, 亦即此意。 由是言之, 樂天新樂府結構嚴

大唐西域記伍羯若鞠闍國條(大唐大慈恩寺三藏法師傳伍同。)略云::

聞其雅頌, (戒日)王曰,秦王天子, 於茲久矣。 平定海内, 殊方異域慕化稱臣,氓庶荷其亭育。 咸歌秦王破陣樂

同書拾迦摩縷波國條略云:

耶?(玄奘)日, 拘摩羅王曰, 今印度諸國, 然。此歌者, 多有歌頌摩訶至那國秦王破陣樂者, 美我君之德也。 聞之久矣, 豈大德之鄉國

但樂舞中「歌者和曰秦王破陣樂」,(見新唐書貳壹禮樂志。)故民間通稱仍用舊名,稱爲秦王破陣 寅恪案:印度得聞秦王破陣樂,當在貞觀十四年平定高昌之後。此樂雖於貞觀七年改爲七德舞, 如樂府雜錄龜茲部所載[秦王]破陣樂曲云云,即是一例。天竺遠方,固應不以七德舞爲稱也。

府

## 法曲

樂天此篇篇題,全唐時本作法曲,注云:

一本曲下有歌字。

那波道圓本作法曲歌, 李元之作,今微之此篇篇題, 汪立名本作法曲。 諸本旣皆作法曲, 考樂天新樂府諸篇篇題例皆不用歌吟等字。 則自以無歌字者爲是也。 而此篇乃和

定諸樂舞, 樂天以此篇次於七德舞之後者, 條理次序極爲明晰, 蓋七德舞所以明太宗創業之艱難, 較之微之之遠從黃帝說起者, 實有浮泛親切之別, 此篇則繼述高宗以下祖宗之製 此白作勝於元

此詩之華夷音聲理論與微之相同, 恐公垂原作亦復如是, 其是非如何, 姑不置辨。 若以史實言

),則殊不正確。如言:

作之又一例證也。

則知霓裳羽衣曲, 天寶十三載七月十日, 實原本胡樂, 太樂署供奉曲名及改諸樂名, 又何華聲之可言?開元之世治民康與此無涉, 婆羅門改爲霓裳羽衣。

固不待言也。

曲者, 據新唐書貳貳禮樂志云:

初 隋有法曲, 其音清而近雅。 其器有鐃鈸, 鐘, 磬, 幢簫, 琵琶。

公之所謂華夷之分,實不過今古之別,但認輸入較早之舶來品,或以外國材料之改裝品, 夫琵琶之爲胡樂而非華聲**,**不待辨證。 而法曲有其器, 則法曲之與胡聲有關可知也。 可慨也。 然則元白諸 爲眞正

抑更有論者,李公垂此篇之原作旣不可見, 姑置不論。 若微之樂天皆自稱景慕外來天竺之佛陀宗

之國產土貨耳。今世侈談國醫者,其無文化學術史之常識,

適與相類,

教者, 如白氏長慶集壹肆和夢遊春詩序云:

況與足下(微之)外服儒風,

内宗梵行者,

有日矣。

又此詩結語云:

法句與心王, 期君日三復。

又樂天自注云:

微之常以法句及心王頭陀經相示, 故申言以卒其志也。

等例, 穎士李華獨孤及之倡導與梁肅之發揚。此諸公者,皆身經天寶之亂離, 夷狄之議論?初視之, 可以爲證, 是與韓退之之力關佛法者,甚有不同。但何以元白二公忽於茲有此內中國而外 頗不可解,細思之,則知其與古文運動有關。蓋古文運動之初起, 而流寓於南土, 其發思古 由於蕭

府

此潮流之震盪, 於此認識最確, 不僅同於地方藩鎭之抗拒中央政府,宜乎尊王必先攘夷之理論,成爲古文運動之一要點矣。 懷撥亂之旨, 故主張一貫。其他古文運動之健者,若元白二公,則於不自覺之中, 而具有潛伏意識,遂藏於心者發於言耳。古文運動爲唐代政治社會上一大事, 乃安史變叛刺激之反應也。 唐代當時之人旣視安史之變叛, 爲戎狄之亂華 間接直接受 昌黎

元詩「火鳳聲沉多咽絕。 胡騎與胡妝。」句樂府詩集陸拾引此詩。 春鶯囀罷長蕭索。 錢牧齋校宋本及全唐詩本, 」句,可參閱向達先生唐代長安與西域文明,茲不多論 「胡騎」上皆有「胡音」二字,

獨有關於文學。

此義當於論唐史時詳爲考證,

茲以軼出本文範圍,故不多及,

聊識其意於此。

## 二王後 海漫漫

此詩旣論音樂,

自以有「胡音」二字爲是也。

原作 皇漢武求仙之戒,若非憲宗文學侍從之臣,似亦末由敷陳也。 襲李氏之舊題, 公垂必依之發興。至於「周武隋文之子孫」,固不易爲作詩時居東都之公垂所同時得見, 雖不可見, 新樂府七德舞法曲後, 自不難推見。至樂天何以忽增創此二新題之故, 當亦無此二題。 即繼以二王後及海漫漫二篇。此二篇爲微之樂府新題中所無。 所以知者, 微之和公垂之作, 然則此二篇乃樂天所增創, 取上陽白髮人爲首。上陽宮在洛 則貞觀政要第貳壹愼所好篇之第 李公垂 而 而秦 非 天

貞觀四年太宗曰,隋煬帝性好猜防,專信邪道,大忌胡人,乃至謂胡床爲交床, 瓜,築長城以避胡,終被宇文化及使令狐行達殺之。又誅戮李金才及諸李殆盡, 卒何所益。 胡瓜爲黃

似即爲二王後一篇之所本。其第貳章云:

童男童女數千人隨其入海求神仙,方士避秦苛虐, 貞觀二年太宗謂侍臣曰, 神仙事本是虚妄,空有其名。 因留不歸。 秦始皇非分愛好, 始皇猶海側踟蹰以待之, 爲方士所詐, 乃遣

煩妄求也。

沙丘而死。

漢武帝爲求神仙,

乃將女嫁道術之士。

事既無驗,

便行誅戮。

據此二事,

神仙不

多見於貞觀政要第貳拾仁惻篇中, 供採摭,遂取以成此二篇也。 似即爲海漫漫一篇之所本。 頗疑樂天於繙檢貞觀政要尋撦材料以作七德舞時, 而七德舞自「亡卒遺骸散帛收。」以下至「思摩奮呼乞効死。」諸事蹟 其愼所好篇即次於仁惻篇之後爲第貳壹篇,亦足爲此說之佐證 尚覺有餘賸之義 可

也。

第五章

新

府

海漫漫之前者,蓋二王後之助郊祭與七德舞法曲皆性質上有密切關係,可以相連, 隋煬帝條在貞觀四年列第叁,則似未有所改易。 復次,今戈本政要之次序先後,雖不皆仍原本之舊,但愼所好篇中求神仙條在貞觀二年列第貳, 樂天之詩不依政要之先後次序, 而取二王後列諸 其海漫漫篇則

稿

此組遂爲新樂府之冠也。 性質近似,皆標明祖宗垂戒子孫之微意, 撰季多薦獻太淸宮詞文。(見白氏長慶集肆拾。)自易聯想及此,而有「玄元聖祖」之句也。 堂太廟郊祀爲同一性質, 室所攀認之祖宗。 性質似較泛也。 至海漫漫篇所以特列於第肆篇, 且受大聖祖高上大道金闕玄元天皇大帝之尊號, 不過與血族祖先之七廟又稍有別耳。樂天於元和二年充翰林學士時, 即新樂府總序所謂「爲君而作」者。故相聯綴自爲一組, 有以示異於其他通常諷諫諸篇者, 廟號太淸宮, 則薦享老子與明 老子亦爲唐皇 此四篇

又二王後一篇更有可論者,元微之上陽白髮人有:

隋煬枝條襲封邑。

之語,原注又云:

樂天此篇之作,殆受其啓發也。近古封前代子孫爲二王三恪。

錄之。)云: 其海漫漫一篇更有可論者, 舊唐書壹肆憲宗紀上(太平御覽壹佰肆亦引此文, 較爲明晰, 今參合

所宗,老子五千文爲本。老子指歸與〔六〕經無異。後代好怪之流, 元和五年八月乙亥, 上顧謂宰臣曰,神仙之事信乎?李藩對曰,神仙之說出於道家。 假託老子神仙之説,

第五章 新 樂

府

日,

朕前生豈非仙人乎?

胡僧長生藥, 始皇遣方士載男女入海求仙, 遂致暴疾不救。 古詩云, 漢武帝嫁女與方士求不死藥, 服食求神仙, 多爲藥所誤。誠哉是言也。 二主受惑, 卒無所得。 君人者但務 文皇帝服

求理, 四海樂推,社稷延永,自然長年也。上深然之。

此二 間先後論, 寅恪案:李藩之語與海漫漫所言幾無不同。豈李白二公各不相謀而適冥合耶?此殊可疑也。 事不能無所關涉, 樂天新樂府據其自題作於元和四年, 似李語出於白詩。然以常識言之, 而史載李藩之語於元和五年, 其可能不多。頗疑樂天新樂府雖大體作 則白先而李後。 以時 若

疑,俟於論杏爲梁時總括言之,今姑不涉及焉。

其實時時修改增補,

不獨海漫漫一篇如此,

即杏爲梁等篇亦有成於元和四年以後之

於元和四年,

又杜陽雜編中略云:

謁見。 月味 元和五年内給事張惟則自新羅使回, 步, 公子曰,唐皇帝乃吾友也。汝當旋去爲吾傳語。還舟中, 約及一二里, 則見有數公子, 云, 戴章甫冠, 於海上泊州島間, 着紫霞衣, 忽聞鷄犬鳴吠, 吟嘯自若。 迴顧舊路, 惟則知其異 似有煙火 悉無蹤跡。上 遂乘

時中國與新羅頻有使節往還。 寅恪案:蘇鶚撰書, 雖多詭異之說,不足深信, (參舊唐書壹玖玖上新唐書貳貳拾新羅傳唐會要玖伍新羅條。)是知 然閹寺以神仙事蠱惑君上, 自是常情, 而元和之

稿

此以元和五年爲言, 亦可與上說相參證也。

其亦有所據。 憲宗爲有唐一 代中興之英主, 然卒以服食柳泌所製丹藥, 躁渴至極, 左右宦官多因此得罪,

遂爲

(見通鑑貳肆壹唐紀元和十四年冬十月及十五年春正月條。)觀元和五年憲宗問李藩

陳弘志所弑。

知其已好神仙之道。樂天是時即在翰林,頗疑亦有所聞知。故海漫漫篇所言,殆陳諫於幾

先者。此篇末句以老子不言藥爲說,遠引祖訓,近切時宜,誠新樂府大序所謂爲君而作者也。 二王後篇「古人有言天下者,非是一人之天下。」句,就寅恪一時記憶所及,則有呂氏春秋壹孟

天下,天下之天下,非一人之天下。

紀貴公篇云:

所謂太公六韜壹文韜文師篇云:

太公曰,天下非一人之天下,乃天下之天下也。

魏徵羣書治要叁壹六韜序云:

天下者,非一人之天下,天下之天下也。

同書同卷武韜云:

馬總意林壹引六韜云: 天下非一人之天下也。

天下非一人天下,天下之天下。

但羣書治要似爲其所從出,蓋李相國論事集壹進歷代君臣事蹟五十餘狀略云: 自皆與詩語有關。意林纂輯於貞元之初,與樂天作詩之時代甚近,頗可能爲樂天此二句之所依據。

元和四年奏, 昔太宗亦命魏徵等博采歷代事蹟, 撰羣書政(寅恪案, 此避高宗諱改作政。)要,

置在座側,常自省閱, 書於國史, 著爲不刊。 今陛下朝夕觀覽, 必致貞觀之盛理。

李絳與樂天於元和四年, 則樂天此詩之依據羣書治要,最爲可能也。 即樂天作此詩之年, 同爲翰林學士, 而深相交好。深之旣如此推崇魏氏

## 立部伎

樂天所以列立部伎於海漫漫之後者, 而立部伎與華原磬性質相類, 復連續列之。 殆以七德舞法曲二王後海漫漫四篇性質近似, 觀此可知樂天之匠心, 即此篇題排列之末節, 故聯綴編列。 亦不率

白詩立部伎小序下之注及元詩此篇題下之注, 兀氏長慶集貳肆立部伎題下注云: 應互相校正, 以兩注俱爲李公垂傳原文故也。今本

退入雅樂可知矣。

爾爲之也。

第五章

新樂

府

應依全唐詩本元稹詩與白氏長慶集貳立部伎小序下注同作:

入雅樂部, 則雅樂可知矣。

子董氏刊本元氏長慶集貳肆,及嚴氏影宋本白氏諷諫本立部伎作「性靈」。 又今本白詩立部伎小序下注中「性識」二字, 雖元稹詩全唐詩本題下注亦與相同, 蓋元氏長慶集貳陸琵琶 然應依明嘉靖壬

歌有「性靈甚好功猶淺。」之句,又樂府雜錄(守山閣叢書本。)琵琶條云: 武宗初,朱崖李太尉有樂吏(史?)廉郊者, 盡綱之能。 綱嘗謂儕流曰,敎授人亦

師於曹綱,

多矣,未有此性靈弟子也。

是作「性靈」者,

更爲有據也。

微之此篇以秦王破陣樂功成慶善樂之今昔比較, 寓其感慨。 蓋當時之制, 享宴之樂分爲坐立二

如舊唐書貳玖音樂志略云:

部,

而秦王破陣樂屬於立部。

陣樂慶善樂大定樂上元樂聖壽樂光聖樂,凡八部。安樂等八舞, 高祖登極之後, 享宴因隋舊制, 用九部之樂。其後分爲立坐二部,今立部伎有安樂太平樂破 聲樂皆立奏之, 樂府謂 之立

部伎, 者。)自長壽樂已下皆用龜茲樂。 其餘總謂之坐部伎。 坐部有讌樂長壽樂天授樂鳥歌萬壽樂龍池樂破陣樂(此玄宗所作

是也。 樂天此篇, 則雖襲用李元舊題, 而其所述內容,實與微之之以立部伎中之破陣樂慶善

樂爲言者不同。 蓋白氏新樂府中旣專有七德舞一篇以陳王業之艱難, 於此自不必重複。 斯固樂天

新樂府一 事唯以一篇詠之之通則, 此通則, 即不複是也。 而微之西涼伎云:

哥舒開府設高宴,

八珍九醞當前頭。

前頭百戲競撩亂,

丸劍跳擲霜雪浮。

師子搖光毛彩豎,

樂天則取跳丸擲劍諸雜戲之摹寫, 胡姬 醉舞筋骨柔 專成此篇, 以刺雅樂之陵替。 而西涼伎專述師子戲, 以刺疆臣

之貪懦。 此又樂天一詩詠一事之通則。 此通 則, 即不雜是也。

丸劍跳擲諸戲者, 即自昔相傳之百戲, 亦即舊唐書貳玖音樂志略云:

之散樂也。隋書壹伍音樂志云:

歷代有之。

非部伍之聲,

俳優歌舞雜奏。

玄宗以其非正聲,

置教坊於禁中以處之。

百 始齊武平中, 戲。 周 時 鄭譯 有魚龍爛漫俳優朱儒山車巨象拔井種瓜殺馬剝驢等奇怪異端, 有寵於宣帝, 奏徵齊散樂人, 並會京師爲之, 蓋 秦角抵之流者也。 百有餘物, 開 皇 名爲

並放遣之。 及大業二年突厥染干來朝, 煬帝欲誇之, 總追四方散樂 大集東都。

唐制度淵源略論稿音樂章。)史家因有「始齊武平中」之言耳。唐世此類百戲, 寅恪案:此類百戲, 但多爲因襲前代者也。 源出 西胡, 北齊以前, 已輸入中國。 惟北齊宮廷, 最爲西胡化, 雖亦有新自中亞輸入 (詳拙著隋

白詩之述此類百戲者, 有「舞雙劍, 跳七丸。 嫋 巨索, 掉長竿。」諸句。 茲請略徵舊籍以供例證,

以闡其源出西胡之說焉

文選貳張衡西京賦云:

俾明其內容,

並據之稍加解釋,

跳丸劍之揮霍,走索上而相逢

又云:

| 國志槐志貳壹臣榮專镇|| 邯鄲享条裴主引槐咯岳云奇幻儵忽,易貌分形,吞刀吐火,雲霧杳冥。

三國志魏志貳壹王粲傳潁川邯鄲淳條裴注引魏略略云:

太祖遣(邯鄲)淳詣(臨菑侯)植。

時天暑熱,

植因呼常從取水自澡訖,

傅粉,

遂科頭拍袒,

胡

而此類

舞五椎鍛,跳丸擊劍。

係統之伎藝,實盛行於西方諸國。 寅恪案:跳丸擊劍走索諸戲, 及易貌分形吞刀吐火等幻術, 據史記壹貳叁大宛列傳略云: 自兩漢曹魏之世, 即已有之,

條枝在安息西數千里,國善眩。

同書同卷又略云:

敷抵, 漢使還, 出奇戲諸怪物, 而後[安息王]發使隨漢使來觀漢廣大。 多聚觀者。 以大鳥卵及黎軒(靬)善眩人獻於漢。 於是大

後漢書壹壹陸西南夷傳略云:

永寧元年擇國王雍由調復遣使者詣闕朝賀, 獻樂及幻人,能變化吐火, 自支解,易牛馬頭。

又善跳丸, 數乃至千(?)。自言我海西人, 海西即大秦也。

三國志魏志叁拾總論裴注引魏略略云:

諸種雜戲於唐代流行頗盛。其見於文物典籍者,關於「舞雙劍」句,教坊記曲名有西河劍器。 可證也。 西戎傳曰:大秦國一號犂靬, 俗多奇幻, 口中出火, 自縛自解, 跳十二丸巧妙。

開元三載, 余尚童稚, 記於郾城觀公孫氏舞劍器渾脱。 杜詩柒觀公孫大娘弟子舞劍器行序云:

錢注引明皇雜錄略云: 上素曉音律,時有公孫大娘者, 善舞劍, 能爲鄰里曲,

裴將軍滿堂勢,

西河劍器渾脱,

遺

(?)妍妙皆冠絕於時也。

新唐書叁肆五行志云: 近服妖也。

太尉長孫无忌以烏羊毛爲渾脱氈帽, 人多效之, 謂之趙公渾脱,

寅恪案:據上引諸條, 知劍器渾脫蓋爲連文,而渾脫本是胡物。西河疑即河西或河湟之異稱,

第五章

新 樂 府

劍, 出 與 洒 西 I胡也。 域交通之孔 今全唐詩 近 四 本那波本及諸善本皆作舞雙劍, 道。 ][[ 出土古磚, 又裴爲疎 勒國姓, 有繪寫 舞 (見舊唐書壹肆陸新 ,劍器渾脫之狀者, 故坊間汪本之爲誤倒可不待辨。 語書壹佰拾裴玢傳。 可資參證。 又坊間 汪 )皆足明此 本此句作「 伎 實

於大秦, 泛用數字。 南棚漆彈弓背, 因舉樂天詩此句, 關於跳七丸句, 俟考。)以此推之, 雖丸數各異, 蓋樂天所知跳丸伎藝之最精者, 亦繪跳丸之伎, 寅恪甲申歲客成都, 謂必七丸。 再詳數之, 然爲技則一,知此技亦來自西方之國也。 跳丸之數旣爲七, 所印圖版, 見唐磚一方,刻跳丸之伎。同觀者數其丸曰, 其數果七, 舞劍之數亦必爲雙。 丸數止於七, 只見六丸, 殊足爲此詩之證。 惟左手指尖黑暗不明, 故詩中以爲言也。 樂天作詩, (正倉院考古記圖 必指當時實狀, 跳丸之技, 未審其上 六丸耳。 別 非率 版 有 寅恪 貢 丸 陸

關於嫋互索句, 封氏聞見記陸繩伎條 (唐語林伍同。)略云:

内

四重, 相遇 數丈立 明皇開元二十四年八月五日御 柱 既 側 身而 而 翻 以 過 起 身擲倒 者。 繩, 至繩, 有著履 直 如 弦 而 還往曾無蹉跌, 行 樓設 然後伎女自 繩伎。 從容俯仰者。 繩 伎者先引長繩, 皆應嚴鼓之節。 端躡足 或 以 而 畫竿 上, 接脛, 往 兩 來倏忽之間 端 衛 土 屬 地, 胡嘉隱作繩伎賦獻之。 高六尺。 埋 鹿 或 望若 盧 蹋 以 肩 繫之, 飛 蹈 仙 頂 有 鹿 自安 至 中 盧 = 路

寇覆蕩

伶倫分散,

外方始有此伎。

軍州宴會,

時或有之。

源

杜陽雜編中略云:

張弓絃五條,令五女各居一條之上, 上(敬宗)降日, 大張音樂, 集天下百戲於殿前。 衣五色衣, 執戟持戈,舞破陣樂曲, 時有伎女石火胡, 本幽州人也。 俯仰來去, 於百尺竿上 赴節如

是時觀者目眩心怯。 文宗即位, 惡其太險傷神,遂不復作。

寅恪案:石爲昭武九姓之一。火胡之名,尤爲其人出自信奉火祆教之西胡族之證。

此戲源於西

關於掉長竿句, 則朝野僉載云: 胡,

自可推知也。

者不忍,女無懼色。 幽州人劉交, 戴長竿高七十尺, 自擎上下, 後竟爲撲殺。 有女十二, 甚端正, 於竿上置定, 跨盤獨立。見

明皇雜錄略云:

玄宗御勤政樓, 羅列百伎。 時教坊有王大娘者, 善戴百尺竿。 劉晏詠日, 樓前百戲競爭新。

安祿山事蹟下略云:

惟有長竿妙入神。

第五章

新

樂 府

向潤客等計無所出,遂以樂人戴竿索者爲趫捷可用, 唯三數人伏草莽間獲免。其樂人本玄宗所賜,皆非人間之伎,轉相教習,得五百餘人。 授兵出戰。 至城北清水河,爲奚羯所

六

並 或 脱 一人肩符,首戴二十四人。(寅恪案:肩一本作扇,「首戴」下有闕字,符字義亦難通, 誤, 俟考。)戴竿長百餘尺, 至於竿杪人騰擲如猿狖飛鳥之勢, 竟爲奇絕, 累日不憚。 疑

者汗流目眩。

獨異志上云: 德宗朝有戴竿三原婦人王大娘,首戴十八人而行。

筋斗裴承恩妹大娘, 善歌, 兄以配竿木侯氏。

又云:

寅恪案:裴爲疏勒國姓。(參舊唐書壹肆陸新唐書壹佰拾裴玢傳。)裴承恩有爲西胡之可能。 范漢女大娘子,亦是竿木家。開元二十一年出內,有姿媚而微慍羝。 (原注云:謂腋氣也。) 范漢

語言與文學。) 夫范氏旣爲竿木家, 女大娘子有腋氣,疑即是胡臭。(參拙著狐臭與胡臭,載一九三七年六月清華大學中國文學會編 日本正倉院南棚漆彈弓背第二段繪有戴竿戲, (見正倉院考古記圖版貳陸。)又史浩鄮峯 當與其同類爲婚姻,亦雜有西胡血統。 故疑此戲亦來自西域

詳見南史陸齊本紀東昏侯紀南齊書柒東昏侯紀及通鑑壹肆貳齊紀永元元年十二月條。)

(周一良先生謂齊東昏侯善作擔幢之戲,

是此技亦傳入南朝

漫錄亦有竹竿子之語,皆可資參考。

觀

總之,此類百戲, 來自中亞。 雖遠在漢世, 已染其風。 而直至唐朝, 猶有輸入。如舊唐書貳玖音

樂志略云: 幻術皆出西域, 天竺尤甚。 漢武帝通西域, 始以善幻人至中國。 我高宗惡其驚俗, 勅西域關

即爲其證。 令, 不令入中國 然頗疑唐世所盛行者,多因於後魏北齊楊隋之一脈流傳, 如胡樂之比。 拙著隋唐制

度淵源略論稿音樂章中曾涉及此事,故於此不多贅列焉。 此唐代新輸入之胡樂也。

樂也。 胡樂與胡伎也。至二公所謂雅樂, 謂「中庭漢振高音播。」以及樂天所詠之雜戲, 抑尤可論者, 然則二公直以後來居上者, 微之立部伎云:「胡部新聲錦筵坐。」指坐部伎而言, 爲胡部新聲, 即法曲之類, 指立部伎而言。 積薪最下者, 爲先王雅樂耳。 其中既不免雜有琵琶等胡器, 則後魏北齊楊隋及李唐初年輸 夫法曲之樂, 是亦更早輸入之胡 其所

有胡器,而破陣樂之類,據通典壹肆陸樂典坐立部伎條所云:

知尤多胡音, 則微之詩注所云::

自安樂以後,

皆雷大鼓,

雜以龜茲樂,

聲振百里,

並立奏之。

法曲與胡部新聲合作。 太常丞宋沇傳漢中王舊説云, 識者異之。 明皇 明年禄山叛。 雖雅好度曲, 然而未嘗使蕃漢雜奏。 天寶十三載始韶道調

一六三

樂天法曲篇注所云:

法曲雖似失雅音, 蓋諸夏之聲也。 故歷朝行焉。 (此下略同元詩立部伎注。)

白詩「太常三卿爾何人。」句,太常三卿云者,唐六典壹肆(舊唐書肆肆職官志新唐書肆捌百官志並 其不合事實眞相, 自極明顯。 特古文運動家尊古卑今, 崇雅賤俗, 乃其門面語, 本不足深論也。

太常寺卿一人,少卿二人。

元詩「中庭漢振高音播。」句, 所謂漢振者, 據守山閣本羯鼓錄(唐語林伍同。)略云:

云:去聲。)肯聲。 宋開府璟與上(明皇)論鼓事曰,不是青州石末,即是魯山花藝。 據此,乃是漢震第二鼓也。上與開府兼善兩鼓, 撚小碧上掌下須有朋(原注 而羯鼓偏好, 以其比漢震

此漢震即漢振也。

稍雅細焉。

元詩「昔日高宗嘗立聽, 曲終然後臨御座。」者, 舊唐書貳玖音樂志略云:

破陣樂太宗所造也。 享宴奏之,天子遜位,坐宴者皆興。

舊唐書壹捌捌孝友傳裴守眞傳(通典壹肆陸樂典坐立部伎條原注,唐會要叁叁破陣樂條同。)略云:

禮。 又神功破陣樂功成慶善樂二舞, 臣等詳 議 奏二舞時, 天皇不合起立。 每奏, 上皆立對。 時並從守真議。 守真又議 會高宗不豫, 日, 詳覽博記, 事竟不行。 未有皇王立觀之

云: 元詩「明年十月燕寇來。」句, (舊唐書玖玄宗紀下及通鑑貳壹柒唐紀玄宗紀天寶十四載。貳壹捌肅宗紀至德元載諸條同。)略 是也。 與其連昌宮詞「明年十月東都破。」句俱爲誤記。 據新唐書伍玄宗紀

則祿山之反,在天寶十 可謂疏於國史矣。 (天寶十四載)十一月安禄山反。 四載十一月。 十二月丁酉陷東京。 其破東都, 在同年十二月。 天寶十五載六月己亥禄 微之於此一 誤再誤, 山陷京師 必非偶爾忽

華原

時事。 樂天此篇小序下自注與微之詩題下自注同,蓋皆出於李公垂原詩傳。大唐新語拾釐革篇開元中天 貞觀之風, 樂天新樂府於立部伎之後, 自此以上由七德舞至海漫漫, 故詩中有「積德重熙有餘慶。」之言, 即繼以華 原磬上陽白髮人胡旋女新豐折臂翁諸篇者, 則以太宗時事爲主。 是亦與太宗有關也。)此蓋以時代爲分合者也。 (法曲 一篇雖以永徽始, 以此數篇皆玄宗 然永徽之政有

府

下無事條末語亦與相同。 劉氏與李元白三公爲同時人, 其所述亦同出於一源也。

元白二公此篇意旨, 俱崇古樂賤今樂,而據白氏長慶集肆捌策林第陸肆目復樂古器古曲略云:

美, 人心平而和, 夫器者所以發聲,聲之邪正,不繫於器之今古也。 若君政驕而荒, 人心動而怨, 則雖奏今曲廢古曲, 不在乎改其器易其曲也。 則須捨今器用古器,而哀淫之聲不散矣。若君政善而 而安樂之音不流矣。 曲者所以名樂,樂之哀樂,不繫於曲之今 臣故以爲銷鄭衛之聲, 復正始之

然則射策決科之論, 與陳情獻諫之言, 和其情, 固出一人之口, 而乖牾若是, 其故何耶?樂天和答詩十首

在乎善其政,

序(白氏長慶集貳。)云:

同者謂之和,異者謂之答。

雖然, 殆即由李氏原倡本持此旨, 二公賦詩在和公垂原意, 寅恪嘗反覆詳讀元白二公華原磬之篇, 竊疑微之詩篇末所云:「願君每聽念封疆, 遂至不顧其前日之主張歟?

不遣豺

時旅居鳳翔時所見。樂天所感者,則在翰林內廷時所知。故皆用樂記 忘封疆臣。 狼剿人命。 `」樂天詩篇中所云:「古稱浮磬出泗濱。 果然胡寇從燕起。武臣少肯封疆死。」殆有感於當時之邊事而作。微之所感者, 立辯致死聲感人。」及「宮懸一聽華原石, 爲其少 君心遂

鏗以立號, 號以立横, 横以立武。 君子聽鐘聲, 則思武臣。 石聲硜, 硜以立別,

别

詩箋證中, 集壹伍施司諫注東坡詩序。)今讀華原磬之篇而益信。 其說詳後樂天新樂府西涼伎篇及前微之豔體 謂其辭直而徑,揆以此篇,則亦未盡然。陸務觀序施注蘇詩,極言能得作者微旨之難,(見渭南 以發揮其胸中之憤懣, 茲不贅論。 殊有言外之意,此則不必悉本之於公垂之原倡也。樂天新樂府大序

例。 今爲用者也。樂天之作新樂府,以詩經古詩爲體裁,而其骨幹則實爲當時民間之歌曲, 書不敢觀。(見前長恨歌章。)此乃吾國文學史上二大事, **淸華學報玖卷貳期拙著四聲三問。)韓退之酷喜當時俗講,以古文改寫小說,而自言非三代兩漢之** 底蘊也。 此外尙有可論者, 韓白二公同屬古文運動之中心人物,其詩文議論外表內在衝突之點, 苟能通知吾國文學史上改革關鍵之所在,當不以詩語與策林之說互相矛盾爲怪也。 沈休文取當時善聲沙門之說創爲四聲,而其論文則襲用自昔相傳宮商五音之說, 自古文人尊古卑今,是古非今之論多矣,實則對外之宣傳,未必合於其衷心之 而其運動之成功, 復相類似。 實皆爲以古爲體,以 讀此華原磬 亦爲其

## 上陽〔白髮〕人

此題今敦煌本(巴黎圖書館伯希和號伍伍肆貳。)作上陽人, 無白髮二字。 全唐詩作上陽白髮人

注云:

一無白髮字。

汪本同敦煌本, 注云:

一本有白髮二字。

則似有白髮字者爲是。可參閱法曲條。 那波本及盧校本皆有白髮二字。考此篇乃樂天和微之作者, 微之詩題, 諸本既均作上陽白髮人,

李公垂或亦乘此類似機會感興成詩, 此題公垂原倡, 而元白二公和之。考寶氏聯珠集有寶庠陪留守僕射巡視至上陽宮感興二絕句, 否則雖在東都, 似亦無緣擅入宮禁之內也。 則

白氏長慶集肆壹奏請加德音中節目有請揀放後宮人一條, 略云:

有供億糜費之煩。下則離隔親族, 臣伏見大曆以來四十餘載, 宮内人數積久漸多。 有幽閉怨曠之苦。 事宜省費, 伏慮驅使之餘, 物貴遂情。 其數猶廣。 臣伏見自太宗玄 上則屢給衣食,

而 :通鑑貳叁柒唐紀憲宗紀載李絳與樂天同言此事, 並繫之於元和四年三月之末, 又云:

閏三月己酉,制出宮人如二人之請

宗以來,

每遇災旱,

多有揀放。

伏望聖慈,

再加處分。

則其事旣與樂天作詩之時相同,

自必有關於白公此篇及七德舞一篇無疑也。

天寶五載已後,楊貴妃專寵,後宮人無復進幸矣。

之言,是公垂之意必以册楊氏爲貴妃事在天寶四年八月,故云「五載已後」也。餘詳長恨歌箋證。

玄宗末歲初選入,入時十六今六十。「唯向深宮望明月,東西四五百迴圓。」句,據詩云:

假定上陽宮人選入之時爲天寶十五載(西曆七五六年),其年爲十六。則至貞元十六年(西曆八〇 上陽宮人之獲見月圓次數,亦不過四五百迴。 〇年)其年六十。自入宮至此凡歷四十五年, 須加十六閏月, 共約五百五十六望, 三五之時, 月夕生於東, 朝沒於西,所以言東西 除去陰雨暗夕,

者,蓋隱含上陽人自夕至旦通宵不寐之意也。

親近侍從官稱〔天子〕曰大家。 「大家遙賜尚書號。」句,「大家」者,據蔡邕獨斷上云:

蓋「大家」乃漢代宮中習稱天子之語也。 而劉肅大唐新語壹貳酷忍篇 (參酉陽雜俎前集壹忠志類上

嘗夢日鳥飛條。)云:

舊唐書壹捌肆宦官傳李輔國傳云: 初令宮人宣勑示王后。后曰,願大家萬歲,昭儀長承恩澤,死自吾分也。

府

[李輔國]私奏曰,大家但内裏坐,外事聽老奴處置。

李義山文集肆紀宜都內人事云:

宜都内人曰,大家知古女卑於男邪?(寅恪案, 宜都内人以皇帝稱武則天也。)

肆職官志宮官條(參新唐書肆柒百官志尙宮局條。)云: 三國志魏志叁明帝青龍三年注引魏略, 體如七絕之類,而古體則用典雅之詞,此新樂府雖爲摹擬古詩之體,但「大家」一 是直至唐世,猶保存此稱謂。樂天詩詠宮女,故用宮中俗語也。依唐人作詩通則, 而又合於當時宮庭習俗, 則樂天下筆時煞費苦心, 及北史壹伍魏書壹叁后妃傳序等,即是其例。 端可見矣。又女尙書之號,古已有之, 詞旣於古典有 俗語限用於近 據舊唐書肆 如

宮官。(六尚如六尚書之職掌。)

是唐代沿襲前代,宮中亦有女尙書之號也。此老宮女身在洛陽之上陽宮,當時皇帝從長安授以此 即所謂「遙賜」也。噫!以數十年幽閉之苦,至垂死之年,始博得此虛名, 而詩人言外之旨抑可見矣。 (全唐詩第壹壹函王建宮詞「宮局總來爲喜樂, 院中新拜內尙書。 聊以快意, 實可哀

見應笑。」者,實有天寶末載與貞元元和之際時尚不同之意,茲略徵舊籍以考釋之如下。 「小頭轐履窄衣裳。青黛點眉眉細長。外人不見見應笑,天寶末年時世妝。」句,所以言「外人不見

亦可供參考也。)

關於衣履事, 姚汝能安祿山事蹟下云:

天寶初 貴游士庶, 好衣胡服, 爲豹皮帽。 婦人則簪步搖, 议衣之制度, 衿袖窄小。

今新唐書叁肆五行志云

天寶初,貴族及士民好爲胡服胡帽。婦人則簪步搖釵,衿袖窄小。

妝。」者,豈窄小之時尙起自天寶初年,下至天寶末載尙未已耶?(又馬元調本天寶末年作天寶年 即用姚書,足可爲此詩「小頭鞵履窄衣裳。」句之注脚。惟姚書作「天寶初」,而此云「天寶末年時世 雖與姚歐之書不相衝突,但詩中明言玄宗末歲初選入,似作天寶末年者,更爲確切也。)

時世寬妝束。

又白氏長慶集壹肆和夢遊春詩云:

則知貞元末年婦人時妝尙寬大, 是即樂天「外人不見見應笑。」詩意之所在也。

又觀舊唐書壹柒上文宗紀云:

太和二年五月丁巳, 命中使於漢陽公主及諸公主第宣旨, 今後每遇對日, 不得廣挿釵梳, 不

須著短窄衣服。

然則太和初期婦人時妝復轉向短窄矣。時尙變遷,迴環往復,此古今不殊之通則。寅恪嘗以爲證 釋古事者,不得不注意其時代限制,此足爲其例證也。

第五章

關於畫眉事, 才調集伍元微之有所教詩云:

莫畫長眉畫短眉。斜紅傷豎莫傷垂。 (寅恪案, 此兩句乃當日時勢妝, 即時世妝之教條也。

前已論及。)人人總解爭時勢,都大須看各自宜。

爲描寫同一時代之流行妝束。頗疑貞元末年之時世妝, 有所教一首在豔體詩中,當爲貞元末所作,與樂天和夢遊春詩所謂「風流薄梳洗, 其畫眉 尚短, 與樂天此詩所言天寶末年之

時世寬妝束。」

呂向美人賦,(參新唐書貳佰貳文藝傳呂向傳及全唐文叁佰壹。)即樂天所言者也。其作「呂尙」者 君不見昔時呂尙美人賦。」句及此句小注中之呂尙,俱應依傳世善本作呂向。今文苑英華玖陸有 時尙爲「靑黛點眉眉細長。」者,

適得其反也。

姑記此以俟更考。

蓋因太公望之故而誤書耳。

復次,微之行宮五絕(元氏長慶集壹伍。)云:

寥落古行宮。 宮花寂寞紅。 白頭宮女在, 閑坐説玄宗。

蓋二者旣同詠白頭宮女,

可藉以窺見二公作品關係之密切也。

復次微之上陽白髮人詩云::

可與此篇參互並觀,

諸王在閣四十年, 七宅六宮門户関

寅恪案,

錢牧齋校改「七宅」爲「十宅」是也。 唐會要伍諸王門(參舊唐書壹佰柒玄宗諸子涼王璿傳

及新唐書捌貳十一宗諸子汴哀王璥傳。)略云:

安國寺東附苑城爲大宅,分院居之,名爲十王宅。 先天之後,皇子幼則居内。 東封後(寅恪案, 指開元十三年東封泰山言。)以年漸長成, 乃於 。十王謂慶忠棣鄂榮光儀潁永延盛濟等,

十舉全數。其後壽信義陳豐恆涼七王,又就封入内宅。開元二十五年鄂光得罪, 天寶中慶棣又歿,惟榮儀十四王居内,而府幕列於外坊, 歲時通名起居而已。 外諸孫長 忠王繼大

百孫院三四十人。諸孫納妃嫁女,亦就十宅中。太子不居於東宮, 太子之子亦分院而居, 婚嫁則同親王公主於崇仁里之禮院。 但居於乘輿所幸之別院

成,又於十宅外置百孫院。每歲幸華清宮,側亦有十王宅百孫院。

十王宫人每院四百餘人,

故「七宅」爲「十宅」之譌,據此可以證明矣。至微之此詩結語又云:

隨煬枝條襲封邑,

肅宗血胤無官位。(原注云:肅宗已後諸王並未出閣。)王無妃媵主無壻。

陽亢陰淫結災累。何如決壅順衆流, 女遣從夫男作吏。

亦可與元氏長慶集叁貳獻事表所列十事中「二曰任諸王以固磐石。三曰出宮人以消水旱。四曰嫁 諸女以遂人倫。」等相參證也。

## 女

胡 旋

微之此篇注云:

緯書曰, 上幸蜀, 至萬里橋, 僧 行嘗奏明皇曰, 乃歎謂左右曰, 陛下行幸萬里, 行之奏其是乎?。 聖祚無疆。 故天寶中歲幸洛陽, 冀充盈數。

及

也。 十四年冬十月丁卯由洛陽還長安後,即不復再幸東都。此所云:「天寶中歲幸洛陽」者,非史實 寅恪案:此條亦見國史補上及唐語林伍等書。關於預言後驗之物語,可不置辨。 可參考連昌宮詞章。 惟玄宗自開元二

樂天詩云:

天寶季年時欲變。

祿山傳及安祿山事蹟上並同。 寅恪案:安祿山能胡旋舞事, 又舊唐書壹捌叁外戚傳武承嗣傳附延秀傳亦有胡旋舞之記載。 見於史傳中, 如舊唐書貳佰上安祿山傳(新唐書貳貳伍上逆臣傳安 其事

臣妾人人學圓轉。中有太真外禄山,二人最道能胡旋。

在玄宗前, 則此舞爲唐代宮中及貴戚所愛好, 由來久矣。)云:

宗前, 禄山)晚年益肥壯, 作胡旋舞, 疾如風焉。 腹垂過膝, 重三百三十斤。每行以肩膊左右擡挽其身, 方能移步。 至玄

氏傳, 俱止言其善歌舞, 即爲其證。至於楊太眞, 則舊唐書伍壹后妃傳上玄宗楊貴妃傳,新唐書柒陸后妃傳上玄宗貴妃楊 而不特著其長於胡旋舞。然太眞旣善歌舞, 而胡旋舞復爲當時所尚,

則

太眞長於此舞, 自亦可能。 樂天之言, 或不盡出於詩才之想像也。

梨花園中册作妃。

樂天詩云:

金鷄障下養爲兒。

萊宮側者,乃敎坊之所在。 寅恪案:唐長安有二梨園。 (詳徐松兩京城坊考。)準以地望與情事,似俱無作爲册妃處所之可能。 一在光化門北, 一在蓬萊宮側。其光化門北者,遠在宮城以外。其蓬

樂天之言未知所據,又太眞外傳上云:

八月。 天寶四載七月册左衛中郎將韋昭訓女配壽邸。 詳見長恨歌章, 茲不置辨。)於鳳凰園册太真宮女道士楊氏爲貴妃。 是月(寅恪案, 樂史作是月即七月,

誤。

應作

則樂史以册楊氏爲貴妃之地爲鳳凰園。鳳凰園之位置,今亦無考。 或謂宋敏求長安志西內一章

(畢沅關中勝蹟圖志伍及徐松|兩京城坊考此條俱出宋氏之書。)云:

似鳳凰園與鳳凰門有關。 東面一門鳳凰門, 隋曰建春門, 惟據通鑑貳壹陸唐紀玄宗紀略云: 後改通訓門。 明皇時鳳凰飛集通訓門, 韶改爲鳳凰

天寶十一載八月)癸巳楊國忠奏有鳳凰見於左藏庫屋, 出納判官魏仲犀言, 鳳集庫西通訓

第五章

十月己亥, 改通訓門曰凰集門。 魏仲犀遷殿中侍御史,楊國忠屬吏率以鳳凰優得調。

知改通訓門爲鳳凰門在天寶十一載。其事在天寶四載八月册楊氏爲貴妃事以後。

準以時間,

不合。故於此册妃之處所, 惟有闕疑,以俟更考。

至「金鷄障下養爲兒。」者,據次柳氏舊聞(兩唐書安祿山傳及安祿山事蹟上並同。)云:

天寶中,安禄山每來朝, 上特異待之,每爲致殊禮, 殿西偏張金鷄障,其來輒賜坐。

曰,天子殿無人臣坐禮,陛下寵之已甚,必將驕也。上呼太子前曰,此胡有奇相,

吾以此厭

弭之爾。

話錄等。) 云:

安祿山事蹟上(參兩唐書安祿山傳, 通鑑貳壹陸唐紀玄宗紀天寶十載正月甲辰條及考異, 趙璘因

貴妃與禄山作三日洗兒, 洗了又绷禄山, 是以歡笑。玄宗就觀之, 召禄山入内,貴妃以繡綳子綳禄山,令内人以綵輿舁之,歡呼動地。玄宗使人問之, 金銀錢物, 極樂而罷。 自是宮中皆呼禄山爲祿兒,不禁其出入。 大悦。 因加賞賜貴妃洗兒

則金鷄障與養爲兒本是兩事, 樂天以之牽合爲一,作爲「梨花園中册作妃。」之對文耳。

則新豐折臂翁之目, 此題新豐折臂翁,一作折臂翁, 與此篇首句「新豐老翁八十八。」更適合故也。 似作新豐折臂翁者爲是。蓋樂天新樂府大序明言「首句標其目」。

此篇主旨即其結語云: 君不聞開元宰相宋開府。 不賞邊功防黷武。 又不聞天寶宰相楊國忠。 欲求思幸立邊功。

未立生人怨, 請問新豐折臂翁

舊唐書壹肆柒杜佑傳(新唐書壹陸陸杜佑傳同。)略云:

元和元年册拜司徒同平章事。 時河西党項,潛導吐蕃入寇。邊將邀功, 亟將擊之。 佑上疏論

捕斬之,傳首闕下。 國家自天后以來, 自以爲功代莫與二,坐望榮寵。 突厥默啜兵強氣勇,屢寇邊城, 宋璟爲相, 爲害頗甚。 慮武臣邀功, 開

元初,

邊將郝靈住親 爲國家生事,

之日,

止授以郎將。 由是訖開元之盛,無人復議開邊。中國遂寧,外夷亦靜。

寅恪案:樂天所以稱宋璟爲宋開府者,雖由宋璟之文散階至開府儀同三司,〈參舊唐書玖陸宋璟 傳壹佰陸王毛仲傳。)實亦以此爲當日通用以稱宋璟者, 開元日(後?)通不以名, 而可稱者宋開府。 觀國史補下(唐語林肆企羨類同。)略云:

第五章

宗一朝理亂所繫者常舉之事例。(參李相國論事集伍論任賢事條及同集陸上言開元天寶事條。)然 年。」初視之,似亦甚不可通,然考全唐詩第貳貳函段成式戲高侍御七首之壹云: 或受其影響, 未可知也。 君卿上疏,在樂天作此詩之前。 可證也。 作」語不可通,蓋不可讀爲「此臂臂折六十年。」也。今敦煌本及那波道圓本俱作「臂折來來六十 尤可注意者, 樂天此篇論天寶末宰相楊國忠, 而取開元初宰相宋璟爲對文, 詩中「此臂折來六十年。」句, 杜氏之疏傳誦一時,白氏此詩以宋璟防黷武事爲言,與之符同 全唐詩本「折來」下注云:「一作臂折。」此 固當時述玄

百媚城中一個人。紫羅垂手見精神。青琴仙子常教示,自小來來號阿真

「痛不眠,終不悔。」句,敦煌本作「痛不眠兮終不悔。」併兩句爲一句。考樂天新樂府五十篇中多有 語之「臂折來來六十年。」爲令人易解之「此臂折來六十年。」則大可不必矣。 則「來來」連文亦唐人常語,全唐詩小注殆校寫者有所誤會耳。至今之翻刻那波本者, 亦改唐世舊

靈佺」之名,則白詩諸本與史傳之紀載歧異至多。 如今汪本及全唐詩本俱作靈筌, 注文中「即鮮于仲通李密覆軍之所也。」之「李密」,應作「李宓」,此世所熟知者,可勿置論。 費袞梁谿漫志 惟「郝

重疊三言之句,此「兮」字似可不用,敦煌本不必盡從也。

捌樹稼靈佺誤條(知不足齋叢書本。)略云:

白樂天樂府新豐折臂翁注云:天武軍牙將郝雲岑, 按此則名雲岑, 而舊唐書作靈儉。 新唐書

通鑑貳壹壹唐紀玄宗紀開元四年六月條作靈荃, 考異云:

唐曆又云靈荃,舊傳爲靈儉,今從唐曆。

岑建功舊唐書校勘記陸伍突厥傳上略云: 仍與入蕃使郝靈筌。 寰宇記筌作任。

而通鑑考異引舊傳作郝靈儉。疑佺字之誤。(寅恪案,

百衲本此傳筌作儉,

寅恪案:舊唐書壹肆柒杜佑傳新唐書伍玄宗紀開元四年六月癸酉條, 與溫公所見者同。) 新唐書壹貳肆宋璟傳,

新唐

中均同,今白詩諸本亦無歧異。費程書中作雲者,自不可從。而佺字乃取義於堯時仙人偓佺,與 書壹陸陸杜佑傳, 新唐書貳壹伍上突厥傳上,俱作郝靈佺,自以作靈佺者爲是。蓋「靈」字在史籍

靈字有關,不可別作他字也。

仲通之敗, |天寶末楊國忠爲相, 「特」。殊不知「鐵勒」爲種族之名。「特勒」即「特勤」,乃王子之稱,不可混淆也。 又「特勒」當作「鐵勒」。蓋通常多誤「特勤」爲「特勒」,而「特勒」復世所習見,淺人因改「鐵」爲 尚在其前一歲,即天寶十載也。又樂天蠻子朝「至今西洱河岸邊, 箭孔刀痕滿枯骨。 重構閣羅鳳之役,募人討之。」之「天寶末」,宋本作「天寶十一載。」其實鮮于 復次, 注文中,

第五章 新

府

寶十三載鮮于仲通統兵六萬討雲南王閣羅鳳於西洱河,全軍覆沒也

三載矣。今計自天寶十載即西曆七五一年, 寶十三載李宓之敗而言, 寅恪案:天寶十三載李宓敗死於西洱河,樂天此篇注謂楊國忠重構閣羅鳳之役, 特混李宓爲鮮于仲通耳。 或天寶十三載即西曆七五四年, 若果如是, 則宋本注中之天寶十一 至元和四年即西曆八 其意亦恐是指天 載, 當作十

不足深論。至「八十八」三字,敦煌本作「年八十」者,詩人舉成數言之,本亦可通,不必以其巧合 歲其年八十。然則所謂「新豐老翁八十八。」者,押韻之故,「臂折來來六十年。」者,舉成數言之, ○九年此篇作成之歲,共爲五十九年或五十六年。例如詩言新豐翁年二十四爲天寶十三載,

八十之年爲說也。

復次, 約摹仿此篇,蓋連昌宮詞假宮邊老人之言,以抒寫開元天寶之治亂繫於宰相之賢不肖及深戒用兵 然其氣勢若常山之蛇, 此篇爲樂天極工之作。其篇末「老人言, 是亦宮旁居民也。)至連昌宮詞以「連昌宮中滿宮竹。」起,以「努力廟謨休用兵。」結, 實與此篇無不相同也。 首尾迴環救應, 則尤非他篇所可及也。後來微之作連昌宮詞, (此篇所寫之折臂翁爲新豐人。新豐即昭應縣之本名, 君聽取。」以下,固新樂府大序所謂「卒章顯其志。 爲華清宮之 即合於

樂天新樂府「首句標其目,卒章顯其志。」之體制,

自更不待論矣。

## 樂天此篇小序云:

借夫婦以諷君臣之不終也。

下。 此說不爲無見。 事亦見於通鑑貳叁捌唐紀憲宗紀中,而附記於元和五年六月甲申白居易復上奏以爲臣比請罷兵條 或疑李相國論事集貳論白居易事條所云,憲宗怒白居易不遜,欲逐之出翰林事。與此有關。 其時間雖似稍晚, 惟可注意者, 樂天此時雖居禁近, 但樂天新樂府五十首中如海漫漫杏爲梁諸篇, 實爲小臣, 詩中「左納言, 疑亦作於元和四年以後, 右納(內)史。」句。

乃指宰相大臣而言, 非樂天自況之辭也。

樂天所指言者,其在德順二宗之世乎? 復次,新樂府之作旣在元和四年或略後, 而其時憲宗朝大臣並無所謂「朝承恩, 暮賜死。」之情事,

舊唐書壹貳德宗紀上(舊唐書壹壹捌新唐書壹肆伍楊炎傳同。)略云:

馬, 建中二年七月庚申, 以中書侍郎平章事楊炎爲左僕射。 十月乙酉, 尚書左僕射楊炎貶崖州

同書壹叁陸寶參傳(參新唐書壹肆伍寶參傳,通鑑貳叁肆唐紀德宗紀貞元八年四月乙未條,

第五章

九年三月條。) 略云:

明年(貞元五年)拜中書侍郎同平章事領度支鹽鐵轉運使。 貶參郴州別駕, 貞元八年四月也。

(九年三月)乃再貶爲驩州司馬, 未至驩州, 賜死於邕州武經鎮

之間,遂遭賜死,此誠可致慨者也。

寅恪案:楊炎以文學器用,竇參以吏識強幹,

俱爲德宗所寵任, 擢登相位,

而並於罷相後不旋踵

又會昌一品集壹貳論救楊嗣復李珏陳(裴?)夷直第叁狀(參新唐書壹捌拾李德裕傳。)云:

伏見貞元初(寅恪案, 此坐死。 旋則朝廷中外皆以爲冤。兩河不臣之地,悉恐亡懼(?)。德宗尋亦追悔, 劉晏之賜死實在建中初。)宰臣劉晏緣德宗在東宮時涉動搖之論,

官其子

寅恪案:劉晏爲代宗朝舊相,最有賢名,而德宗以疑似殺之,斯爲失政之尤。此當時後世所以咸

致冤痛也。

舊唐書壹肆憲宗紀上(參新唐書柒憲宗紀陸貳宰相表中。)云:

[永貞元年十一月]貶正議大夫中書侍郎韋執誼爲崖州司馬, 以交王叔文也。

曾受韋執誼之知獎。 (見唐文粹伍陸李珏牛僧孺神道碑及陸捌杜牧丞相奇章公墓誌銘。)復考白氏 寅恪案:韋執誼流貶於憲宗即位之年,距樂天作詩之時甚近。 樂天始終同情於牛僧孺, 而牛僧孺

刺德宗之猜刻,遂取以諷諫元和天子耶?

詩中「左納言,右納史。」句,唐六典捌門下省侍中條略云:

四年,改爲侍中, 門下省侍中二人,隋氏諱忠, 龍朔二年, 改爲東臺左相。 改爲納言。煬帝十二年,改納言爲侍内。 咸亨元年復舊。 光宅元年改爲鸞臺納言。 皇朝初爲納言, 武德

元年復舊。開元元年改爲黃門監,五年復舊,曰門下省侍中。

同書玖中書省中書令條略云:

相。咸亨元年復舊。 帝十二年改爲内書省。 中書省中書令二人,隋氏改中書省爲内史省,置內史省監令各一人,尋廢監,置令二人。煬 光宅二年改中書爲鳳閣,令爲内史。神龍元年復舊。 武德初爲内史省。三年改爲中書省。 龍朔三年改省爲西臺,令爲右 開元元年改爲紫微

令,五年復舊。

又白氏長慶集壹初入太行路詩結語云:寅恪案:據此,則右納史當作右內史也。

若比世路難,

猶自平於掌。

可與此篇旨意相參照也。

司天喜

此篇小序云:

引古以儆今也。

耀芒射角動三台,其詩云::

寅恪案:晉書叁陸張華傳略云:

上台半滅中台坼。

代下邳王晃爲司空,領著作。初華所封壯武郡,有桑化爲柏。

又華舍及監省數有妖怪。

少子韙以中台星坼,

勸華遜位。

華不從。

則古有中台星坼三公須避位之說, 李吉甫所誣構, 爲杜佑于頔鄭絪裴垍李藩五人。其中裴垍曾在翰林與樂天同官交好。 憲宗紀元和二年十一月它日上召李絳對於浴堂條。) 則此三人者,似俱不應爲樂天所譏誚。 人狀。)李藩則由裴垍之推薦, 而爲其道誼相合之李絳所救解。(參李相國論事集貳論鄭絪條及通鑑貳叁柒唐紀 致身相位。 是此篇所刺者, (參舊唐書壹肆捌李藩傳。)鄭絪亦嘗爲樂天素所不喜之 豈即當時之執政耶?考元和四年之三公及宰相 (參白氏長慶集肆壹論制

任其咎。樂天作詩時,裴垍爲中書侍郞同平章事, 一月丁卯罷爲太子賓客,李藩於二月丁卯由給事中拜。)雖爲宰相,並非三公。揆以樂天引古儆今 凡遇陰陽災變, 則三公縱不握實權者,亦往往爲言者所指斥,而實際柄政之臣, 鄭絪李藩相代爲門下侍郞同平章事。 則時或不 (鄭絪於

之語, 則樂天所指言者, 殆屬之當時司徒杜佑司空於頔二人之一矣。

周禮注疏壹捌春官大宗伯之職條賈公彥疏引武陵太守星傳云:

後漢書陸拾下郞顗傳略云:

三台一名天柱。

上台司命爲太尉,

中台司中爲司徒,

下台司禄爲司空。

順帝時災異屢見,陽嘉二年正月公車徵, 能其事, 序賢進士, 後必有喜。 反之, 則白虹貫日。 顗迺詣闕拜章〔言七事,其六事曰〕,又易傳曰,公 以甲乙見者, 則譴在中台。 自司徒(劉

陰陽多謬。 宜黜司徒, 以應天意。

直指司空而言也。然則是篇所指, 寅恪案:古以司徒上應三台之中台, 坼」而張華子韙勸其避位者,不過張韙鑒於當時政局之動盪,特欲其父避禍引退耳,非即謂中台 其杜岐公乎?又白氏長慶集陸柒司徒令公(裴度)分守東洛移鎭 故「譴在中台」則「宜黜司徒」。前引晉書之文,所謂「中台星

天上中台正, 人間一品高 北都輒奉五言四十韻寄獻以抒下情詩云。

第五章

新 樂 府

尤可 與此 說相印證也。 當日杜岐公以年過七十尙不致仕, 深爲時論所非。 樂天秦中吟不致仕

首, 以元和五年九月致仕, 所不許。且樂天又深有取於其戒邊功防黷武之論, 顯爲其事而發, 宜新樂府中有此一篇也。 (舊唐書壹肆憲宗紀。)時草制者猶以「近代寡廉, 或有以杜岐公已於元和二年正月請致仕, 似不應致過分之譏誚爲疑者。 罕由斯道。」隱譏杜氏 是又不然。 而爲憲宗 高郢

、國史補中。)而樂天所草答高郢請致仕第二表(白氏長慶集叁玖。)亦以:

援禮引年, (可參白氏長慶集壹高僕射詩。)則當日之輿論可知矣。 遺榮致政。 人鮮知止, 卿獨能行。 不唯振起古風, 至新豐折臂翁一篇, 亦足激揚 時俗。 或即取義於杜

復次,白氏長慶集肆拾季冬薦獻太淸宮詞略云:岐公之疏者,亦不過不以人廢言之義耳。

維元和二年,歲次丁亥,十二月甲寅朔二十六日已卯,嗣皇帝臣稽首大聖祖高上大道金闕

起。 元天皇大帝。 司天臺奏, 伏以今年司天臺奏, 正月三日祀上帝於南郊, 六月五日夜鎮星見。 司天臺奏, 六月十三日夜老人星見。 佳氣充塞, 四方溫 司天臺奏, 潤 祥風 冬至日

樂天此篇之作,或即以曾草是文而有所感觸耶?

佳氣充塞,

瑞雪祁寒者。

謹遣攝太尉司徒平章事杜佑薦獻以聞

捕

舊唐書壹貳德宗紀上(參舊唐書叁柒新唐書叁柒五行志。)略云:

下則草木及畜毛無復子遺, 窘,關中饑民蒸蝗蟲而食之。五月癸卯,分命朝臣禱羣神以祈雨。 穀價騰踊。 七月,關中蝗食草木都盡。 甲子, 蝗自海而至, 韶蝗蟲繼臻, 飛蔽天, 彌亙

興元元年,是秋螟蝗蔽野,草木無遺。貞元元年四月,關東大饑,賦調不入,由是國用益

減省,不急之務, 切停罷。

千里,

菽粟翔貴,

稼穡枯瘁,

嗷嗷蒸人,

聚泣田畝。

朕自今視朝不御正殿,

有司供膳,

並宜

饉, 考貞元元年樂天年十四,時在江南,求其所以骨肉離散之故,殆由於朱泚之亂。而興元貞元之饑 則又家園殘廢之因。 聊書所懷。寄上浮梁大兄,於潛七兄,烏江十五兄, 觀白氏長慶集壹叁自河南經亂, 關內阻飢。 弟兄離散, 兼示符離及下邽弟妹。 各在一處。因望 詩云:

時難年饑世業空。

月有感,

可證也。 又通鑑貳叁貳唐紀德宗紀貞元二年夏四月條云:

之一。數月人膚色乃復故。 時比歲饑饉,兵民率皆瘦黑。 至是麥始熟, 市有醉人,當時以爲嘉瑞。人乍飽食,死者復伍

第五章 新 府

夫兵 及新唐書壹貳肆姚崇傳略同。)所記捕蝗之事, 於貞元以來朝廷姑息藩鎭, 證校白氏詩文附按。)實可與元和四年所作此捕蝗詩互相證發也。 亂歲饑 其貞元十四五年間所作寄家人詩, 而反對李吉甫吐突承璀之積極政策也。 乃貞元當時人民最忧目驚心之事。 以求苟安之措施。 (見歷史語言研究所集刊第拾貳本岑仲勉先生文苑英華 多可與此篇詞語相參證。 惟與此似亦不無心理情感之關係。 舊唐書玖陸姚崇傳 樂天於此, 既餘悸尙存, 樂天於元和中不主張用 (舊唐書叁柒新唐書叁陸五 茲略錄其文如下: 故追述時, 未必悉因 下筆猶有 兵 黨 行 派之 古 辨 志

之。 彼豈無德致然?今坐看食苗, 自宜修德。 開 四 元四年(五月)山 崇曰 蝗是天 萬 石, 仍拒御史不肯應命。 若殺蟲救人, 災, 投汴 豈可 渠, 東蝗蟲大起, 制以 流下者不可勝紀。 人事, 因緣致禍, 何忍不救?因以饑饉, 外議咸以爲非。 崇乃遣御史分道殺蝗。 崇大怒, 崇請獨受, 時 牒報之日, 朝廷 喧議, 義不仰關 又殺蟲太多, 將何以安?若水乃行焚瘞之法, 古之良守, 皆以驅蝗爲不便, 汴州刺史倪若水執奏曰, 蝗是天災, 有傷和氣。 蝗蟲避境。 黄門監 今猶 若其修 可復, 盧懷 德可免, 請 慎謂 獲蝗 公思

並可參閱後漢書伍伍卓茂傳。 寅恪案:姚崇所謂「古之良守, 」及盧懷愼「蝗是天災, 豈可制以人事。」之說。樂天對於蝗蟲之識解 白詩所謂「豈將人力競天災。」者, 蝗蟲避境。」與白詩所謂「我聞古之良吏有善政, 即如倪若水「蝗是天災, 同於盧倪, 以政驅蝗蝗 此則時代囿 自 出境。 1宜修

詩末自注云:

貞觀二年太宗吞蝗蟲事,具貞觀實錄。

寅恪案:此篇結語以文皇吞蝗事爲言, 王後海漫漫百鍊鏡諸條相參證。 又此事亦見今戈本貞觀政要捌論務農篇。 疑亦爲樂天作七德舞時撦尋材料所採摭之餘義。可與論二

昆明春

此篇小序下注云:

貞元中始漲之。

册府元龜壹肆帝王部都邑門(參舊唐書壹叁德宗紀下貞元十三年八月丁巳條。)云:

貞元十三年)八月韶曰, 昆明池俯近都城,古之舊制, 蒲魚所產,實利於人。

宜令京兆尹韓

皐充使即勾當修堰漲池。

止水賦及青出藍詩, 載宋悛漲昆明池賦。 是也。今文苑英華叁伍(全唐文陸肆肆。)有張仲素漲昆明池賦,同書同卷(全唐文玖伍柒。)亦 徐松登科記考壹肆貞元十四年李隨榜有李翺張仲素呂溫等, 與此無涉。考董逌廣川書跋捌李翶題名條略云: 惟此年試題爲鑒

重。觀韋貫之集有啓獻韓貞公乞兗知進士舉,當時貞公欲以解頭目送文公,由是乃得以李翱 今考文公所書,知府送皆有會集,書於慈恩石楹。蓋當時等甲進士便與科名等,故世尤貴

爲第一,張仲素次之。蓋自十人解送而九人入等,

時以爲盛,

即此題名是也。

之可能,或者樂天新樂府中昆明春一篇,殆即受張賦之啓發耶? 皐, 疑張氏之賦即應京兆府試而作,樂天爲貞元十六年進士,與張氏作賦時相距至近,殊有得見此賦 徐氏所據以考定李張爲貞元十三年京兆等第者,即李文公感知己賦與此條也。 既與李文公之府送有此一段因緣, 而皐實又爲貞元十三年以京兆尹主持漲昆明池之役者, 董氏所記韓貞公即

頗

復次, 盧校本云:

題無水滿二字, 貞元中始弛之, 與上文連。

岑仲勉先生論白氏長慶集源流, 按作弛之是也。東本全詩均誤。唯此句是注,與題連則非。 並評東洋本白集(見歷史語言研究所集刊第玖本肆肆伍頁。)云:

寅恪案:岑說「此句是注,與題連則非。」是也。惟詩中雖有

諸句, 即弛禁之意, 以昆明近帝城。 但亦別有: 官家不得收其征。 菰蒲無租魚無稅。 近水之人感君惠。

詔

開八水注恩波,

千介萬鱗同日活。

九〇

之言,可與「漲之」語意相應。若再以張宋之題作漲昆明池賦證之, 則那波本汪本注作「漲之」,全

唐詩注作「漲泛」者,當亦非無據也。

水。(三)涇水。(四)渭水。(五)豐水。(六)鎬水。(七)牢水。(八)潏水。是也。 「詔開八水注恩波。」句,所謂八水者,三輔黃圖陸所紀,關中八水皆出上林,(一)壩水。(二)旌

「吳興山中罷榷茗。」者,國史補下云:

風俗貴茶,茶之名益重。湖州有紫笋。

同書同卷又云:

曰, 普問曰,此爲何物?魯公曰,滌煩療渴,所謂茶也。贊普曰,我此亦有。 衡出使吐蕃事。李氏所指,殆即常魯。今本作常魯公,乃傳寫之誤。)使西蕃,烹茶帳中。贊 常魯公(舊唐書壹玖陸下吐蕃傳下及册府元龜玖捌拾外臣部出使門並有建中二年常魯隨崔漢 知顧渚之茶, 此壽州者, 亦遠輸吐蕃矣。) 此舒州者, 此顧渚者, 此蘄門者, 此昌明者, 此繼湖者。 (寅恪案, 遂命出之。 據此 以指

南部新書戊云:

漸與楊祭酒書云,顧渚山中紫笋茶兩片。此物但恨帝城未得嘗,實所嘆息。一片上太夫人, 湖州造茶最多,謂之顧渚貢焙。焙在長城縣西北。大曆五年以後,始有進奉。故陸鴻

府

片充昆弟同啜。後開成三年, 以貢不如法, 停刺史裴充。

新唐書肆拾地理志湖州吳興郡條云:

紫筍茶, 長城(縣)顧山, 有茶以供貢。

舊唐書壹叁德宗紀下云: 貞元九年春正月癸卯,初稅茶,歲得錢四十萬貫,從鹽鐵使張滂所奏。茶之有稅,自此始也。

同書肆玖食貨志云: 貞元九年正月,初稅茶。

新唐書伍肆食貨志云: 貞元八年, 以水災減税。

十税其一, 自是歲得錢四十萬緡,然水旱亦未嘗拯之也。

明年,

諸道鹽鐵使張滂奏,

出茶州縣若山及商人要路以三等定估,

皆有關稅茶與吳興顧渚盛產名茶之史料也。

鄱陽坑裏休稅銀。」者,貞觀政要陸論貪鄙篇云:

貞觀十年治書侍御史權萬紀上言, 宣饒二州諸山, 大有銀坑, 採之極是利益, 每歲可得錢數

舊唐書壹叁陸齊映傳(新唐書壹伍拾齊映傳同。)云:

百萬貫。

第五章 新 樂 府

爲 又改洪州刺史江西觀察使。 金銀器以希旨。 先是銀餅高者五尺餘, 映常以頃爲相輔, 李兼爲江西觀察使, 無大過而罷, 冀其復入用, 乃進六尺者。 乃掊斂貢奉, 至是因帝(德宗

誕日,端午,映爲餅高八尺者以獻。

新唐書肆壹地理志饒州鄱陽郡條云:

榷茗貢銀者,貞元之弊政。 誠可謂善諷者矣。 土貢麩金銀。 放昆明池魚蒲之稅租者,德宗之仁施。 映對明顯,

寄慨至深。

以此爲

世選人必深注意其近年考試之題目,以供揣摩練習, 京都之往事,兼念水鄉之舊遊,遂就其親所聞見権茗稅銀之弊政, 爲樂天所記憶。又樂天少時曾往來吳越間,其兄復在浮梁,(可參汪立名本樂天年譜。)是以追憶 又樂天於貞元十五年由宣州解送, 十六年成進士。若貞元十三年京兆府試以漲昆明池爲試題, 與明淸時代無異, 而痛陳之也。 則修治昆明池一事,自當 唐

城鹽州

微之新樂府雖無此題, 但樂天此篇誚邊將之旨, 必有取於其西涼伎縛戎人二篇之意,自不待言。

i.

美聖謨而誚邊將也。

即其遣詞亦多用浣花原語。他如此篇「韓公創築受降城。」一句,乃諸將第貳首起句「韓公本意築三 尊。」諸句,則不獨造意悉承自杜工部諸將第貳首「獨使至尊憂社稷, 君主之英明獨斷,全遠資少陵於代宗時所作之詩爲模楷, 城。」之改寫,亦其證也。夫樂天於貞元之時,旣未嘗歷職淸要,自不得預聞朝廷之大計。其崇美 之全部主旨, 由是觀之,讀樂天此篇者, 見下論。)至於譏誚邊將之養寇自重, 及詩中「鹽州未城天子憂。」「德宗按圖自定計, 必應取少陵諸將第貳首參互比較, 則近和微之在鳳翔時親見親聞之原意,故不爲泛泛之詞也。 此所以未見有當於當日之情事也。 始能得其眞解, 又可知矣。此篇小 非關將略與廟謀。」「翻作歌詞聞至 諸君何以答昇平。」之結論

序下注云:

貞元壬申歲,特韶城之。

寅恪案:壬申歲, 貞元九年二月辛酉, 貞元八年也。 韶復築鹽州城。 考舊唐書壹叁德宗紀下云: 貞元三年, 城爲吐蕃所毀。

自是塞外無堡障,

既城之後,邊患息焉。

宗紀貞元九年二月辛酉條考異略云: 同書壹肆肆杜希全傳楊朝晟傳及壹玖陸下吐蕃傳下亦均繁是役於貞元九年, 獨通鑑貳叁肆唐紀德

府

八年韶追張公(獻甫)議築鹽夏二城云云。白居易樂府鹽州注亦云, 貞元壬申歲特韶城

之。 而實錄在九年二月,蓋去歲詔使城之。今年因命杜彦光等而言之。

君實作史,采及此注,足徵雖細不遺。通鑑之爲傑作,於此可見矣。茲略迻錄舊唐書杜希全傳 (參新唐書壹伍陸杜希全傳。)紀載當日築城之經過於下, 以備讀樂天此詩者之參證焉。

具名奏聞,悉與改轉。 權知鹽州事, 甫邢君牙韓潭王栖耀范希朝,各於所部簡練將士,令三萬五千人同赴鹽州, 遠之謀, 至化未孚。 戰之方, 則封内多虞, 千里庭障, 衝要,遠介朔陲,東達銀夏,西援靈武,密邇延慶,保扞王畿。乃者城池失守, 易象垂文, 西通鄜坊, 希全以鹽州地當要害, 修五原之壘, 燧燧不接, 三隅要害, 有備無患, 既不能復前古之治, 甚爲邊患。 應板築雜役,取六千人充。其鹽州防秋將士率三年滿更代, 先王令典。況修復舊制,安固疆里,偃甲息人,必在於此。 使邊城有守, 朕情非己欲,志在靖人,咨爾將相之臣,忠良之士, 諸華屢警, 自貞元三年西蕃劫盟之後, (新傳此下有請復城鹽州五字。)朝議是之。九年, 致四夷之守, 役戌其勤。 若非興集師徒, 由中及外, 中夏克寧,不有暫勞,安能永逸。宜令渾瑊杜希全張獻 與其臨事而重擾, 皆靡寧居。 州城陷虜, 深惟永圖, 繕修壁壘, 設攻守之具, 自是塞外無保障, 豈若先備而即安。 豈忘終食。 仍委杜彦先(光?) 韶曰, 輸誠奉命, 神策將軍張昌宜 顧以薄德 制備無據 設險守國 靈武勢隔 是用弘久 鹽州地當 務耕 陳力

元白詩箋 一證稿

忘憂, 旬而畢。 勉茂功勳,永安疆場,必集兵事,實惟衆心,各相率勵, 時將板築, 仍韶涇原劍南山南諸軍深討吐蕃以牽制之。 以副朕志。凡役六千人,二 由是板築之時,虜不及犯

塞 城畢, 中外稱賀。 由是靈武銀夏河西稍安,虜不敢深入。

詩云:

城在五原原上頭。

寅恪案:元和郡縣圖志肆靈武節度使鹽州五原縣條略云:

鹽州〔治〕五原縣。五原謂龍游原, 乞地干原, 青領原, 可嵐貞原, 横槽原也。

則五原爲鹽州治所及五原縣之得名, 可據知也。

蕃東節度鉢闡布。

寅恪案:新唐書貳壹陸下吐蕃傳下云:

[元和]五年,以祠部郎中徐復往使, 並賜鉢闡布書。 虜浮屠豫國事者也, 亦曰鉢掣逋。

又白氏長慶集叁玖有與吐蕃宰相鉢闡布勅書,乃樂天在翰林時所草。 吐蕃宰相也。 蓋城鹽州時, 鉢闡布尚未爲

詩云:

金鳥飛傳贊普聞。 建牙傳箭集羣臣。

寅恪案:舊唐書壹玖陸下云:

適有飛鳥使至,飛鳥猶中國驛騎也。

新唐書貳壹陸上吐蕃傳上云:

趙璘因話錄肆角部之次(參唐語林捌補遺。)云:

其舉兵以七寸金箭爲契,百里一驛。

有急兵,

驛人臆前加銀鹘。

甚急,

鹘益多。

蕃法刻木爲印,

每有急事,

則使人馳馬赴贊府牙帳。

日行數百里,

使者上馬 如飛,

號爲鳥

知此乃吐蕃之制度也。

詩云:

君臣赭面有憂色。

寅恪案:舊唐書壹玖陸上吐蕃傳上(新唐書貳壹陸上吐蕃傳上同。)云:

[文成]公主惡其人赭面, [棄宗]弄贊令國中權且罷之。

以吐蕃有赭面之俗故也。 敦煌寫本法成譯如來像法滅盡之記中有赤面國,乃藏文(Kha-dmar)之對譯, 即指吐蕃而言。蓋

新

詩云:

長安藥肆黃蓍賤。

寅恪案:本草綱目壹壹引唐蘇恭本草云:

黄蓍今出原州者最良。

蓋秦原闍通,故黃蓍價賤也。

韓公創築受降城

詩云:

寅恪案:張仁亶築三受降城事, 世所習知, 亦唐人所盛稱者。 如杜子美之詩, 呂和叔之銘,

例證也。

詩云:

德宗按圖自定計, 非關將略與廟謀

寅恪案:樂天此語,意謂城鹽州之舉,全出德宗之旨, 唐書杜希全傳之紀載, 事關軍國大計, 德宗似無不與商議之理, 則城鹽州之議, 本由希全發之, 故此句所詠, 而貞元八九年間, 非關將相謀略, 疑與當時情勢有所未合也。 不知有何依據。考上引舊 陸宣公正爲宰相,

陽城事蹟,見韓愈順宗實錄貳永貞元年三月壬申追前諫議大夫道州刺史陽城赴京師條,及同書肆 永貞元年六月癸丑贈故道州刺史陽城左常侍條, 此皆世所習知, 茲不備錄。 惟節錄舊傳(參新傳。)所紀陽城抗疏論発道州貢矮奴事於下, 舊唐書壹玖貳隱逸傳新唐書壹玖肆卓行傳陽城傳

供讀此篇者之參證焉。

道州土地產民多矮, 每年常配鄉户, 竟以其男號爲矮奴。 城下車,禁以良爲賤。 又憫其編忙

乃抗疏論而免之。自是乃停其貢。民皆賴之,無不泣荷。

詩云:

歲有離異之苦,

城云臣按六典書。 任土貢有不貢無。道州水土所生者, 只有矮民無矮奴。

民多矮事,除見於前引之新舊傳外, 寅恪案:樂天此數句, 似即依據陽氏原奏之文。今此奏不載於全唐文等書, 劉賓客嘉話錄(劉叔遂蘇萊曼東遊記證聞曾引之, 自無可考。 載中國文 惟道州產

化研究彙刊第肆卷。) 云:

小者道州參軍, 楊國忠嘗會諸親, 胡者湖州文學, 時知吏部銓事, 簾中大笑。 且欲大噱, 已設席呼選人名,引入於中庭, 不問資序,

短

亦可資參證也。所謂「按六典書。」「任土貢有不貢無。」者, 即唐六典叁戶部郎中員外郞條云:

注云:

郎中員外郎, 掌領天下州縣户口之事,凡天下十道, 任土所出而爲貢賦之差。

舊額, 令中書門下對朝集使隨便條革, 貢獻多非土物, 或本處不產而外處市供, 以爲定準。 或當土所宜, 緣無額遂止。 開元二十五年,

茲不贅述。 詩所述陽城奏語, 是也。至關於六典曾否行用問題,則自來多所辨說。已詳拙著隋唐制度淵源略論稿職官章, 所可言者, 亦此問題例證之一也。 六典一書, 自大曆後公式文中, 可以徵引, 與現行法令同一效力。 觀樂天

篇末云:

道州民,民到於今受其賜。欲説使君先下淚。仍恐兒孫忘使君, 生男多以陽爲字。

寅恪案:道州民以陽城之姓名子之事,不見於順宗實錄及舊傳,惟新傳書之,未知所本。 書壹柒陸韓愈傳云: 考新唐

貶陽山令,有愛在民,民生子多以其姓字之。

壹。)者。 而其事亦不見於舊唐書壹陸拾韓愈傳。 實則後漢書壹佰陸循吏傳任延傳略云: 此殆爲宋景文取自李翶所撰之韓文公行狀(李文公集壹

年二十至五十, 徵爲九眞太守, 女年十五至四十, 駱越之民, 無嫁娶禮法,不識父子之性, 皆以年齒相配,其產子者,始知種姓。咸曰, 夫婦之道。 延乃移書屬縣, 使我有是子 各使男

者,任君也。多名子爲任。

白詩李狀恐是用此故典以爲虛美推贊陽韓二公之詞,未必果有其事也。 墓誌銘云: 又如白氏長慶集陸壹元稹

三川人慕之,其後多以公姓字名其子。

蓋亦同此例也。

抑又可論者,元氏長慶集貳有陽城驛詩,

乃微之元和五年春貶江陵士曹參軍途中所作,觀白氏長

慶集貳和答詩十首第貳首爲和陽城驛, 其序略云:

(元和)五年春, 寄在路所爲詩十七章。 微之從東臺(東都洛陽御史臺)來。不數日,又左轉爲江陵士曹掾。 及到江

與海漫漫杏爲梁兩篇參證, 可知, 頗疑樂天此作與其和微之陽城驛詩有關。蓋受此暗示,因詠貞元時事,而並及之也。此可 以此兩篇俱有作於元和五年或以後之可能, 則道州民一篇,亦自有此

復次, 微之陽城驛詩云:

種可能也。

祠(詞?)曹諱羊祜,(寅恪案:晉書叁肆羊祜傳,荆州人爲祜諱名, 屋室皆以門爲稱,

曹爲辭曹焉。)此驛何不侔。我願避公諱,名爲避賢郵

樂天和陽城驛詩, 深贊同微之改驛名之意,其結語至云:

可謂極其傾倒矣。 若作陽公傳, 後來此驛名竟爲之改易。 杜牧樊川集肆商山富水驛詩注云: 欲令後世知。不勞敍世家,不用費文詞。 但使國史上,全錄元稹詩。

驛本名與陽諫議同姓名,因此改爲富水驛。

即可爲證。然則元白詩之流行於當時及其影響之深鉅, 驛名不合輕移改, 留警朝天者惕然 信有徵矣。惟牧之詩之結語云:

雖文人喜作翻案文字,然亦牧之素惡元白之詩所使然也。 以其亦與陽城有關, 因並附論及之。

#### 馴 犀

公垂此篇詩旨如何,不可考見。微之和其詩,則意主治民不擾,使之遂性,以臻無爲之治。所謂: 乃知養獸如養人,不必人人自敦獎,不擾則得之於理,不奪有以多於賞。 脱衣推食衣食之,

不若男耕女令紡。堯民不自知有堯, 旨意亦略嫌平常, 但見安閒聊擊壤。 似不如樂天此篇末數語, 前觀馴象後觀犀, 俯仰今昔,而特以爲善 理國其如指諸掌。

是也。

微之是篇,

議論稍繁,

聖主不忘初政美, 小儒唯有涕縱橫。

蓋與樂天此篇有同感而深得其旨矣。考舊唐書壹叁德宗紀下略云:

益。 戒服玩之奢。 於多士。 歎連甍,果致五盜僭擬於天王,二朱憑陵於宗社。 輟廷臣而治畿甸。此皆前王之能事,有國之大猷,率是而行,夫何敢議。 所賴忠臣戮力, 其始也, 德宗皇帝初總萬機, 解鷹犬而放伶倫, 去無名之費, 否運再昌。 勵精治道, 雖知非竟逐於楊炎, 止榷酤而絕貢奉。 罷不急之官。 思政若渴, 出永巷之嬪嫱, 奉天之窘,可爲涕零。 百神咸秩, 而受佞不忘於盧杞。 視民如傷。 五典克從。 放文單之馴象。 凝旒延納於讜言, 罪己之言, 用延賞之私怨, 一旦德音掃地, 御正殿而策賢良, 減太官之膳 側席思求 補之何 愁

據此,白詩措辭微婉,與史臣書事直質者殊異,此或亦昔人所謂詩與春秋經旨不同之所在歟? 李晟之兵符。 取延齡之奸謀, 罷陸贄之相位。 知人則哲, 其若是乎?貞元之辰,

吾道窮矣。

關於德宗放馴象事, 杜陽雜編上云:

代宗朝文單國累進馴象三十有二。上即位,悉令放之於荆山之南。 之式 孚, 宏詞獨孤綬,所司試放馴象賦,及進其本,上(德宗)自覽考之,稱歎得人。 則必受乎來獻。 物或違性, 斯用感於至仁。 上以綬爲知去就, 而緩不斥受獻,不傷放 故特書第三等。 因吟其句曰, 化

棄,故賞其知去就焉。

又舊唐書壹貳德宗紀上略云:

[大曆十四年五月]癸亥即位於太極殿。 閏[五]月丁亥,韶文單國所獻舞象三十二,令放荆山

宗初次改元之建中爲言,其實非建中元年也。(參劉文典先生羣書斠補。)又舊紀所謂「放於荆山之 陽」者,據通鑑貳貳伍唐紀德宗紀大曆十四年閏五月命縱馴象於荆山之陽條胡注云: 寅恪案:德宗即位於大曆十四年五月,放馴象即在是年閏五月,但大曆爲代宗年號,故樂天以德

然則詩云「馴象生還放林邑。」及注云「放歸南方。」皆有所誤會也。

此禹貢所謂導汧及岐至於荆山者,唐屬京兆府富平縣界。

關於馴犀凍死事,舊唐書壹叁德宗紀下略云:

[貞元九年]十月癸酉,環王國獻犀牛,上令見於太廟。十二年十二月己未,大雪平地二尺,

寅恪案:貞元九年歲次癸酉,十二年歲次丙子,元氏長慶集貳肆馴犀篇引李傳云: 竹栢多死。環王國所獻犀牛,甚珍愛之,是冬亦死。

貞元丙子歲南海來貢。至十三年冬苦寒,死於苑中。

而樂天此篇注中「貞元丙戌。」固應如汪立名之言改爲丙子,但「貞元十三年」亦應依舊唐書德宗紀

馴犀馴犀通天犀,軀貌駭人角駭雞。

抱朴子壹柒內篇登涉云:

通天犀角有一赤理如綖,有自本徹末。 故南人或名通天犀爲駭雞犀。

以角盛米,

置羣雞中,雞欲啄之,未至數寸,

即驚退

是也。

詩云:

上嘉人獸俱來遠。 蠻館四方犀入苑。

寅恪案:詩所謂「蠻館四方」者,即唐六典壹捌典客署典客署令條注云:

及唐兩京城坊考壹承天門街之西宮城之南第二横街之北條云: 〔隋〕於建國門外置四方館,以待四方使客,各掌其方國及互市事。

皇朝以四方館隸中書。

復次,此篇詩句, 從東第一中書外省,次西,四方館。(隋曰謁者臺,即諸方通表通事舍人受事之司。)者是也。 如「餘以瑶雾鏁以金。 故鄉迢遞君門深。海鳥不知鐘鼓樂,池魚空結江湖心。」

亦樂天自比之詞。又「一入上林三四年。」句,則馴犀於貞元九年十月入獻,十二年十二月凍死,

府

之歎服其歌行,固非無因也。 之歲月約略相近。故此句比擬尤切,詞意相關,物我俱化。樂天之詩才,實出微之之上。李公垂 實在苑中四年有餘,而樂天於元和二年十一月入翰林,至作此篇時在元和四年,亦與馴犀在苑中

此題公垂倡之, 其新樂府中一篇旣以五絃彈爲題, 微之和之, 樂天則秦中吟有五絃(才調集壹作五絃琴。)一篇, 自是酬李元之作, 但秦中吟中五絃一 篇之辭旨與新樂府此 新樂府有五絃彈

李公垂此題所詠今不可見,未知若何。元白二公則立意不同。 微之此篇以求賢爲說, 樂天之作則

篇頗有關連,因亦參合於此論之。

以惡鄭之奪雅爲旨,

題。故鄙見以爲白氏之作,較之元氏此篇,更爲優勝也。

此其大較也。 微之持義固正,

但稍嫌迂遠。

樂天就音樂而論音樂,

極爲切

微之此篇及白氏之作,俱有趙璧技藝之摹寫。蓋趙璧之五絃在當時最負盛名。 國史補下云:

《耳,目如鼻,不知五絃之爲璧,璧之爲五絃也。人問其術。答曰,吾之于五絃也,始則心驅之,

中則神遇之,終則天隨之。 吾

趙壁彈五絃,

方浩然,

眼如耳,

樂府雜錄五絃條云:

皆可與元白諸作參證也。 貞元中有趙壁者, 妙于此伎也。 白傅諷諫有五絃彈。 近有馮季皐。

又元白二公此題諸篇之詞句, 幷可與其後來所作之琵琶歌琵琶引參證。 如微之詩中:

第五章

府

風入春松正凌亂, 鶯含曉舌憐嬌妙。 嗚嗚暗溜咽冰泉, 殺殺霜刀澀寒鞘。

樂天秦中吟五弦中:

大聲麄若散,颯颯風和雨。小聲細欲絕,切切鬼神語。

及新樂府五絃彈中:

冰寫玉盤千萬聲。 第五絃聲最掩抑。 四座相對愁無言。 座中有一遠方士,唧唧咨咨聲不已。 鐵聲殺, 隴水凍咽流不得。 冰聲寒。 殺聲入耳膚血慘, 五絃並奏君試聽。 寒氣中人肌骨酸。 淒淒切切復錚錚。 鐵擊珊瑚一兩曲, 曲終聲盡欲半日,

等句是也。

元詩「衆樂雖同第一部。」句,樂天琵琶引云:

十三學得琵琶成,名屬教坊第一部。

國史補下略云:

名倡,以爲盛會。令袞弊衣以出,合坐嗤笑。及轉喉一發,樂人皆大驚曰, 李袞善歌。初於江外, 而名動京師。 崔昭入朝, 密載而至, 乃邀賓客, 請第一部樂及京邑之 此必李八郎也。

太平廣記貳佰肆樂類貳又李暮條引逸史云:

遂羅拜階下。

李暮]開 元中吹笛爲 第 部, 近代無比。 有故自教坊請假至越州, 公私更醮, 以觀其妙。

皆可與元氏此句參證也。

### 朝

之復通南詔, 以犯西北。 玄佐中變, 此題李公垂原作, 且於貞元十七年大破其衆於雅州,則爲效已可睹矣。此事始末詳拙著唐代政治史述論 而未能全部施行。然韋南康在劍南, 乃貞元初唐室君主及將相大臣圍攻吐蕃秘策之一部。 而元白二公和之。元白之詩俱於韋皐有微辭, 以南詔復通之故, 李氏之作諒亦相同。 得使吐蕃有所牽制, 此秘策雖不幸以韓滉早死, 其實韋南 不敢全力 劉 康

稿下篇論吐蕃條及下文論西涼伎條,於此可不複述。 茲所欲言者, 據國史補中略云:

韋太尉在西川極其聚斂, 坐有餘力, 以故軍府寖盛, 而黎甿重困。 及晚年爲月進, 終致

知當時士論多以劉闢之亂歸咎南康, 是固然矣。 惟同書同卷又云:

之亂

天下譏之。

吐蕃九節度, 郭汾陽再收長安,任中書令二十四考。勳業福履,人臣第一。韋太尉皐鎭西川亦二十年, 擒論莽熱以獻, 大招附西南夷。 任太尉, 封南康王, 亦其次也。

則 南 康招附西南夷之勳業, 亦爲時議所推許也。 而元白二公乃借蠻子朝事以詆之, 自爲未允。

其時二公未登朝列, 自無從預聞國家之大計,故不免言之有誤耳。

元詩云:

白詩云:

清平官繁金怯嵯。

寅恪案:樊綽蠻書爲現存研究南詔史實之最要資料。今新唐書貳貳貳上中南蠻傳南詔傳, 清平官持赤藤杖,大軍將繫金呿嗟。

蠻書。故亦可取與元白此諸句相參校。二公句中所謂淸平官者, 即新傳云:

即根據

曰布燮, 曰久贊, 謂之清平官。 所以決國事輕重, 猶唐宰相也。

白詩中所謂大軍將者,新傳云:

是。又白氏長慶集肆拾有與南詔淸平官書,亦可與此參證也。

官曰坦綽,

慈爽主禮, 曰 酋望, 曰正 酋望, 罰爽主刑, 曰員外 哲望, 勸爽主官人, 厥爽主工作, 曰大軍將。 曰員外, 萬爽主財用, 猶試官也。 引爽主客, 幕爽主兵, 禾爽主商賈 琮爽主户籍.

今白詩諸本,除嚴氏本嘉承本等善本外,多作「大將軍」者,皆誤也。 外臣部官號門南詔: 他書如今本册府元龜玖陸貳

清平官酋望大軍將兼之。

等語,是亦譌誤之一例。至阮元撰雲南通志所載南詔向化碑, 則或作大將軍, 或作大軍將。

蓋有

誤有不誤者矣。

元詩之「金呿嵯」, 白詩之「金呿嗟」, 新傳云:

佉苴, 韋帶也。

又云:

自曹長以降, 繫金佉苴。

「呿嵯」,「呿嗟」皆佉苴之異譯,自不待論也。

至白詩中之「赤藤杖」,則韓昌黎集肆和虞部盧四汀酬翰林錢七徽赤籐杖歌(元和四年分司東都

作。)云:

赤籐爲杖世未窺,臺郎始携自滇池。

全唐詩壹肆張籍和李僕射秋日病中作云::

獨倚紅籐杖, 時時增上行。

同書壹玖裴夷直南韶朱籐杖詩云:

六節南籐色似朱。拄行階砌勝人扶。

第五章

樂 府

皆足徵赤籐杖出自南詔, 而爲當時朝士所最珍賞之物也。白氏長慶集捌朱籐杖紫驄吟云:

栖栖者。

拄上山之上,

騎下山之下。

江州去日朱籐杖,

忠州歸時紫聽馬。

天生二物濟我窮,

我生合是

同集壹伍紅籐杖云:

交親過避別,車馬到江迴。唯有紅籐杖,相隨萬里來。

同集壹陸紅籐杖(自注云:杖出南蠻。)云:

南韶紅籐杖,

西江白首人。時時攜步月,

處處把尋春。

勁健孤莖直,

疎圓六節勻。

火山生處

遠, 瀘水洗來新。 麓細纔盈手, 高低僅過身。 天邊望鄉客, 何日拄歸秦。

同集貳貳三謠序云:

息之暇, 予廬山草堂, 筆硯在前, 有朱籐杖一, 偶爲三謠 蟠木机一, 素屏風二, 時多杖籐而行, 隱机而坐, 掩屏而臥。

宴

朱籐謠略云:

朱籐朱籐。 温如 紅 玉, 直如朱繩。 自我 得爾以爲杖, 大有裨於股肱。 前年左遷, 東 南萬里。

然則赤籐杖與樂天關係密切如此,亦可稱佳話矣。

惟

此朱籐,

實隨

我

來

求天叩地持雙珙。

白詩云:

此,以俟更考。 寅恪案:此二句俱不易解。白曰「雙隈伽」。元曰「雙珙」。豈「隈伽」者,「珙」之音義耶?姑識於 摩挲俗羽雙隈伽。

白詩云:

異牟尋男尋閣勸。

特赦召對延英殿。

上心貴在懷遠蠻。

引臨玉座近天顏。

冕旒不垂親勞徠。

賜衣賜食移時對。

寅恪案:王建宮詞第貳首云:

殿前傳點各依班。召對西來六韶蠻。

其第捌首云:

直到銀臺排仗合,

聖人三殿對西番。

故附錄之。

可與白詩參證也。

(此首所詠非即指六韶蠻, 但以其言天子御殿召對蠻夷

第五章 新 樂 府

或

舊唐書壹叁德宗紀下云: [貞元十八年正月]乙丑,驃國王遣使悉利移來朝貢,并獻其國樂十二曲與樂工三十

五人。

而微之此篇題下李傳云:

蓋實以貞元十七年來獻,而十八年正月陳奏之於闕庭也。

貞元辛巳歲始來獻。(樂天此篇小序下之註作十七年。

貞元辛巳歲,

即貞元十七年也。)

樂天此篇以「欲王化之先邇後遠也」爲旨,微之詩中有:

教化從來有源委, 必將泳海先泳河。

之句,是二公此篇持旨相同之證。想李公垂原作,當亦類似。

殆即樂天和答詩序(白氏長慶集

貳。) 所謂:

同者謂之和。

也。

樂天詩云:

二四四

又云:

曲終王子啓聖人。臣父願爲唐外臣。

白氏長慶集肆拾與驃國王雍羌書略云:

說郛陸柒驃國樂頌(當是開州刺史唐次所撰。見新唐書貳貳貳下南蠻傳驃傳。)略云: 又令愛子遠副闕庭。今授卿太常卿,幷卿男舒難陀那及元佐摩訶思那二人亦各授官。 驃國王子獻其樂器。初,驃國之王舉國送之,且訓其子曰,

聖唐恩澤,宏被八埏。

至若驃國, 來循萬里。 進貢其音, 敢愛其子。 又頌辭云:

唐會要壹佰驃國條略云: 貞元十八年春正月,南韶使來朝。 驃國王始遣其弟悉利移來朝。

今聞南韶異牟尋歸附,

心慕

之, 乃因南韶重譯, 遣子朝貢。其王姓困沒長,名摩羅惹。

通鑑貳叁陸唐紀德宗紀略云:

舊唐書壹玖柒南蠻傳驃國傳略云: 貞元十八年春正月驃國王摩羅思那遣其子悉利移入貢,仍獻其樂。

第五章 樂

府

其國樂, 貞元中其王聞南韶異牟尋歸附, 凡十曲, (據新唐書貳貳貳下南蠻傳驃傳所標舉者應有十二曲。 心慕之。 〔十〕八年, 乃遣其弟悉利移因南韶 )與樂工三十五 重譯 來 朝。 又獻

俱。尋以悉利移爲試太僕卿。

册府元龜玖柒貳外臣部朝貢門云:

貞元十八年正月,

驃

國王始遣其弟悉利移來

朝,

獻其國樂凡十曲,

(同書伍柒拾掌禮

部

夷樂

門作十二曲。)與樂工三十五人來朝。

新唐書貳貳貳下驃傳略云:

雍羌亦遣弟悉利移城主舒難陀獻其國樂。 五譯而至。 德宗授舒難陀太僕卿遣還

朝。 利移城主舒難陀。 以獻樂者爲驃國王之子悉利夷。 雍羌之子舒難陀」爲言。 今傳世之說郛本驃國樂頌, 寅恪案:驃國王所遣之使, 後言「遣子入貢。」 唐頌白書俱當時之文件, 」又可注意者,唐會要於同條中述同一事,而前言「驃國王始遣其弟悉利 諸書所記互相乖異。 舊傳册府元龜並以悉利夷爲雍羌之弟。 樂天之詩及其所草與驃國王雍羌書俱以「驃國 其他諸書亦皆可信之史籍, 則唯言驃國王遣其子獻樂而不著其名。 新傳則作「雍羌亦遣 而牴牾若此, 移來 弟 通

復次,新唐書貳貳貳下南蠻傳驃傳略云:

可解。

姑記之以俟更考。

請獻夷中歌曲, 貞元中王雍羌聞 至成都, 韋皐復譜次其聲, 且令驃國進樂 南韶歸唐, 有内附心。 人 以其舞容樂器異常 於是皐作南韶奉聖樂。 (南韶王)異牟尋遣使楊加明詣劍南西川節度使韋皐, 乃圖畫以獻。 雍羌亦遣弟悉利移城主舒難陀獻其

國史補下略云:

于司空頔因章太尉[皐]奉聖樂, 亦撰順聖樂以進。 頔又令女妓爲六佾舞, 聲態壯妙, 號孫武

順聖

業隆重, 寅恪案:德宗經朱泚亂後, 仍不能不隨附時俗, 只求苟安, 宜乎致當時之譏刺也。 專以粉飾太平爲務, 特元白二公俱於此篇未明言之耳。 藩鎭大臣亦迎合意旨。 故雖南康之勳

縛 戎

此篇題目元白集諸本均作縛戎人。 改易,然未必即是與題意相應者也。 傳置南方」之語, 知極可通, 不必定爲譌字。 至樂天「將軍遂縛作蕃生。 」句中之縛字, 雖斷不可

獨白氏新樂府嘉承本作傳戎人。

證以微之此篇題下注中「例皆

微之幼居西北邊鎭之鳳翔,對於當時邊將之擁兵不戰,虛奏邀功,必有所親聞親見,故此篇言之 頗極憤慨。 樂天於貞元時旣未嘗在西北邊陲, 自無親所聞見, 此所以不能超越微之之範圍而別有

稿

過日。 諸句, 增創也。 遺民腸斷在涼州。 白氏此篇不爲置和者,蓋以此旨抒寫於西涼伎篇中, 至微之詩末「緣邊飽餧十萬衆,何不齊驅一時發。年年但捉兩三人, 將卒相看無意收。 」一節。斯又樂天新樂府不複不雜之一貫體例也。 而有「緣邊空屯十萬卒。 精衞銜蘆塞溟渤。 飽食溫衣閒

今邏些長慶會盟碑云:

寅恪案:元詩此篇「年年但捉兩三人。」之「捉」, 「畫牧牛羊夜捉生。 若有所疑, 或要捉生問事, 」之「捉生」, 乃此會盟碑,即當日國際條約中「捉生」二字之注脚也。 白詩「將軍遂縛作蕃生。」之「生」,及城鹽州篇 (參西陽

便給衣糧放還。

志。)有捉生將,(參舊唐書壹叁叁李晟傳附子愬傳。)即取義於此。 雜俎前集肆喜兆類成式見大理丞鄭復說淮西用兵時條。)唐世有守捉使, (參舊唐書叁捌地理

又舊唐書壹玖陸下吐蕃傳下云:

其「生口」一詞, 道送到吐蕃生口十七人, [永貞元年]十一月,以衛尉少卿兼御史中丞侯幼平充入蕃告册立等使。 亦可與碑文及元白之詩相印證, 而專喜改易舊文之宋子京於新唐書貳壹陸下吐蕃 韶給遞乘放還蕃。 元和元年正月,

福建

傳下易作:

憲宗初, 遣使者修好,且還其俘。 府

則文雖古雅,然「俘」字殊非當日習用之語也。

昌黎先生集拾武關西逢配流吐蕃七絕云::

寅恪案:此可與元詩題下「例皆傳置南方」語參證。考舊唐書壹伍憲宗紀下云: 嗟爾戎人莫慘然。 湖南地近保生全。 我今罪重無歸望,直去長安路八千。

[元和十四年正月]癸巳貶[韓]愈爲潮州刺史。

正月所以放還吐蕃生口者, 蓋退之貶潮州在元和十四年,尙在長慶會盟之前, 以遣使修好, 遂有特恩耳。 故捉縛蕃生幷不「給衣糧放還」也。 至元和元年

又舊唐書壹柒上敬宗紀云:

〔寶曆元年五月〕丁卯,湖南觀察使沈傳師奏,當道先配吐蕃羅沒等一十七人,準赦放還本 今各得狀, 不愿還。 從之。

南方。 寅恪案:此次放還吐蕃生口,雖亦由敬宗即位恩赦。然子言此奏,不獨可與微之詩題「例皆傳置 此又足爲長慶會盟碑文添一注脚矣。 」之語,及退之「湖南地近保生全。 」之句參證, 並可知長慶會盟之後,「蕃生」自宜放還本

平之。新唐書壹陸柒王播傳,通鑑自貳肆玖宣宗大中十三年十二月至貳伍拾懿宗咸通元年八月, 復次,宣宗大中末年裘(唐實錄及舊唐書壹陸肆王播傳附式傳作「仇」。)甫亂浙東, 觀察使王式討

其實仍是大中十四年八月, 不過通鑑例用後元耳。 皆紀此事。 其中有涉及配流土蕃者, 而 通

所載尤詳,當采自平剡錄也。茲節引其文於下:

健者百餘人。 官軍少騎卒。 願效死。 式曰, 悉以爲騎卒, 虜久羈旅, 吐蕃回鶻比配江淮者, 所部遇之無狀, 使騎將石宗本將之。 困餒甚。 其人習險阻, 凡在管内者, 式既犒飲, 便鞍馬, 皆視此籍之。 又賙其父母 可用也, 又奏得龍陂監馬 妻子, 舉籍府中, 皆泣拜 得驍 讙

寅恪案:白詩云:

二百匹,

於是騎兵足矣。

天子矜憐不忍殺。韶徙東南吳與越。

大中三年以後, 宜再傳置俘虜於南方。或者大中三年唐室收復河湟以後,又不必復守舊約。 浙東即是越地,蓋唐代本有配流吐蕃於吳越之事。長慶會盟之後, 十三年以前, 所配流者耶?(參閱通鑑貳貳陸德宗建中元年正月改作兩稅法條「比 拘於放還「捉生」之條約, 王式所謂「比配」殆指

又白詩云:· 來」二字胡注。

)然則白詩之用「越」字,

乃是紀實,

而非趁韻也。

自云鄉管本涼原。大曆年中沒落蕃

寅恪案:吐蕃之陷涼原,實在大曆以前。 (參新唐書肆拾地理志隴右道總序及叁柒地理志關內道

原州條, 元和郡縣圖志肆拾隴右道涼州條等。)樂天以代宗一朝大曆紀元最長, 遂牽混言之。

賦

詩自不必過泥, 論史則微嫌未諦也。

又微之此詩自注略云:

延州鎮李如暹,蓬子將軍之子也。嘗沒西蕃。與蕃妻密定歸計。

寅恪案:微之此注疑采自公垂原文。其所謂「延州鎭」之「延」字可能不誤。 若是誤字, 則當爲「廷」

新唐書肆拾地理志北庭大都護府注云::

字即「庭」字之譌,

必不指關內道之延州而言也。

自庭州西延城西六十里有沙鉢城守捉。

微之詩云:

小年隨父戍安西, 河渭瓜沙眼看沒。

則李如暹之父絕非戍守關內道延州之鎮將, 天此詩自注大抵同於元詩注文, 而刪去「與蕃妻」三字。 而是屬於安西北庭都護府之邊軍, 蓋樂天詩略云: 可以推知矣。 至樂

誓心密定歸鄉計, 不使蕃中妻子知。 涼原鄉井不得見, 胡地妻兒虛棄捐。 早知如此悔歸來

自非刪去此三字不能與詞意相合也。 惟李傳旣云「傳置」。白詩亦云「領出長安乘遞行。 」明是乘

兩地寧如一處苦。

第五章 新 樂 府

車。 詩云「忽逢江水憶交河。」則非僅承元詩「早年隨父戍安西。」之語而來。更取「交河」與「江水」爲對 但白詩下又云「扶病徒行日一驛。」則忽改作徒步,不觅衝突。樂天殆偶未注意及之耶?又白

車師前國。王治交河城。河水分流繞城下,故號交河。 ,相映成趣耳。其實漢書玖陸下西域傳下云:

而唐之安西大都護府初治西州即交河郡, 必深究交河之爲城名抑或水名也。 後徙龜茲。 (參新唐書肆拾地理志。)樂天賦詩時恐亦未

### 驪宮高

此篇爲微之新樂府中所無。 宮高處入靑雲。 」之句, 故此篇似爲樂天所自創也。 李公垂原作雖不可見, 疑亦無此題。 蓋「驪宮高」三字原出長恨歌「驪

樂天此篇意旨明白, 自不待多所論證。惟尙有可言者, 即唐代自安史亂後,天子之遊幸離宮頗成

# 一重公案是也。

白氏長慶集壹貳江南遇天寶樂叟詩云:

綠苔重重封壞垣。 我自秦來君莫問, 惟有中官作宮使, 驪山渭水如荒村。 每年寒食一開門。 新豐樹老籠明月, 長生殿閣鎖春雲。 紅葉紛紛蓋欹瓦,

室盛世, 寅恪案:當日驪宮之荒廢一至於此,若非大事修葺,殊不足供天子之遊幸, 竭全國財力之所增營。 斷非安史亂後, 帝國凋弊之餘,所能重建。 此天子遊幸所以最是 而此宮本爲玄宗際唐

害民費財之舉,而淸流輿論所以一致深以爲非者也。

元氏長慶集貳肆連昌宮詞結語云:

老翁此意深望幸,努力廟謨休用兵。

廢情狀, 寅恪案:微之此詩當是元和十三年暮春在通州司馬任內所作, 據微之詩云: (詳連昌宮詞章。 ) 其時連昌宮之荒

去年敕使因斫竹。偶值門開暫相逐。

又云:

自從此後還閉門,夜夜狐狸上門屋。

冒天下之不韙,宜當世之輿論共以諂佞小人目之矣。 是頗與驪宮相類似, 」之句相證發也。 夫微之不持諷諫之旨, 以匡主救民。 反以望幸爲言, 而此諸語又足與白氏江南遇天寶樂叟詩「惟有中官作宮使, 而希恩邀寵。 每年寒食一開 誠可謂

元氏長慶集叁肆兩省供奉官諫幸溫湯狀略云:

今月二十一日車駕欲幸溫湯。 臣等以駕幸溫湯, 始自玄宗皇帝, 乘開元致理之後, 當天寶盈

第五章 新 樂 府

天之儀方設, 羨之秋, 而猶物議喧囂,財力耗顇。數年之外,天下蕭然。 謁陵之禮未遑, 遽有溫泉之行,恐失人神之望。 況陛下新御寶圖, 伏乞特罷 宸遊, 將行大典, 曲面 (回)天 郊

原注云:

元和十五年十二月二十日兩省三十人同狀。

寅恪案:微之此狀以玄宗遊幸溫湯遂致「財力耗顇」「天下蕭然」爲言,

是與樂天此篇

吾君愛人人不識。不傷財兮不傷力。

之始者, 等句之旨適相符同也。 殆即以由詩篇受中人之助, 至其所以賦望幸連昌之詩於憲宗御宇之時, 已爲淸議所不容, 遂欲藉狀詞以掩飾其前非, 而草諫幸華清之狀於穆宗踐阼 而求諒於輿論

歟?

元氏長慶集叁陸進馬狀略云:

同州防禦烏馬一匹, 八歲, 堪打毬及獵。 右臣竊聞道路相傳, 車駕欲蹔遊幸溫湯, 未知虚實

者。其馬謹隨狀進。

進馬助翠華巡遊昭應。 寅恪案:微之於元和十五年十二月任祠曹時, 其時間相距, 不出二年, 曾草狀諫穆宗駕幸溫湯, 而一矛一盾, 自翻自覆,尤爲可笑也。 而於長慶二年刺同州時又 然則其前

狀匡君進諫之詞,本爲救己蓋愆之計,觀此可知矣。

杜牧樊川文集壹貳與人論諫書(參唐語林陸。)略云:

先皇帝幸驪山, 近者寶曆中敬宗皇帝欲幸驪山, 而享年不長。 帝曰, 時諫者至多, 驪山若此之凶邪。 上意不決。 宜一往以驗彼言。 拾遺張權與伏紫宸殿下叩 後數日自驪 頭諫曰, 山

語親倖曰,叩頭者之言,安足信哉。

考。 寅恪案:牧之所紀敬宗遊幸溫湯之事, 頗與本文所論有關, 故附錄於此, 以供讀詩論世者之參

樂天詩中所謂:

吾君在位已五載。

遊幸溫湯, 已有以遊幸驪山從臾元和天子者。 紀憲宗紀。)至元和四年,已五載矣。觀於後來穆宗於元和十五年閏正月即位,其年十二月即欲 蓋憲宗於永貞元年八月乙巳即位(見舊唐書壹肆憲宗紀上,新唐書柒憲宗紀, 而與微之之進不以正者, 其人格之高下, 則樂天此篇所見, 殊爲深遠, 故此篇之作, 似已預知後來之事者。 相去懸絕矣。 實寓有以期克終之意。是則樂天誠得詩人諷諫之 頗疑樂天在翰林之日, 通鑑貳叁陸唐 親倖小人

### 百鍊鏡

揚州貢端午鑄鏡事,舊籍所載頗多,茲擇錄其有關者如下:

舊唐書壹貳德宗紀上云:

(大曆十四年六月)己未,揚州每年貢端午日江心所鑄鏡, 幽州貢麝香,皆罷之。

寶三載五月初五日進水鏡一面條。)云:

國史補下(參酉陽雜俎前集叁貝編僧一行窮數有異術條,

容齋五筆端午帖子詞條,

及異聞錄唐天

成,往往有自鳴者。揚州舊貢江心鏡,五月五日揚子江中所鑄也。

或言無有百鍊者,

或至六七十鍊,

則已易破難

此篇「我有一言聞太宗。 」以下至篇末一節,據貞觀政要第叁論任賢篇魏徵條(舊唐書柒壹新唐書

玖柒魏徵傳同。)云:

太宗後嘗謂侍臣曰, 朕常保此三鏡, 夫以銅爲鏡, 以防己過。 今魏徵 殂逝, 可以正衣冠。 遂亡一鏡矣。 以古爲鏡, 可以知興替。 因泣下久之。 以人爲鏡, 可以明

寅恪案:此篇疑亦是樂天繙檢貞觀政要及太宗實錄以作七德舞時,採摭其餘義而成者也。

樂天秦中吟有立碑一首, 可與此篇相參證。立碑云:

勛德既下衰,文章亦陵夷。但見山中石,立作路旁碑。銘勳悉太公,敍德皆仲尼。復以多爲 千言直萬貲。爲文彼何人,想見下筆時。但欲愚者悦,不思賢者嗤。

工人磨琢欲何用, 石不能言我代言。 不願作人家墓前神道碣。墳土未乾名已滅。

不願作官家

道旁德政碑。

不鐫實錄鐫虛詞。

之無益復可笑也。青石一篇以段顏爲例者, 美政,雖無人爲之立碑, 激發忠烈爲主旨,則又是此二篇不同之點。立碑一篇以麴信陵爲例者, 蓋皆譏刺時人之濫立石碣,與文士之虛爲諛詞者也。但立碑全以譏刺此種弊俗爲言,而靑石更取 而遺愛在民, (可參閱容齋五筆柒書麴信陵事條。) 蓋所以愈見立碑欺世 唐世忠烈之臣無過二公, 舊唐書壹貳捌新唐書壹伍叁 麴信陵雖名位不顯, 而有

俱以二公合傳, 而舊唐書段秀實傳云:

真卿復與秀實齊名, 此篇標舉忠烈, 以勸事君, 舍此二公, 自莫屬也。又秀實死於朱泚之亂, 自貞元後,累朝凡赦書節文,褒獎忠烈,必以秀實稱首。

第五章

新

樂

府

二二七

眞

卿死於李希烈之叛, 則此篇結語

長使不忠不烈臣。 觀碑改節慕爲人。 慕爲人。 勸事君。

振玉丙寅稿盧虔神道碑銘跋。)憲宗祭盧虔文即樂天在翰林所草。 所謂不忠不烈之臣, 乃指驕蹇之藩鎮, 當無可疑。 碑文則歸登奉敕所撰。 (亦見丙寅稿之跋。)從史爲昭義節度使, 而元和四年三月盧從史之父盧虔病歿, 於元和二年時已有不臣之迹 (見白氏長慶集叁玖。) 盧虔之 (見羅

王士眞劉濟潛通條。)於元和四年五月請發本軍討成德王承宗時,翰林學士又有奏疏論其姦謀 〈參李相國論事集叁論盧從史請用兵事條及通鑑貳叁柒唐紀憲宗紀元和四年四月昭義節度使盧從 〈參李相國論事集貳論鄭絪事條及通鑑貳叁柒唐紀憲宗紀元和二年十一月昭義節度使盧從史內與

月,見丙寅稿之跋, 新唐書壹柒陸韓愈傳附劉义傳云: 但歸登奉勅撰文或在元和四年。 史遭父喪久未起復條。)頗疑樂天此篇或即因盧虔立碑之事而作也。

(盧虔之碑立於元和五年三

後以爭語不能下賓客, 因持愈金數斤去。 日, 此諛墓中人得耳, 不若與劉君爲壽。

寅恪案:碑誌之文自古至今多是虛美之詞, )韓昌黎志在春秋, )則殊非實錄。 (參舊唐書壹陸壹新唐書壹柒壹李光顏傳。 欲「作唐一經, 誅奸佞於旣死, 不獨樂天當時爲然。 發潛德之幽光。」而其撰韓宏碑(見昌黎 )此篇標舉段顏之忠業,以勸人 (可參白氏長慶集伍玖修

香

山

就。 臣之事君。若昌黎之曲爲養寇自重之藩鎭諱者,視之寧無愧乎?前言昌黎欲作唐春秋, 劉义之言以相參證, 樂天則作新樂府,以擬三百篇,有志竟成。於此雖不欲論二公之是非高下, 亦足見當時社會風氣之一斑。 而知樂天志在移風匡俗, 此詩自非偶然無的之 然讀此篇者, 而不能 取

### 兩朱閣

作也。

樂天此篇所言德宗女兩公主薨後, 其第改爲佛寺事。 其兩公主未知確指, 惟據新唐書捌叁公主傳

憲宗女梁國惠康公主傳云:

始封普寧。

帝特愛之,

下嫁于季友。

元和中徙永昌,

薨。

韶追封及諡。

將葬,

度支奏義陽義

章公主葬,用錢四千萬,詔減千萬。

舊唐書壹肆捌李吉甫傳(參新唐書壹肆陸李吉甫傳。)云:

主咸於墓所造祠一百二十間, [元和]七年京兆尹元義方奏,永昌公主準禮令起祠堂, 費錢數萬。 ? 請其制度。

初,

貞元中義陽義章二公

則知德宗女義陽義章二公主之薨, 唐書李吉甫傳及新唐書公主傳所紀於墓所起祠堂者不同。 恩禮獨優, 其後遂引以爲例。此篇所言主第改佛寺事, 然揆以德宗諸女中,惟此二主齊名并稱 固與舊

則「貞元雙帝子」殆即指此二主而言耶?未敢確言, 姑記所疑, 以俟詳考。 (見校補記第十 三則

## 西涼伎

作,不同於虛泛塡砌之酬和也。此題在二公新樂府中所以俱爲上品者, 李公垂原作今不可見,未知若何。元白二公之作,則皆本其親所聞見者以抒發感憤, 此題之共同歷史背景, 然後再分述二公各別之感憤焉 實職是之故。 今請先釋證 固是有爲而

關於此題之歷史背景, 寅恪於拙著唐代政治史述論稿下章論中國與吐蕃之關係一節已詳言之,可

取以參證。茲略述最有關之史料如下。

舊唐書壹貳玖韓滉傳(新唐書壹貳陸韓休傳附滉傳同。)略云:

而已。 請以當道所貯蓄財賦, 十餘州,可翹足而待也。 滉上言吐蕃盜有河湟, 玄佐納其賂, 因許之。 及來覲, 盛陳犬戎未衰, 國家第令三數良將驅十萬衆於涼鄯洮渭, 爲饋運之資,以充三年之費。然後營田積粟,且耕且戰。收復河隴二 不可輕進。 爲日已久。 上甚納其言。滉之入朝也,路由汴州,厚結劉玄佐, 近歲已來, 滉貞元三年二月以疾薨, 上訪問焉, 兵衆寖弱, 初頗稟命。 並修堅城, 計其分鎭之外, 各置二萬人,足當守禦之要。 遂寢其事。 及滉以疾歸第, 戰兵在河隴五六 玄佐意怠, 將薦其可任邊 遂辭 臣

同書同卷張延賞傳(新唐書壹貳柒張嘉貞傳附延賞傳同, 並參舊唐書壹貳德宗紀上貞元三年閏十

月庚申詔省州縣官員條。 )略云:

延賞奏議請省官員曰, 請減官員,收其祿俸,資幕職戰士,俾劉玄佐復河湟,軍用不乏矣。 初稟

命,及滉卒,玄佐以疾辭。上遣中官勞問,臥以受命。 上(德宗)然之。初韓滉入朝,至汴州,厚結劉玄佐,將薦其可委邊任。 延賞知不可用, 玄佐亦欲自効, 奏用李抱真。 抱真亦

辭不行。時抱真判官陳曇奏事京師, 延賞俾曇勸抱真, 竟拒絕之。

同書壹伍貳劉昌傳(參舊唐書壹叁德宗紀下貞元四年正月庚午以宣武軍行營節度使劉昌爲涇州刺

史四鎭北庭行軍涇原等州節度使條及新唐書壹柒拾劉昌傳等。)略云: 貞元三年(劉)玄佐朝京師。 上因以宣武士衆八千,委昌北出五原。軍中有前却沮事, 昌繼斬

度支度營田等使, 三百人,遂行。尋以本官授京西北行營節度使。 昌在西邊僅十五年, (舊唐書壹叁德宗紀下, 歲餘,授涇州刺史充四鎮北庭行營兼涇原節 貞元十九年五月甲子,

四鎮

北庭行軍涇原節度使檢校右僕射涇州刺史劉昌卒。 )疆本節用, 軍儲豐羨。

新唐書柒德宗紀云:

貞元四年正月]壬申, 劉玄佐爲四鎮北庭行營涇原節度副元帥。

通鑑貳叁叁唐紀德宗紀云:

府

〔貞元四年正月〕壬申,以宣武行營節度使劉昌爲涇原節度使。

通鑑貳叁貳唐紀德宗紀云:

不勝其弊。 餘皆爲卒。 身客死 各遺歸國。 皆從來宰相之過, 歸路既絕, 貞元三年七月]初, 命檢括胡客有田宅者, 耶? 有不願歸, 李泌知胡客留長安久者, 人馬既仰給於鴻臚, 禁旅益壯。 於是胡客無 豈有外國朝貢使者, 河隴既沒於吐蕃, 當於鴻臚自陳, 鴻臚所給胡客纔十餘人, 一人願歸 停其給。 者, 禮賓委府縣供之, 凡得四千人。 或四十餘年, 泌皆分隸神策兩軍。 授以職位, 留京師數十年,不聽歸乎?今當假道回紇, 自天寶以來, 歲省度支錢五十萬緡。 將停其給, 給俸禄爲唐臣。 皆有妻子, 於度支受直。 安西北庭奏事, 王子使者, 胡客皆詣政府訴之。 買田宅, 度支不時付直, 人生當承 爲散兵馬 及西域使人在長安者, 舉質取利, 市人皆喜。 時 展用 使, 長安市肆 泌曰, 或自海 安居不欲 或押牙。 (此當採 豈可終 此 道

寅恪案:貞元時劉玄佐初納韓滉之賂, 涇原節度使者, 其情勢可知矣。 以其部將劉昌代行邊任, 非姓名官職有所牴牾, 又新紀載貞元四年正月壬申以劉玄佐爲涇原節度副 此乃無可如何之舉也。 許任收復河湟失地之事,後復變易, 蓋玄佐不肯居邊, 觀於劉昌誅戮却沮者三百人,然後始能 故以宣武軍節度使遙領涇原副 完帥, 而通 遂辭疾不行。 鑑 同日載 成行, 以劉昌爲 元帥之虚 故德宗

自

鄴侯家傳

銜, 而德宗以涇原節度使實職授其部屬劉昌, 率宣武兵八千以赴任耳。

過邠寧, 曾封章上聞, 此三鎮得不爲右臂之大藩乎?自畫藩維 請復河湟。 事亦旋寢, 功竟不立。 五十餘 擁旄鉞

新唐書壹肆陸李吉甫傳所云:

者,是也。吉甫爲憲宗朝宰相,林蘊此書,自爲元和時所上無疑。 據河湟以來,迄於憲宗元和之世,長安君臣雖有收復失地之計圖, 據此可知自安史亂後, 而邊鎭將領終無經略舊疆之志 吐蕃盜

關於微之特具之感憤,則元氏長慶集叁拾誨姪等書云:

見元氏長慶集伍捌夏陽縣令陸翰妻河南元氏墓誌銘。 每借書於齊倉曹家, 師友之資盡廢。 徒步執卷就陸姊夫(寅恪案, 憶得初讀書時, )師授。 栖栖勤勤, 感慈旨一言之歎, 微之謂其姊夫 其始也若

第五章

新

府

寅恪案:微之少居西北邊鎭之鳳翔, 殆親見或聞知邊將之宴樂嬉遊, 而坐視河湟之長期淪沒。 故

追憶感慨, 本之奉勅諛墓之碑文, 賦成此篇。 不必盡爲實錄也。)既係確有所指,而非泛泛之言,此所以特爲沉痛也。 頗疑其詩中所詠, 乃爲劉昌輩而發。(舊唐書劉昌傳所述劉昌之功績,

關於樂天個別之感憤, 則李相國論事集肆論內庫錢帛條略云:

學士李絳嘗從容諫〔上聚財〕,上(憲宗)喟然曰,又河湟郡縣沒於蕃醜, 朕方練智勇之將, 刷祖宗之恥。 故所用不徵於人,儲蓄之由, 蓋因於此。 列置烽候, 朕所以身衣澣 逼 近

郊

通鑑貳叁捌唐紀憲宗紀元和五年末略云:

不妄破用,

親戚賜用,

纔表誠意而已。

[李]絳嘗從容諫上聚財。上曰,今兩河數十州,皆國家政令所不及。河湟數千里淪於左袵。

朕日夜思雪祖宗之恥,而財力不贍,故不得不蓄聚耳。不然,朕宮中用度極儉薄, 多藏何用

同書貳肆捌唐紀宣宗紀云:

耶?

以中原方用兵,未遂而崩。 (大中三年)閏十一月丁酉, 今乃克成先志耳。 宰相以克復河湟, 其議加順憲二宗尊諡,以昭功烈。 請上尊號。 上(宣宗)日,憲宗常有志復河湟,

舊唐書壹捌下宣宗紀云:

收復,百寮請加徽號, (大中三年)十二月進諡順宗曰至德大聖大安孝皇帝。 帝(宣宗)日, 河湟收復, 繼成先志, 憲宗曰昭文彰武大聖孝皇帝。 朕欲追尊祖宗, 以 功烈 初以河

昭

新唐書貳壹陸下吐蓄傳略云:

刃,而河湟自歸, 憲宗常覽天下圖, ,見河湟舊封,赫然思經略之,未暇也。至是羣臣奏言,今不勤一卒, 請上天子尊號。帝(宣宗)曰,憲宗常念河湟, 業未就而殂落。 今當述祖宗 血

之烈。其議上順憲二廟諡號, 夸顯後世。

寅恪案:憲宗嘗有經略河湟之計圖, 據上引史籍可知, 而杜牧樊川集貳河湟七律所謂:

元載相公曾借箸, 憲宗皇帝亦留神。

末也。然則樂天於元和四年作此詩時, 條。)故書之於元和五年十二月己丑以絳爲中書舍人學士如故之後耳, 士院壁記題名,舊唐書壹肆憲宗紀及通鑑貳叁捌唐紀憲宗紀元和六年二月宦官惡李絳在翰林 蓋以其無確定年月可稽,而次年即元和六年二月李絳拜戶部侍郞出翰林院,(見重修承旨學 亦可參證也。又李絳諫憲宗聚財,而憲宗以收復河湟爲言事,通鑑以之繫於元和五年之末 亦即其在翰林時, 非獨習聞當日邊將驕奢養寇之情事, 非謂其事即在元和五年之 H

天子每思常痛惜

亦深知憲宗儉約聚財之苦心,是以其詩中:

之句,不僅指德宗,疑兼謂憲宗。而取以與:

將軍欲說合慙羞。

無疑,即此可見矣。遂於拙著唐代政治史述論稿所已詳者,特爲鈎索沉隱而證釋之如此。 爲映對,尤爲旨微語悲, 居西陲之境所聞知者, 詞賅意切。 固又有不同也。今之讀白詩, 故知樂天詩篇感憤之所在, 而不讀唐史者, 較之微之僅追賦其少時以草 其瞭解之程度, 殊不能

元詩首節敍安史亂前西北之殷富諸句,通鑑貳壹陸唐紀玄宗紀天寶十二載八月條,(參太平廣記

肆叁陸白駱駝條。)云:

言之。) 閻閻相望, 是時中國盛強,自安遠門西盡唐境萬二千里(胡注云:西盡唐境萬二千里, 桑麻翳野, 天下稱富庶者, 無如隴右。 併西域内屬 國

開天傳信記略云:

時事, (寅恪案 元初, 自不應從後所改名也。 上勵精理道, 司馬溫公通鑑作安遠門, 鏟革 訛弊, 於此足徵通鑑之精密。)西行亙地萬餘里, 不六七年, 甚是。 蓋肅宗惡安禄山, 天下大治。 安西諸國悉平爲郡縣, 故改安爲開。 入河湟之賦稅 鄭綮之 書 自開 敍玄宗 遠門 左

右藏庫財物山積,

不可勝較。

寅恪案:微之所描寫者, 蓋得之於邊陲之遺文,殊爲實錄,並非詩人誇大之詞也。 府

白詩首節敍舞師戲情狀諸句,樂府雜錄龜茲部條云:

戲有五常獅子,高丈餘,各衣五色。每一獅子,有十二人。戴紅抹額,衣畫衣,執紅拂子。

謂之獅子郎,舞太平樂曲。

通典壹肆陸樂典坐立部伎條(參新唐書貳玖音樂志。)云:

太平樂亦謂之五方師子舞,師子摯(鷙)獸,出於西南夷天竺師子等國。綴毛爲衣,象其俯仰

馴狎之容。二人持繩拂,爲習弄之狀。五師子各衣其方色,百四十人歌太平樂舞抃以從之, 服飾皆作崑崙象。(寅恪案,原注略云,立部伎有八部,二太平樂,亦謂之五方師子舞。)

大唐傳載(參唐語林伍補遺。)云:

王維爲太常丞,被人嗾令舞黃獅子, 坐是出官。黄獅子者,非天子不舞也。

南部新書乙云:

五方師子本領出太常。靖恭崔尚書邠爲樂卿, 左軍並教坊曾移牒索此戲,稱云備行從,

寅恪案:通典所載,師子戲與樂天詩所描寫者,尤相類似也。

判回牒不與

唐書貳壹陸上吐蕃傳上通鑑貳貳叁唐紀代宗紀廣德二年十月條。)云: 白詩敍吐蕃侵略,安西阻絕事,元和郡縣圖志肆拾隴右道涼州條(參舊唐書壹玖陸上吐蕃傳上新

廣德二年(西曆七六四年)陷於西蕃。

甘州條云:

永泰二年(即大曆元年, 西曆七六六年)陷於西蕃。

肅州條云:

沙州條云: 大曆元年(西曆七六六年)陷於西蕃。

建中二年(西曆七八一年)陷於西蕃。

瓜州條云:

大曆十一年(西曆七七六年)陷於西蕃。

西州條(參舊唐書壹叁德宗紀下貞元六年末。)云:

貞元七年(西曆七九一年)沒於西蕃。

人取以爲戲,此後邊將遂徇俗用爲享賓客犒士卒之資也。

寅恪案:涼州陷蕃,安西路絕,西胡之來中國者,不能歸國,

必有流落散處於邊鎭者,

故當地時

又取樂天此篇「有一征夫年七十。見弄涼州低面泣。」與驃國樂「時有擊壤老農夫,暗測君心閑獨 」及秦中吟買花「有一田舍翁。」「低頭獨長嘆。」相較, 其筆法正復相同,此爲樂天最擅長者。

### 八駿圖

言古詩,雖非新樂府中之一篇,然旣爲微之在江陵時所作, 復贅。惟元氏長慶集第叁卷中諸詩,其詞句之可考見者,多是微之在江陵之作品,則此八駿圖五 元氏長慶集叁有五言古詩八駿圖一篇,郭茂倩樂府詩集誤以之置入新題樂府中,辨已見前, (微之之作當較後。)元白兩詩, 其間或有關係, 亦未可知也。 則與樂天賦新樂府時相距當不遠

微之五言古詩樂天新題樂府所以各以八駿圖爲題者, 國史補上云:

德宗幸梁洋, 唯御騅馬, 號望雲雕者。 駕還京師, 飼以一品料。 暇日牽而視之, 必長鳴四

戚貴多圖寫之。

元氏長慶集貳肆望雲騅馬歌序云::

顧,若感恩之狀。後老死飛龍廐中,

八駿圖說一文,蓋此乃當時之風氣也。至此種風氣特盛於貞元元和之故, 寅恪案:微之有「德宗以八馬幸蜀」之言, 比附於周穆王以八駿西巡之物語歟?要之,畫師詩人之寫詠穆天子者,其胸中固有德宗幸蜀 德宗皇帝以八馬幸蜀, 七馬道斃, 唯望雲雕來往不頓。 李肇記時人多圖寫望雲雕之事, 貞元中老死天底, 而柳河東集壹陸亦有觀 殆由以德宗幸蜀之史 臣稹作歌以記之。

之史事在也。

復次, 此篇修詞

雖至工妙,

寓旨則殊平常,

較之前篇西涼伎之有親切見聞,

真摯感慨者,

不同科

### 澗 底 松

文選貳壹左思詠史詩之第貳首云:

鬱鬱澗底松,

離離山上苗。

以彼徑寸莖,

蔭此百尺條。

世胄躡高位,

英俊沉下僚。

地勢使

樂府詩集玖玖此題下亦引太冲此詩,蓋已知樂天此題取材所自矣。) 由來非一 朝。 金張襲舊業,七葉珥漢貂。 馮公豈不偉, 白首不見招。 (寅恪案, 郭茂倩

但細思之, 白氏此題不獨採用太冲此詩之首句以名篇,且亦襲取其全部之旨意。初視之, 則知其實是有爲而作,不同於通常擬古之詩篇也。 頗似爲充數之作

拙著唐代政治史述論稿中篇論牛李黨之分野,

以爲李黨乃出自魏晉北朝以來之山東舊門,

而牛黨

則多爲高宗武后以來, 謂之失地,故此篇並非自況之詞, 之言茲不必詳。 所可注意者,樂天此時雖爲拾遺小臣, 用進士詞科致身通顯之新興寒族, 如左太冲喻己(見文選五臣注。)之原意也。然則其興感之由果 然已致身翰苑淸要,以其資歷而言, 樂天即爲以文學進用之寒族也。 其證辨

何在乎?考牛李黨爭之表面公開化, 紀(參拙著唐代政治史述論稿中篇。)云: 適在樂天作詩之前一年, 即元和三年。 通鑑貳叁柒唐紀憲宗

上第, [元和三年]夏四月上策試賢良方正直言極諫。 上亦嘉之, 皆指陳時政之失,無所避。吏部侍郎楊於陵, 韶中書優與處分。 李吉甫惡其言直, 舉人伊闕尉牛僧孺, 吏部員外郎韋貫之爲考策官。 泣訴於上。且言翰林學士裴垍王涯覆 陸渾尉皇甫湜, 貫之署爲 前進士李

官員外郎, 嶺南節度使, 湜涯之甥也, 貫之爲果州刺史。 亦坐考策無異同也。 涯不先言, 後數日, 垍無所異同。 僧孺等久之不調,各從辟於藩府 貫之再貶巴州刺史, 上不得已, 罷垍涯學士, 涯貶號州司馬。 **坩爲户部侍郎**, 乙亥以楊於陵爲 涯爲都

之競爭, 策,牛李之詆斥吉甫,或不免太甚,而吉甫亦報復過酷。 寅恪案:牛僧孺李宗閔,後日牛黨之黨魁也。李吉甫,後來李黨黨魁德裕之父也。此次制科考 遂表面形成化矣。 樂天牛黨也, 故於此時亦密諫其事。 自此兩種不同社會階級, 觀白氏長慶集肆壹論制科人狀所 奪取政治地位

臣今言出身戮,亦所甘心。

又云:

臣今職爲學士, 官是拾遺, 日草韶書,月請諫紙。 臣若默默, 惜身不言, 豈惟上辜聖恩,

府

亦下負人道。所以密緘手疏,潛吐血誠。苟合天心,雖死無恨。

擢用。 可謂言之激切矣。 故此篇必於「金張世祿」之吉甫,「牛衣寒賤」之僧孺, 樂天作此詩時, 李吉甫雖已出鎭淮南, 猶邀恩眷。 有所憤慨感惜。 牛僧孺則仍被斥關外, 非徒泛泛爲「念寒雋」

而作也。又白氏長慶集貳捌與元九書云:

可知樂天與思黯氣類至近,宜其寄以同情矣。 苟相與者,則如牛僧孺之戒焉。

# 牡丹芳

樂天秦中吟有買花(才調集壹此題作牡丹。)一首, 唐代牡丹之賞翫甚盛,故元白二公集中多詠此花之詩。 可與此篇相參證。 觀容齋隨筆貳唐重牡丹條所舉之例,可槪 蓋二者俱爲詠牡丹之作也。

唐代牡丹賞翫之見於筆記小說者, 其例至多。 茲略引數條, 以爲例證如下。

## 國史補中云:

見也。

會要捌陸街巷門略云, 京城貴遊尚牡丹三十餘年矣。 太和五年七月左街使奏, 每春暮, 車馬 、若狂, 伏見諸街鋪近日多被雜人及百姓諸軍諸使官 以不耽玩爲 恥。 執金吾鋪官(寅恪案

第五章 新 樂

官健舍屋, 數萬者。元和末韓令始至長安,(寅恪案,舊唐書壹伍陸韓弘傳略云,元和十四年七月入鄭。 健起造舍屋,侵占禁街。今除先有敕文百姓及諸街鋪守捉官健等舍屋外,餘雜人及諸軍諸使 並令除拆。則所謂鋪官者,即街鋪守捉官健也。)圍外寺觀種以求利,一本有直

遽命斷去。 日, 吾豈效兒女子邪?

韶曰,

,韓弘可加司徒兼中書令。

則韓弘適以元和末至長安, 韓令即指韓弘言也。)居第有之,

酉陽雜俎前集壹玖廣動植類肆草篇牡丹條云:

爲郎官, (段)成式檢隋朝種植法七十卷中, 奉使幽冀, 迴至汾州衆香寺,得白牡丹一窠,植於長安私第,天寶中爲都下奇賞。 初不記說牡丹。 則知隋朝花藥中所無也。開元末,裴士淹

又云:

元和初猶少, 今與戎葵角多少矣。

同書續集玖支植篇上云:

朝始得分明見,也共戎葵校幾多。成式又見衛公圖中有馮紹正雞圖,當時已畫牡丹矣。 (李衞公)又言,貞元中牡丹已貴。 柳渾善(嘗?)言,近來無奈牡丹何。數十千錢買一窠。今

尚書故實(參劉賓客嘉話錄。)云:

世言牡丹花近有,蓋以國朝文士集中無牡丹歌詩。張公嘗言楊子華有:畫牡丹處極分明。子

府

北齊人,則知牡丹花亦已久矣。

太平廣記貳佰肆樂類貳又李龜年條引松牕錄云:

開元中, 禁中初重木芍藥, 即今牡丹也。

得四本,

紅紫淺紅通白者。

上因移植於興慶池東,

原注引開元天寶花木記云:

沉香亭前。

禁中呼木芍藥爲牡丹。

南部新書丁云:

丹後諸牡丹半月開 長安三月十五日, 兩街看牡丹, 奔走車馬。 慈恩寺元果院牡丹先于諸牡丹半月開。 太真院牡

獨異志上云:

合也。 花而死, 度傳裝晉公薨於開成四年三月四日。是月癸未朔, 書陸叁宰相表下及通鑑貳肆陸唐紀文宗紀紀裴晉公薨於開成四年三月丙戌。 唐裴晉公度寢疾永樂里。暮春之月,忽遇(過)遊南園,令家僕童舁至藥欄。 至舊唐書壹柒下文宗紀作三月丙申司徒中書令裴度卒。丙申蓋丙戌之譌。 可悲也。 悵然而返。 明早報牡丹一叢先發。公視之,三日乃薨。 則丙戌爲四日。是新表舊傳通鑑之紀載相 (寅恪案, 舊唐書壹柒拾裴 語曰, 通常牡丹以 我不見此 據新 唐

唐人詠牡丹詩甚多,不須徵引, 惟賦則較少,茲錄其賦序一二條,聊備例證焉。

唐文粹陸舒元輿牡丹賦序云:

牡丹,日月寖盛。 暮春之月,遨遊之士如狂焉。 天后之鄉, 西河也。 今則自禁闥泊官署外延士庶之家, 精舍下有牡丹,其花特異。 亦上國繁華之一事也。近代文士爲歌詩以詠其形容, 天后歎上苑之有闕, 瀰漫如四瀆之流, 因命移植焉。 不知其止息之地。 未有能賦 由此 京國

李德裕會昌一品集別集牡丹賦序略云:

之者。余獨賦之,以極其美。

賦中「有百歲之芳叢。」句下原注云: 余觀前賢之賦草木者多矣,惟牡丹未有賦者,聊以狀之。

今京師精舍甲第,猶有天寶中牡丹在。

代條。)其所謂「京師貴遊尙牡丹三十餘年矣。」云者,自大和上溯三十餘年,適在德宗貞元朝。 寅恪案:據上引唐代牡丹故實,知此花於高宗武后之時,始自汾晉移植於京師。 猶爲珍品。至貞元元和之際,遂成都下之盛翫。此後乃瀰漫於士庶之家矣。李肇國史補之作 約在文宗大和時。 (參閱歷史語言研究所集刊第玖本岑仲勉先生跋唐摭言李肇著國史補之朝 當開元天寶之

此足與元白二公集中歌詠牡丹之多,相證發者也。白公此詩之時代性, 極爲顯著, 洵唐代社會風

俗史之珍貴資料,故特爲標出之如此。

詩中「西明寺裏開北廊。 題西明寺牡丹七言詩,元氏長慶集壹陸有西明寺七絕, 」者,白氏長慶集玖有西明寺牡丹花時憶元九五言古調詩, 知西明寺乃賞翫牡丹之地也。 同書壹肆有重

者至多也。 去年嘉禾生九穗,今年瑞麥分兩歧。」者,唐代有報祥瑞之制,其見於唐會要貳捌及貳玖祥瑞門

「公主」二字,傳世白集或有作「公子」者,殆後人囿於習俗, 唐詩第壹壹函王建宮詞云:「御前新賜紫羅襦, 又詩中「庳車輭譽貴公主, 香衫細馬豪家郎。 」兩句, 步步金堦上軟輿。 乃以「貴公主」「豪家郎」男女對映爲文。 不明此義, 」可知「輭轝」爲女子所乘。 因而妄改耶? 據全

又康駢劇談錄下玉藥院眞人降條(學津討源本)云:

衫, 林瓊樹。 上都(上都宋周必大玉藥辨證引此文作長安。)安業坊唐昌觀舊有玉藥花, 出自宮掖 端麗無比。 峨髻雙鬟 。元和中春物方盛,車馬尋玩者相繼。 莫敢逼而視之。竚立良久,令小僕取花數枝而出。 既下馬, 無簪珥之飾, 以白角扇障面, 容色婉約, 直造花所。 迥出於衆。 忽一日, 異香芬馥, 從以二女冠, 有女子年可十七八, 將乘馬, 聞於數十步之外。 三女僕。 迴謂黃冠者曰,曩有 甚繁。 僕者皆外頭黃 衣 繡綠 每發, 觀者以爲 衣, 若

府

玉峯之約, 證作百餘步。)有輕風擁塵,隨之而去。 方悟神仙之遊。餘香不散者經月餘日。時嚴給事休復,元相國〔稹〕,劉賓客〔禹錫〕, 自此可以行矣。 時觀者如堵,咸覺煙霏鶴唳,景物輝煥。 須臾塵滅。 望之已在半天。 (辨證天字下有矣字。) 舉轡百步,(百步,辨 白醉吟

[居易],俱有聞玉藥院真人降詩。

但亦可

潛下玉龜山」,則是仙女乘車不乘馬,與康錄不同。疑嚴詩爲較近當時傳說也。)爲稍不同。 寅恪案, 凡異同之點所在耶?一笑。 有外出觀賞者。 藉此反映當時社會風俗。 此故事乃唐人所盛傳, 惟此仙女特乘馬而不御輕輩,(全唐詩壹柒函嚴休復唐昌觀玉藥花之貳云:「羽車 故知元和中即樂天賦牡丹芳之時代,長安寺觀花事盛日,宮掖貴婦人固 觀諸家賦詠之衆,可爲例證。 神仙之說, 其荒誕不待辨。

紅 毯

新唐書肆壹地理志宣州宣城郡條列舉土貢中有:

頭紅毯。

之目,即此篇所謂「年年十月來宣州。」之紅線毯也。 (元和二年六月)癸酉 東都莊宅使織造户並委府縣收管。 據舊唐書壹肆憲宗紀上云:

稿

四四 八

使宣州條云: 知地方政府亦管有織造戶, 此類紅線毯乃宣州所管織造戶織貢者。 又元和郡縣圖志貳捌宣歙觀察

開 元貢白紵布。 自貞元後, 常貢之外, 別進五色線毯及綾綺等珍物, 與淮南兩浙相比。

通典陸食貨典所列玄宗時天下諸郡每年常貢云

宣城郡。 貢白紵布十匹。 今宣州

舊唐書壹佰伍韋堅傳(新唐書壹叁肆韋堅傳同。)略云: 天寶元年穿廣運潭,二年而成。 宣城郡舩即空青石紙筆黃連。

寅恪案:唐代初期以關東西川爲絲織品之主要產地。 迨經安史亂後, 產絲區域之河北 Ш

無絲織之綾絁等物, 後東南遂爲絲織品最盛之產區矣。 央政府權力所及, 貢賦不入。故唐室不得不徵取絲織品於江淮, (唐六典叁戶部郞中員外郞條下所列十道貢賦內, 宣州亦貢綺。然必不重要。 如宣州者, 當開元天寶之時, 其土貢爲葛屬之紵布, 以充國用。 由於人力之改進 其特產並 非

此

乃其尤顯著之例也。 故章堅陳列江南諸郡珍貨之舩,宣城之舩無綺也。)而至貞元以後, 觀於此, 亦可以知政治人事之變遷與農產工藝盛衰之關係矣。 遂以最精美之絲織線毯著聞 可參閱下繚綾

白氏長慶集貳陸送侯權秀才序云:

貞元十五年秋, 予始舉進士,與侯生俱爲宣城守所貢。 明年春, 予春官中第。

寅恪案:白氏長慶集貳壹有宣州試射中正鵠賦及窻中列遠岫詩, 蓋樂天於貞元中曾遊宣州, 遂由宣州解送應進士舉也。 是以知其紅線毯一篇之末自注所云: 即樂天於貞元十五年 應宣州試

貞元中宣州進開樣加絲毯。

乃是親身覩見者。 披香殿」用飛燕外傳故事。 此詩詞語之深感痛惜, 此類紅線毯自爲供後庭之飾品者, 要非空泛無因而致矣。詩中「織作披香殿上毯。 此語其爲泛用古典歟?抑更有所專 句,

**縷毯與成都錦花褥之長,** 太原毯澀毳縷硬, 蜀都褥薄錦花冷。 而無其短, 殆同於今之所謂絲絨者。 者, 蓋毯本以毛織成, 其工藝之精進可知矣。 而紅線毯乃以絲爲之, 是兼太原毳

杜 陵 叟

李相國論事集肆賀德音狀等。) 云: 元和四年暮春, 答宗正卿李 詞等賀德音表, 京畿實有苦旱之事, 答將軍方元蕩等賀德音表, 如新唐書柒憲宗紀(參白氏長慶集肆拾答宰相杜佑等賀德音 全唐文陸貳憲宗亢早撫恤百姓德音

[元和四年]閏[三]月已酉以旱降京師死罪非殺人者。 禁刺史境内權率,諸道旨條外進獻。 嶺

黔中福建掠良民爲奴婢者。省飛龍厩馬。己未, 雨。

姓今年租稅, 通鑑貳叁柒唐紀憲宗紀(參白氏長慶集肆壹奏請加德音中節目緣今時早請更減放江淮早損州縣百 請揀放後宮內人狀, 及李相國論事集肆論量放早損百姓租稅條, 請揀放後宮人條

論德音事條等。) 云:

又言嶺南黔中福建風俗,多掠良人賣爲奴婢,乞嚴禁止。 租税。又言宮人驅使之餘,其數猶廣。事宜省費,物貴徇情。又請禁諸道橫斂, [元和四年]上以久旱,欲降德音。 絕進奉, 禁掠賣皆如二人之請。 翰林學士李絳白居易上言,以爲欲令實惠及人,無如減其 己未, 雨, 閏[三]月已酉制降天下繫囚, 絳表賀。 以充進奉。

白氏長慶集壹賀雨詩云:

税,

出宮人,

皇帝嗣寶曆,元和三年冬。 自冬及春暮,不雨旱爞爞。上心念下民,懼歲成災凶。遂下罪己

韶, 殷勤告萬邦。

皆可爲證。是知樂天此篇:

三月無雨旱風起

語, 實非詩人泛寫, 而此篇之作, 蓋亦因此而有所感觸也。 句,

詩中「十家租稅九家畢,虛受吾君蠲免恩。

可與白氏長慶集肆壹奏請加德音中節目,

時早請更減放江淮早損州縣百姓今年租稅。)及李相國論事集肆論量放早損百姓租稅條:

昨正月中所降德音, 量放[江淮]去年錢米,伏聞所放數內已有納者。

之言相參證,以深之與樂天同上之狀,其所言者, 雖爲江淮等處之稅, 然其情事則正與樂天此篇

詩句所言相符同故也。 「白麻紙上書德音。 者, 章執誼翰林院故事(參李肇翰林志, 唐會要伍柒翰林院條。)云:

之重事, 中書以黃白二麻爲綸命重輕之辨。 拜授將相, 德音, 赦宥, 則不得由於斯。 近者所出, 獨得用黃麻。 其白麻皆在此院,

自非國

蓋德音例以白麻紙書之,此唐家制度也。

繚綾

目, 敦煌本(巴黎圖書館伯希和號伍伍肆貳。)此篇題作「撩綾歌」。多一歌字, 例皆不用歌吟等字也。 可參閱上法曲條。 非是。 蓋新樂府之題

微之陰山道篇有:

令族親班無雅操。 挑紋變鑷力倍費, 從騎愛奴絲布衫, 弃舊從新人所好。 臂鷹小兒雲錦韜。 越穀撩綾織一端, 十疋素縑工未到。 豪家富貴踰常制

府

諸句, 即樂天此篇篇題「繚綾」及旨意「念女工之勞也。」之所本, 蓋樂天欲足成五十首之數,

欲於專斥迴鶻之陰山道篇中雜入他義,故鋪陳之而別爲此篇也。

太平廣記貳伍柒嘲誚門織錦人條引盧氏雜說(參閱韓偓玉山樵人集,

余作探使繚綾手帛子寄賀因

而有詩「解寄繚綾小字封。 句, 及其香奩集七絕半睡「自家揉損砑繚綾。 句。 )云:

錦。 忽吟詩云, 唐盧氏子不中第, 如今不重文章事,莫把文章誇向人。盧愕然,憶是白居易詩, 亂前屬東都官錦坊, 學織繚綾功未多。 徒步及都城門東。 織宮錦巧兒。 亂投機杼錯抛梭。 其日, 以薄藝投本行, 風寒甚, 莫教宮錦行家見, 且投逆旅。 皆云, 因問姓名。 如今花樣與前不同, 俄有一人續至, 把此文章笑殺他。 日, 姓李, 附火良久。 世織繚 不謂伎 又云,

以文綵求售者, 不重於世, 且東歸去。

寅恪案:此足徵繚綾之爲珍貴絲織物, 而可與元白二公之詩相印證也。

李衛公會昌一品集別集伍奏繚綾狀(參舊唐書壹柒肆新唐書壹捌拾李德裕傳。)略云::

及可幅盤條繚綾等一千匹。 昨緣宣索 自 今所織千匹, 已具軍資歲計及近年物力聞奏。伏料聖慈, 費用至多, 伏讀韶書, 臣愚亦所未曉。 倍增惶灼。 伏乞陛下酌當道物力所宜 況元鵝天馬掬豹盤條文彩珍奇, 必垂省覽。 又奉韶旨令織定羅紗袍 更賜 節 只合聖

吳越之地盛產此種精美之絲織品也。 西時所奏(據舊傳),取與微之「越縠繚綾」, 樂天「織者何人」「越溪寒女」之言相參證, 尤足徵當時

元和郡縣圖志貳陸浙東觀察使越州條云:

開元貢甘橘,

甘蔗, 葛根, 石蜜, 交梭白綾。 自貞元之後,

凡貢之外,

別進異文吳綾,

皷歇(?)單絲吳綾, 吳朱紗等纖麗之物, 凡數十品。

通典陸食貨典所列玄宗時天下諸郡每年常貢云::

舊唐書壹佰伍章堅傳略云:

會稽郡。貢朱砂一十兩。

白編綾十疋。交梭(梭)十疋。輕調十疋。今越州。

會稽郡舩即銅器, 羅, 吳綾, 絳紗。

國史補下云:

初,

歲得數百人。 越人不工機杼。 由是越俗大化, 競添花樣, 薛兼訓爲江東節制, 乃募軍中未有室者,厚給貨幣, 綾紗妙稱江左矣。 密令北地娶織婦以

寅恪案:以越州而論, 經薛兼訓之獎勵改良,其工藝遂大爲精進矣。 當安史亂前, 雖亦爲蠶絲之產地,然絲織品並不特以工妙著稱。 其他東南各地, 絲織工業之發展, 其變化雖不 迨安史亂

若越州之顯著, 實亦可據以推見也。又考薛兼訓於代宗時節制浙東, 歷時甚久, (詳吳廷燮唐方

第五章

新

鎭年表。)國史補所載其移風化俗之功, 殊非虛語。 以元和郡縣圖志所標明越州於貞元後別進纖

麗之絲織物數十品證之可知矣。

元氏長慶集貳叁古題樂府織婦詞云:

繰絲織帛猶努力。

變緝(攝)撩機苦難織。

東家頭白雙女兒,

爲解挑紋嫁不得。

自注云:

予掾荆時,日(目)擊貢綾户有終老不嫁之女。

知當時繚綾貢戶之苦至此, 寅恪案:繚綾爲當時絲織品之最新最佳者,故費工耗力遠過其他絲織品, 則詩人之作詩諷諫, 自無足異也。 觀微之古題樂府此詩,

抑更有可論者,詩云:

應似天台山上明月前,四十五尺瀑布泉。

寅恪案 詳下陰山道篇。)今言四十五尺者,豈當日官司貪虐, :繚綾爲越之名產, 天台亦越之名山, 故取以相比。 多取於民,以致踰越定限耶?至以瀑布泉 依唐代規制, 絲織品 一匹長 (四丈。

比絲織品, 亦唐人詩中所慣用, 如全唐詩第壹捌函徐凝廬山瀑布詩(參唐語林叁品藻類尚(中?)

虚空落泉(一作瀑布瀑布。書白舍人初到錢塘條。)云:-

)千仞直。

雷奔入江不暫息。

今古長如白練飛,

條界破青山色。

二五四

賣 炭

此篇小序云:

苦宮市也。

蓋宮市者,乃貞元末年最爲病民之政,

宜樂天新樂府中有此一篇。

且其事又爲樂天所得親有見聞

故此篇之摹寫, 極生動之至也。 茲擇錄數條以供讀樂天此篇者之參證。

關於宮市事,史籍所載頗多,

昌黎先生集外集陸順宗實錄壹略云:· 上(順宗)在東宮,嘗與諸侍讀並[王]叔文論政,至宮市事。上曰,寡人方欲極言之。

當侍膳問安, 獨叔文無言。 不宜言外事。陛下(德宗)在位久, 既退, 上獨留叔文。 謂曰, 向者君奚獨無言, 如疑太子收人心, 豈有意邪?叔文曰, 何以自解?上大驚, 太子職 因泣

衆皆稱

日 非先生, 寡人無以知此。遂大愛幸。

宦官所造成。順宗在東宮時,所以不宜極論宮市者,亦在於此,不僅以其有收人心之嫌也。 寅恪案:當日皇位之繼承決於內庭之閹豎, ` (詳拙著唐代政治史述論稿中篇。)而宮市之弊害則由

同集集 順宗 實錄貳略云:

錢物, 以聞。 妻子, 市, 人物, 以驢送至内。 而 事, 實奪之。 即斂手付與,眞爲不復可辨, 買人直數千錢物, 待此然後食。 稍不如本估。 宮中有要, 韶點此宦者, 嘗有農夫以驢負柴至城賣, 農夫涕泣, 市外物, 而賜農夫絹十匹, 今以柴與汝, 末年不復行文書, 以所得絹付之, 仍索進奉門户幷脚價錢。 令官吏主之。 不取 無敢問所從來, 然宮市亦不爲之改易。 直而歸, 遇宦者稱宮市取之, 置白望數百人於兩市幷要鬧坊, 不肯受。 與人爲市, 汝尚不肯, 其(其疑當作與。)論價之高下者, 日, 將物詣市, 隨給其直。 須汝驢送柴至内。 我 纔與絹數尺。 有死 至有空手而歸者。 貞元末, 而已。 閱 農夫 又就索門户, 遂殿宦者, 人所賣物, 以宦者爲使, 日, 名爲宮市 我 率用 有父母 但 街吏擒 仍邀 稱 抑買 百 宮

寅恪案:此篇所詠,

即是此事。

退之之史, 即樂天詩之注脚也

舊唐書壹陸拾韓愈傳 (新唐書壹柒陸韓愈傳同。 ) 云:

德宗晚年 政出多門, 怒。 貶爲連州山陽 宰相不專機務。 山陽應作陽山。 宮市之弊諫官論之, 令。 不聽。 愈嘗上章數千言極論之,不

舊唐書壹伍玖路隨傳略云: 寅恪案:韓文公之貶陽山令, 雖尙有其他原因, 然與論宮市事亦至有關係也。

是相循。 及隨進憲宗實錄後,文宗復令改正永貞時事。隨奏曰,韓愈所書, 韓愈撰順宗實錄,說禁中事頗切直。內官惡之,往往於上前言其不實。累朝有詔修改, 其實錄伏望條示舊記最錯悞者, 宣付史官, 委之修定。 韶曰, 亦非己出。 其實錄中所書德宗順 元和之後,

史。比之少陵之作, 故猶得從而窺見當日宮市病民之實況,而樂天此篇竟與之脗合。 篇。)然其書宮市事,亦涉及內官,自亦爲修定本所刪削。今傳世之順宗實錄,乃昌黎之原本, 寅恪案:順宗實錄中最爲宦官所不滿者,當是述永貞內禪一節,(見拙著唐代政治史述論稿中 宗朝禁中事, 尋訪根底, 殊無愧色。其寄唐生詩中所謂「轉作樂府詩。 蓋起謬傳, 諒非信史。 宜令史官詳正刊去, 其他不要更修。 於此可知白氏之詩, 」「不懼權豪怒。 」者,(白氏長 誠足當詩

舊唐書壹肆拾張建封傳(新唐書伍貳食貨志略同。)云:慶集壹。)洵非誇詞也。

德宗頗深嘉納。 諫官御史表疏論列〔宮市〕,皆不聽。吳湊以戚里爲京兆尹,深言其弊。建封入覲,具奏之。 墮業者數千萬家, 而户部侍郎判度支蘇弁希宦者之旨, 無土著生業, 仰宮市取給。 上信之。 因入奏事, 凡言宮市者, 上問之, 弁對日, 皆不聽用。 京師遊手

寅恪案:此亦爲當日士大夫同惡宮市弊害之事證, 錄之文,故不複引。 因附錄於此。 至舊傳此前一節, 則俱出順宗實

容齋續筆壹壹楊國忠諸使條云:

宮市之事, 咸謂起於德宗正元。 不知天寶中已有此名, 且用宰臣充使也。

舊唐書壹壹代宗紀(舊唐書壹壹捌元載傳通鑑貳貳肆唐紀代宗紀大曆八年九月癸未條並同。)云: (大曆八年九月)癸未晉州男子郇謨, 以麻辮髮, 持竹筐及葦席,哭於東市, 請進三十字。 如

上召見,賜衣,館之禁中。內二字曰監團。

欲去諸道監軍團練使

南部新書戊略云:

也。

不請旨,

請裹尸於席筐。

事

尤切於罷宮市。

大曆八年七月, 晉州男子郇謨, 以麻辮髮, 哭於東市。 上聞。 賜衣, 館於客省。 每一字論

寅恪案:自天寶歷大曆至貞元五六十年間, 皆有宮市,而大曆之際, 乃至使郇謨哭市, 則其爲擾

民之弊政,已與貞元時相似矣。

其他諸篇有異, 關於樂天此詩, 然其感慨亦自見也。 更有可論者, 此篇徑直鋪敍, 與史文所載者不殊, 而篇末不著己身之議論, 微與

中篇論中央政治革命條及隋唐制度淵源略論稿禮儀章附論都城建築節已詳論之,茲不復贅。 詩中「迴車叱牛牽向北。 者, 唐代長安城市之建置,市在南而宮在北也。拙著唐代政治史述論稿

樂天此句之「北」,殊非趁韻也。

柒。)殊失少陵以雖欲歸家,而猶迴望宮闕爲言,隱示其眷念遲迴不忘君國之本意矣。 注杜詩者,多不得其解,乃妄改「望」爲「忘」,或以「北人謂向爲望」爲釋,(見陸游老學庵筆記 復次,杜少陵哀江頭詩末句「欲往城南望城北。」者,子美家居城南,而宮闕在城北也。 自宋以來

又詩云:

半匹紅紗一丈綾,繫向牛頭充炭直。

憲宗紀元和四年九月條云:

寅恪案:此二句關涉唐代估法問題, 非此篇所能詳論。 茲僅錄一事,以資解釋。 通鑑貳叁柒唐紀

錢重, 相, 所屬之州。 奏天下留州送使物, 民輸稅有三。一曰上供,二曰送使,三曰留州。建中初定兩稅, 民所出已倍其初。 由是江淮之民稍蘇息。 請一切用省估。 其留州送使者, 其觀察使先稅所理之州以自給。 所在又降省估就實估, 以重斂於民。 貨重錢輕, 不足, 然後許稅於 及[裴]垍爲 是後貨輕

胡注云:

省估者,都省所立價也。

第五章

府

故「省估」者,乃官方高擡之虛價,「實估」者,乃民間現行之實價, 即韓愈順宗實錄所謂「本估」。

唐代實際交易, 往往使用絲織品。 宮廷購物, 依虚估或即依「省估」。 取紗綾支付炭價, 其爲病民

母別ス

之虐政,

不言可知也。

亦別有楊朝晟傳, 樂天此篇摹寫生動, 元元和間楊姓之人, 其可以破虜策勳者, 關西 關西驃騎大將軍。 詞, 明是用楊震號「關西夫子」之故典, 新唐書壹伍陸楊朝晟傳同。)略云: 」指何人而言耳。 詞語憤激, 似是直接見聞其事, 或謂樂天新樂府所詠者, 大抵爲貞元元和 惟有楊朝晟, (後漢書捌肆楊震傳。)則其人爲楊姓無疑。 而描述之於詩中者。 據舊唐書壹肆肆楊朝晟傳(舊唐書壹貳 惜未得確考, 間之事。 不知所 此 詩

朝晟奏方渠合道木波皆賊路也, 兵以護外境, 建中初, 從李懷光討劉文喜於涇州, 朝晟分統士馬鎮木波堡。 請城其地以備之。 斬獲擒生居多, [邠寧節度使張]獻甫卒, 上(德宗)從之。 授驃騎大將軍。 韶 已事, 以朝晟代之。 [貞元]九年城 吐蕃始來, 十三年 、鹽州, 數日 徵

城禦寇之功, 則楊朝晟不獨其氏爲楊, 是與此詩所謂「關西驃騎大將軍。 且爲驃騎大將軍(唐制驃騎大將軍從一品, 」及「破虜策勳」者, 適相符合。至迎新棄舊之事 爲武散官之最高者。 )而有築

退

乎?是說雖甚爲可能, 雖 無可考, 然以邊將武人之常例揆之,恐此類之事亦或不免。 但舊唐書壹叁德宗紀下云: 然則此詩所指言者, 其唯楊朝晟

則樂天作詩時, (貞元十七年五月)乙酉,邠寧節度使檢校工部尚書邠州刺史楊朝晟卒。 朝晟久已物故, 故亦不能不致疑耳。

#### 陰 Щ 道

此題公垂倡之, 財政問題也。 拙著唐代政治史述論稿下篇論外患與內政之關係, 元白和之, 以言迴鶻馬價事爲主。 蓋此乃唐代在和平時期與外族交涉, 已詳言之, 茲只就元白二詩略爲 最重要之

元詩云:

釋證如下:

臣 聞平時七十萬匹馬, 關中不省開斯課。 四十八監選龍媒, 時貢天庭付良造。 如今坰野十無

新唐書伍拾兵志云:

盡

在飛龍相踐暴。

又以尚乘掌天子之御, 左右六開, 曰飛黄, 二曰吉良, 三日 龍媒, 四 日駒 縣,

天苑, 總十有二開。 爲二廐, 曰祥麟, 二曰鳳苑, 以繫飼之。 其後禁中又增 五 日 置 駃 飛龍 騠

六

日

寧間地廣千里, 而馬多地狹不能容。 曰宜禄, 八曰安定。 初用太僕少卿張萬歲領羣牧。 一曰保樂,二曰甘露, 又析八監,列布河西豐曠之野。 八坊之田千二百三十頃,募民耕之, 自貞觀至麟德四十年間,馬七十萬六千, 三日南普閏, 四日北普閏, 以給芻秣。 五曰岐陽, 八坊之馬爲四十八監, 置八坊, 六日太平, 岐豳涇 七

寅恪案:關於唐代馬政, 元詩又云: 資料頗不少,茲不遑多引, 僅取歐公所述, 亦足以釋元詩矣。

寅恪案:此所謂花磚,即國史補下所云:

品。 御史故事, 宣政其次,用七品。紫宸最近, 大朝會則監察押班,常參則殿中知班,入閣則侍御史監奏。蓋含元殿最遠,用八 用六品。 殿中得立五花磚, 綠衣用紫案褥之類, 號爲七

貴。

者,是也。

**允邏敦肥水泉好。** 

寅恪案:紇邏敦一詞不易解,疑「紇邏」爲 Kara 之譯音, 即玄黑或靑色之義。 (見 Radloff

突厥

豈「紇邏敦」者,青草之義耶?若取「草盡泉枯馬病羸。」句之以草水並舉者,與此句相較,似可證 方言字典貳册壹叁貳頁。)「敦」爲 Tunā 之對音簡譯,即草地之意。(見同書叁册壹肆肆拾頁。)

成此說也。然歟否歟?姑記所疑,以求博雅君子之敎正。

又敦煌掇瑣上輯壹叁(巴黎圖書館伯希和號貳伍伍叁。)昭君出塞變文(羽田亨敦煌遺書第一

載此文。)有云:

邊草叱沙紇邏分 原夏南地持白□ 陰圾愛長席箕□(此周一良先生舉以見告者。 □□又搜骨利幹

多百合」。(見唐會要壹佰骨利幹國條,並參通典貳佰邊防典壹陸骨利幹條, 傳及新唐書貳壹柒下回鹘傳附骨利幹傳等。)變文中「□□又搜骨利幹」句指馬言。骨利幹與馬有 寅恪案:變文此節旣有殘闕,復多胡語, 自不待論。「邊草叱沙紇邏分」句指草言。據元和姓纂上聲九賡宇文下(參新唐書柒壹下宰相 殊難強釋。但骨利幹爲鐵勒之一種,「地出名馬」,「草 舊唐書壹玖玖下鐵勒

世系表宇文氏條及通志貳玖氏族略伍宇文氏條等。)云: 出本遼東南單于之後。或云以係炎帝。神農有嘗草之功,俗呼草爲俟汾,

音轉爲字文。

及北史玖捌高車傳(魏書壹佰叁高車傳同。)略云:

又有十二姓,九曰俟分氏。(今通行本通典壹捌伍邊防典壹叁高車傳俟分氏作俟斤氏,殊誤。)

第五章

新

謂「草多百合」之「百合」耶?取證迂遠, 宇文部,因而傅會神農嘗百草之神話也。 骨利幹附於其同種回鶻之後,且明言回鶻爲高車苗裔。然則「紇邏分」者, 是俟汾乃草之胡名, 與俟分同爲一語。 聊備一說, 頗疑宇文周之先本爲高車種俟分部, 此點軼出本書範圍, 附記於此,以俟更考。 茲不詳論。 所可注意者, 殆即紇邏草之義。豈所 後詭稱出於鮮卑貴種 新唐書以

白詩又云:

予記: 唐曾長成者益皇飛龍但印骨與皮。

寅恪案:唐會要柒貳諸監馬條云:

依左右閑印以三花。 至二歲起脊量強弱, 其餘雜馬, 漸以飛字印印右膊。 齒上乘者 細馬次馬,俱以龍形印印項左。送尚乘者, 以風字印左膊, 以飛字印左髀。 經印之後, 於尾側 簡習

同書同卷諸蕃馬印條略云:

別所者,各以新入處監名印印左頰

回紇馬印厄。

可以解釋此句也。

白詩又云:

五十匹練易一匹。 練去馬來無了日。 養無所用去非宜, 每歲死傷十六七。

二六四

白氏長慶集肆拾翰林制誥肆與回鶻可汗書云:

達覽將軍等至, 便令歸國,仍遣中使送至界首。 緣近歲以來, 頃者所約馬數, 省表, 或有水旱,軍國之用不免闕供。 蓋欲事可久長。 其馬數共六千五百匹。 何者, 雖都數未得盡足,然來使且免稽留, 付絹少, 則彼意不充。 據所到印納馬都二萬匹, 今數内且方圓支二十五萬匹, 納馬多, 都計馬價絹五十萬 貴副所須, 則此力致歉。 分付達覽將 當悉此

廣,

則欠價漸多。

以斯商量,

宜有定約。

彼此爲便,

理甚昭然。

舊唐書壹玖伍回紇傳(參新唐書貳壹柒上回鶻傳。 )略云:

回統恃功

自乾元之後,

屢遣使以馬和市繒帛。

仍歲來市,以馬一匹易絹四十匹,

作縑。)動至數萬馬。其使候遣,繼留於鴻臚非一。 蕃得帛無厭,我得馬無用。 朝廷甚苦之。

同書壹貳柒源休傳(新唐書貳壹柒上回鹘傳同。)略云:

回統]可汗使謂休曰,所欠吾馬直絹 一百八十萬疋, 當速歸之。

之不同,似甚不可解。考練之爲絲織品,其質不及絹之精美,即古詩上山採蘼蕪篇所謂「新人工 此詩則俱作練。 寅恪案:舊唐書回紇傳書馬價之絲織品爲絹。 故人工織素(素即絹)。將縑來比素。新人不如故。 白氏長慶集與回鶻可汗書乃當時之公文,而此詩亦直述當時之實事, 樂天所草與回鶻可汗書亦作絹。 」者。或者馬一匹直絹四十匹, 但新唐書回鶻傳及 何以有絹練 直縑遂

二六五

絹易一馬, 若以時代之先後釋之, 五十匹歟?至新傳之改易舊文, 五匹絹, 據舊傳言, 與舊傳所言者相差甚遠。此種數值之差異,若以索價付值之不同釋之, 與舊傳言者頗合。若依回鶻印納馬二萬匹而索價絹五十萬匹計之,則每匹馬唯易二十 馬一匹易絹四十匹, 則實物之交易, 若依唐朝以二十五萬匹絹充六千五百匹馬價計之, 以絹爲縑則未詳其故。 似亦不應前後相差如此。 又樂天所草與回鶻可汗書中尤有可論者, 頗疑回鶻每以多馬賤價傾售, 既決爲不可能。 則約爲四十匹 唐

上語フラ

室則減其馬數而依定値付價,

然亦未敢確言也。

舊唐書肆捌食貨志上(通典陸食貨典賦稅下同。)云: 縑絲不足女工苦。疎織短截充匹敷。藕絲蛛網三丈餘, 回鶻訴稱無用處。

丈尺, 至有五丈爲匹者, 先是開元八年正月勅, 惡不得至濫。 亦載此數。 若求兩而加尺,甚朝四而暮三。宜令有司簡閱, 任土作貢, 頃者以庸調無憑, 理甚不然。闊一尺八寸,長四丈。同文共軌, 防源斯在, 而諸州送物, 好惡須準。 故遺作樣, 作巧生端。 有踰於比年常例, 以頒諸州。 苟欲副於斤兩, 其事久行。 令其 遂則 好不得過 立樣之 加其

寅恪案: 唐制絲織品之法定標準爲闊一尺八寸,長四丈, 而付回鶻馬價者, 僅長三丈餘,

此即所

益, 謂「短截」也。 「疎織」也。其惡濫至此,宜回鶻之訴稱無用處矣。 復可笑。樂天此篇誠足爲後世言國交者之鑑戒也。 其品質之好惡,應以官頒之樣爲式, 觀於唐回馬價問題, 而付回鶻馬價者, 又史籍所載, 只言回鶻之貪,不及唐家之 彼此俱以貪詐行之, 則如藕絲蛛網, 此即所謂 旣無

白詩又云:

之史料也。

樂天此篇則並言之。是此篇在新樂府五十首中,

雖非文學上乘,

然可補舊史之闕,

實爲極佳

寅恪案:咸安公主即德宗女燕國襄穆公主,下嫁回紇武義成功可汗者。 咸安公主號可敦。

主傳, 新唐書貳壹柒上回鶻傳上, 不須備引也。

其始末見新唐書捌叁諸公

時 世 妝

微之法曲篇末云

胡音胡騎與胡妝,

五十年來競紛泊。

外族之影響。此乃古今之通例, 樂天則取胡妝別爲此篇以詠之。 蓋元和之時世妝, 而不須詳證者。 又豈獨元和一代爲然哉? 實有胡妝之因素也。 凡所謂摩登之妝束,

府

詩云:

時世妝。 時世妝。 出自城中傳四方。 時世流行無遠近。 顋不施朱面無粉。 烏膏注唇唇似泥。

新唐書叁肆五行志云:

雙眉畫作八字低。

妍蚩黑白失本態,

妝成盡似含悲啼。

圓鬢無鬢椎髻樣。

斜紅不暈赭面狀。

不自樹也。

悲啼者,

憂恤象也。

元和末,婦人爲園鬟椎髻, 不設鬢飾, 不施朱粉, 惟以烏膏注脣, 狀似悲啼者。 園鬟者, 上

歲, 寅恪案:新唐書此節似即永叔取之於樂天之詩者。 而志言元和末何耶?又白氏長慶集壹叁代書詩一百韻云: 然樂天作詩於元和四年, 元和紀年共計十五

風流誇墮髻,時世鬭啼眉。

とこっ

貞元末,城中復爲墮馬髻,啼眉妝。

則貞元之末已有所謂啼眉妝。又樂天琵琶引云:「夜深忽夢少年事, 日與長安名妓秋娘競美。秋娘盛時復在貞元十六年前後。(詳見上琵琶引章。)貞元紀年凡二十一 伍微之夢遊春云:「最似紅牡丹,雨來春欲暮。 「鶯鶯詩」。)云:「牡丹經雨泣殘陽。」據鶯鶯傳,張生之初見鶯鶯,在貞元十六年,琵琶婦少年 」離思六首之壹(全唐詩第壹伍函元稹貳柒此首作 啼妝淚落紅闌干。 」及才調集

歲,而二十一年八月即改元永貞。故貞元十六年亦可通言貞元之末也。 他善本可資校訂, 解爭時勢。」)立即摹倣之。其後遂風行於四方較遠之地域。迄於元和之末年, 貞元末年之長安,而繁盛都會如河中等處,爭時勢之婦女(才調集伍微之「有所敎」詩云:「人人總 姑記此疑以俟更考。又此節可與上陽白髮人條互相闡發, 豈此種時世妝逐次興起於 讀者幸取而並觀之 尚未改易耶?今無

元和妝梳君記取, 髻椎面赭非華風。

寅恪案:漢書玖伍西南夷傳云:

此皆椎結。

師古注云:

結讀曰髻,爲髻如椎之形也。

白氏之所謂椎髻,

疑即此樣也。至赭面已詳前城鹽州篇,茲不贅釋。白氏此詩所謂面赭非華

風

乃吐蕃風氣之傳播於長安社會者也。

復次, 歷史語言研究所集刊第拾本第貳分。)就外交關係言,中唐與吐蕃雖處於或和或戰之狀態,(自德 外夷習俗之傳播,必有殊類雜居爲之背景。(此義嘗於拙著讀東城老父傳一文略言之,載

來言, 宗貞元三年平涼敗盟後, 則貞元元和之間, 長安五百里外即爲唐蕃邊疆。 唐室與吐蕃入於敵對狀態, 至憲宗初年乃採用懷柔政策。 其鄰接若斯之近, 決無斷絕可能。 )而就交通往 此當日

### 夫

追摹時尚之前進分子,

所以仿效而成此蕃化之時世妝也。

參考。 記賞, 取長恨歌及傳改縮寫成者也。 形魂離合之關係, 寅恪於論長恨歌時, 及穆天子傳陸諸書, 至於此篇前段所用故實, 而 此種物語之增加, 已言樂天之詩句與陳鴻之傳文所以特爲佳勝者, 皆世所習知者, 故就此篇篇末一節與長恨歌及傳之關係略爲釋證數語, 則不過出於史記貳捌封禪書漢書玖柒外戚傳上李夫人傳, 則由漢武帝李夫人故事轉化而來。 無須贅引也。 實在其後半節暢述 此篇以李夫人爲題, 以供讀者之 人天生死 西京雜

即

#### 詩云:

寅恪案:前三句取自長恨歌「馬嵬坡下泥土中, 此恨縣縣無絕期。 又不見泰陵 一掬淚, 」之句,此固顯而易見者也。 馬嵬坡下念楊妃。 縱令妍姿豔質化爲土, 不見玉顏空死處。 此恨長在無銷期。 」諸句。 後一句則取自長恨歌

其新樂府此篇

則

鑒嬖惑也

而詩云:

漢武帝初喪李夫人。

又云:

淚, 馬嵬坡下念楊妃。

則不獨所舉之例,悉爲帝王與妃嬪間之物語故實,且又借明皇楊妃之事標出一眞實之「今」字。自 是陳諫戒於君上之詞,而非泛泛刺時諷俗之作也。考舊唐書伍貳后妃傳下憲宗懿安皇后郭氏傳

傷心不獨漢武帝,自古及今皆若斯。君不見穆王三日哭,重璧臺前傷盛姬。又不見泰陵一掬

(新唐書柒柒后妃傳下憲宗懿安皇后郭氏傳后半不同。)云: 憲宗懿安皇后郭氏,尚父子儀之孫,贈左僕射駙馬都尉曖之女,母代宗長女昇平公主。

爲廣陵王時,納后爲妃。以母貴,父祖有大勳於王室,順宗深寵異之。貞元十一年生穆宗皇 元和元年八月册爲貴妃。 八年十二月百寮拜表請立貴妃爲皇后。凡三上章,上以歲暮,

新唐書柒柒后妃傳下憲宗懿安皇后郭氏傳(參裴廷裕東觀奏記上及拙著唐代政治史述論稿中篇。 元和十五年正月,穆宗即位,閏正月,册爲皇太后,

來年有子午之忌,

且止。

帝後庭多私愛,以后門族華盛,

慮正位之後,不容嬖幸,以是册拜

王皡請后合葬景陵, 宣宗立, 事順宗爲婦, 將自隕, 於后諸子也。 左右共持之。 歷五朝母天下,不容有異論。 以主祔憲宗室。帝不悦,令宰相白敏中讓之。皞曰,后乃憲宗東宮元 而母鄭故侍兒, 帝聞不喜。是夕后暴崩。有司上尊諡, 有曩怨。帝奉養禮稍薄, 敏中亦怒。 周墀又責謂, 后鬱鬱不聊。 葬景陵外園。 **埠終不撓**。 與一二侍人登 太常官

**皡信孤直**。

俄貶皞句容令。

懿宗咸通中皡還爲禮官,

申抗前論,

乃韶后主祔於廟。

文 切合於當日情事之諷諫詩篇也。又觀於後來憲宗終竟不肯定立元妃郭氏爲皇后,卒致釀成裴廷裕 乎?然則此篇之作, 所謂「光陵商臣之酷」,是樂天之先事陳誡,尤不可忽視也。或有以上引史實旣多在樂天賦此篇之 寅恪案:唐代之女禍可謂烈矣。 迄未聞以元妃正位宮闈, 知憲宗亦多內寵, 而宮掖事秘,又非外間所得詳知爲疑者。 必非僅爲襲長恨歌傳之舊意以充五十首之數者,抑又可知矣。 樂天新樂府旣以「爲君而作」爲其要義之一,宜有此取遠鑒於前朝覆轍,近 則疑似之論, 如武章楊張諸后妃之移國亂朝, 不必果無。何況樂天此時又爲文學侍臣, 其實自憲宗踐阼至樂天作詩, 爲時已歷四五載之 皆世所習知者。今觀上引諸史 職居禁密

第五章

# 陵園妾

此篇旣敍宮女幽閉之情事, 自可與上陽白髮人一 篇相參證。 如詩中:

憶昔宮中被妬猜。因讒得罪配陵來。

之句, 殆受上陽白髮人李傳所言::

楊貴妃專寵,後宮人無復進幸矣。六宮有美色者,輒置別所。

之暗示而來,而樂天上陽白髮人詩云:

陵園妾篇中此語自亦與之有關, 未容君王得見面,已被楊妃遙側目。妬令潛配上陽宮, 可無疑也。 惟特須注意者。 據此篇小序云: 生遂向空房宿。

托幽閉喻被讒遭黜也。

全有別。 則知此篇實以幽閉之宮女喻竄逐之朝臣。 蓋樂天新樂府以一吟悲一事爲通則, 取與上陽白髮人一篇比較, 宜此篇專指遭黜之臣, 而不與上陽白髮人憫怨曠之 其詞語雖或相同, 其旨意則

旨重複也。

遙想六宮奉至尊。

宣徽雪夜浴堂春。

雨露之恩不及者,

猶聞不啻三千人。三千人,(此三字

依全唐詩本補入。)我爾君恩何厚薄。願令輪轉直陵園,三歲一來均苦樂。

寅恪案:宣徽殿即在浴堂殿之東,(詳徐松唐兩京城坊考壹大明宮條。)而浴堂則常爲召見翰林學 士之所。據李相國論事集壹上問得賢興化事條:

上嘗御浴堂北廊。

同書貳論鄭絪事條:

上御浴堂北廊, 召學士李絳對。

同書同卷奏事上怒旋激賞事條:

學士李絳於浴堂北廊奏對。

之紀載可知。是此所謂六宮三千人者,乃指任職京邑之近要與閑散官吏而言也。

所謂「三歲一來均苦樂。」者,東觀奏記中云:

章。皇甫珪自吏部員外召入内廷,改司勳員外,計吏員二十五個月限, 上(宣宗)雅重詞學之臣,於翰林學士恩禮特異。宴遊密召,無所間隔。 轉司封郎中知制誥。 惟於遷轉, 皆守彝

孔溫裕自禮部員外改司封員外入內廷,二十五個月改司勳郎中知制語。 動循官制,不以爵禄

私近臣也

蓋唐家之制,京官遷轉,率以二十五個月爲三歲考滿。 (可參白氏長慶集捌〔新授左拾遺〕謝官狀

奏陳情狀及〔新授京兆府戶曹參軍〕謝官狀。) 白氏長慶集壹叁代書詩一百韻寄微之云:

三考欲成資。

中十二年二月甲子條胡注略云:

即指此也。 樂天此篇結語以三歲輪轉爲言, 誠符其卒章顯志之義矣。 又通鑑貳肆玖唐紀宣宗紀大

夫遣詣山陵之嬪妾,本爲經事前朝之宮人,而樂天此篇乃言「願令輪轉直陵園,三歲一來均苦 宋白曰,凡諸帝升遐, 官人無子者悉遣詣山陵供奉朝夕,具盥櫛, 治衾枕,事死如事生。

樂。」頗嫌失體。然則此篇實與陵園妾並無干涉,又可見也。

復次,憲宗朝元和元年以後,外貶之朝臣如元和三年四月考策官爲宰相李吉甫所訴, 州刺史,王涯貶虢州司馬, 楊於陵出爲嶺南節度使者, (參閱澗底松條所引。)雖亦符於樂天小序 韋貫之貶巴

山宮一閉無開日,未死此身不令出

被讒遭黜」之旨,

但以陵園妾爲比,

則似不切,

且詩中:

之言,亦嫌過當。 樂天此篇所寄慨者,其永貞元年竄逐之八司馬乎?舊唐書壹肆憲宗紀上略云:

入。)壬申, 永貞元年十一月(舊紀原脱「十一月」三字。 貶正議大夫中書侍郎韋執誼爲崖州司馬。 召州刺史柳宗元爲永州司馬, 茲據新唐書柒憲宗紀及通鑑貳叁陸唐紀 己卯, 連州刺史劉禹錫朗州司馬, 再貶撫州刺史韓泰爲 虔州司馬, 池州刺史 順 宗紀補

河中少尹陳諫台州司馬,

元年八月壬午, 韓曄饒州司馬, 和州刺史凌準連州司馬, 左降官韋執誼, 韓泰, 陳諫, 岳州刺史程异柳州司馬, 柳宗元, 劉禹錫, 韓曄, 皆坐交王叔文[也]。 元和 凌準,程异等八人縱

逢恩赦,不在量移之限

則以隨豐陵葬禮,幽閉山宮,長不令出之嬪妾,喻隨永貞內禪,竄逐遠州,永不量移之朝臣,實 一一切合也。惟八司馬最爲憲宗所惡,樂天不敢明以豐陵爲言。復借被讒遭黜之意,以變易其

辭, 詩中「一奉寢宮年月多。」句,前引通鑑胡注引宋白之言, 遂不易爲後人覺察耳。又太行路一篇所論,與此篇頗有關涉,讀者幸取而參閱之。 固可爲此語之注脚, 而韓昌黎集肆豐陵

行云:

設官置衛鎖嬪妓, 供養朝夕象平居。

亦可相參證也。

「中官監送鏁門迴。 句, 則太平廣記肆捌陸薛調譔無雙傳云:

忽報有中使押領内家三十人,往園陵, 以備灑掃。

又云:

忽傳説曰, 有高品過, 處置園陵宮人。

可以與樂天此句相印證也。

第五章

新

商

鹽 婦

白氏長慶集肆陸策林第貳叁目議鹽法之弊論鹽商之幸云:

唯求隷名。居無征徭,行無權稅。身則庇於鹽籍,利盡入於私室。此乃下有耗於農商, 既不歸於人,次又不歸於國。 益於筦權明矣。 臣又見自關以東,上農大賈, 蓋山海之饒, 使幸人姦黨,得以自資。 鹽鐵之利,利歸於人,政之上也。利歸於國,政之次也。 易其資產, 入爲鹽商。 率皆多藏私財, 此乃政之疵, 國之靈也。 別營稗販。 今若剗革弊 少出官利 上無

法

沙汰姦商,

使下無僥倖之人, 上得析毫之計,

斯又去弊興利之一端也。

鹽商。 官家利薄私家厚, 所謂「僥倖之人」。篇中「壻作鹽商十五年,不屬州縣屬天子。每年鹽利入官時,少入官家多入私。 寅恪案:樂天此篇之意旨,與其前數年所擬策林之言殊無差異。此篇小序所謂「幸人」者, 少出官利, 鹽鐵尚書遠不知。」諸句, 唯求隷名。 居無征徭, 行無権稅。 即策林所謂「自關以東,上農大賈,易其資財,入爲 身則庇於鹽籍,利盡入於私室。 」而樂天竟 即策林

唐堯夏禹漢文之代, 棄山海之饒, 散鹽鐵之利。

於策林貳貳不奪人利條昌言:

更爲明白無所避忌矣。然此等儒生之腐論,於唐代自安史亂後國計之仰給於鹽稅者, 殊爲不達事

十以便民。 鹽價寖貴。 半,民始怨矣。 准鹽每斗亦增二百,爲錢三百一十,其後復增六十。 劉]晏之始至也, 而國用耗屈,權鹽法大壞。兵部侍郎李巽爲使,以鹽利皆歸度支。初歲之利, 軍饟,百官禄俸皆仰給焉。 未幾復舊。 順宗時, 鹽估益貴, 鹽利纔四十萬緡。至大曆末,六百餘萬緡。天下之賦,鹽利居半。 始減江淮鹽價,每斗爲錢二百五十。其後鹽鐵使李錡奏, 方是時,錡盛貢獻以固寵,朝廷大臣皆餌以厚貨。鹽鐵之利積於私 商人乘時射利, 明年而晏罷。貞元四年淮西節度使陳少游奏加民賦, 遠鄉貧民困高估,至有淡食者。 江淮豪賈射利, 或時倍之。官收不能過 其後軍費日增 江淮鹽斗減錢 如劉晏之 自此江 宮闡服

又舊唐書壹肆憲宗紀上云:

其後則三倍晏時矣。

支鹽鐵轉運等使, [元和元年四月]丁未,以檢校司空平章事杜佑爲司徒。 從其讓也。仍以兵部侍郎李巽代領其任。 所司備禮册拜, 平章事如故。 罷領度

六月乙亥朔,丁丑,以河東節度使李鄘爲刑部尚書,充諸道鹽鐵轉運使。 、四年四月)丁卯,鹽鐵使吏部尚書李巽卒。 (寅恪案,舊唐書壹貳叁李巽傳以巽卒爲四月。)

據此, 貞元元和間鹽法之利弊, 略如上述。而樂天賦此篇時, 鹽鐵尙書爲李巽。 異爲唐代主計賢

第五章

樂府

臣, 其名僅 亞於劉晏。 李巽之後, 繼以李鄘, 鄘以當官嚴重知名。 似此二人者, 俱不應招致譏

樂天此篇結語至以:

桑弘羊, 死已久,不獨漢世今亦有。

篇時與擬策林時並無改易。 毋乃過刻乎?意者其或別有所指耶?姑從闕疑以俟更考。 此篇之作,不過取前日所蓄意見, 形諸篇什耳。

總之,樂天之鹽法意見,

其賦此

詩云:

本是揚州小家女, 嫁得西江大商客。

寅恪案:劉夢得外集捌夜聞商人船中箏七絕云:

大艑高船一百尺,新聲促柱十三弦。 揚州市裏商人女,來占西江明月天。

蓋唐代揚州爲經濟繁盛之都市,

鉅商富賈薈集之處所。

江西商人航乘大

可與樂天此詩相印證。

舟, 每年來往於江西淮南之間。 觀國史補下凡東南郡邑無不通水條略云:

大。 舟船之盛, 居者養生送死嫁娶,悉在其間。 江湖語云, 盡於江西。 水不載萬, 編蒲爲帆, 言大船不過八九千石。 大者或數十幅, 開巷爲圃,操駕之工數百。 然則(而?)大曆貞元間 自白沙泝流而上。 南至江西, 常待東北風, 有俞大娘航 北至淮南, 謂 船最 之 潮

往來,

其利甚博。

可知知 則其娶揚州倡女爲外婦或妾, 自是尋常之事, 此詩人所以往往賦詠之也。

復次, 樊川集肆夜泊秦淮七絕云:

意, 解, 當非泛用故典而有所指實, 推爲絕唱, 舟中者。 夫金陵, 陳亡之恨,在其江南故都之地, 寅恪案:牧之此詩所謂隔江者, 因論樂天此篇, 附記於此。(劉夢得文集叁金陵懷古五律「後庭花一曲, 方有意義可尋。後人昧於金陵與揚州隔一江及商女爲揚州歌女之義, 模糊籠統, 煙籠寒水月籠沙。 (如沈德潛唐詩別裁貳拾此詩評語之類。)殊可笑也。世之讀小杜詩者,往往不能通其 陳之國都也。 夜泊秦淮近酒家。商女不知亡國恨,隔江猶唱後庭花。 似可取與小杜詩互證也。 指金陵與揚州二地而言。此商女當即揚州之歌女, 尚唱靡靡遺音。牧之聞其歌聲,因爲詩以詠之耳。此詩必作如是 玉樹後庭花, 陳後主亡國之音也。 此來自江北揚州之歌女, 幽怨不堪聽。 而在秦淮商 隨聲附和 、」之句 不解

杏 爲 梁

不見馬家宅,今作奉誠園。 秦中吟傷宅一首與此篇有關,如傷宅詩之結語云:

此篇亦云:

第五章 新 樂

尚猶存。 宅門題作奉誠園。

君不見馬家宅,

即其證也。又舊唐書壹貳德宗紀上云:

同書壹伍貳馬璘傳(新唐書壹叁捌馬璘傳略同)云:

(大曆十四年七月)壬申,毀元載馬璘劉忠翼之第,

以其雄侈踰制也。

弟護喪歸。 力窮乃止。 在京師治第舍, 已爲嬖臣楊氏馬廐矣。 京師士庶觀其中堂,或假稱故吏,爭往赴弔者數十百人。德宗在東宮, 時謂木妖。 尤爲宏侈。 璘之第, 及安史大亂之後, 天寶中, 經始中堂,費錢二十萬貫。他室降等無幾。及璘卒於軍,子 貴戚勳家已務奢靡, 法度隳弛。 内臣我帥, 而垣屋猶存制度。 競務奢豪。 然衛公李靖家 亭館第舍 宿聞 其

司, 非馬璘者, 及踐阼,條舉格令,第舍不得踰制。 自是公卿賜宴, 説詳下。 多於璘之山池。子弟無行, 仍韶毀璘中堂及内官劉忠翼之第。 家財尋盡。 (樂天所言之馬家宅, 璘之家園進屬 乃馬燧 官

此篇以杏爲梁名篇者, 蓋自天寶以來, 長安朝貴,即好興土木。居處奢僭, 杏梁一詞, 乃古詩中所習見, 如玉臺新詠陸費昶詠照鏡云: 最爲弊俗。宜樂天之賦傷宅詩及此篇也。

同書柒皇太子聖製豔歌曲云: 晨暉照杏梁。

同書玖沈約古詩題霜來悲落桐云: 文杏堪作梁。

皆其例也。惟同書同卷歌詞二首之貳云: 盧家蘭室桂爲梁。

中有鬱金蘇合香。

而此詩云:

杏爲梁,桂爲柱,何人堂室李開府。

又云:

高其牆,大其門, 誰家第宅盧將軍。

頗似樂天即取意於古歌詞者。 或謂唐語林捌補遺云: 然樂天詩中有「去年」「今歲」之言,

也。

而新唐書柒叁上宰相世系表范陽盧氏表有:

盧言舊宅在東都歸德坊南街,廳屋是杏木梁,

西壁有韋冕郎中畫馬六匹。

自非僅採古典, 當亦兼詠近事

正言,左監門衛將軍, 諡曰光。

第五章

府

者, 樂天所詠之盧將軍, 豈即指盧言或盧正言其人耶?竊以爲不然, 盧言或盧正言是否果爲一

姑置不論。 盧言之第宅在東都, 盧正言爲隋代盧昌衡之曾孫, 當是玄宗以前人。是地域時間

二八四

據樂天篇中言李開府之宅則云:

去年身沒今移主。

各與樂天所詠者不合也。

言盧將軍之宅則云:

今歲官收賜別人。

舊唐書壹肆憲宗紀上(新唐書柒憲宗紀通鑑貳叁柒唐紀憲宗紀元和二年十一月甲申條同。)云: 則李先而盧後,又俱爲元和初年時事無疑。 然則其所指言者, 殆李錡與盧從史歟?

[元和二年]十一月甲申斬李錡於獨柳樹下。

寅恪案:李錡爲鎭海軍節度使,是合於開府之稱也。

同書同卷(通鑑貳叁捌唐紀憲宗紀元和五年四月甲申及戊戌條同。 )略云:

前 元和五年四月甲申鎭州行營招討使吐突承璀執昭義節度使盧從史,載從史送京師。戊戌,貶 昭義節度使盧從史爲驩州司馬。

寅恪案:盧從史得稱將軍, 亦無疑問也。 惟有可注意者, 新樂府雖有:

元 和四年爲左拾遺時 作。

之注, 而此杏爲梁一篇詠及盧從史之敗, 是其作成至少亦在元和五年四月以後也。 頗疑白氏此五

參證也。

詩中「君不見馬家宅, 尙猶存, 宅門題作奉誠園。 者, 舊唐書壹叁肆馬燧傳附子暢傳(新唐書壹

伍伍馬燧傳附子暢傳同。)云:

並盡。 順宗復賜暢。 燧貲貨甲天下。燧既卒,暢承舊業,屢爲豪幸邀取。貞元末中尉申志廉諷暢令獻田園第宅。 身歿之後, 初爲彙妻所訴, 諸子無室可居, 析其產。 以至凍餒。今奉誠園亭館, 中貴又逼取, 仍指使施於佛寺,暢不敢差。 即暢舊第也。

國史補中云:

馬司徒之子暢,以第中大杏饋竇文場。文場以進。 暢懼, 進宅。廢爲奉誠園。屋木盡拆入内也。 德宗未嘗見, 頗怪之。令使就第, 封杏

寅恪案:奉誠園爲馬燧舊第事, 除見於兩唐書及李肇國史補外, 又數見於唐人詩集中, 如寶氏聯

園馬侍中故宅。

珠集竇牟奉誠園聞笛詩注云:

元氏長慶集壹陸奉誠園七絕注云:

馬司徒舊宅。

至其所在地, 則據杜牧樊川集貳過田家宅詩云:

之類,不遑備舉。 安邑南門外, 誰家版築高。 奉誠園裏地, 牆缺見蓬蒿。

可知也。

君不見魏家宅, 屬他人,詔贖賜還五代孫。 者, 其自注云:

元和四年, 韶特以官錢贖魏徵勝業坊中舊宅, 以還其孫, 用獎忠儉

寅恪案:白氏長慶集肆壹論魏徵舊宅(李師道奏請出私財收贖魏徵舊宅事宜。)云:

見,不敢不陳。 伏望明勅有司, 其與師道韶, 特以官錢收贖,使還後嗣,以勸忠臣。 未敢依宣便撰, 伏待聖旨。 則事出皇恩。 (此條可參通鑑貳叁柒唐紀憲宗紀 美歸聖德。 臣苟有所

拾遺之功,不愧近臣言官之職矣。而篇中全以其事歸美憲宗,尤爲遣辭得體也。 則官錢收贖魏徵舊宅之議,實由樂天發之。夫樂天杜強藩之掠美,成君上之勸忠, 誠可謂有論思

元和四年三月條及胡注。

井底引銀瓶

此篇小序云: 止淫奔也。

寄言癡小人家女, 慎勿將身輕許人。

篇末以告誡癡小女子爲言,則其時社會風俗男女關係與之相涉可知。此不須博考旁求,元微之鶯 寅恪案:樂天新樂府與秦中吟之所詠, 皆貞元元和間政治社會之現象。此篇以「止淫奔」爲主旨,

鶯傳即足爲最佳之例證。蓋其所述者,爲貞元間事,與此篇所諷刺者時間至近也。關於鶯鶯傳,

以與此篇所言者相參證於下。

寅恪已辨證其事,茲不重論。惟取傳載雙文報張生書中數語,

詩云:

終知君家不可住。 暗合雙鬟逐君去。 頭馬上遙相顧, 其奈出門無去處。 到君家舍五六年。 一見知君即斷腸。 知君斷腸共君語。 君家大人頻有言。 聘則爲妻奔是妾, 君指南山松柏樹。 不堪主祀奉蘋蘩。 感君松柏化爲心,

書略云:

婢僕見誘, 義盛意深。 遂致私誠。 愚陋之情, 兒女之心,不能自固。 永謂終託。 豈期既見君子, 君子有援琴之挑, 而不能[以禮]定情。 鄙人無投梭之拒。 (見校補記第二 及薦寢

配 爲醜行, 謂要盟爲可欺。 則當骨化形銷, 丹誠不泯。因風委露,猶託清塵。存沒之誠,

則)致有自獻之羞,

不復明侍巾幘。沒身永恨,

含歎何言。

如或達士略情,

捨小從大。

以先

第五章

新

白詩 箋 證

盡於此。

此篇, 則樂天詩中之句, 未必以斯爲尤急者。元白二人之不同,殆即由此而判歟? 豈亦微之和李校書新題樂府序所謂「病時之尤急者。 即雙文書中之言也。 夫「始亂終棄」, 乃當時社會男女間習見之現相。 」耶?(見元氏長慶集貳肆。

)但微之則 樂天之賦

官 牛

此篇小序云:

諷執政也。

府司天臺一篇則專詆杜佑, 寅恪案:元和四年時,三公及宰相凡五人。其中鄭絪裴垍李藩三人皆不應爲樂天所譏誚, 是則此篇之所指言者,其唯于頔乎?

而新樂

新唐書陸貳宰相表中(舊唐書壹肆憲宗紀上同。)云:

寅恪案:據此, 元和三年九月庚寅山南東道節度使檢校尚書左僕射于頔守司空同中書門下平章事。 知于頔之拜相與樂天之作詩, 其時間相距甚近也。 舊唐書壹伍陸于頔傳(新唐書

貞元十四年爲襄州刺史, 充山南東道節度觀察(使)。於是廣軍籍, 募戰士,

器甲犀利,

僴然

壹柒貳于頔傳同。)略云:

稍戒懼,以第四子季友求尚主,憲宗以長女永昌公主降焉。其第二子方,屢諷其父歸朝, 專有漢南之地。於是公然聚斂, 恣意虐殺,專以凌上威下爲務。及憲宗即位,威肅四方, 頔

國史補中(新唐書壹柒貳于頔傳略同。)云:

册拜司空平章事。

襄州人善爲漆器, 天下取法, 謂之襄樣。及于司空頗爲帥, 多酷暴。 鄭元鎭河中, 亦虐。 遠

寅恪案:于頔居鎭驕蹇,迫於事勢,不得已而入朝。雖其執政原是虛名,但以如是人而忝相位,

白氏長慶集肆壹論于頔裴均狀(于頔裴均欲入朝事宜。)云:

固宜譏諷也。

近呼爲襄樣節度。

且于頔身是大臣,子爲駙馬, 性靈事迹陛下素諳。 一朝到來, 權兼内外。 若繩以規制, 則必

失君臣之心。若縱其作爲,則必敗朝廷之度。

同書同卷論于頔所進歌舞人事宜狀云:

於于頔可知。 寅恪案:樂天於于頔入朝以前, 于頔自入朝來,陛下待之,深得其所。存其大體,故厚加寵位。 然則謂此篇爲專指於于者,亦不足怪矣。 已有痛詆之語,在其入朝以後,復於奏狀中言其「性惡」,是不滿 知其性惡,故不與威權

詩中「官牛官牛駕官車。 浐水岸邊般載沙。 「載向五門官道西。 綠槐陰下鋪沙隄。 者, 蓋拜相之

儀制, 如國史補下云:

拜相, 禮絕班行, 府縣載沙填路, 自私第至于城東街, 名曰沙隄。

者, 是也。

紫

此篇小序云:

誠失職也。

以爲證。 寅恪案:樂天在翰林時實有拾遺補闕之功。 又舊唐書壹陸陸新唐書壹壹玖白居易傳, 觀白氏長慶集肆壹, 通鑑貳叁捌唐紀憲宗紀元和五年六月甲申 肆貳, 肆叁, 諸卷所上奏狀,

相符者矣。 及李相國論事集貳論白居易事條, 然則此篇之作, 而又以之次於官牛一篇之後者, 均載憲宗謂白居易不遜,及李絳解釋之語,則樂天亦可謂言行 殆有感觸於時政之缺失, 而憤慨稱職

之涉及宣州兎毫筆者略錄數條於下。 樂天以宣州解送中進士第, 此篇及紅線毯篇俱以宣州之貢品爲言, 蓋皆其所熟知者也。 茲取舊籍

者之不多,

似無可

疑也。

元和郡縣圖志貳捌宣州溧水縣條(此條乃張淸常君舉以見告者,附記於此。)云:

物中有紙筆。又新唐書肆壹地理志宣州宣城郡土貢有兎褐簟紙筆。) 中山在縣東南一十五里,出兎毫,爲筆精妙。(舊唐書壹佰伍韋堅傳載宣城郡船所堆積之產

全唐文捌佰壹陸龜蒙管城侯傳略云:

毛元鋭,字文鋒,宣城人。其族有竄於江南者,居於宣城溧陽山中, 宗族豪甚。

寅恪案:太平寰宇記壹佰叁所紀宣州土產中,筆居其一。樂氏之書,雖較晚出,亦可與樂天之詩

相印證也。至張耒明道雜志云:

原田,則毫全,以出入無傷也。宣兎居山,出入爲荆棘樹枝所傷,則短秃。則白詩所云非也 余守宣州,問筆工毫用何處兎。答云,皆陳亳宿敷州客所販。宣自有兎,毫不可用。蓋兎居

宣和畫譜壹捌崔慤條云:

上有老兔,食竹飲泉生紫毫。此大不知物之理。聞江南之兔,未嘗有毫。宣州筆工, 腹下不白。平原淺草, 大抵四方之兎,賦形雖同, 則毫多而腹白。大率如此相異也。 而毛色小異。山林原野,所處不一。如山林間者, 白居易曾作宣州筆詩, 往往無毫, 謂 復取青 江南 而

恐是古今產物之殊異。上引唐人之文,足徵白詩之不妄。文潛拘於時代,致疑古人。其言未必可

齊中山兎毫作筆耳。

第五章

為定論也。

隋 堤 柳

此篇殆樂天追賦汴河之舊遊,以足五十首之數者,故詩句旣爲通常警誡之語,而感慨亦非特別深 惟樂天本有舊業在埇橋, (參白氏長慶集貳捌答戶部崔侍郞書, 又伍叁埇橋舊業五律。)少時

又嘗旅居吳越,(參白氏長慶集伍玖吳郡詩石記。)觀白氏長慶集伍叁汴河路有感一首所云:

舉目舊鄉關。

事去唯留水,

人非但見山。

啼襟與愁

鬢,此日兩成斑。

孤舟重往還。繞身新眷屬,

三十年前路,

可知其與汴河關係之密切也。然則樂天是篇之作,較之詩人之浮泛詠古者, 固亦有差別矣。

隋堤柳」者, 隋書貳肆食貨志略云:

築御道, 煬帝即位, 樹以柳。 開渠引穀洛水自苑西入,而東注於洛。 又造龍舟鳳觮 黃龍赤艦, 樓船, 又自板渚引河達於淮海, 篾舫。 募諸水工, 謂之殿脚。 謂之御河。 衣錦行 河

「龍舟未過彭城閣。 宇文化及等謀同逆, 者, 即大唐創業起居注下略云: 遂夜率驍果者圍江都宮,

殺後主於彭城閣

執青絲纜,

挽舡以幸江都。

彭城閣,在甘泉縣彭城邨。 大業雜記, 煬帝建, 閣中有溫室。 先是開皇末有泥彭城口之謠

其後果驗。唐李益有詩。

可知彭城閣之所在。全唐詩第拾函李益詩貳揚州懷古云: 彭城閣邊柳, 偏似不勝春。

君虞與樂天爲同時人,其所詠者,可與白氏此句參證也。

二百年來汴河路。」者,隋書叁煬帝紀云:

〔大業元年三月〕辛亥,發河南諸郡男女百餘萬,開通濟渠,自西苑引穀洛水達於河,

自板渚

隋煬帝大業元年當西曆六○五年。白氏作詩時爲唐憲宗元和四年,當西曆八○九年。 引河通於淮。 相距之年正

約合二百之數也。至汴河路, 則寅恪已於拙著秦婦吟校箋中詳論之,於此可不複述。

此篇小序云:

懲厚葬也。

考唐會要叁捌葬門略云:

元和三年五月京兆尹鄭元修奏, 王公士庶喪葬節制, 其凶器悉請以瓦木爲之。 是時厚葬成俗

事竟不行。 即在樂天賦新樂府之前一 年, 當時士庶習於厚葬之風,

此足爲

寅恪案:元修之奏上於元和三年,

雖韶命頒下,

國朝參古今之儀,制喪葬之紀, 又白氏長慶集肆捌第陸陸目禁厚葬略云: 尊卑豐約, 焕然有章,今則鬱而不行於天下者久矣。況多藏

紀。 移風革俗, 其在茲乎? 必辱於死者,厚費有害於生人。

習不知非,

寖而成俗。

陛下欲革其弊,則宜振舉國章,

則樂天於當時民間厚葬之弊俗,久具匡革之志。 此篇之作, 實仍本其數年前構策林時之旨意也。

有當也。 上陽白髮人有「入時十六今六十。」之句等,皆其例也。故此篇自不應遠刺代宗或其以前之山陵, 見事爲主。其有賦詠前朝故實者,亦多與時事有關。如胡旋女篇中有「五十年來制不禁。 而樂天所得聞知者, 或疑篇中旣以「秦始驪山」「漢文霸陵」爲說,似是專指山陵而言。然樂天新樂府中凡所諷論, 至於秦始漢文之得失, 則德宗順宗崇豐二陵, 又未見有過奢之制度。 亦不過言喪葬儉侈利弊者所習用之比照耳, 是知此篇只可視爲泛說, 未可據以疑及此篇之 」之句,

旨意也。今戈本貞觀政要陸論儉約篇略云:

府

貞觀十一年韶曰,闔閭違禮, 珠玉爲鳧雁。 始皇無度, 水銀爲江海。季孫擅魯, 斂以璵璠。

專宋, 送葬之具有不依令式者,仰州府縣官明加檢察, 葬以石槨。莫不因多藏以速禍, 由有利而招辱。 其王公已下,爰及黎庶, 隨狀科罪。 在京五品以上,及勳戚家 自今已

在政要愼終篇中, 太宗之韶, 仍錄奏聞。 旨在懲革臣民厚葬之俗,而亦以秦始皇帝爲言, (見戈氏原注。)當爲樂天作七德舞尋撦材料時所及見, 是可與樂天此篇相參證。 或亦與此篇之作有關 又此條本載

#### 古 冢 狐

此篇之旨意, 樂天新樂府率皆每篇各持一旨, 自宜與之有別。 而不雜不複。 其李夫人一篇, 如前所論, 乃獻諫於君上之詞。

則

詩云:

日欲暮時人靜處。 古冢狐, 白氏長慶集貳和答詩十首之致和古社詩中雖有, 妖且老。 化爲婦人顏色好。 或歌或舞或悲啼。 翠眉不舉花顏低。 頭變雲鬟面變妝, 妖狐變美女, 大尾曳作長紅裳。 忽然一笑千萬態, 社樹成樓臺。 見者十人八九迷。 徐徐行傍荒村路。 黄昏行人過

見者心徘徊。 諸句, 但彼篇意在警戒小人, 與此篇之旨有異。

此篇之作以妖狐幻化美女迷惑行人爲言,乃示戒於民間一般男子者。 色善蠱惑。 能喪人家覆人國。」之句, 恐不過充類至盡, 痛陳其害, 未必即與少陵北征詩「不聞夏 至於篇末一節「何況 褒妲之

殷衰, 中自誅褒妲。 」所述者同其意也。

復次, 篇與下列史料相印證, 狐能爲怪之說, 由來久矣。 亦足供研究社會風俗者之參考也。 而幻爲美女以惑人之物語, 則恐是中唐以來方始盛傳者。

取此

太平廣記肆肆柒狐類狐神條引朝野僉載云:

唐初已來百姓多事狐神, 房中祭祀以乞恩。 食飲與人同之。 事者非一主。 當時有諺曰, 無狐

魅

寅恪案:據此可知唐代社會盛行信奉狐神之俗也。又同書肆伍貳同類任氏條略云:

室宇甚嚴。延入,任氏更妝

而

出

酣飲極

云無。 鄭子至樂遊 自此 乃約 夜久而寢。 與之固爭。 東轉 後期 園 有門 而去。 其妍姿美質,歌笑態度,舉措皆豔, 已昏黑矣。見一宅, 者, 主人適悟。 既行及里門, 誰氏之宅。 乃曰, 主人曰, 門局未發, 土垣車門, 吁!我知之矣。 此隤墉棄地, 門旁有胡人鬻餅之舍, 此中有一狐, 殆非人世所有。 無第宅也。 多誘男子偶宿, 鄭子曰, 將曉, 鄭 子 指 任氏 適過之, 宿 所 曰, 以 當三見 問 曷以 可去 之。

今子亦遇乎?鄭子赧而隱曰, 質明復視其所, 見土垣車門如故, 窺其中,

廢圃耳。

故可取相參證也。 寅恪案:此爲沈旣濟於建中二年所撰之任氏傳文,沈氏作此傳與白氏作新樂府之時代相距不遠, 據沈白二公之言,則中唐以來已有此種類似聊齋志異之狐媚物語, 可以考知

黑潭。

韓昌黎集伍有炭谷湫祠堂五言古詩一首,題下注引歐本云:

在京兆之南,終南之下,祈雨之所也。南山秋懷詩皆見之。

又引陸長源辨疑志云:

長安城南四十里有靈母谷,俗呼爲炭谷。

又引宋敏求長安志略云:

炭谷在萬年縣南六十里,澄源夫人湫廟在終南山炭谷。

樂天此篇所詠黑潭之龍祠,豈即昌黎詩所詠炭谷湫之龍祠耶?考元和四年之春京畿實有旱災, 詳杜陵叟篇所論。 )則此篇所摹寫龍祠享祭之盛,當爲樂天親有聞見者也。

此篇小序云:

疾貪吏也

示, 頗疑此篇之作, 但此篇末節云: 殆受元微之於元和四年使東川按故東川節度使嚴礪罪狀事(詳長恨歌箋證。

將餧狐。狐假龍神食豚盡,九重泉底龍知無。

肉堆潭岸石,

酒潑廟前草。

不知龍神享幾多,

林鼠山狐長醉飽。

狐何幸,

豚何辜,

每年殺豚

是所謂龍者,似指天子而言。狐鼠者,乃指貪吏而言。 壹論于頔裴均狀(于頔裴均欲入朝事宜。)云: 豚者, 即謂無辜小民也。 考白氏長慶集肆

竊見外使入奏,不問賢愚, 割剝疲人。 每一入朝, 甚於兩稅。 皆欲仰希聖恩, 又聞于頔裴均等, 傍結權貴。 上須進奉,下須人事。 數有進奉。若又許來, 莫不減削軍 荆襄之人,

必重困於剝削矣。

同集同卷論王鍔欲除官事宜狀略云:

臣又聞王鍔在鎮日,

不卹

凋残,

唯務差税。

淮南百姓,

日夜無憀。

五年誅求,

百計侵削。

物既足, 皆割剝生人, 部領入朝 營求宰相。 號爲羨餘, 親自進奉。 今若授同平章事, 臣又恐諸道節度使今日已後

聞衆議皆云裴均性本貪殘, 動多邪巧, 每假進奉,廣有誅求。

此篇至爲直接詆誚當日剝削生民,進奉財貨, 月條及考異。)樂天旣於作此篇前屢論進奉之情事,而進奉之情事,又恰與此篇所詠者切合, 貳叁柒唐紀憲宗紀元和三年九月條及考異。)論裴均狀爲元和四年所上。(參同書同卷元和四年四 其論于頔狀,論王鍔狀,俱爲元和三年所上。(頔子季友以元和二年十二月己卯即二十六日尚主, 而此狀云頔子爲駙馬,則論于頔狀自爲元和三年所上。至論王鍔狀,爲元和三年上事,可參通鑑 以邀恩寵, 求相位之藩鎭者也。

則

口 度

此篇小序云:

惡詐人也。

所謂「詐人」者, 初視之, 似是泛指, 但詳繹之, 則疑白氏之意乃專有所刺。 其所刺者, 殆李吉甫

乎?

何以言之?篇之結語云:

第五章

新

府

君不見李義府之輩笑欣欣。 笑中有刀潛殺人。 陰陽神變皆可測, 不測人間笑是嗔。 (關於人

言李義府笑中有刀事, 可參舊唐書捌貳李義府傳, 新唐書貳貳叁姦臣傳上李義府傳, 及談實

錄等。

揆以卒章顯其志之義, 則已直指吉甫之姓, 呼之欲出矣。 又詩中:

但見丹誠赤如血,誰知偽言巧似簧。

J句,可與唐會要捌拾朝臣複諡條載張仲方駁吉甫諡議:

諂淚在臉, 遇便則流。巧言如簧, 應機必發。

方少嘗與樂天同官交好, 之言相印證。蓋仲方駁諡之議, (見白氏長慶集陸壹范陽張公墓誌銘。)則二公詞語之如此巧合, 雖作於吉甫身後, 然其言必爲當日牛黨對於吉甫之共評也。 必非偶 而仲

復次, 內與王士真劉濟潛通條。)略云: 李相國論事集貳論鄭絪事條(參通鑑貳叁柒唐紀憲宗紀元和二年十一月昭義節度使盧從史

又從可知矣。

上日, 上(憲宗)日, 故事合如何處置?〔李〕絳曰, 專權有忌前之心, 密奏。 朕與宰相商量, 絳 對 曰, 造爲此辭, 烟頗知古今, 欲召盧從史卻歸潞府, 冀其去位。無令人言陛下惑於讒佞也。 計鄭綑必不自洩, 洞識名節, 事出萬端, 從史必不自言。 續追 入朝。 情有難測。 鄭 絪輒 陛下先知, 莫是同列有 至是遂已。 漏泄我意, 何 以 不便之 得 先報從 之?

同書同卷辨裴武疏條(參通鑑貳叁捌唐紀憲宗紀元和四年九月庚戌上以裴武爲欺罔條。)略云: 先宿裴垍宅, 須左降嶺南遠處。 (李)絳因

奏言, 無此理。 上(憲宗)顏色甚震怒曰,裴武罔我, 裴武久爲朝士, 具諳制度。 況皆詳練時事之人,計必無此事。 裴垍身爲宰相, 又使回未見, 必有構傷裴垍裴武,陛下不可不察。武得守其 特受恩私。若其未見,便爾宿宰相家, 固

位。

之人,則不可知。考吉甫此時已出鎮淮南,當無尚在長安之理。所可注意者,其時間正與樂天作 此而作,而特以「李義府之輩」爲言者, 詩之時相符是也。 寅恪案:李相國論事集乃專詆吉甫之書,其言未可盡信。 人, 通鑑屬之吉甫。 頗可依據。 前者通鑑以之繫於元和二年十一月,蓋由召盧從史令還昭義事而定。 然則此二條所述者, 譖害之謀如出一轍, 後者通鑑以之繫於元和四年九月,蓋由裴武使成德復命事而定。其構傷二 其職是之故歟?(可參閱澗底松篇所論。 然此兩條並爲司馬溫公采入通鑑, 誣構之語發自二人。樂天之詩殆即由 其潛害鄭絪之 似亦 裴

秦古了

此篇小序云:

哀冤民也。

詩 云:

鵬 豈 無 鵰與鶚, 如不聞。 嗉中肉飽 秦吉了, 不肯搏。 人云爾是能言鳥, 亦有鸞鶴羣, 豈不見雞燕之冤苦。 開立颺 高(寅恪案, 吾聞鳳凰百鳥主, 全唐詩「颺高」作 爾竟不爲 「高

鳳凰之前致一言, 安用噪噪閑言語。

指謂大小諫。 寅恪案:詩中之鵬鶚, 是此篇所譏刺者至廣, 乃指憲臺京尹搏擊肅理之官, 而樂天尤憤慨於冤民之無告,言官之不言也。 鸞鶴乃指省閣翰苑清要禁近之臣, 秦吉了即

復次, 昨 日長爪薦, 此篇所言: 今朝大嘴鳥。 鳶捎乳燕一窠覆, 烏啄母雞雙眼枯。 雞號墮地燕驚去, 然後拾卵

乃喻豪強侵凌弱小之事, 似可與白氏長慶集壹宿紫閣山北邨詩:

節,

其難。

語, 中庭有奇樹, 中尉正承恩。 種來三十春。 (可參白氏長慶集貳捌與元九書, 主人惜不得, 持斧斷其根。 聞僕宿紫閣村詩, 口 稱采造家, 身屬神策軍。 則握軍要者切齒矣。 主人慎勿

諸語相參證。 蓋當日神策軍將吏最爲暴橫, 觀舊唐書壹伍肆許孟容傳(新唐書壹陸貳許孟容傳

同。

等語。

本軍。 益縱橫,府縣不能制。孟容剛正不懼,以法繩之,一軍盡驚。冤訴於上,立命中使宣旨令送 曰, 收捕械繫, (元和)四年, 期滿不足當死。)自興元已後, 孟容繁之不遣。中使再至, 尅日命還之。 拜京兆尹, 賜紫。 曰, 不及期當死。 神策吏李昱假貸長安富人錢八千貫, 乃執奏曰,臣職司輦穀,合爲陛下彈抑豪彊。 禁軍有功,又中貴之尤有渥恩者,方得護軍。 (通鑑貳叁捌唐紀憲宗紀元和四年九月此條作, 滿三歲不償。 錢未盡輸, 故軍士日 孟容遣吏

之紀載, 復不爲訴一言於君上, 樂天此篇所深慨者, 即可知也。夫身受侵害之冤民,多不敢自陳, 其在斯乎? 職司輦轂之京尹, 又少能繩制,

而有言責

昱不可得。

上以其守正,

許之。

# 鵶 九 劍

元氏長慶集貳說劍詩略云:

既非古風壺, 切瓊玖。劍決天外雲, 異,疑是十將門。 吾友有寶劍 密之如密友。 無乃近鵶九。勸君慎所寶,所用無或苟。 何人爲鑄之,干將別來久。 劍冲日中斗。 我實膠漆交, 劍隳妖虵腹, 中堂共杯酒。 我欲評劍功, 劍拂佞臣首。 潛將辟魑魅, 白虹座上飛, 願君良聽受。 今復誰人鑄, 勿但驚妾婦。 青地匣中吼。 劍可剸犀兕, 挺然千載後。 留斬泓下 我聞音響

莫試街中狗。

取與此篇 相較, 頗疑樂天是題之作, 不能與之無關。 惟樂天此篇與微之詩又有不同者, 樂天詩

歐冶子死千年後。 精靈暗授張鵶九。 鵄九鑄劍吳山中。 天與日時神借功。

壞也。 千年之久也。「張鵄九」者, 蓋「歐冶子死千年」者, (亦與元九書中語。 喻周衰秦興六義始刑, )是取鵶九劍爲題,即指新樂府之作而言,亦可以推見矣。故此篇小序 樂天所以自喻。「鵶九鑄劍」者, (見白氏長慶集貳捌與元九書。 樂天以喻其作新樂府欲扶起詩道之崩 ) 迄於樂天之時約有

所云:

思決壅也。

結語所云:

實不僅爲此篇之主旨, 不如持我決浮雲, 新樂府五十首之作, 無令漫漫蔽白日。 爲君使無私之光及萬物, 其全部旨意亦在於斯。 由此觀之, 蟄蟲昭蘇萌草出 樂天此篇之作,

何耶?曰, 此外尚有可論者, 總括敍述其前此四十八篇之主旨者也。 此篇所述者, 此篇既已總括其新樂府之作, 一己之作品。采詩官所論者, 而後此復有采詩官一

廣大之理想。

樂天之意,

蓋以爲決壅蔽

篇,

以爲全部新樂府之殿

乃

官篇所引。)是其新樂府之作,亦不過備采詩官之采獻耳。此所以必以采詩官一篇爲殿也。 繫乎廣視聽。廣視聽之要則,在立采詩之官。夫采詩官者,日采於下,歲獻於上。(詳見下采詩

新樂府組織之嚴,用意之密,斯又爲一例證矣。

送, 復次, 九之劍, 可視爲劍成之始。 詩中「劍成未試十餘年。 樂天自身及其新樂府作品融而爲一,誠可謂物我兩忘, 自此迄於元和四年己丑賦新樂府之時, ' 」者**,**亦疑爲樂天自喩之語。考樂天於貞元十五 其間已踰十年矣。 主賓俱泯矣。 年己卯由宣州解 蓋樂天此篇以鵶

### 采 詩 官

趣理想者也。 樂天新樂府五十篇, 每篇皆以卒章顯其志。 此篇乃全部五十篇之殿, 亦所以標明其作五十篇之旨

白氏長慶集肆捌策林第陸拾玖目采詩以補察時政(參同卷策林第陸捌目議文章, 前總論已引。 )略

俾乎歌詠之聲, 臣聞聖王酌人之言, 諷刺之與, 補己之過, 所以立理本, 日采於下, 歲獻於上者也。 導化源也。 所謂言之者無罪, 將在乎選觀風之使, 聞之者足以自誠 建采 詩之官,

所謂善防川者,決之使導。善理人者,宣之使言。

第五章

新

樂

府

稿

同集叁拾進士策問五道(元和三年爲府試官。)之第叁道云:

大凡人之感於事, 則必動於情,發於歎,興於詠,而後形於歌詩焉。故聞蓼蕭之詠, 則知威虐及人也。 聞廣袖高髻之謠,則知風俗之奢蕩也。古之 則

觀風之使,復採詩之官, 君人者,採之以補察其政, 知德澤被物也。聞北風之刺, 俾無遠邇, 經緯其人焉。夫然, 無美刺, 日採於下, 則人情通而王澤流矣。 歲聞於上。 以副我一人憂萬人之 今有司欲請於上, 遣

旨 識者以爲何如。

寅恪案:上引二文皆樂天於元和四年賦新樂府以前所作,可知樂天於復古采詩之意, 蓋蓄之胸中

白氏長慶集壹讀張籍古樂府略云:

張君何爲者,

業文三十春。

尤工樂府詩,

舉代少其倫。

爲詩意如何,

未嘗著空文, 願播内樂府 時得聞至尊。

同書同卷寄唐生詩云:

同書貳捌與元九書略云:

我亦君之徒, 痛甚騷人辭。 鬱鬱何所爲。 非求宮律高,不務文字奇。 不能發聲哭, 轉作樂府詩。篇篇無空文, 惟歌生民病, 願得天子知。 句句必盡規。 功高虞人

六義互舖陳。 風雅比興

復吾平生之志。 爲時而著, 自登朝來, 指言者, ,不可支持耶?抑又不知天之意,不欲使下人之病苦,聞於上耶?不然, ` 輒詠歌之,欲稍稍遞進聞於上。上以廣宸聰,副憂勤。次以酬恩獎,塞言責。下以 歌詩合爲事而作。是時皇帝初即位,宰府有正人,屢降璽書,訪人急病。 年齒漸長, 豈圖志未就,而悔已生。言未聞,而謗已成矣。 閱事漸多。每與人言,多詢時務。每讀書史,多求理道。 **豈六義四始之風,天將破** 何有志於詩者 始知文章合 而難於

知。」此即其「采詩」「諷諫」之旨意也。新樂府以此篇爲結後之作,正如常山之蛇尾, 樂府則曰,「願播內樂府,時得聞至尊。」自述其作樂府之本志,則曰,「惟歌生民病, 嘗著空文。」自詡其新樂府,則曰,「篇篇無空文。」是此一要義,固無差別也。又樂天於文昌古 寅恪案:樂天之新樂府與文昌之古樂府,其體制雖有不同,而樂天推許文昌古樂府,則曰,「未 不利若此之甚也? 與首篇有互 願得天子

南部新書癸云:

相救護之用。其組織嚴密,非後世摹仿者,所能企及也。

明人胡抱章, 頗諷時事。 士達子舉正,端拱二年進士,終職方員外郎。 作擬白氏諷諫五十首,亦行於東南,然其辭甚平。後孟蜀末楊士達亦撰五十

寅恪案:後世摹仿全部新樂府之詩, 如胡楊之徒所作, 均不顯著流傳。 若淸高宗之擬作, 則更可

第五章

不置論矣。

才藝之實,徒揭其義旨以自高,則不勝其虛誕之弊矣。 復次,樂天作新樂府之義旨,非難附和承襲,而其作新樂府之才藝,則曠世不一見者也。苟無其

南部新書庚云:

元和以來,舉人用虛語策子作賦,若使陳詩觀風,乃敎人以妄爾。

(見校補記第三則)

據之言。故論新樂府竟,

並附錄末流摹擬之弊於此,以供效顰者之鑒誡。

寅恪案:李珏以譏諷時事爲元和體詩之病,(見唐語林貳文學類文宗欲置詩學士條。

)恐非絕無依

三〇八

### 第六章 古題樂府

作不可見,自難評論。然白氏長慶集壹陸編集拙詩成一十五卷因題卷末戲贈元九李二十詩「苦教 李公垂作新題樂府,微之擇和之,樂天復擴充之爲五十首,遂成有唐一代詩歌之名著。今公垂之

李二十常自負歌行,近見予樂府五十首,默然心伏。短李伏歌行。」句,樂天自法云:

樂天所賦。寅恪別爲一章,合元白所作而專論之,茲可不涉及也。 則公垂之作,當不及樂天,可以無疑。微之所作,見於元氏長慶集貳肆者,共十二首,亦多不如

長恨歌琵琶引連昌宮詞諸章闡明之,茲亦可取用參證,即所謂比較之研究是也。 心目中,仿效改創,從同立異,以求超勝,決非廣泛交際率爾酬和所爲也。關於此義,寅恪已於 月,詳繹其意旨詞句, 有似同之處。有改創,然後有立異之點。儻綜合二公之作品,區分其題目體裁, 夫元白二公,詩友也,亦詩敵也。故二人之間,互相仿效,各自改創, 即可知二公之於所極意之作,其經營下筆時,皆有其詩友或詩敵之作品在 以蘄進益。 考定其製作年 有仿效, 然後

稿

府, 且數意竝陳, 微之賦新題樂府, 意爲 而行文自由無拘牽滯礙之苦。微之所賦,則尚守七言古體詩之形式,故亦不如樂天所作之瀟 一題, 幾如自然之散文, 往往使讀者不能知其專主之旨, 如樂天之所作者, 其不及樂天之處有二:(一)爲一題涵括數意, 却仍極富詩歌之美。且樂天造句多以三七言參差相間雜, 殊相懸遠也。 (二)爲造句遣詞, 注意遂難於集中。 頗嫌晦澀, 故讀畢後影響不深, 則不獨詞義複雜, 不似樂天作品詞句簡 不甚清 感人之力較 微仿古樂 切,

茲先節錄古題樂府序之有關解釋者於下。 讀元詩者,苟明乎此,始可評論及欣賞今傳世之元氏長慶集貳叁卷中古題樂府詩十九首也。 案:丁酉爲元和十二年。)即樂天於元和四年賦新樂府後之八年, 創以求超勝, 是殆微之於其元和十二年(元氏長慶集貳叁古題樂府序下自注「丁酉」二字。 和劉猛李餘古樂府詩時之心理。 寅恪

其序略云:

至於樂流

尚

灑自然多矣。

夫微之作品此二病,

若無樂天作品存在,

似亦難發見。若取二人所作同一

題目比較 而欲改

則相形見絀,

淺學猶能預知,

豈深知甘苦工於爲詩之微之, 而不自知耶?旣知之,

後之文人, 達樂者少, 不如寓意古題, 代唯詩人杜甫悲陳陶哀江頭兵車麗人等,凡所歌行, 諷與當時之事, 刺美見事, 以貽後代之人。 但遇 興紀題, 猶有詩人引古以諷之義焉。 沿襲古題, 往往兼以句讀短長爲詩歌之異。 唱和重複 曹劉沈鮑之徒時得如此, 於文或有短長, 況自風 無復依傍。 於義咸爲贅賸 雅

率皆即事名篇

近

Tri

府章。)予少時(寅恪案:元和十二年微之年三十九歲,其作新題樂府若在元和四年, 相距不過八年,少時二字不可拘泥也。)與友人樂天李公垂輩, 謂是爲當 遂 亦已三 不復

而和之。其有雖用古題, 擬賦古題。 昨梁州見進士劉猛李餘各賦古樂府詩數十首, 全無古義者, 若出門行不言離別, 其中一二十章, 將進酒特書列女之類是也。 咸有新意 予因選

之主旨, 府之缺憾, 微之於新題樂府, 則爲「寓意古題, 即不改舊時之體裁, 旣不能競勝樂天,而藉和劉猛李餘之樂府古題之機緣, 刺美見事。 而別出新意新詞,以蘄追及樂天而軼出之也。 」及「咸有新意。 」與「雖用古題,全無古義。 以補救前此所作新題 故其自序之語最要 」或「頗同古意

頗同古義,

全創新詞者,

則田家止述軍輸,

捉捕詞先螻蟻之類是也。

實創新也。意實創新而形則襲古,以視新題樂府之形實俱爲一致,體裁較爲單簡者,似更難作。豈 全創新詞。 而詞意俱新,或意新而題詞俱古。其綜錯複雜,尤足以表現文心工巧之能事矣。故微之之擬古, 」等語。 然則微之之新題樂府, 題意雖新而詞句或仍不免襲古。而古題樂府, 或題古

微之特擇此見其所長, 而以持傲其詩敵歟?請略舉其最佳之數首以爲例證如下:

之舊作新題樂府一題具數意者大不相似。 中雖有全係五言或七言者,但其中頗多三言五言七言相間雜而成,且有以十字爲句者,如人道短 凡古題樂府十九首, 自夢上天至估客樂, 此則微之受樂天之影響, 無一首不只述一意, 與樂天新樂府五十首相同, 而改進其作品無疑也。 十九首 而與微

之「莽卓恭顯皆數十年富貴。 」及十一字爲句者, 如董逃行之「爾獨不憶年年取我身上膏。

復若君莫非及田野狐兎行,則又仿古,通篇全用四言矣。故讀微之古

長短參差,頗極變錯之致。

題樂府,殊覺其旨趣豐富,文采豔發,似勝於其新題樂府。 舉數顯著之例,如夢上天云:

茫茫漫漫方自悲,

哭向青雲椎素臆。哭聲厭咽旁人惡,

喚起驚悲淚飄露。千慙萬謝喚厭人, 向使無君終不寤。

來時畏有他人上,截斷龍胡斬鵬翼。

微之於仕宦之途,感慨深矣。又如董逃行云:

董逃董逃人莫喜。 勝負相環相枕倚。 縫綴難成裁破易。 何況曲針不能伸巧指。 欲學裁縫須準

破壞易而建設難, 無其道而行其事。此詩所言若此,今日吾人讀之,心中將如何耶?又如夫遠征

遠征不必戍長城。 出門便不知死生。

及田 「家詞云

願官早勝讐早復。 農死有兒牛有犢。 誓不遣官軍糧不足。

蓋詞句簡鍊,思致微婉, 皆依舊題而發新意。詞極精妙,而意至沉痛。取較樂天新樂府之明白曉暢者, 此爲元白詩中所不多見者也。 別具蘊蓄之

並世文雄如韓退之柳子厚劉夢得諸公之論有所關涉。蓋天人長短之說,固爲元和時文士中一重要 此十九首中最可注意者,莫如人道短一篇, 通篇皆以議論行之。詞意俱極奇詭, 頗疑此篇與微之

公案也。柳河東集壹陸天說略云:

者, 説 禍元氣陰陽者滋少,是則有功於天地者也。 韓愈謂柳子曰,吾爲子言天之説,人之壞元氣陰陽也亦滋甚。吾意有能殘斯人使日薄歲 欲望其哀且仁者,愈大謬矣。子而信子之仁義,以游其内,生而死爾, 世謂之陰陽。 彼上而玄者, 其烏能賞功而罰禍乎?功者自功, 世謂之天。 下而黃者, 世謂之地。 蕃而息之者,天地之讐也。 禍者自禍, 渾然而中處者, 欲望其賞罰者大謬。 世謂之元氣。 柳子曰,吾能終其 烏置存亡得喪於 寒 呼而 而

劉夢得文集壹貳天論三篇(參柳河東集叁壹答劉禹錫天論書。 )序略云:

其間耶?

柳子厚作天説以折韓退之之言,文信美矣,蓋有激而云, 世之言天者二道焉。 泥於冥冥者, 則曰天與人實相異, 拘於昭昭者, 則曰天與人實影響, 是茫乎無有宰者, 非所以盡天人之際。故余作天論以 如有物的然以宰者, 故自然之説勝焉。予之友河東解人 故陰騭之說勝

其上篇略云:

極其辯云。

韓柳劉三公之說甚悉, 邪?法小弛則是非較, 道必賞, 德與怨不歸乎天。 今以一己之窮通, 邪?我蹈道而已。 之實盡喪矣。 大弛則是非易位,賞恆在佞, 然而固然, 之道在法制, 之能天亦有所不能也。 大凡入形器者, 皆有能有不能。 故曰天之所能者, 人恆執其所能, 建善必罰。 豈理邪, 天也。福或可以詐取, 其用在是非, 夫實已喪, 今不能具引, 生乎亂者, 而欲質天之有無,惑矣。余曰,天恆執其所能, 法大弛, 故其人曰, 賞不必盡善,罰不必盡惡。 余故曰, 以仰乎天, 生萬物也。 而名徒存, 人能勝乎天者法也。 則其人曰,道竟何爲邪?任人而已。法小弛,則天人之論較焉。 人道昧, 而罰恆在直。 天何預乃人事耶?福兮可以善取, 天與人交相勝爾。 天有形之大者也。 惟取劉論上篇稍詳錄之, 非有預乎寒暑云爾。 人之所能者, 彼昧者方挈挈然提無實之名, 不可知。 禍或可以苟免。人道駮,故天命之説亦駮焉。 義不足以制其疆, 故由人者, 法大行則是爲公是, 治萬物也。 故其人曰,彼宜然而信然,理也。 人動物之尤者也。天之能人固不能也,人 其説曰, 天之道在生植, 生乎治者, 以其爲唐人說理之第一等文字也。 舉歸乎天, 法大行, 刑不足以勝其非。 禍兮可以惡召, 人道明, 以臨乎下, 欲抗乎言天者, 非爲公非。 則其人曰, 非天預乎人爾 咸知其所自。 其用在強 非有預乎治亂 人之能勝天 天下之人蹈 天何預人 奚預乎天 斯數 彼不當 法

至韓柳之說,則文人感慨憤激之言也。微之人道短一篇,暢論天道似長而實短,人道似短而實

天既職性命,道德人自強。

之句, 則與夢得,「天之道在生植。人之道在法制。 其用在是非。」似有所合,但細繹:

賴得人道有揀別,信任天道真茫茫。若此撩亂事,豈非天道短,賴得人道長。

頻密, 之結論 和十年至十二年間在通州司馬任內嘗以事至山南西道節度使治所興元。興元者,西南一大都會 宮七絕受其暗示者相似。(參連昌宮詞章及新樂府章新豐折臂翁篇所論。) 攷微之與柳劉往來不甚 微之於作此詩前得見柳劉之文,與其作連昌宮詞之前亦得見樂天新豐折臂翁昌黎和李正封過連昌 則遠道寄文之可能不多。然微之於元和十年春曾與柳劉諸逐臣同由貶所召至長安。又於元 ,則微之自別有創見,貌似夢得爲說理之詞,意同韓柳抒憤激之旨,此恐非偶然所致,

十年至十二年之間, 爲和梁州進士劉猛李餘而作, 而文士萃集之所也。 柳劉文名高一世。天人之說尤爲奇創,自宜傳寫流布於興元。 在長安與興元兩地,俱有得見柳劉二公天論與天說之機緣也。 梁州即興元, 或者微之在梁州之日, 曾得窺見柳劉之文, 遂取其意 是微之於元和 微之古題樂府

旨加以增創以成此傑作耶?

附

論

# (甲)白樂天之先祖及後嗣

關於白氏之遠祖,如樂天於故鞏縣令白府君事狀(白氏長慶集貳玖。)中所自述者,其可疑諸點: 不一而足, 表所附考證, 陳振孫白文公年譜已詳辨之,而沈炳震新唐書宰相世系表訂譌及武英殿本新唐書柒伍下宰相世系 詳悉辨證, 唐摭言壹叁敏捷條白敏中盧發所賦「十姓胡中第六胡。」諸句,及白氏長慶集伍玖沃洲山禪院 非獨此文爲然也。但此類可存而不論,蓋今日稍具常識之讀史者,決不致爲所迷惑: 轉無謂也。又近年中外論著中,有據北夢瑣言伍中書蕃人事條所紀崔愼由詆白敏中之 亦俱有所論。其實諸家譜牒記述,虛妄紛歧,若取史乘校之,其譌謬矛盾可笑之處

記所云:

厥初有羅漢僧西天竺人白道猷居焉。

又略云:

昔道猷肇開茲山, 今日樂天又垂文茲山。 異乎哉,沃洲山與白氏其世有緣乎。

代牛弘賜田事闡述及之。茲僅迻錄其所言者於此,以供竝觀同論之便利。至於樂天之父母以親舅 關於樂天非北齊五兵尙書白建之後裔一端,寅恪已於拙著唐代政治史述論稿中篇論牛僧孺家有隋 親舅甥爲婚配二事而已。蓋此二事均與樂天本身有實際影響,而不似白氏爲胡姓之浮泛關係也。 制度淵源略論稿。)則此類問題亦可不辨。故謂元微之出於鮮卑, 甥爲婚配一事, 却爲贅論也。 多繫於其人所受之文化,而不在其所承之血統。」之事例言之,(見拙著唐代政治史述論稿及隋唐 胡人來居中土, 則止就其僅餘之標幟即胡姓一事,詳悉考辨, 推論白氏之爲胡姓。 茲所欲言之樂天先世問題,僅爲樂天非北齊五兵尚書白建之後裔, 其世代甚近者, 則別於此詳言之。以彼書限於體例範圍, 鄙意白氏與西域之白或帛氏有關, 殊有考論之價值。 、恐未必有何發見,而依吾國中古史「種族之分, 若世代甚遠久, 不能多所旁及, 而此文則專論樂天家 自不俟言, 白樂天出於西域, 已同化至無何纖微跡象可尋 但吾國中古之時, 及樂天之父母以 固非妄說 西域

白氏長慶集貳玖襄州別駕府君事狀云:

世,

其性質有異故也。

此所謂有功於北齊之司空即白建也。 白建字彦舉,武平七年卒, 贈司空 有功於北齊, 贈司空。 據北齊書肆拾白建傳(北史伍伍白建傳同。)略云: 韶賜莊宅各一區, 在同州韓城縣, 至今存焉。

附

臣, 是白 其所賜莊宅, 建卒於北齊未亡以前。 何得越在同州韓城即仇讎敵國之境內乎?其爲依託, 其生存時期, 周齊二國, 東西並峙, 互相爭競。 不待辨論也。 建爲齊朝主兵之大

又新唐書柒伍下宰相世系表白氏表云::

白建字彦舉,後周弘農郡守,邵陵縣男。

周境內,後來子孫遠攀異國之貴顯,遂致前代祖宗橫遭李樹代桃之阨耶? 田,本屬於一後周姓白名某字某之弘農郡守,而其人實是樂天眞正之祖宗。 北周弘農郡守, 此白建旣字彥舉, 與北齊贈司空之事絕不能相容。 與北齊主兵大臣之姓氏名字俱無差異, 其間必有竄改附會, 是即樂天所自承之祖先也。 自無可疑。豈樂天之先世 故其所賜莊宅能在北 但其官則爲

貞松老人(羅振玉)遺稿後丁戊稿白氏長慶集書後一文中, 論及樂天之父母以親舅甥爲婚配事。 其

頗可解釋樂天早年家庭環境及後來其母以狂疾墜井而死諸問題。

故於此引證稍

,並推論之以供讀白詩者之參考。

說雖簡

然甚確。

白氏長慶集貳玖太原白氏家狀二道, 其故鞏縣令白府君事狀云:

高 御。 祖諱建 父諱 北齊五兵尚書, 朝請大夫檢校都官郎中。 贈司 空。 曾祖 諱士通, 公諱鍠 皇 一朝利州都督。 祖諱志善,

其襄州別駕府君事狀略云:

以本文之上下文及他文之有關者相參校而得知者也。但有爲本文之上下文及相關之他文所限定, 「令」之疑當作「尉」,「延安」之疑當作「鞏縣」,及「曾」「玄」二字之疑當互易,即是其例。蓋此皆可 寅恪案:古人文字傳於今世者,轉寫多有譌誤,自不足怪。上所引樂天所作其父及外祖母墓誌如 又白氏長慶集貳伍唐故鄜城縣尉陳府君夫人白氏墓誌銘略云: 尉。)妣太原白氏。夫人無兄姊弟妹,八歲丁鄜城府君之憂, 君之母,故大理少卿襄州別駕諱季庚之姑,前京兆府户曹參軍翰林學士白居易前秘書省校書 女, (寅恪案, 延安令疑當作鞏縣令。)韓城令諱欽之外孫, 故鄜城尉諱潤之夫人, 故潁川縣 夫人太原白氏,享年七十。唐利州都督諱士通之曾孫,尚衣奉御諱志善之玄孫,(寅恪案, 彭城之功封潁川縣君。元和六年四月三日歿於長安宣平里第,享年五十七。有子四人,次曰 陳朝宜都[王叔明]之後。祖諱璋,利州刺史。考諱潤,坊州鄜城縣令。(寅恪案,令疑當作 郎白行簡之外祖母也。 疑當作士通之玄孫,志善之曾孫。曾玄二字互易。)都官郎中諱溫之孫,延安令諱鍠之第某 公與本州刺史李洧歸國。 公諱季庚,鞏縣府君之長子。建中元年授彭城縣令。時徐州爲東平所管,屬本道節度使反, 次日行簡 貞元十年五月二十八日,終於襄陽官舍,享年六十六。 十五歲事舅姑。建中初以府君 夫人陳氏,

作一世系親屬表以明之如下: 白建 士 通 志善 温 鍠 季庚 行簡 居易 幼文

陳潤妻

類川縣君

幼美(金剛奴)

妹女, 妹字之譌寫, 矣。至樂天於其外祖母之墓誌銘以「襄州別駕諱季庚之姑」爲言者,此姑字必不可通。 樂天之外祖母乃其祖之女, 樂天文中, 樂天稱陳夫人爲季庚之姑, 歷敍其外祖母之尊卑先後諸親族血統聯繫, 但細思之, 則樂天屬文之際, 若直書其事, 與其父爲同產, 乃諱言而非其實矣。 易言之,即樂天之父季庚實與親甥女相爲婚配也明 」(羅振玉貞松老人遺稿甲集後丁戊稿白氏 其間關係, 似覺太難爲情, 互相制限, 羅貞松謂「季庚所 一定而不可移, 初視之似是 取乃 則

夫親舅甥相爲婚配,

如西漢惠帝之后爲其同母姊魯元公主女,

(見史記肆玖外戚世家,

捌玖張耳

長慶集書後條。

) 洵確論也。

110

日,恐亦不乏相同之例,但在唐代崇尚禮教之士大夫家族, 陳餘列傳等。)及吳孫休朱夫人爲休姊女之事,(見吳志伍孫休朱夫人傳及裴注。)於古代或即今 此種婚配則非所容許,自不待言也

謂姦小功以上親,父祖妾,及與和者。抑更有可論者,唐律疏議壹名例律十惡十曰內亂條注云:

疏議釋之云:

爲報服緦麻者非。 姦小功以上親者, 謂外孫女於外祖父,及外甥於舅之類。 謂據禮男子爲婦人着小功服而姦者。 若婦人爲男夫, 雖有小功之服,

同書壹肆戶婚律下第壹條條文云:

姑, 諸同姓爲婚者,各徒二年。緦麻以上以姦論。 已之堂姨及再從姨, 若妻前夫之女者, 亦各以姦論。 堂外甥女, 女壻姊妹, 其父母之姑舅兩姨姊妹, 若外姻有服屬而尊卑共爲婚姻, 並不得爲婚姻, 違者各杖一百, 及姨, 若堂姨, 及娶同母異父 母之姑, 並離之。

疏議釋之略云:

外姻有服屬者, 有作姑舅者大謬。)妻之父母,此等若作婚姻,是名尊卑共爲婚姻。 爲婚不禁。 謂外祖父母,舅,姨,(據涵芬樓影印滂熹齋藏宋刊本作舅姨。今坊間印本 其外姻雖有服, 非尊卑

#### 又云:

從姨, 父母姑舅兩姨姊妹, 若堂姨雖於父母無服, 堂外甥女, 亦謂堂姊妹所生者, 於身無服, 亦是尊屬。 乃是父母總麻, 母之姑, 女壻姊妹, 堂姑, 據身是尊, 於身雖並無服, 並是母之小功以上尊, 故不合娶。 據理不可爲婚。 及姨又是父母小功 己之堂姨及再 並爲尊卑

混亂,

人倫失序, 違此爲婚者,

各杖一百。

自同姓爲婚以下, 雖會赦, 各離之。

此等若作婚姻,則尊卑混亂,人倫失序,是以唐律亦科以「各杖一百。」「雖會赦,各離之。 乃以尊卑混亂與否及服屬之親疎等關係而定。故外姻如從母兄弟姊妹, 史壹叁柒劉三吾傳附朱善傳。) 唐律戶婚律所規定之條例, 就外姻論之, 寅恪案:據上所引, 律則不在禁限。 (外兄弟姊妹。)舅之子,(內兄弟姊妹。)者, (參唐會要捌叁嫁娶目永徽二年九月條。)親舅甥自古在服紀之內,唐代復改加重, 至外姻如上引唐律戶婚律條文自父母之姑舅兩姨姊妹以下,雖於身並無服紀, 可知吾國法意, 重在內外區分, 尊卑等級。 雖並是總麻三月成人正服, (參容齋續筆捌姑舅爲婚條及明 (姨兄弟姊妹。 然非尊卑, 則科罪與否及其重輕, 其爲婚於唐 ) 姑之子, 」之罪 儀禮喪 旧

甥者,何也。謂吾舅者,吾謂之甥。何以緦之,報之也。

服禮緦麻三月者甥(鄭注,姊妹之子。)條傳云:

及通典玖貳禮典凶禮緦麻成人服三月條(參唐會要叁柒服紀下貞觀十四年條。)略云:

大唐貞觀十四年, 親疎相 似, 而服 紀 有殊, (永徽四年長孫無忌等進律疏以前之十三年。)太宗謂侍臣曰, 理未爲得。 集學者詳議。 於是侍中魏徵等議曰, 謹按, 舅服 舅之與姨,

請與從母同小功。 制可。

婚姻」者,以姦論也。所謂以姦論者, 可知。 然則甥舅爲婚, 律所必禁。違律者即應依戶婚律下第壹條條文「若外姻有服屬而尊卑共爲 唐律疏議壹肆戶婚律下第一條條文「諸同姓爲婚者各徒二

若同姓緦麻以上爲婚者, 各依雜律姦條科罪。 年,

緦麻以上以姦論。

」下疏議釋之云:

「外姻有服屬而尊卑共爲婚姻者以姦論。 二千里。折傷者絞。妾減一等。 諸姦緦麻以上親, 及總麻以上親之妻, 」自亦當准此。 若妻前夫之女,及同母異父姊妹者, 放唐律疏議貳陸雜律上第貳叁條條文云:: 徒三年。

疏議釋之云: 奸緦麻以上親, 謂内外有服親者。

徒, 目上(參舊唐書貳柒禮儀志, 綜前所引戶婚律之條文及疏議, 並使離異。 一雖會赦, 亦離之。」固甚明也。惟於此尚有一問題特須注意者, 通典玖貳禮典凶禮緦麻成人三月服條。)略云: 與此雜律姦條文之條及疏議觀之,則甥舅爲婚, 唐會要叁柒服紀 於唐律應科以滿

謹按, 爲舅緦麻, 舅報甥亦同 慶元年(舊志作二年。 修律疏人不知禮意, 傍親之服, 舅亦報甥三月, 、此制。 禮無不報, 貞觀年中, )九月二十九日, 舅報甥服尚止總麻, 于例不通, 是其義矣。 己非正尊, 八座議奏舅服同姨小功五月, 今甥爲舅, 使同從母之喪, 不敢降之也。 修禮官長孫無忌等 故甥爲從母五月, 理須改正。 奏曰, 而今律疏舅報於甥 依古 今請修改律疏 則舅宜進甥以同從母之 喪服, 從母報甥小功, 甥 服 爲 猶 舅 舅報甥 三月, 緦 甥

通典壹叁肆禮典開元禮貳玖小功五月成人正服條云:

亦小功。

制從之。

爲外祖父母,爲舅及從母丈夫婦人報。

疏, 即如疏議所謂男子爲婦人着小功服而姦者, 夫吾國古代禮律關係密切, 豈即謂此類條文耶?又唐律疏議貳陸雜律第貳肆條條文云: 故甥舅爲婚,不入內亂之條, 永徽四年頒律疏時(舊唐書伍拾刑法志。)甥爲舅服小功, 如疏議所釋者是也。及顯慶改舅報甥亦小功, 宜入內亂之條矣。 長孫無忌所奏請修改者, 是甥舅爲婚 舅報甥尚止 指言律

適 諸 名例律陸第捌條條文及疏議。)從父姊妹,從母及兄弟妻, 人者總麻。 姦從祖祖母, 唐律姦從祖祖姑, 姑, 從祖伯叔母, 從祖姑之罪重於姦總麻親者, 姑, (寅恪案, 據開元禮, 兄弟子妻者,流二千里。 從祖祖姑, 依本服而不從輕服之法也。 從祖姑在室者小功 強者 口

之學,姑記其疑於此,

以待通識禮律之君子之敎正。

或亦有修改耶?但檢宋刑統此諸條條文下並未載補充制,格,勅條, 「爲舅及從母丈夫婦人報」,其喪服之制旣同,且舅之與姨,親疎相似,則舅甥爲婚之刑章, 其故俟考。寅恪素不諳禮律 後來

於拙著唐代政治史述論稿中篇詳論之。可參閱。) 黨,而見惡於李贊皇。其歷史之背景,由來遠矣。(關於牛李黨派之分野與社會階級之關係, 如其父母之婚配,與當日現行之禮制(開元禮。)及法典極相違戾,即其例也。後來樂天之成爲牛 總之,樂天先世本由淄青李氏胡化藩鎭之部屬歸向中朝。 其家風自與崇尙禮法之山東士族迥異。

復次,樂天之父季庚歿於貞元十年,年六十六,其母潁川縣君陳夫人歿於元和六年, 其婚配之間,當有難言之隱,今則不易考見矣。陳振孫白文公年譜元和十年下云: 婚之理。若其父果已結婚,樂天於季庚之事狀中何以絕不言及其前母爲何人?其故殊不可解。疑 亦常見, 據此推計, 本不足異。所可怪者,以唐代社會一般風習論之,斷無已仕宦之男子年踰四十, 則陳夫人年十五歲結婚,時季庚年已四十一歲矣。夫男女婚配, 年齡雖相距懸遠, 年五十七。 尚未結

[元和十年]六月,盜殺宰相武元衡, 樂天時爲太子左贊善大夫。)惡之。會有惡公者, 公首上疏請急捕賊以雪國耻。 言其母看花墜井死, 宰相以非諫職 而作賞花及新 (寅

附

(甲)白樂天之先祖及後嗣

其罪。 有無, 是。 適也。 居, 河南尹,刑部侍郎,皆晉公所擬。凡曰墜井,必恚恨也, 斃於坎井。 到,人救之得免。後遍訪醫藥,或發或瘳。常恃二壯婢,厚給衣食,俾扶衛之。 善寺老僧, 居與白鄰, 甚傷名教,不宜寘彼周行。)又改司馬。宰相,韋貫之,張弘靖也。 度方爲[御史]中丞,亦遇盜不死,既愈迺相耳。 常索米丐衣於鄰郡邑。母晝夜念之, 固人倫之大不幸,而傅致詩篇以成讒謗,則僉壬嫉娟者爲之也。故刪述彦休之語, 夕拜謂給事中也。 又驗新井篇是尉整屋時作, 安有怡暢閑適之際,遽致顛沛廢墜之事。樂天長於情,無一春無詠花之什, 貶江州刺史。中書舍人王涯言其所犯不可復理郡,(寅恪案,舊唐書壹陸陸白居易傳 獨高彦休闕史言之甚詳, 時裴晉公爲三省,本廳對客,京兆府申堂狀至,四坐驚愕。 可謂存朝廷大體矣。夕拜正色曰,言其實也。非大體也。由是晉公信其事。 聞其母久苦心疾, 僧故佛光和尚弟子也。 王維酬郭給事詩云,夕奉天書拜瑣闈。 叫呼往往達於鄰里。坐客意稍釋。 公母有心疾, 隔官三政,不同時矣。 今考集中亦無所謂新井詩者, 病益甚。公隨計宣州,母因憂憤發狂, 因悍妬得之。及嫠,家苦貧, 新井之事, 世莫知其實, 隕穫也。凡曰看花,必怡暢也, 彦休所記, 此指薛存誠言。)謂曰, 他日, 意其刪去。 大略 薛給事存誠曰, 舊譜併及裴度, 晉公獨見夕拜(寅恪 如此, 然則公母死以 公與弟不獲安 史氏亦不辨其 聞之東都聖 一旦稍怠 以華刀自 因欲微 以告 前時 閑

晉公尙未爲宰相也。但樂天母以悍妬致心疾發狂自殺一點, 寅恪案:高氏所述關於裴晉公一節,覈以年月,不無可疑,蓋樂天母以元和六年四月歿, 檢知不足齋本高氏書,未見此條, 恐亦是後人所刪去。 張耒張右史文集肆捌有題賈長卿讀高彦休 則似不能絕無所依據而偽造斯說。今 而是時

續白樂天事一文,其語稍冗長, 此不必辨,小人之誣君子, 如舜與伊尹所遭之比。 可不多錄, 大旨謂:

有所不相容許者也。至文饒所以薦用樂天從弟敏中之故,蓋亦不得已而思其次耳。(見舊唐書壹 雖意在爲賢者辨護,不知此事元無關樂天本身道德,可以不辯護也。今所欲言者,則爲樂天坐此 陸陸新唐書壹壹玖白居易傳附敏中傳,及北夢瑣言壹李太尉抑白少傅條, 此。以樂天父母之婚配旣違反禮律,己身又以得罪名敎獲譴, 不協條等。)吾人今日固不可以此責樂天。然樂天君子人也,却爲此而受犧牲, 發狂自殺是也。常疑李文饒能稱賞家法優美之柳仲郢, 必有內在之遠因, 或亦因經此事之打擊, 貶江州刺史, 王涯以其所犯得罪名教, 不可治郡, 復改司馬, 此遠因即其父母之婚配不合當時社會之禮法人情, 而加深其程度耶? 而不能寬容文才冠代之白居易, 遂與矜尙禮法家風之黨魁, 乃明見史乘之事實。夫此事 南部新書乙白傅與贊皇 致其母以悍妬著聞 其消極知足之思 亦由於 其氣 卒

附

白詩箋證 稿

又南部新書甲云:

白樂天之母因看花墜井。 後有排擯者, 以賞花新井之作左遷。穆皇嘗題柱曰,此人一生爭得

寅恪案:韓退之著諱辨,謂李賀父名晉肅, 錢書此條, 頗可與昌黎之文參讀。 足爲當時社會禮教末流, 而議者言賀不得舉進士。若父名仁。 虚偽不近人情之反詰妙語。吾人 其子豈不得爲

關於樂天後嗣之問題,陳振孫白文公年譜會昌六年下云: 因此又可推知樂天必坐斯事喧傳一時,而被目爲名敎罪人無疑也。

上日, 云, 也。 失次,不然, 命客取文刻碑。 載公子景受以從子繼。碑亦云大中三年景受自潁陽尉典治集賢御書, 公自喪阿崔,終身無子。墓誌云,以姪孫阿新爲後,又云,三姪味道, 毋請太常諡,毋建神道碑。 則治命亦本不於龍門。賈氏談錄云, 何不取醉吟先生墓表看?卒不賜諡。 則治命終不用耶?碑云, 案公舍其姪而以姪孫爲後, 新史云,敏中爲相, 十一月葬龍門。而墓誌云, 葬於華州下邽, 祔先塋 四方過者,必奠巵酒,冢前方丈,常成泥濘。 弟敏中, 既不可解, 請立神道碑。 請諡曰文。 而所謂阿新者, 賈氏談錄云, 據此, 奉太夫人楊氏來京師, 景回, 即景受乎?則昭穆爲 則但立碑而未嘗賜 晦之。 有司請賜諡。 世系表 又

諡也。

新史當別有據

進士。並不詳何人子。又云,樂天無子,以姪孫阿新爲之後。大中三年,李商隱爲公墓碑 白公自撰醉吟先生墓誌云,有三姪,長味道,巢縣丞。次景回,淄州司兵參軍。次晦之,舉

按公墓誌預作於會昌初,豈其後復易以從子承祧而更其名乎?

云,子景受,自潁陽尉典治集賢御書。表云,景受孟懷觀察使,

以從子嗣。則非阿新明矣。

唐文粹(涵芬樓影印嘉靖本。)伍捌所選錄李商隱撰樂天墓碑銘後有附載之弘農楊氏(即樂天夫

人。)傷子辭云:

子有令子, 儉衣削食。 以紀先功,志刊貞石。彼蒼不遺,俾善莫隆。今子建立,痛冤無窮。

馮浩樊南文集詳注捌云:

寅恪案:今文苑英華玖肆伍載有樂天自撰墓誌,即世所謂醉吟先生墓誌銘者也。此誌乃一僞撰之 子,乃景受。蓋阿新殤後,又以景受爲繼,而郡君痛冤無窮,自以辭志之也。 愛,定於存時者。不意公沒後,阿新亦殤。此殤子辭必爲阿新。其曰令子即阿新。其曰今 蒼不遺,乃有其志未及爲者。若景受則實取文刻碑矣。余謂阿新越序爲嗣,是白公楊氏所 此可細思而悟其事也。 刻碑側,故兼登之。否則何煩旁及哉?據辭追揣, 其云紀功刊石,已即碑序中件右功世取文刻碑之意,然志刊貞石,彼 情事宜然。舊新傳表之異,可以互通矣。 文粹必因其附

附

考見者,惟其前立之子先死,後立之子爲景受耳。或以樂天以姪孫爲嗣之事, 決言。但傳中「遺命薄葬, 是否即得之於僞文,殊未可知也。 陸白居易傳, 得矣。然其「其曰令子即阿新。 注玉谿生所撰此碑, 嘗致疑, (參岑仲勉先生白集醉吟先生墓誌銘存疑, 遂於論及樂天後嗣時, 似可以信據爲言者。其實舊傳中又有「仍自爲墓誌」之說。其「以姪孫爲嗣」之記載 因附論樂天之後嗣, 無請諡。 」之結論,則仍信從僞誌,似亦未確。然則樂天後嗣之問題, 乃欲調和此僞誌與李碑之衝突,宜其扞格而不能通也。 (新唐書壹壹玖白居易傳未記樂天後嗣, 」之記載,似亦與僞誌有關也。) 而據傷(馮氏所見文粹本作殤。)子辭爲說,可謂讀書有 載歷史語言研究所集刊第玖本。)而陳汪 是否別有所見,不敢 亦見於舊唐書壹陸 馮孟亭考 二氏俱未

又賜諡與否一節,則唐會要柒玖諡法門上「文」字下有:

故太子少傅白居易,大中三年十二月中書侍郎平章事白敏中上疏請行諡典。 從之。

諡曰文

類,元和後不以名可稱者白太傅條,但國史補下開元日通不以姓而可稱者節, 乃奏定諡白居易曰文。)至樂天官爲太子少傅,故世稱爲白傅,若其稱爲白太傅(見唐語林肆企羨 故新唐書壹壹玖白居易傳所述自有依據。(北夢瑣言壹牛僧孺奇士條亦云,白敏中入相, 無白太傅語。)則

譌誤不俟言矣。

樂天之思想行爲與佛道二家有關,自不待論。 比較問題也。 。全唐詩第壹柒函白居易叁陸客有說(自注云:客即李浙東也。所說不能具錄其事。 茲所欲言者,即樂天對於佛道二家關係淺深輕重之

近有人從海上迴。海山深處見樓臺。 中有仙龕虚一室,多傳此待樂天來。

なられるころ

寅恪案:太平廣記肆捌神仙類白樂天條引〔盧肇〕逸史(參葉夢得石林避暑錄話壹白樂天集自載李 吾學空門非學仙。恐君此說是虛傳。海山不是我歸處,歸即應歸兜率天。 結彌勒上生業,故云。) (自注云:予晚年

浙東言海山有仙館待其來之說條。) 略云:

窺之。客問之,答曰,此是白樂天院。 道士與語曰,此蓬萊山也。既至,莫要看否?遣左右引於宮内遊觀。至一院, 唐會昌元年(?),李師稷中丞爲浙東觀察使。有商客遭風飄蕩,不知所止,月餘至一大山。 錄以報白公。先是白公平生唯修上坐(生?)業,及覽李公所報, 樂天在中國未來耳。歸旬日至越, 乃自爲詩二首以記其事,及 具白廉使李公, 扃鏁甚嚴, 因

附

#### 李浙.

間之相隔爲十六年,而十八乃十六之譌寫耶?俟考。)樂天此詩及自注, 五年, 宗尚苦縣, 之作品, 據吳廷燮唐方鎭年表浙東觀察使欄引嘉泰會稽志所記, 二年年七十一時所作。(白氏長慶集第陸玖卷中之律詩,自喜入新年自詠以下, 而此客有說及答客說二詩於白氏長慶集陸玖中按其排列次序及內容推之,似是樂天於會昌 唯送王卿使君赴任蘇州七律有「一別蘇州十八載。 固可視爲實錄, 然此前樂天實與道教之關係尤密, 知李師稷任浙東觀察使之時爲會昌二年至 '」之句,似覺不合。或者樂天計算其時 亦顯而易考者也。 述其晚年皈依釋迦而 大抵皆會昌二年 茲分爲丹藥之行

爲與知足之思想二端論之如下:

全唐詩第壹柒函白居易叁叁感事五言排律云::

寅恪案 服氣崔常侍(晦叔), ::若據樂天於開成二年年六十六時所作此詩中自述之語, 唯知趁杯酒, 不解煉金銀。 燒丹鄭舍人(居中)。 睡適三尸性, 常期生羽翼, 慵安五藏神。 那忽化灰塵。 似是絕未嘗爲燒丹之事者。 無憂亦無喜, 每遇 凄凉. 六十六年春 事, 還 思源 但又

取其他詩篇觀之, 我爲江司馬, 心中了無疑。 則知其不然。 君爲荆判司。 黄牙與紫車, 如白氏長慶集伍壹同微之贈別郭虛舟鍊師五十韻五古略云: 俱當愁悴日, 謂其坐致之。 始識虚舟師。 自負因自歎, 授我參同契, 人生號男兒。 其辭 若不佩金印, 妙且微。 我

讀

即合

翳玉芝。 高謝人間世, 深結山中期。 泥壇方合矩, 鑄鼎圓中規。 橐鑪一以動,瑞氣紅輝輝。

齋心獨歎拜, 中夜偷一 窺。 二物正訢合, 厥狀何怪奇。 綢繆夫婦體, 狎 獵魚 就龍姿。 簡 寂館

集壹柒對酒五律云, 彈指起,姹女隨烟飛。 廬山記貳敍山南篇叁。 (劉宋陸修靜置館廬山, 漫把參同契, 難燒伏火砂。 )曉時, 始知緣會間,陰騭不可移。藥竈今夕罷, 諡簡寂先生。 且替紫河車。 心塵未淨潔,火候遂參差。萬壽覬刀圭,千功失毫釐。 見蓮社高賢傳。)鐘後, 有時成白首, 無處問黃牙。 紫霄峰(亦在廬山, 詔書明日追。 幻世爲泡影, (參白氏長慶 見陳舜俞 先生 浮

姹女丹砂燒即飛。 事事無成身老也, 醉鄉不去欲何歸。

生抵眼花。

唯將綠醅酒,

及同集同卷醉吟二首之壹七絕云,

空王百法學未得,

詩侶, 律。云: 乃樂天紀其於元和十三年任江州司馬時燒丹之事者,是歲樂天年四十七。然則樂天之中年曾惑於 丹術可無疑矣。而白氏長慶集壹玖余與故刑部李侍郎早結道友,以藥術爲事。與故京兆元尹晚爲 有林泉之期。 周歲之間,二君長逝, 李住曲江北, 元居昇平西, 追感舊遊, 因貽同志七

花時那忍到昇平。 白氏長慶集壹柒潯陽歲晚寄元八郎中庾三十二員外五律, 從哭李來傷道氣 如年七十身猶在, 自亡元後減詩情。 金丹同學都無益, 但恐傷心無處行。 (寅恪案, 此詩作於長慶二年, 可參 水竹鄰居竟不成。 閱水年將暮, 燒金道未成。 月夜若爲遊曲水, 丹砂不

附 (乙)白樂天之思想行為與佛道關係

肯死, 白髮事須生。 之句。

又可證知樂天「早結道友」,「同學金丹」也。至其晚歲,如白氏長慶集陸玖有開成五年(據卷中諸

詩排列之次序及內容約略推定者。)所作戒藥五古云:

暮齒又貪生,服食求不死。朝吞太陽精,夕吸秋石髓。

吾聞諸老氏。

慾, 又望延甲子。天人陰騭間,

亦恐無此理。

域中有真道,

所説不如此。

後身如(全唐詩第

徼福反成災,藥誤者多矣。

以之資嗜

壹柒函白居易叁陸作始。)身存,

雖似有悔悟之意, 燒藥不成命酒獨醉五律云: 可與前引客有說及答客說二絕句相參證, 然如白氏長慶集陸陸有開成二年所作

白髮逢秋短,丹砂見火空。 不能留姹女, 爭免作衰翁。 賴有杯中渌, 能爲面上紅。 少年心不

遠, 只在半酣中。

之佛土者,不過爲絕望以後之歸宿, 句(見前引感事詩。)以自豪,何其自相矛盾,若此之甚耶?由是言之,樂天易蓬萊之仙山爲兜率 丹不成,遂感歎借酒自解耳。 目其題意觀之, 樂天是時殆猶燒藥,蓋年已六十六矣。 噫!亦可哀矣。 殊非夙所蘄求者也。 而同在此年, 然則其早年好尚, 猶賦「唯知趁杯酒, 不解鍊金銀。 雖至晚歲終未免除,

復次, 白氏長慶集陸貳思舊五古云:

過中年。 石, 閒日一思舊, 隨日合破壞,至今粗完全。齒牙未缺落,肢體尚輕便。 飢來吞熱麵, 未老身溘然。 唯余不服食, (全唐詩第壹柒函白居易貳玖作物。)渴來飲寒泉。 舊遊如目前。 再思今何在,零落歸下泉。退之服硫黄, 杜子得丹訣, 老命反遲延。 終日斷腥膻。 況在少壯時, 崔君誇藥力, 亦爲嗜欲牽。 已開第七秩,飽食仍安眠。 經冬不衣綿。 詩役五藏神, 但躭葷與血, 一病訖不痊。 或疾或暴夭, 不識汞與鉛。 酒 汨三丹田 且進盃中 微之鍊秋 悉不

錢大昕十駕齋養新錄壹陸衞中立字退之條云:

其餘皆付天。 (寅恪案,

此詩似爲大和八年作,時樂天年六十三。)

寅恪案:樂天之舊友至交, 字造微,次中立,字退之,次中行,字大受,誌首云兄弟三人,後只云與弟中行別, 中立誌無疑。 年譜有方松卿辯證一條云, 白樂天詩, 公長慶三年作李干墓誌, 退之服硫黄, 中立餌奇藥求不死,而卒死,樂天詩謂退之服硫黃者,乃中立也。近世李季可 而見於此詩之諸人,如元稹杜元穎崔羣, 一病訖不痊。後人因以爲昌黎晚年惑金石藥之證。頃閱洪慶善韓子 力詆六七公皆以藥敗。 衞府君墓誌,今本作衞之元,其實中立也。衞晏三子,長之元, 明年則公卒, 豈咫尺之間身試其禍哉? 皆當時宰相藩鎭大臣, 則其爲 且爲

當日文壇之健者,文學詞科之高選,

斷無與微之諸人並述之理。然則此詩中之退之,固舍昌黎莫屬矣。方崧卿李季

所謂第一流人物也。若衞中立則旣非由進士出身,位止邊帥幕寮之末職,

復非

之,號曰「火靈庫」。 可錢大昕諸人雖意在爲賢者辯護, 陶爲五代時人, 距元和長慶時代不甚遠, 然其說實不能成立也。 考陶穀清異錄貳載昌黎以硫黃飼雞男食 其說當有所據。至昌黎何以如此言

行相矛盾,則疑當時士大夫爲聲色所累, 即自號超脫,亦終不能免。

全唐詩第壹肆函張籍貳祭退

之五古述韓公病中文昌往視一節云: 中秋十六夜, 魄圓 天差晴。 公既 相邀留, 坐語于增楹。 乃出二侍女, 合彈琵琶等。 臨風聽

是夜涼難忘。

郎中詩後七絕。)及「小園桃李」(見昌黎集拾鎭州初歸七絕,及唐語林陸韓退之有二妾一曰絳桃 夫韓公病甚將死之時, . 柳枝皆能歌舞條。)之流,自未能忘情。明乎此, 忽遽聞再更。 ` 尙不能全去聲伎之樂,則平日於「園花巷柳」(見昌黎集拾夕次壽陽驛題吳 顧我數來過 則不獨昌黎之言行不符得以解釋, 而樂天之

葉夢得避暑錄話壹論白樂天云:

數卷之中,

互相矛盾, 其故亦可瞭然矣。

然吾猶有微恨, 似未能全忘聲色杯酒之累。 賞物太深, 猶有待而後遣者。 故小蠻樊素每見於

其鍊丹燒藥,豈有似於昌黎「火靈庫」者耶?讀者若取前引戒藥五古一詩中「以之資嗜慾。 寅恪案:樂天於開成四年十月年六十八, 得風痺之疾, 始放遣諸妓。 前此既未全遣除聲色之累

」之語觀

之類。 尙有可注意之點,即韓公排斥佛道,而白公則外雖信佛,內實奉道是。韓於排佛老之思想始終 級風習至相符會故也。樂天於鍊丹燒藥問題,行爲言語之相矛盾,亦可依此解釋。但白韓二公, 即可明其梗概矣。或疑陶穀所記,實不可信,如僧徒所造昌黎晚歲皈依佛敎及與大顚之關係 白於信奉老學, 在其鍊服丹藥最後絕望以前, 但鄙意昌黎之思想信仰,足稱終始一貫,獨於服硫黃事,則寧信其有,以與唐代士大夫階 亦始終一致。明乎此,然後可以言樂天之思想

故不可以據佛家之說,以論樂天一生之思想行爲也。至其「知足不辱」之義, 樂天之思想,一言以蔽之曰「知足」。「知足」之旨,由老子「知足不辱」而來。蓋求「不辱」,必知足 悟而得之。 天安身立命之所在。由是言之,樂天之思想乃純粹苦縣之學,所謂禪學者, 而始可也。此純屬消極,與佛家之「忍辱」主旨富有積極之意,如六度之忍辱波羅蜜者,大不相 故釋迦以忍辱爲進修,而苦縣則以知足爲懷,藉免受辱也。斯不獨爲老與佛不同之點, 。 此意樂天曾屢形之於語言,茲略舉其詩句,以爲證明。 亦因處世觀物比較省 不過裝飾門面之語。 亦樂

白氏長慶集壹柒贈內子五律云:

白髮方興歎, 猶勝嫁黔婁 青娥亦伴愁。 寒衣補燈下,小女戲牀頭。 闇澹屏幃故, 淒涼枕席秋。

附

不辱。此樂天一生出處進退安身立命所在之理論, 此所謂等級, 覺不如, 而俯視較下之級,則猶勝於彼。因此無羨於較上之級者,自可知足矣。 乃比較而得之者。旣知有等級之分,則己身所處不在最下一級,仰瞻較上之級, 讀其作品者,不可不知也。 故持此義, 若能知足, 以觀其 則可 雖

詩,則愈易瞭解。茲更錄數首於下:

# 白氏長慶集陸貳把酒五古云:

加年紀。 把酒仰問天,古今誰不死。所貴未死間,少憂多歡喜。窮通諒在天,憂喜即由已。是故達 人,去彼而取此。勿言未富貴,久忝居禄仕。借問宗族間, 試問班行中, 幾人及暮齒。 朝冷不過飽, 五鼎徒爲爾。 幾人拖金紫。 夕寢只求容, 勿憂漸衰老, 一衾而已矣。 且喜

全唐詩第壹柒函白居易貳玖吟四雖雜言云:

此外皆長物,

於我雲相似。

有子不留金,

何況兼無子。

貧苦最甚 忘榮知足委天和, 後 眼雖病, 歌歇時。 徐郎中晦因疾喪明。 猶明於徐郎中。 請君添 亦應得盡生生理。(自注云, 一酌, 家雖貧,猶富於郭庶子。 余爲河南尹時, 聽我吟四雖。年雖老, 分司同官中, 見同年鄭俞始授長水縣令。 猶少於韋長史。命雖薄, 省躬審分何僥倖, 章長史績年七十餘, 值酒逢歌且歡喜。 因歎四子, 猶勝於鄭長 郭庶子求 而成

此篇也。

也。白氏長慶集陸叁狂言示諸姪五古云:

累,我今婚嫁畢。心安不移轉, 世欺不識字,我忝攻文筆。世欺不得官,我忝居班秩。人老多病苦, 身泰無牽率。 所以十年來, 形神閑且逸。 我今幸無疾。 況當垂老歲, 人老多憂 所要

如我優幸身, 無多物。 一裘煖過冬,一飯飽終日。 人中十有七。 如我知足心,人中百無一。傍觀愚亦見,當己賢多失。不敢論他 勿言舍宅小,不過寢一室。 何用鞍馬多, 不能騎兩匹。

同集陸伍詩酒琴人,例多薄命。 人, 狂言示諸姪。 予酷好三事, 雅當此科, 而所得已多, 爲幸斯甚。 偶成狂詠,

聊

寫愧懷。七言律云:

愛琴愛酒愛詩客, 三者何堪幷在身。 只合飄零隨草木, 多賤多窮多苦辛。 誰教凌厲出風塵。 中散步兵終不貴, 榮名厚禄二千石,樂飲閒遊三十春。 孟郊張籍過於貧。 一之已歎關於命,

何得無厭時咄咄,猶言薄命不如人。

同集陸玖自題小園五古云:

附

論

(乙)白樂天之思想行為與佛道關係

不鬥門館華, 藹藹遙相對。 不門林園大。 主人安在哉, 但鬥爲主人,一坐十餘載。 富貴去不迴。 池乃爲魚鑿, 迴看甲乙第, 林乃爲禽栽。 列在都城内。 何如小園主 素垣夾朱 拄杖

閑即來。親賓有時會,琴酒連夜開。以此聊自足,不羨大池

全唐詩第壹柒函白居易叁柒(會昌)六年立春日人日作七律云:

肆武宗紀會昌四年十一月條新唐書壹柒肆牛僧孺傳舊唐書壹柒陸新唐書壹柒肆楊嗣復傳及李 楊嗣復, 議最老, 親故歡遊莫厭頻。 二日立春人七日, 封謂李宗閔, 韓庶子劉員外尤貧, 盤蔬餅餌逐時新。 試作循潮封眼想, 皆牛黨主要人物也。 循潮封三郡遷客, 年方吉鄭猶爲少, 何由得見洛陽春。 見杜牧樊川文集柒牛公墓誌銘通鑑貳 皆洛下舊遊也。寅恪案, (自注云, 家比劉韓未是貧。 分司致仕官中, 循謂牛僧 鄉園節歲應堪重, 肆 孺 古傅鄭諮 捌 唐 紀陸 潮

取消 舉氣類之關係,不能不隷屬牛黨。 讀白 l詩者,或厭於此種屢言不已之自足思想,則不知樂天實有所不得已。 雖爲自言其知足所以不辱, 極之態度不可也。 宗閔傳等。 樂天於卒年歲首所作之詩,其「試作循潮封眼想, 儻亦有感於此三人之不能勇退歟?葉石林於避暑錄話壹論樂天 而處於當日牛黨與李黨互相仇恨之際, 欲求脫身於世網, 蓋樂天旣以家世姻戚科 何由得見洛陽春。 自非

夫知足不辱, 推其所由得, 明哲保身,皆老氏之義旨, 惟不汲汲於進, 而志在於退。是以能安於去就愛憎之際, 亦即樂天所奉爲秘要, 而決其出處進退者也。 每裕然有餘也

此之故,則疑不能不於其家世之出身,政黨之分野求之。此點寅恪已詳言之於拙著唐代政治史述 總而言之,樂天老學者也,其趨向消極,愛好自然,享受閑適,亦與老學有關者也。至其所以致

不能奉老學以周旋者,必致身敗名裂。是樂天之得以身安而名全者, 論稿政治革命與黨派分野篇中,茲不具論。夫當日士大夫之政治社會,乃老學之政治社會也。苟 實由食其老學之賜。 是耶非

耶?謹以質之知人論世讀詩治史之君子。

制之公式文字耳。故不足據以推見樂天之思想也。至「格義」之義, 復次,白氏長慶集伍玖有三教論衡一篇。其文乃預設問難對答之言, 史語言研究所蔡元培先生六十五歲紀念專號。)茲不贅論。 解釋之語,大抵敷衍「格義」之陳說, ,篇末自謂「三殿談論, 承前舊例。 已詳拙著支愍度學說考(載歷 頗如戲詞曲本之比。又其所 」然則此文不過當時 種應

## (丙)論元白詩之分類

元氏長慶集叁拾敍詩寄樂天書中微之自言其詩之分類略云::

僕因撰成卷軸, 詞 難近 古, 而止於吟寫性情者, 其中有旨意可觀而詞近古往者,爲古諷。 爲古體。 詞實樂流 而止於模象物色者, 意亦可觀, 而流在樂府者, 爲新題樂府。 爲樂

聲勢沿順, 屬對穩切者, 爲律詩,仍以七言五言爲兩體。 其中有稍存寄興,與諷爲流者,爲

律諷。 昨行巴南道中, 古,又兩體。 量淡眉目, 不幸少有伉儷之悲, 自十六時至是元和七年矣, 又有詩五十一首。文書中得七年已後所爲向二百篇, 綰約頭鬢, 撫存感往, 衣服脩廣之度及匹配色澤尤劇怪豔, 成數十詩, 有詩八百餘首。 取潘子悼亡爲題。 色類相從, 因爲豔詩百餘首, 繁亂冗雜,不復置之執 共成十體, 凡二十卷。 又有以干教化者, 詞有今 近 世

據此,微之詩可分(一)古諷,(二)樂諷, (七)律諷,(八)悼亡,(九)五七言今體豔詩,(十)五七言古體豔詩, (三) 古體, (四)新題樂府, (五)七言律詩, 共爲十體也。 (六)五言律

又元氏長慶集伍陸杜工部墓係銘云:

予嘗欲件析其文,

體別相附, 與來者爲之准, 特病頗未就。

蓋微之於分體之意旨,蓄之胸中久矣。考白氏長慶集貳捌與元九書云: 兩韻者 理動於内, 公獨處, 興比者。 僕數月來, 或 又自武德迄元和, 四百餘首, 檢討囊表中, 隨感遇而形於歎詠者, 移病閑居, 謂之雜律詩。 知足保和, 得新舊詩, 因事立題, 凡爲十五卷,約八百首。 一百首, 吟翫情性者, 各以類分, 分爲卷。 題爲新樂府者, 謂之感傷詩。 一百首, 共一百五十首, 又有五言七言長句絕句自一百韻至 謂之閑適詩。 首自拾遺來, 又有事物牽於外, 謂之諷 凡所適所感關於美刺 諭 詩 又或

退

附

體, 前, 之寫定其詩成爲十體二十卷,疑即在元和七年。較之樂天之類分其詩爲十五卷,其時間或稍在 七年之間之作。又言,「〔元和〕七年已後所爲,向二百篇,繁亂冗雜,不復置之執事前。 書約略相近,然微之旣自言其詩分爲十體,共二十卷。乃年十六即貞元十年至年三十四, 寅恪案:樂天與元九書乃元和十年十二月在江州司馬任內所作, 「今年三十七矣」及「昨行巴南道中」之語, 未可知也。或者樂天詩之分類即受元之影響暗示, (見讀鶯鶯傳。 )亦可爲一證也。又樂天初編詩集時, 知亦作於元和十年到通州以後。 如樂天之制誥亦依微之之說, 其分類如此, 而微之敍詩寄樂天書, 後來則唯分格詩與律詩二 雖其作書之時與樂天此 分爲新舊 」則是微 即元和 據其中

汪立名於白香山詩後集卷壹格詩題下言格詩之義略云:類,不復如前之詳細,殆亦嫌其過於繁瑣耶?

詩之一體矣。 別於律詩 唐人詩集中, 多兼律詩體而言,不專主古體也。 之謂, 著格詩若干首, 無號格詩者, 豈元少尹生平獨不爲歌行雜體乎?況公後序但曰,邇來復有格律詩。 遂統稱之曰格詩耳。時本於十一卷之首格詩下復繫歌行雜體,是以格詩另爲古 公前集既分古調、 律詩若干首, 即大曆以還 樂府、 歌行, 有齊梁格, 顧於詩之義雖亡考, 賦序銘記等若干首, 以類各次於諷諭、 元白格, 合三十卷。 而見於諸公之文章者可 元和格, 閒適、 葫蘆、 感傷之卷, 由是觀之, 洛中集記 證。 後集不 格者但 進退, 元

亦曰,其間賦格律詩八百首,初未嘗及歌行雜體, 固以格字該舉之也。

寅恪案:汪氏論格詩爲「格者,但別於律詩之謂。 」此語甚是。 惟於齊梁格等之格與格詩之格,

未能識其意義之各別。故所論者似猶未達一間, 茲特爲辨之於下。

格有二義,其一爲體格格樣之格,白氏長慶集伍壹九日代樊羅二妓招舒著作及同集陸貳洛陽春贈

其下皆自注「齊梁格」,即體格之義也。唐語林貳文學篇文宗好五言詩條,

珏奏曰:憲宗爲詩,格合前古。」亦指體格而言。又全唐詩第壹陸函白居易貳叁餘思未盡加爲六

韻重寄微之詩云:

劉李二賓客兩詩,

詩到元和體變新。

自注云:

衆稱元白爲千字律詩,或號元和格。

或格樣之格,其體則爲律詩, 以上所引,皆足證體格同義 非古詩。與白氏之格詩迥不相侔也。其二爲格力骨格之格, 可以互用也。而尤可注意者,元和格即元和體, 此所謂格, 乃格式 元微之

杜工部墓係銘云:

又云: 意義格力無取焉。

尙

而又沈宋之流, 研練精切, 穩順聲勢, 謂之爲律詩

又云:

律切則骨格不存。

樂天與元九書稱杜詩云:

至於貫穿今古, 覼縷格律, 盡工盡善。

格詩諸卷中凡有長短句多標明雜言, 卷中又有於題下特著齊梁格者,蓋齊梁格與古調詩同爲五言,尤須明其不同於狹義之格詩也。 雜體者,即謂歌行雜體就廣義言之固可視爲格詩,若嚴格論之,尚與格詩微有別也。至於格詩諸 之謂。則格詩依樂天之意,唯其前集之古調詩始足以當之。然則白氏長慶集伍壹格詩下復繫歌行 格詩即今所謂古體詩, 樂天格詩之義即可以此爲解釋。 律詩即今所謂近體詩,此即汪氏所論者也。 蓋樂天所謂格詩, 豈以雜言之體殊爲駮雜耶? 實又有廣狹二義。就廣義言之,格與律對言, 就狹義言之,格者,格力骨格

(丁)元和體詩

關於元和體詩,自來多所誤會, 庶能得其眞解也。 茲就唐時之論此體詩及元白二公本身所言此體詩之界說,

舊唐書壹陸陸元稹傳(參元氏長慶集集外文章上令狐相公詩啓。)略云: 律詩, 體。 陷流俗。 是。 府謫官於今十餘年矣。 之辭學, 元白焉。 **稹聰警絕人,年少有才名。與太原白居易友善。工爲詩,** 言, )千餘首。 唯杯酒光景間, 屢爲小碎篇章, 以自吟暢, 重複首尾, 積與同門生白居易友善, (集外文章排作挑耳,是。)自爾江湖間爲詩者, 不知天下文有宗主, 以相投寄。 自衣冠士子, 至誾閻下俚, 常欲得思深語近, 謂稹曰, 其間感物寓意可備矇瞽之風者,有之。辭直氣麤, 韻同意等, 小生自審不能過之,往往戲排舊韻, 嘗覽足下製作, 閑誕無事, 妄相放效, 不異前篇, 韻律調新, 居易雅能詩, 所恨不多, 遂專力於詩章, 悉傳諷之, 屬對無差, 亦目爲元和詩體。 而又從而失之, 就中愛驅駕文字,窮極聲韻,或爲千言或五百言 請出其所有。 號爲元和體。 然以爲律體卑痺, 而風情宛然, 日益月滋, 復相放効, 遂至於支離褊淺之辭, 別創新辭, 善狀詠風態物色。 而司文者考變雅之由, 稹因獻其文, 宰相令狐楚一代文宗, 而病未能也。 有詩句(集外文章句作向 罪尤是懼, 力或不足, 格力不揚, 名爲次韻相酬, 自敍曰, 當時言詩 固不敢陳露於 皆目爲元和詩 苟無姿態 則至於顯 江湖間 往往歸咎於 蓋欲以難 稹自御史 雅知稹 多新進 倒 則 語

寅恪案:此爲微之自下之「元和體詩」定義,

自應依以爲說。據此,則「元和體詩」可分爲二類,

其

嘗以爲雕

蟲

小事,

不足以自明。

其例。 士代書一百韻, 爲次韻相酬之長篇排律,如白氏長慶集壹叁代書詩一百韻寄微之,及元氏長慶集拾酬翰林白學 元白此類詩於當時文壇影響之大, 白氏長慶集壹陸東南行一百韻,及元氏長慶集壹貳酬樂天東南行一百韻等, 則元氏長慶集貳貳酬樂天餘思不盡加爲六韻之作詩「次 即是

韻千言曾報答。 」句自注云:

全唐詩第壹陸函白居易貳叁餘思未盡加爲六韻重寄微之詩「詩到元和體變新。」句自注云: 樂天曾寄予千字律詩數首,予皆次用本韻酬和,後來遂以成風耳。

衆稱元白爲千字律詩, 或號元和格。 其二爲杯酒光景間之小碎篇章,

此類實亦包括微之所謂豔體詩

俱足與微之上令狐楚啓相參證也。

中之短篇在內。 如元氏長慶集貳貳爲樂天自勘詩集七絕題略云:

因思頃年城南醉歸, 馬上遞唱豔曲, 十餘里不絕。

亦指此類詩言。而白氏長慶集壹伍酬微之寄示贈阿軟七律題(參白氏長慶集貳捌與元九書。

云

花百草無 微之到 通州日, 顏色。 然不知題者何人也。 授館未安, 見塵壁間 有數行字, 微之吟歎不足, 即僕舊詩。 因綴一章, 其落句云, 兼錄僕本詩同寄, 渌水紅蓮一朶開, 省其詩

乃是十五年前初及第時, 贈長安妓人阿軟絕句。

其詩云

十五年前似夢遊。 曾將詩句結風流。 偶助笑歌嘲阿軟, 可知傳誦到通州。 昔教紅袖佳人唱,

者也。

今遣青衫司馬愁。

惆悵又聞題處所,

雨淋江館

破牆

頭。

(寅恪案,

阿軟即

才調集壹所

天 江南喜逢蕭九徹因話長安舊遊戲贈五十韻詩, 多情推阿軟,

流於人 然則元白此類詩之廣播流行, 間, 疏於屛壁,子父女母交口教授。淫言媟語,冬寒夏熱,入人肌骨不可除去。 風靡當日又可知矣。 吾無位

斯即李戡斥爲「纖豔不逞,

非莊士雅

人所爲。

不得用法以治之。」者。(樊川文集玖李戡墓誌銘。)而葉石林於避暑錄話叁駮之云:

如樂天諷諫閑適之辭,可槩謂淫言媟語耶?

殊不知「樂天諷諭閑適之辭」乃微之上令狐楚啓所謂「詞直氣麤, 而當時最爲流行之元白詩, 除「千言或五百言律詩」外, 唯此杯酒光景間小碎篇章之元和體 罪尤是懼, 固不敢陳露於人。

予始與樂天同校秘書之名, 多以詩章相贈答。 會予譴掾江陵, 樂天猶在翰林, 寄予百韻律

如元氏長慶集伍壹白氏長慶集序略云:

作新詞 及雜體 省觀寺郵候牆壁之上無不書, 自謂 前後數十章。 爲元和 體 詩, 是後各佐江 而樂天秦中吟賀雨諷諭等篇 王公妾婦牛童馬走之口無不道。 通, 復相酬 寄。 巴蜀江楚間 時人罕能知者。 泊長安中少年, 自篇章已來, 然 未有如是流傳之 而二十年間 遞相 做 詩 競

尤足證杜牧李戡之所以痛詆, 要非無故, 而葉氏則未解此點也。

復次, 元和體詩以此之故, 在當日並非美詞。 如唐語林貳文學類文宗欲置詩學士條云:

李珏奏日, 寅恪案, 此指玉川子月蝕詩之類。)爾後鼓扇名聲, 臣聞憲宗爲詩,格合前古, 當時輕薄之徒,摛章繪句, 謂之元和體,實非聖意好尚如此。 聱牙崛奇, 今陛

下更置詩學士,臣深慮輕薄小人,競爲嘲詠之詞,屬意於雲山草木,亦不謂之開成體乎?玷

黯皇化,實非小事。

又國史補下略云:

可以爲證。而近人乃以「同光體」比於「元和體」,自相標榜,殊可笑也。至於惠洪冷齋夜話壹(參 元和已後, 詩章學淺切於白居易,學淫靡於元稹, 俱名元和體。

汪立名本白香山詩後集伍詩解七絕案語。) 云:

則元白詩在當時所盛行者, 白樂天每作詩, 詩近於鄙俚。 令一老嫗解之。 爲此兩類元和體詩。 問日, 解否?嫗曰, 若排律一類必爲老嫗所解始可筆錄, 解。 則錄之。 不解, 則易之。 故唐末之

集之卷帙當大爲減削矣。其謬妄又何待詳論。惟世之治文學史者,猶以元白詩專以易解之故, 則白氏長慶

附

得盛行,則不得不爲辨正耳。

(戊)白樂天與劉夢得之詩

白氏長慶集陸壹醉吟先生傳略云:

退居洛下。〔與〕彭城劉夢得爲詩友。

同集陸拾劉白唱和集解(寅恪案:劉禹錫父名溆。 予頃以元微之唱和頗多, 或在人口, 常戲微之云, 僕與足下二十年來爲文友詩敵, 幸也, 白,以予子之故,使僕不得獨步於吳越間, 得夢得,文之神妙,莫先於詩。 不幸也。吟詠情性, 豈唯兩家子姪秘藏而已。 沈舟側畔千帆過, 播揚名聲,其適遺形,其樂忘老,幸也。然江南士女語才子者,多云元 病樹前頭萬木春。 已酉歲(太和三年)三月五日樂天解。 若妙與神, 之句之類, 亦不幸也。 故樂天易序爲解。 則吾豈敢。 今垂老復遇夢得, 眞謂神妙。 如夢得雪裏高山頭白早, 不欲犯其家諱故也。 在在處處, 得非重不幸耶?夢 應當有靈物護 海中仙果子 )云:

嗟乎!微之先我去矣。詩敵之勍者,同集伍玖與劉蘇州書云:

亦非利不行。但止交綏,未當失律。 非夢得而誰?前後相答, 然得雋之句, 警策之篇, 多因彼唱此和中得之。 彼此非一。 彼雖無虚可 他人未

劉夢得文集肆金陵五題序云:

余少爲江南客, **道爾生思, 歘然有得。** 而未遊秣陵,嘗有遺恨。後爲歷陽守,跂而望之,適有客以金陵五題相示, 他日友人白樂天掉頭苦吟, 歎賞良久。 且日,石頭詩云, 潮打空城寂

寞迴。吾知後之詩人不復措詞矣。 餘四詠雖不及此,亦不孤樂天之言爾。

前半期爲元微之,後半期則爲劉夢得。而於夢得之詩,

傾倒讚服之

尤多於微之。此甚可注意者也。王士禛香祖筆記伍云:

寅恪案:樂天一生之詩友,

矣。 眼前景語, 前頭萬木春。等句,最爲下劣,而樂天乃極賞歎, 白樂天論詩多不可解,如劉夢得雪裏高山頭白早,海中仙果子生遲。沈舟側畔千帆過, 元白二集瑕瑜雜陳, 却往往入妙。 似出率意,而風趣復非雕琢可及。 如上得籃輿未能去,春風敷水店門前。 持擇須慎。 初學人尤不可觀之。 以爲此等語,在在當有神物護持, 白古詩晚歲重複什而七八。 可憐八月初三夜,露似珍珠 絕句作 悖謬甚 病樹

又王士禎池北偶談壹肆樂天論詩條云:

月似弓。之類,

附

(戊)白樂天與劉夢得之詩

樂天作劉白唱和集解, 前頭萬木春。 以爲神妙, 獨舉夢得雪裏高山頭白早, 且云此等語在在處處應有靈物護之,殊不可曉。 海中仙果子生遲。 沈舟側畔千帆過, 宜元白於盛唐諸家 病樹

興會超詣之妙,全未夢見。

寅恪案:漁洋之詩與樂天之詩, 即樂天自覺其所作遜於劉詩之處。 其價值高下如何, 古今已有定評, 此杜少陵所謂「文章千古事,得失寸心知。 無俟贅論。 樂天深賞夢得詩之

尤非功力遠不及己之人, 周,故理太周則辭繁,意太切則言激。 頃者在科試間,常與足下(指元微之。)同筆硯。每下筆時, 所能置喙也。白氏長慶集貳和答詩十首序云: 然與足下爲文所長在此, 輒相顧語, 所病亦在於此。 患其意太切而理太 足下來序果

馬

有詞犯文繁之說,

今僕所和者,

猶前病也。

待與足下相見日,

各引所作,

稍删其煩而晦其義

語也。考此序作於元和五年,樂天時年三十九,方在壯歲,乃元白二公詩文互相受影響最甚之時 何苦於垂暮之年,而妄以虛詞諛人若此乎?全唐詩第壹柒函白居易叁陸哭劉尚書夢得二首之壹 品而未能達到者, 樂天自言其與微之詩文之病, 及大和五年微之卒後, 莫如從夢得求之。樂天之所以傾倒夢得至是者, 夢得則已臻其理想之境界也。若不然者, 樂天年已六十。其二十年前所欲改進其詩之辭繁言激之病者, 在辭繁言激。故欲刪其煩,而晦其義。此爲樂天有自知之明之眞實 實職是之故。蓋樂天平日之所蘄求改進其作 樂天固一世之文雄,自負亦甚不淺 並世詩

四海齊名白與劉。 自注云, 曹公曰, 百年交分兩綢繆。 天下英雄唯使君與操耳。)文章微婉我知丘。(自注云:仲尼云, 同貧同病退閒日, 一死一生臨老頭。 杯酒英雄君與操

丘者,春秋。又云:春秋之旨微而婉也。)賢豪雖歿精靈在,應共微之地下遊。

所短, 詩者儻能綜合元白劉三公之所長,始爲樂天心意中之所謂工者歟? 合 寅恪案:樂天此輓詩非酬應之苟作,其標舉春秋文章微婉之旨,正夢得之所長。樂天自以爲是其 「沈舟側畔千帆過, 而樂天晚歲諸作, 而平日常欲刪其煩, 恐亦欲摹倣之而未能到。此則非天才有所不及,實性分有所不同。 病樹前頭萬木春。 晦其義,以求改進者也。故夢得詩「雪裏高山頭白早, 」等簡鍊沉著之名句, 與樂天刪煩晦義之旨, 海中仙果子生 極爲訢

復次,北夢瑣言陸白太傅墓誌條(參唐語林陸補遺。)云:

時人疑其隙終也。

寅恪案:此節雖已爲汪立名及馮浩辨正,(見汪本白香山詩後集壹柒,覽盧子蒙侍御舊詩, 元相爲序下之補注。)今似不須詳考。然此事關係甚鉅,故不得不略申論之如下。 微之唱和。 洎自撰墓誌(應作醉吟先生傳。)云, 感今傷昔,因贈子蒙,題於卷後。七律後按語,及樊南文集詳注捌太原白公神道碑銘 與劉夢得爲詩友,殊不言元相公,

全唐詩第壹柒函白居易叁伍病中五絕句之叁云::

李君墓上松應拱, (寅恪案:白氏長慶集貳肆有唐善人墓碑云,公名建, 字杓直, 隴西人。

長慶元年二月二十三日夜無疾即世。)元相池頭竹盡枯。(寅恪案:白氏長慶集陸壹河南元公 誌銘云,大和五年七月二十二日遇暴疾,一日薨於位。)多幸樂天今始病,不知合要苦治

今予始病,得非幸乎?)

(自注云, 李元皆予摯友也。

杓直少予八歲,即世已九年。微之少予七年,

薨已八年矣。

寅恪案:樂天此詩乃開成己未歲(開成四年。 ) 初病風時所作,時年已六十八矣。

同書同卷夢微之七律云:

我寄人間雪滿頭。 夜來攜手夢同遊。 阿衛韓郎相次去, 晨起盈巾淚莫收。 夜臺茫昧得知不。 漳浦老身三度病, 咸陽宿草八回秋。 (自注云, 阿衛微之小男, 君埋泉下泥銷骨, 韓郎微之

寅恪案:白氏長慶集陸壹河南元公墓誌銘云:

以〔大和〕六年七月十二日,祔葬於咸陽縣奉賢鄉洪瀆原,從先宅兆也。

年秋病後獨宿香山寺三絕句之間,是其證也。又如前引哭劉尚書夢得一詩,猶以「應共微之地下 五年三月三十日所作春盡日宴罷感事獨吟七律(參全唐詩第壹柒函白居易叁伍此詩題下注。)與五 故以詩中「咸陽宿草八回秋。」句言之,當作於開成五年, 」爲言。 劉夢得卒於會昌二年之秋。(見下引樂天感舊詩序。)時樂天年七十一, 距會昌六年 而此詩載白氏長慶集陸捌中, 列於開成

八月樂天之卒,相隔纔四年耳。至白氏長慶集陸玖感舊幷序云:

者,乃樂天下筆時偶爾誤記耳。)崔侍郎晦叔大和七年夏薨, 元公墓誌銘,微之薨於大和五年七月二十二日,葬於六年七月十二日。 故李侍郎杓直長慶元年春薨,元相公微之大和六年秋薨,(寅恪案:據白氏長慶集陸壹 劉尚書夢得會昌二年秋薨, 此云大和六年秋薨 河南 四

君子予之執友也。二十年間凋零共盡。唯予衰病,至今猶存。因詠悲懷,題爲感舊

晦叔, 晦叔墳荒草已陳。 屈指相知唯五人。 縣碟義鄉北原。)夢得墓溼土猶新。微之捐館將一紀, 博陵人。 大和七年七月十一日遇疾薨於號州廨舍。 四人先去我在後, (寅恪案, 白氏長慶集陸壹唐故號州刺史崔公墓誌銘略云, 公諱玄亮, 一枝蒲柳衰殘身。 豈無晚歲新相識, 杓直歸丘二十春。 九年四月二十八日歸室於磯州昭義 平生定交取人窄, 相識面親心不親

人生莫羨苦長命,

命長感舊多悲辛。

微之不能令樂天作此詩。元白二公關係之密切若是,斯尤爲讀兩長慶集之人,所不可不知者也。 因附論樂天夢得之詩,特於此標明元白二公文章交誼死生因緣之事實,以爲本書之結束。 年月,妄構誣說,殊爲可恨。且夢微之一詩,其情感之誠篤,可謂生死不渝。非樂天不能作此詩,非 上文「退居洛下」而言,夢得固樂天洛下之詩友也。至於微之,則其時已逝矣。淺人不曉文義,不考 則此作更在哭夢得詩之後矣。然則醉吟先生傳僅言「〔與〕彭城劉夢得爲詩友」而不及微之者,蓋承

#### 附校補記

# (一) 十三頁第十四行後加:

又馬永卿懶真子貳云

也。 歌眞得之。(此條乃戴裔煊先生舉以見告者。論語子罕篇云,後生可畏,焉知來者之不如今 云,楊家有女初長成,養在深閨人未識。故世人罕知其爲壽王瑁之妃也。春秋爲尊者諱,此 詩人之言爲用固寡。然大有益於世者,若長恨歌是也。明皇太真之事,本有新臺之惡,而歌 四十五十而無聞焉, 斯亦不足畏也已。聖人之言,豈不信哉!附識於此, 以表謝意, 并

 $\frac{1}{2}$ 二百八十七頁第十三行,「而不能(以禮)定情」下加一段,文如下:

記燭武師丹之感云爾。)

通。 見止,亦既觀止, (寅恪案:以禮二字據古本董解元西廂記柒補。 毛詩召南草蟲篇小序云,大夫妻能以禮自防也。及經文云,未見君子,憂心忡忡。 我心則降。 並樂府解題曰,定情詩漢繁欽所作也。言婦人不能以禮從人, 蓋既見君子矣,何以不能定情?文意殊不貫

毛詩正義。 而自相悦媚等語。 君子之語即用經文。 故依董本特補以禮二字,以足文意。 定情一辭亦與繁欽之詩有關。 考微之年十五, 繁氏作品微之當能見及之 以明經及第, 必習熟

也。)

(三) 三百零八頁第七行後加:

至此篇詞語有略須釋證者,如詩云:

夕郎所賀皆德音,

春官每奏唯祥瑞。

有春官夏官秋官冬官中官正各一人,副正各一人。(見新唐書肆柒百官志及舊唐書肆叁職官志。) 中之職,主要在「凡百司奏抄,侍中旣審,則駮正違失。詔勅不便者,塗竄而奏還,謂之塗歸。 即出於此。可參附論甲白樂天之先祖及後嗣中引高彥休闕史,目給事中薛存誠爲夕拜條。 今「每奏唯祥瑞」,則如新樂府中司天臺一篇所譏者是也。 寅恪案,漢官儀云:「黃門郎日暮入對靑瑣門拜,名曰夕郎。」唐代習稱門下省給事中爲「夕拜」, (見新唐書肆柒百官志。幷參舊唐書肆叁職官志。)今給事中「所賀皆德音」,可謂失職矣。司天臺 蓋給事

(四) 十二頁第八行「之嫌也」下加:

逼迫, 堅,天上人間會相見。」等句。若依尊杜貶白之說,是明皇殺害楊妃, 夫長恨歌採用漢武帝李夫人故事, 乃一言情作品, 與少陵北征詩性質迥異, 則明皇爲楊妃之仇敵,而長恨歌亦可解釋作長久仇恨之歌詩矣。豈不大可笑哉 出於自動, 故有「但敎心似金鈿 而非受軍士之

(五) 三十三頁第十三行「倏忽蕣英暮」句下加:

平生服杏丹,顏色真如故。

分 三十三頁第十四行删去「則以」至「者也」二十五字。 改加下列一段。

唐紀肅宗紀至德元載五月條。) 云: 寅恪案:舊唐書伍壹后妃傳上玄宗楊貴妃傳(參新唐書柒陸后妃傳上玄宗楊貴妃傳及通鑑貳壹捌

帝不獲已,與妃韶,遂縊死於佛室。

太眞外傳下云:

上入行宫, 乃曰, 撫妃子出於廳門, 願大家好住。 妾誠負國恩, 至馬道北牆口而別之, 死無恨矣。 乞容禮佛。 使[高]力士賜死。 帝日, 願妃子善地受生。 妃泣涕嗚咽, 語不勝 力士

遂縊於佛堂之梨樹下。

寅恪所見記載,

方法多種兼用,吞金不過其一。楊妃縊死前,或曾吞金,是以里中兒傳得此說,亦未可知。故不 賜死情事耳。 詩貴人飲金屑, 得自「里中兒」, 或遂疑貴妃實服金屑, 故有此異說耳。(檢沈濤瑟榭叢談下云:「楊貴妃縊死馬嵬, 迺用晉書 賈后傳, 趙王倫矯遣尚書劉宏等,齎金屑酒賜后死故事, 誤矣。 」寅恪以爲沈說固可通, 但吾國昔時貴顯者, 傳記無異說。 以喻當日貴妃 劉夢得 致死之

幾皆言貴妃縊死馬嵬,獨夢得此詩謂其吞金自盡。疑劉詩「貴人飮金屑」之語,乃

吞金絕不能致死。紅樓夢記尤二姐吞金自盡事,亦與今日科學不合也。所可注意者,樂史謂妃縊 至張耒張右史文集捌「讀中興頌碑」七古首句云,「玉環妖血無人掃」。夫楊妃縊死,或呑金死,皆 死于梨樹之下,恐是受香山「梨花一枝春帶雨」句之影響。 果爾,則殊可笑矣。 至劉詩「平生服杏 無流血滿地之可能。文潛所云,當即出於少陵詩句,但未免過于誇大耳。)據今日病理家理論, 山進兵長安,少陵潛伏避禍,傳聞楊妃爲兵士所殺害,實非眞知親見者可比,本不得據爲典要。 必認爲僅用古典已也。又杜工部集壹「哀江頭」云:「明眸皓齒今何在, 顏色眞如故。 )略云: 之語, 據葛洪神仙傳陸董奉傳(可參三國志肆玖吳志肆士燮傳裴注引葛洪神仙 血汚遊魂歸不得。」蓋安祿

丸,内在口中,以水灌之,使人舉其頭,搖而消之。須臾手足似動,顏色漸還, 杜燮爲交州刺史,(寅恪案:「杜」當作「士」。)得毒病死。死已三日,奉時在彼,乃往與藥三 (奉)後還豫章廬山下居,居山不種田, 如此數年, 計得十餘萬株, 鬱然成林。 日爲人治病, 亦不取錢, 重病愈者,使栽杏五株,輕 燮遂活。

然則稚川之傳,乃夢得詩此二句之注脚也。

(七) 三十七頁第二行後加

又劉夢得「馬嵬行」末句云:

指環照骨明。首飾敵連城。將入咸陽市,猶得賈胡驚。

寅恪案:西京雜記壹云:

[高祖]戚妃以百鍊金爲彄環, 照見指骨。 上惡之, 以賜侍兒鳴玉耀光等各四枚。

不欲顯言之, 蓋戚妃與楊妃身分適合, 夢得用典精切, 山自命, 國文化甚深,白樂天詩尤具重大影響。長恨歌旣有「忽聞海上有仙山」之句,日本以蓬萊三島之仙 此與彼國熊野有徐福墓者,正復相似,自可不必深究也。 但其意非指楊妃託身逃遁也。昔友人言,日本有楊貴妃墓, 於此可見。由是推之, 貴妃死後, 曾見其照片。日本受中 疑有盜墓之舉,

(八) 四十五頁後加:

云:

抑更有可論者, 即白香山何以得由盩厔尉召入翰林爲學士一重公案是也。 舊唐書壹陸陸白居易傳

病,補政之缺, 居易文辭富豔, 而士君子多之, 尤精於詩筆,自讎校至結綬畿甸, 而往往流聞禁中, 章武皇帝納諫思理, 所著歌詩數十百篇, 渴聞讜言, 〔元和〕二 皆意存諷賦, 箴時之

年十一月,召入翰林爲學士。

整屋尉集賢校理白居易作樂府及詩百餘篇,規諷時事,資治通鑑貳叁柒唐紀憲宗紀元和二年十一月條云:·

流聞禁中,

上見而悦之,

召入翰林爲

通鑑記此事本於舊書,而所謂樂府及詩百餘篇, 孟棨本事詩情感類「韓翊(寅恪案:「翊」當作「翃」,下同。)少負才名。 胡注無釋,未知何所確指。 考唐之德憲二宗, 」條略云:

所與。 春城無處不飛花。寒食東風御柳斜。 日, 李相勉鎭夷門, 定誤矣。 幸又賀曰,此非員外詩也?韓曰,是也,是知不誤矣。 夜將半, 德宗批 日, 韋就座曰, 章扣門急, 又署爲幕吏。 與韓翊。 韓出見之, 留邸狀報制誥闕人, 時有與翊同姓名者, 韓翊殊不得意, 賀曰, 日暮漢宮傳蠟燭,青煙散入五侯家。 員外除駕部郎中知制誥。 中書兩進名, 多辭疾在家, 爲江淮刺史,又具二人同進。 時建中初也 御筆不點出, 唯末職韋巡官者與韓獨善。 韓大愕然, 又請之, 又批曰, 御筆復批曰 日, 且求聖旨 與此韓 必無此

之主, 部作品與篇目索引綜合作品表, 神策中尉, 與元九書云,「聞宿紫閣村詩, 見此等當時新作品。 及下附論(丁)元和體詩所引, 皆喜觀覽當時文士作品。 即所謂握軍要者,乃吐突承璀, 白氏長慶集壹宿紫閣山北村詩有「主人愼勿語, 唐語林貳文學類文宗欲置詩學士條李珏之語。 則握軍要者切齒矣」。依日本花房英樹白氏文集之批判的研究第三 宿紫閣山北村詩作於元和五年, 而元和元年十一月至五年九月之 但帝王深居九重, 與通常人民隔絕, 則宿紫閣山北村詩憲宗是否得見,殊不可知。 中尉正承恩」等句, 非經由宦寺之手, 據此可知, 同書貳捌 必無從得 唐代好詩 以常情

論, 神策中尉似不應采進此詩也。 由是言之, 長恨歌之所以爲憲宗所深賞, 幷閹寺視爲與彼類

叁章連昌宮詞引新舊唐書謂元微之由宦者崔潭峻采進連昌宮詞**,** 篇所引舊唐書憲宗懿安皇后郭氏傳。第二點詳見新樂府海茫茫篇所引杜陽雜編。茲不多贅。 后,二爲此詩描述神仙之韻事風情, 涉之作品, 宮詞有二特點, 可以推知。今試釋長恨歌內容有二特點:一爲楊玉環雖極承寵愛, 即銷兵、 望幸兩事, ,爲當時詩人所不能及。第一點詳見下引第伍章新樂府李夫 最可迎合穆宗及宦寺之心意。 穆宗乃大悦, 嗚呼, 微之與樂天, 遂召入翰林。 而終不得立 邪正 爲

(九) 第六十二頁第四行後加

於此,以俟通人之敎正。

林學士耶?樂天之由盩厔尉得召入爲翰林學士一重公案,至今似尚無道及者,

豈知俱藉連昌宮詞、

長恨歌兩詩中有合於人主及宦寺之心意而得爲翰

遂發其覆,

別,

當時及後世固有定品,

白氏文集記略云: 抑更有可論者,唐代文人自珍惜其作品, 不令其遺佚, 莫甚於白樂天。 白香山集陸壹蘇州 南禪院

生世俗文字, 聖善寺鉢塔院律庫中, 有文集七帙,合六十七卷,凡三千四百八十七首。 放言綺語之因, 一本真於廬山東林寺經藏中, 轉爲將來世世讚佛乘轉法輪之緣也。 其集家藏之外, 一本寘於蘇州南禪院千佛堂内, 別錄三本, 開成四年二月二日樂天 本翼於東都 願以今

可以爲證。朱彝尊曝書亭集叁陸重刊白香山詩集序云:

爲之記。 詩家好名, 既以集本付其從子外孫, 未有甚於唐白傅者, 既屬其友元微之排纘長慶集矣, 而又分貯于東林南禪聖善香山諸寺, 而又自編後集, 比之於杜元凱峴山 爲之序,

舊唐書壹陸陸白居易傳略云:

尤汲汲焉

〔元和〕十年七月,盜殺宰相武元衡,居易首上疏論其冤,急請捕賊,以雪國恥。宰相以官官 (寅恪案:時樂天任太子左贊善大夫職事。)非諫職,不當先諫官言事。 中書舍人王涯上疏論之,言居易所犯狀迹, 奏貶爲江表刺史。

不宜治郡,追韶授江州司馬

引, 知。若所揣測不誤,此疏當是樂天故意刪去,不使流傳於世耳。至白香山集貳柒與楊虞卿書所言 此例。然則樂天此疏,必爲宰相所憎惡,及與當時政府主要政策,即用兵淮蔡一端有關,可以推 舊史之說,寅恪甚以爲可疑。蓋此疏乃關係樂天出處之重要文字,樂天旣珍惜己身文字如上所 琵琶引述琵琶女之不得已而嫁作商人婦,實由「弟走從軍阿姨死」。 貶江州之理由, 則今流傳之白氏文集中不見此疏,已甚可怪。且宮官何以不能先諫官言事,唐代似尙未發現 乃舊史所根據者,然即如與楊虞卿書所言, 亦應載其原疏, 此弟之從軍應是與用兵淮蔡有 何以刪去不存耶。又

稿

三六四

天涯淪落之恨者, 其心情之痛苦, 滴江州之時間 據是而言, 兩人之流落天涯皆是用兵淮蔡之結果。 約略計此琵琶女嫁作商人婦之時間, 相合, 則不僅不符事實, 尤可想見。 或相距甚近也。 若此解釋不誤, 洪容齋取琵琶引與蘇東坡定惠院海棠詩爲同類, 而所見尤膚淺矣。 則「同是天涯淪落人」一句, 謂不過尋常攄寫 其所感恨甚 與樂

### (十) 八十三頁末加:

之舉是也。依微之此詩如「連昌宮中滿宮竹」至「小年進食曾因入」一節,「初過寒食一百六,殿舍 之離宮,必將宮門鎖閉, 相逐」二句,及「自從此後還閉門, 無煙宮樹綠」二句,「明年十月東都破」至「不到離宮門久閉」一節, 復次,茲有一事可附論於章末者,即微之此詩與唐代久閉之離宮在寒食節時, 而此宮門亦必尚存垣牆, 夜夜狐狸上門屋」二句等語, 否則雖閉門, 綜合論之, 亦不能阻禁外人闌入宮內也。 「去年勑使因斫竹, 則知唐代皇帝不臨幸 特命中官於內斫竹 偶値 門開 白

我自秦來君莫問, 苔重重 封 壞垣。 惟有中官作宮使, 驪山渭水如荒村。 每年寒食一開門。 新豐樹老籠明月, 長生殿閣鎖黃昏。 紅葉紛紛蓋敬瓦

氏文集壹貳江南遇天寶樂叟詩云

宮門則長閉, 則是樂天於元和十年貶江州司馬之時, 至寒食節始有中官開門於內斫竹也。 華清宮中之殿宇固甚破敗, 樂天此詩乃寫實之作, 但其垣 與微之之詩出於揣想者 牆雖已毀損 而 尙 存在

也。 離宮,尙存宮牆,在寒食節時,宮使始開門於內斫竹等事,與樂天所言華淸宮之情狀並無少異 本自不同,然微之此詩亦依據唐代離宮一般之情況而言,絕非無中生有之描繪。 故在連昌宮詞爲特性之虛構, 江南遇天寶樂叟詩乃通性之寫實。 由是而論, 如其所述久閉之 元白兩詩可以互

至天寶亂後, 東都洛陽之上陽宮, 則更有詳論之必要。 請略引史料, 考釋之於下:

杜工部集壹伍諸將五首之三云:

相證發也。

洛陽宮殿化爲烽。

若據此語, 可知子美此句乃詩人感傷之語,不可過於拘泥也。 何寂寞,宮室盡燒焚。 史焚燒洛陽宮殿之今典。 漢書董卓傳並曹植詩「洛陽何寂寞,宮殿盡燒焚」爲釋。 是唐代洛陽之宮殿已於安史亂時化爲烽燼矣。 」仇氏改「宮室」爲「宮殿」,意雖相同, (仇氏所引子建詩乃文選貳拾曹子建送應氏詩二首之一, 然則仇氏僅舉出少陵所用之古典, 但檢仇兆鰲杜詩詳注壹陸, 但改曹詩以合杜句, 殊可不必也。 其詩云:「洛陽 此句注引後 實無安

白氏長慶集叁上陽白髮人篇注云:

也。 天寶五載 貞元中尚存焉。 已後, 楊貴妃專寵後, (寅恪案:鄙意以爲此篇乃李紳之原唱, 宮人無復進幸矣。 六宮有美色者, 而元稹白居易和之者, 輒置別所, 上陽 白氏之

注原出公垂也。 詳見此稿第伍章新樂府上陽白髮人篇。

新唐書柒柒后妃傳下代宗睿眞皇后傳云:

宗), 代宗睿真皇后沈氏, 實生德宗。 天寶亂、 吳興人。 賊囚后東都掖庭。 開元末, 以良家子入東宮。太子(指肅宗)以賜廣平王(指代 王入洛, 以德宗爲皇太子, 復留宮中。 時方北討, 未及歸長安,

通鑑貳貳陸唐紀肆貳德宗紀建中二年正月條云:

而河南爲史思明所沒,遂失后所在。

代宗立,

韶訪后在亡,

不能得。

狀, 初, 韶太后許偽, 入奏,上大喜。二月辛卯,上以偶日御殿, 百餘人,齎乘輿服御物, 宮人不審識太后, 恐不言久獲罪, 上聞之驚喜。 高力士有養女, 左右侍衞甚嚴。 左右可下。左右皆下殿。 皆言是, 時沈氏故老已盡, 遽自言本末。上命力士養孫樊景超往覆視。 嫠居東京, 景超謂高氏曰, 就上陽宮供奉。 高氏辭稱, 頗能言宮中事。 無識太后者, 始何自置身俎上。 實非太后, 高氏乃曰, 左右誘諭百方, 羣臣皆入賀, 女官李真一意其爲沈太后, 上遣宦官宮人往驗視之, 驗視者益疑之, 吾爲人所強, 韶有司草儀奉迎。 左右叱景超使下, 高氏心動,乃自言是。驗視者走馬 景超見高氏居内殿, 非己出也。 強迎入上陽宮。 高氏弟承悦在長 年狀 景超抗聲 以牛車載還其 詣使者具言其 頗 同 上發宮女 日 以太后 宦官 有

家

元氏長慶集貳肆上陽白髮人篇云:

秋池暗度風荷氣。 南奔胡馬蹙, 日日長看提象門, 宮女三千合宮棄。 終身不見門前事。 宮門一閉不復開, 近年又送數人來, 上陽花草青苔地。 自言興慶南宮至。 月夜閑聞洛水聲

新唐書伍玄宗本紀(參舊唐書玖玄宗本紀下及通鑑貳貳壹唐紀叁柒肅宗紀上元元年六月條)略云: 上元元年徙居於西内甘露殿

修理, 殿,則上陽宮之正殿,尙未被毀或被毀後重加修理之一證也。夫自天寶五載迄貞元之末, 陽上陽宮非如少陵所謂「化爲烽」之確證。 寅恪案:代宗睿真皇后沈氏,旣能於廣平王即代宗收復東都之前後,皆留在上陽宮, 上論洛陽宮至安史亂時迄元和初年實未毀壞並宮牆存在宮門常閉。故亦如其他唐代離宮之通例於 於南內至上元元年遷於西內之時間無疑, 「近年」,其界說殊可研究。 故上陽白髮人暫可在其中居住也。至於元微之詩云:「近年又送數人來, 至德二載]十二月丁未, [玄宗]至自蜀郡, 居於興慶官。 儻上陽宮全被焚毀, 則此老宮女, 當修理時,將此老宮女搬移他處, 尚有何人**妒**忌, 而令此老宮女受終身監禁之苦乎。 考微之此詩作於元和四年, 豈能露宿如此之久。若謂上陽宮雖全被焚毀**,**後來重加 迨修理完畢後, 蓋歷年將五十載,固不得謂之近年也。 又德宗建中二年高力士女有能以假太后之資格, 則不能上溯至德二載玄宗自蜀郡還長安居 然則上陽宮雖經安史之亂, 再將其遷於原處居住, 自言興慶南宮至」之 則楊貴妃死已五 斯爲當日洛 仍未全部毀 歷時六

寒食節始有中使開門斫竹之事。 茲請先考唐代杏花桃花開放之時間, 兼及地域並其他相關之問

唐撫言叁「慈恩寺題名遊賞賦詠雜紀」條云:

一杏園花發詩。

題,

以資說明

進士題名自神龍之後, 過關宴後, 率皆期集於慈恩塔下題名,故貞元中劉太眞侍郎試慈思寺

寅恪案:登科記考列劉氏於貞元四年主禮部試, 今檢文苑英華壹捌捌省試玖載李君何, 周弘亮

陳翥曲江亭望慈恩寺杏園花發詩云:

陳翥,

曹著四人應試是科之原作。

曲池晴望好,近接梵王家。 紅泉落影斜。 園中春尚早,亭上路非賒。芳景堪遊處,其如惜物華。 十畝開金地,千林發杏花。 映雲猶誤雪, 照日欲成霞。 (寅恪案:沈亞之 紫陌傳香

既經徐松考訂, 沈下賢集壹並全唐詩第捌函沈亞之及全唐詩第柒函陳翥俱收此首。 可以無疑。 沈下賢集集首元祐丙寅之序稱沈氏「元和十年登進士第」, 夫陳翥爲貞元四年進士 唐才子

收於沈集者,全唐詩不加詳考, 傳陸沈亞之傳同, 故全唐詩及沈集所載此詩, 以致陳翥、 沈亞之兩人詩内均列此詩, 實非出自下賢之手。 蓋宋人編唐人專集時, 可謂疏舛矣。)

略言及,茲爲與杏花開放時間比較, 陳氏「園中春尙早」句, 可證杏花開放在早春大約相當於二月之時間。至於桃花開放之時間, 故再詳引人所習知之人面桃花故事於下。

孟棨本事詩情感類「博陵崔護」條略云:

如故, 設牀命坐, 博陵崔護舉進士下第。 因題詩於左扉曰:「去年今日此門中, 獨倚小桃斜柯佇立。 清明日獨遊都城南, 崔以言挑之, 得居人莊, 人面桃花相映紅。 不對, 崔辭去。 扣門久之, 來歲清明日, 人面秪今何處去, 有女子自門隟 逕往尋之。 深窺之, 桃花依舊 門牆 開門

花開放約在二月, 然則桃花之開放約在距淸明節先後不遠之時間, 芳篇論裴度得見牡丹開放始卒之例。若閏月在此節氣之後, 或在二月,或在三月。若此年有閏月而閏月在此節氣之前, 桃花開放約在三月, 其與此通例不合者, 可以無疑。 則表面視之花開較遲。 蓋別有其他特別原因, 則表面視之花開較早, 吾國昔時本用陰曆, 清明節之排列, 亦可爲詳究解 通常言之, 杏 如第伍章牡丹

其一特別之原因爲地域性之關係。地域有高低及南北二種。 故花開較平地爲遲。白氏文集肆叁遊大林寺序略云: 凡地勢較高如山頂或高原空氣較平地

釋也。

余與河南元集虚[等]凡十七人, 梨桃始華, 大林窮遠, 澗草猶短, 人迹罕到, 人物風候與平地聚落不同 其僧皆海東人, 自遺愛草堂歷東西二林, 山高地深, 初到怳然若別造一世界者, 時節絕晚。于時孟夏日, 抵化城, 憩峰頂, 登香鑪峯, 因 如正二月 口口 1號絕 宿大

稿

句云 :「人間 四月芳菲盡, 山寺桃花始盛開。 長恨春歸無覓處, 不知轉入此中來。 時元和十

年四月九日樂天序。 則時節晚。 又考元和十二年有閏五

徒食用, 寅恪案:樂天言大林寺「山高地深, 閏月又在節氣之後, 如惠遠、 此乃躬耕傳法及講學適宜之條件。 陶潛、白居易、朱熹諸名人,皆居住山南,蓋以交通便利, 則覺時節較晚, 故大林寺之桃花晚開, 時節絕晚。 至近歲西人闢山北牯嶺之地, 」足證地勢高, 實兼具二因素。 藉作避暑之用, 可以供給家屬朋友及生 廬山自六朝以 斯前

其地, 遂有「更有牆頭千葉桃, 連昌宮詩,有「高甍巨桷壓山原」之句, 所未嘗夢見者, 但亦應知此宮不在平地而在高原, 而大林寺遺址復於牯嶺發現, 風動落花紅簸簸。」二句。 則連昌宮建築於山上平坦之地。 所以三月清明前後, 尤可與樂天此文相印證也。 桃花獨可留滯於盛開將落之狀態。 微之作此詩時, 前引韓昌黎和李正封過 雖未身到

至若地域南北之關係, 則北方較寒, 故花開較遲, 南方較暖, 故花開較早, 此爲一 般通例,

如陸游劍南詩稿

壹柒臨安春雨初霽云:

晴 味年來 窗細乳戲分茶。 薄似紗, 素衣莫起風塵嘆, 誰令騎馬客京華。 猶及清明可到家。 小樓 夜聽春 雨, 深巷明朝賣杏花。 矮紙斜行開作草,

此詩世人習誦 無須贅釋。 所可注意者, 第柒捌二句明言客杭州時猶在淸明之前, 而杏花已開放

可賣也。 惟曹寅楝亭十二種後村千家詩三節候門載杜牧淸明七絕一首云:

牧之此清明七絕一首,或在此時所作耶?然無佐證。又馮應榴蘇文忠公詩合注壹捌載送蜀人張師 史分司東都(見新唐書壹柒肆杜佑傳附牧傳,並參孟棨本事詩高逸類杜舍人牧弱冠成名條。)然則 此詩收於明代千家詩節本,乃三家村課蒙之敎科書, 但此詩有「清明時節雨紛紛」及「牧童遙指杏花村」二句,似是在北方所作。 殊爲可疑。 時節雨紛紛, 今馮集梧杜樊川詩注, 路上行人欲斷魂。 旣不載此首, 借問酒家何處有 其補遺亦不收入, 馮氏未加說明, 數百年來實唐詩最流行之一首。 牧童遙指杏花村。 考杜牧曾以監察御 若究其出 不敢臆

忘歸不覺鬢毛斑, 好事鄉人尚往還。 斷嶺不遮西望眼, 送君直過楚王山。 厚赴殿試二首云:

雲龍山下試春衣,

放鶴亭前送落暉。

一色杏花三十里,新郎君去馬如飛

絕句與上引放翁七律一首相比較, 明是在徐州任內, 移知湖州道中作。 寅恪案:馮氏於此卷卷首古今體詩四十七首下引査注云:「元豐二年己未正月在徐州任,三月後 一特別之原因爲某 」此題第壹首之楚王山,並第貳首之雲龍山及放鶴亭皆在徐州。 元豐二年三月之前所作也。宋代汴梁殿試亦在二月杏花開放時節。 一年氣候暫時改變之關係。 則地域之南北與杏花開放之早晚關係, 白氏文集壹春雪詩略云: 可以明瞭矣。 足證此二絕句 取東坡此一

元和歲在卯, 六年春二月。 月晦寒食天, 天陰夜飛雪。 上林草盡沒, 曲江冰復結。 紅乾杏花

綠凍楊枝折

舊唐書壹肆憲宗紀上略云:

元和六年二月丙寅朔。 三月乙未朔。 閏十二月辛卯朔。

全唐詩第伍函韓愈伍辛卯年雪五古略云:

元和六年春,寒氣不肯歸。 河南二月末,雪花一尺圍。 生平未曾見, 何暇議是非。

是歲有閨十二月,

在清明

寅恪案:元和六年辛卯二月小盡, 即樂天所謂時節較晚之年,此年東西二都皆有大雪,杏花凍死,故可目此年之氣候與其他 其次日爲三月乙未朔, 適值清明節。

節後,

般時節不同也。

翠輦西歸七十春,

又檢寶氏聯珠集叁寶庠陪留守韓僕射巡內至上陽宮感興二首云:

玉堂珠綴儼埃塵。 武皇弓劍埋何處, 泣問上陽宮裏人。

寅恪案,舊唐書壹伍伍竇羣傳附庠傳云: 愁雲漠漠草離離, 太乙句陳處處疑。 薄暮毀垣春雨裏, 殘花猶發萬年枝。

吏部侍郎韓皋出鎮武昌, 又爲宣歙副使, 除奉天令, 辟爲推官。 登州刺史, 皋移鎮浙西, 東都留守判官。 奏庠爲節度副使殿中侍御史, 遷澤州刺

同書壹肆憲宗紀上略云:

(元和五年十月)以户部尚書韓皋爲東都留守判東都尚書省事。 [元和八年六月]以東都留守韓

句之「殘花」,當是杏花而非桃花。桃花雖通常在淸明前後開放,此年之氣候寒冷與往年不同, 故疑胄卿以東都留守判官之資格陪仲文巡內至上陽宮之時間,乃元和六年二月念九日寒食節。依 以開放時間較遲, 不久送來者, 證。蓋元和四年距元和六年時間甚近,實氏旣於元和六年尙得見上陽宮內之宮人,則此宮人當是 者可與上引元微之元和四年所作上陽白髮人篇中「近年又送數人來,自言興慶南宮至」二句互相印 元二十四年後,即不再幸洛陽,此點寶氏及其他唐代文人固不詳悉計算也。若揣測不誤,則韓 竇氏絕句第壹首「翠輦西歸七十春」句,蓋從天寶元年下推至元和六年適爲七十載。其實玄宗自開 二氏之巡視上陽宮亦循唐代離宮於每年寒食節遣中使斫竹之通例耳。(寶氏絕句第壹首第肆句或 皋檢校吏部尚書兼許州刺史充忠武軍節度使。 與微之詩「近年」之語,亦甚適合也。餘詳上論微之此詩節。) 寶氏絕句第貳首第肆 此爲變例,即樂天詩所謂「紅乾杏花死」者,宜胄卿以殘花目之。復據全唐詩第 是

曉日清明天, 夜來嵩少雨。 千門尚煙火,九陌無塵土。酒綠河橋春, 漏間宮殿午。遊人戀芳 陸函李正封洛陽清明雨霽詩云:

半犯嚴城鼓

李氏此詩爲何年所作, 雖不能考, 但唐代洛陽寒食節時亦有春雨連綿之氣候也。

其三特別之原因爲人事忽有變動, 杏桃二花開放之時間表面視之, 似與常年不同, 按諸實際, 幷

無改易也。

太平廣記壹伍肆李顧言條引溫畬續定命錄略云:

月暮,登科又校一年遲。」明年, 宗皇帝晏駕(寅恪案:舊唐書壹叁德宗紀下云:「貞元二十年正月癸巳帝崩。」),果三月下旬 唐監察御史李顧言,貞元末應進士舉。見〔南〕省東南北街中有一人徐吟詩曰:「放牓只應三 京師自冬雨雪甚, 畿内不稔, 停舉。貞元二十一年春, 德

放進士牓。

權載之文集玖和九華觀見懷貢院八韻略云:

虚,幽緘發清機。支頭一吟想,恨不雙翻飛。 上巳好風景, 仙家足芳菲。地殊蘭亭會,人似山陰歸。 滯茲文墨職, 坐與琴觴建。 麗曲滌煩

同書同卷上巳日貢院考雜文不遂赴九華觀祓禊之會以二絕句申贈云:

三日韶光處處新,

九華仙洞七香輪。

老夫留滯何由往,

珉玉相和正遠身。 (原注云,

時

以沽

美玉爲詩題。)襖飲尋春興有餘,深情婉婉見雙魚。 同心齊體如身到, 臨水煩君便祓除

不遂之語可互相印證。考載之不以進士出身,但三次主禮部試, 寅恪案:溫氏謂貞元二十一年春,德宗晏駕,三月下旬放進士榜,與權氏詩題上巳日貢院考雜文 其以沽美玉爲試題, 則在貞元二

開放之際,而與常年不同,斯實由此年有人事變動之故所致也。 之,則知唐代通常放進士牓時正値杏花開放。至若貞元二十一年放進士牓時在三月下旬,乃桃花 魚」句即指其夫人所寄之書並詩也。茲綜合上引唐摭言文苑英華續定命錄,權載之文集等材料論 氏四十八歲時之作品, 十一年。(見徐松登科記考壹伍)檢舊唐書壹肆捌權德輿傳載其卒於元和十三年, 前一題爲答其夫人寄懷之作,故第貳題以「申贈」爲言, 且「深情婉婉見雙 是前列兩題乃權

(十一) 一百零三頁第十行後加

「十」乃「九」之訛。若所揣測者不誤,則北夢瑣言伍中書蕃人事條云: 九九之詩爲例證,茲復檢才調集伍全唐詩第壹伍函元稹貳柒有曹十九舞綠鈿一詩, 關於鶯鶯氏族問題,下附讀鶯鶯傳已略論及,謂唐代女子,頗有以「九九」爲名者, 引才調集伍代 頗疑曹十九之

唐自大中至咸通,白中令入拜相,次畢相誠,曹相確, 蓋以畢、 羅相劭, 權使相也,

據是, 此女姓曹名九九, 殆亦出於中亞種族。 考吾國自漢以來之史籍所載述, 中亞胡人善於釀

如晉書壹貳貳呂光傳略云:

曰, 可以歸矣,

近日中書盡是蕃人。

白、

曹、

羅爲蕃姓也。

繼升巖廊。

敗,士卒淪沒酒藏者相繼矣。 (呂)光入其城(龜茲),大饗將士。胡人奢侈,厚於養生,家有蒲桃酒,或至千斛,經十年不

又胡姬姝麗,如玉臺新詠壹辛延年羽林郞詩云:

五, 者子,是。後世選本改姝爲奴,非是。)姓馮名子都。 昔有霍家姝, 春日獨當鑪。 (丁福保編全漢三國晉南北朝詩注云:古時士之美者曰姝, 長裾連理帶, 廣袖合歡襦。 頭上藍田玉, 依倚將軍勢, 耳後大秦珠。 調笑酒家胡。 如干旄之詩稱彼姝 兩鬢何窕窕, 胡姬年十

良所無。

揣測者不誤,則水經注肆河水又南過蒲坂縣西條略云: 然則自漢至唐,吾國產名酒之地多是中亞胡族聚居區域。 乃產郎官淸名酒之地。此女之又善彈琵琶,故疑此女當是辛延年詩所謂「酒家胡」之類。 第貳章琵琶引論琵琶女所居之長安蝦蟆 若所

河東]郡多流雜, 謂之徙民。 民有姓劉名墮者, 宿擅工釀, 採挹河流, 醞成芳酎, 排於桑落

庾子山集伍就蒲州刺史乞酒詩云:

之辰,故酒得其名矣。

蒲城桑葉落,灞岸菊花秋。願持河朔飲,分勸東陵侯。

及國史補下敍酒名著者條略云:

酒[云名品]則有河東之乾和蒲萄。

則鶯鶯所居之蒲州, 唐代以前已是中亞胡族聚居之地, 可以證明。 中亞胡族, 膚色白晢, 特異於

可證。 今觀才調集伍元稹雜思六首之六「尋常百種花齊發,偏摘梨花與白人」, 則鶯鶯之膚色白皙 由是而言,就鶯鶯所居之地域及姓名並善音樂等條件觀之,似有辛延年詩所謂「酒家胡」之

茲姑妄言之,讀者儻亦姑妄聽之耶?

長恨歌中「盡日君王看不足」之霓裳羽衣舞,即本自中亞流行之婆羅門舞。又「梨花一枝春帶雨」之 或謂楊貴妃原出隋代河中觀王雄之族,觀王家庭妾媵中殊有就地娶中亞酒家胡之可能。 「梨花」即「偏摘梨花與白人」之「梨花」。此歌兩句皆有著落,不同泛語。斯說未有確據,不得視爲 果爾, 則

(一二) 一百一二百萬一丁多口

聊記於此,以資談助云耳。

(十二) 一百十七頁第一行後加:

抑更有可論者,近人據新唐書貳百叁崔元翰傳略云:

以字行,舉進士,博學宏辭,

賢良方正,

皆異等。

義成李勉表爲幕府,

崔元翰名鵬,

表爲太原掌書記, 召拜禮部員外郎,竇參秉政,引知制誥,罷爲比部郎中, 時已七十餘

卒

鶯鶯即崔元翰女。 檢宋子京作新唐書崔元翰傳, 翰文集序。 王性之據崔氏譜云永寧尉鵬, (參姚鉉唐文粹玖貳及全唐文肆捌玖。)其文云: 亦娶鄭濟女。 則鶯鶯者乃崔鵬女,於微之爲中表。應推得一 實採用權載之文集叁叁唐尙書比部郎中博陵崔元 結論謂

諫,凡三登甲科,名動天下。 協律郎, 以經明歷衛州汲縣尉, 大理 工評事, 錫以命服登朝, 初自典校秘書, 號州湖城主簿。 爲太常博士, 連辟汧公北平王司徒府管奏記之職, 親沒,遂不復仕。 禮部員外郎。 [元翰]泊博學宏詞。 貞元七年春, 轉 職 歷太常寺 方員外 直言 極

郎

知制誥。

八年冬,

罷爲比部郎中。

十一年夏,

寢疾不起

初名鵬,而以字行者,乃特避其族人中之同名耳。又新唐書柒貳下宰相世系表有淸河崔鵬之名: 夫權氏崔元翰集序載元翰父良佐及元翰本人所歷官職極爲詳盡。崔氏譜謂崔鵬爲永寧尉, 關係。由是言之,新唐書崔元翰傳採用權德輿崔元翰文集序, 今全唐文捌佰肆有崔鵬之文一篇, 所載元翰父及元翰本身所歷官職皆不符合。故鶯鶯之非良佐或元翰之女可知。至元翰之所以改其 但此崔鵬爲懿宗咸通時人, 實與王性之所謂永寧尉崔鵬者絕無 不但可以證明鶯鶯非元翰之女, 與權

二百三十頁第一行後加

可推知崔氏譜之永寧尉崔鵬實與鶯鶯絕無關涉也。

癸卯春胡守爲君檢出下列資料見告。

唐會要壹玖公主廟門云:

貞元十五年七月十五 擇地置廟。 祔祭之日, 日追册故唐安公主爲韓國貞穆公主。 官給牲牢禮物, 太常博士一人贊相。 故義章公主爲鄭 四時仲月則子孫自備其 國莊 穆公主。

後韶

七年三月二十九日追祔神主於廟。莊穆貞穆二主,德宗皇帝愛女,悼念甚深,特爲立廟,權 禮。(貞穆廟在靖安里。貞元十七年十一月十四日追祔神主於廟。 莊穆廟在嘉會里。貞元十

宋敏求長安志玖靖安坊條(徐松唐兩京城坊考貳靖安坊條同。)云:

韓國正穆公主廟。(禮閣新儀曰,德宗女自唐安公主追册,貞元十七年祔廟。

同書拾嘉會坊條(唐兩京城坊考肆嘉會坊條同。)云:

鄭國莊穆公主廟。(禮閣新儀曰,德宗女曰義章公主追册 貞元十七年祔廟。

新唐書伍捌藝文志儀注類云:

韋公肅禮閣新儀二十卷。(元和人。)

「閣」,實指「禮閣新儀」之「閣」,乃以宅爲寺,而與舊唐書李吉甫傳所言義陽義章二公主於墓所起 寅恪案:新唐書貳佰儒林傳下韋公肅傳云:「元和初,爲太常博士兼脩譔。 」然則「兩朱閣」之

祠堂者,有所不同也。

作者附記

刊,特附識於此,藉表感謝之意。 此稿得以寫成實賴汪籛王永興程曦三君之助。又初印本脫誤頗多,承黃萱先生相助,

得以補正重

### 陳寅恪集後記

集自然是父母, 家最好的箱子裝載, 我們從小就知道全家最寶貴的東西是父親的文稿。 也是我們姐妹最大心願。 家人呼之為「文稿箱」。 避日軍空襲時, 從抗戰逃難直至「文化大革命」, 首先要帶的就是「文稿箱」。 父親文稿都是用全 出版父親文

在, 道變換, 父親一生坎坷, 嘗侮食自矜, 則為我們姐妹辛勞的最高報償 病殘齊至, 曲學阿世」。 抗日烽火中, 始終未曾間斷學術創作。而父親為學一貫堅持「獨立之精神, 如今父親全集出版, 顛沛流離, 生活窘迫,雙目失明,暮年骨折卧床, 學界儻能於研究父親著述時, 更經痛苦;然而無論世 更知父親此種精神之所 自由之思想」,

中竟被洗劫一空, 棺尚遠。」 九六二年胡喬木同志來訪, 由上海古籍出版社刊行, 送交蔣天樞先生。 終未能見到陳集出版。 父親聽了很高興, 片紙不留。 蔣先生沒有辜員父親囑託, 這只是父親文字的一部分。一九八八年六月,蔣天樞先生不幸突然病逝 父親生前已將出版文稿重任託付於弟子蔣天樞先生,不料文稿在「文革」 以為有望見到文集面世。 談及文稿,父親直言:「蓋棺有期, 「文革」結束後, 我們姐妹將歷經曲折於一九七八年五月追回的父親文 付出 豈知「文化大革命」 開始, 艱巨勞動, 出版無日。」胡答:「出版有期, 於一九八〇年主持出版了陳寅恪文 父母備受摧殘, 蒼涼 蓋

 $\equiv$ 課

於是 我 們 姐 妹 繼 續 收 集 整 理父親 的文字。

代為出 現在 夢未定稿據一九八七年六月收回的殘稿作了校補外, 筆記等)。 集(高僧傳之部), (詩存), 出 版文集過程中已親自審定文集編 元白詩箋證稿, 版 一九八〇年出版的寒柳堂集, 的 陳 書信集, 寅恪集, 並講義及雜稿( 讀書札記 柳如是別傳諸集, 是在上海古籍出 兩晉南 集(舊新唐書之部)、 版 目及有關 北朝 金明館 此次出版時作了校對, 社 所刊 史講義、 叢稿 事宜, 印之陳 初編 其餘 \_ 唐史講義、 故仍按父親原意進行。 寅恪文集基 集(史記 編排均不作變動, 編 除寒柳堂集中詩存併入 備課 隋唐制 漢書、 礎上 筆 進 度淵 記、 晉書、 行 因父親生前 的, 論文、 源 而此次刊行全 略論 唐 增 加 人小說 講 稿 T 託付 詩 話 陳寅恪 集, 唐 等之部 集所增 蔣 評 天 政 寒 語 詩 治 樞 柳 集(附 補之 史述 先 堂 聽

晚年整理 利文長老尼詩偈集中文舊譯並補 而未成之稿」, 父親的文稿墨跡命運亦如其人, 九八七年六月兩次收回詩文稿 有的在運輸途中被盜 就緒 準 如蒙古源流注、 備出 版的文稿, 世說新語注、 或存放親友處丢失, 現下落不明, 頻遭劫難, 譯及解釋其詩等等(見一九四二年九月廿三日父親致劉 於「文革」中全被查抄, 但仍未全部歸還。 面 五代史記注、 世 木 難。 抗戰時已遺失了多箱撰有眉識的書籍, 即便抗戰勝利後在清華大學授課 「文革」過去撥亂反正後, 佛教經典之存於梵文者與藏譯及中譯合校、 難覓其蹤。 這些皆為父親 雖於一 永濟信)。而 九七八年五 廿年來所擬著述 研究之講 其中有 的 月及 父親

則是期望從不同角度反映父親的學

術

生

涯

父親的這些文字,

作為祖國文化遺產,

獻給後世相知

目前所收集之最全者而拟名「陳寅恪全集」,轉又考慮到其實並不能「全」,故稱 資料等, 亦未曾得見。總之, 散落在各處的文字, 迄今尚有部分未能獲見。這次刊印父親文集, 「陳寅恪集」。 因其為

述。 枚舉, 版陳集為中外學者深望, 歷經十年的艱難曲折, 生的夫人錢澄女士, 及參與 於上海古籍出版社主持出版了陳寅恪文集, 外學者弟子, 此次父親遺作付梓, 前稍留 而今陳集業已付印, 難以 、輯錄並 痕跡以自作紀念」, 一一敬列, 我們姐妹的友人以及相識或不相識的各界人士支持幫助。 閱讀書札記等多位先生亦於此 三聯書店非常重視,投入很大力量以保證質量; 華忱之先生等將珍藏了多年 陳寅恪集終於面世,當此之時,我們百感交集, 在此謹向一切參與、 我們希望以此集告慰逝去的父母, 此書之所以遲至今日方能面世, 他於 賸有文章供笑駡」之時, 推動、幫助、 黄萱先生協助蔣先生做了不少工作。 併致謝。 「文革」 劫後幸存的父親書函贈送, 其間有許多我們始料未及的困擾, 支持出版陳寅恪集的人士表示衷心感謝 在我們收集父母詩文書信資料過 父親自謂 尚望 「文字結習與生俱來, 真不知何以表述其經過於萬 同時我們得到父母親朋故舊, 後世相知儻破顏 首先感謝蔣天樞先生一九八〇年 校補寒柳堂記夢未定稿 各種支持幫助不勝 0 程中, 我們 必欲於未死之 於此 更希望將 無需 劉 節先 海内 出

陳 美延 謹述 一九九九年七月三日父親誕生一百零九週年

#### 陳 寅 恪集再版説明

斯年、 再版 手寫本唐代政治史略稿, 聯 重 書 店 致胡適、 印的機會我們做了少量校勘修訂工作, 出 版的陳寅恪集十三 致聞宥少數函件的時間認定, 個别詞句作了變動; 種十四册, 自二〇〇一年一月至二〇〇二年五月面 如 編排順序也相應有所變動。 略增改書信集、 糾正個别誤字、圖片説明; 詩集中的某些注釋; 但未及增 世 唐代政治史述 補近年來新 後, 更正書信 時 逾 八 發現 集中 載。 論 稿 的 致傅 現藉 對 照

些陳寅恪信札、 詩作, 亦屬憾事

在此,

仍一如既往得到大家的支持和幫助 特向熱心提供資料及指出陳寅恪集中訛誤的讀者朋友, 致以衷心謝忱! 並希望此次再版重印後

陳 美流 延求 二〇〇九年四月

